




DE
MATRIMONIO
CHRISTIANO



DE
MATRIMONIO
CHRISTIANO

LIBRI TRES

AUCTORE IO. PERRONE E SOC. IESU

IN COLL. ROM. GEN. STUDIORUM PRAEFECTO.

TOMUS TERTIUS



ROMAE

TYPIS S. CONGREGATIONIS DE PROP. FIDE

—
MDCCCLVIII.

DE
MATRIMONIO CHRISTIANO

LIBER TERTIUS

DE
UNITATE AC INDISSOLUBILITATE MATRIMONII CHRISTIANI.

STATUS QUAESTIONIS ET PARTITIO.

Cum duae vulgo recenseantur coniugii christiani proprietates, unitas videlicet, atque indissolubilitas, et earum unaquaeque graves complectatur quaestiones, singillatim expendendae sunt. Quapropter in duas sectiones hunc librum distinguemus ad absolvendum quod nobis proposuimus argumentum; quarum altera erit de unitate, altera de indissolubilitate.

Licet vero de utraque hac proprietate in tractatu de matrimonio egerimus, tamen quod nonnisi breviter strictimque, prout Praelectionum indoles postulat, ibi fecimus, fusius pleniusque hic pro rei gravitate pertractare constituimus, ne quid deesse ad uberiores rei cognitionem videatur.

SECTIO PRIMA

DE MATRIMONII CHRISTIANI UNITATE

Matrimonii unitas in unius cum una individuae societatis coniunctione consistit, eaque sub duplici potest ratione spectari; aut quatenus individuum eiusmodi societatis consuetudinem servat cum unico coniuge, quin novas

ineat altero defuncto coniuge nuptias, aut quatenus alterutro vita functo eandem cum altero societatem instaurat. Sub primo respectu habetur monogamia perfecta, sub altero monogamia imperfecta.

Huic unitati tum perfectae, tum etiam imperfectae adversatur polygamia simultanea seu uxorum pluralitas uno eodemque tempore, nec non polyandria, quae habetur, cum mulier pluribus simul adhaeret viris. Unitas imperfecta quae exurgit ex iteratione coniugii alterutro coniuge defuncto, vulgo polygamiae aut polyandriae successivae nomine designari consuevit. Quo fit, ut passim theologi bifariam distinguant polygamiam et polyandriam, in simultaneam videlicet et in successivam.

Polygamiae vox usurpari solet ad significandam plurium uxorum cum uno viro coniunctionem. At proprie polygamia vox est generica, quae multipliciter significat nuptiarum, cuius veluti species sunt polyandria et polygynia. Duplex itaque est polygamiae significatio; altera generica, altera vero specifica quae aequipollet polygyniae. Nos a communi loquendi ratione nullatenus recedemus.

Ut itaque quidquid de unitate christiani matrimonii dicendum est complectamur, in duo capita primam hanc sectionem partiemur, ac prius de simultanea, deinde de successiva polygamia disputabimus.

Quod ad simultaneam attinet polygamiam, vix ulla occurrit quaestio si sermo sit de pluralitate virorum, seu de polyandria: breviter itaque eius foeditatem, solo etiam inspecto naturae iure, ostendemus. Si vero sermo sit de pluralitate uxorum seu de polygynia, quae ut diximus polygamia appellari solet, multiplex erit quaestio expendenda: num scilicet ea primariae naturae legi ita refragetur, ut sit intrinsece mala ac semper illicita; an vero solum quadantenus naturae legi adversetur, illique potius

minus conformis quam ab ea prorsus difformis dicenda sit; an ea divino iure etiam ante Evangelium vetita fuerit, adeo ut sine divina dispensatione frequentari licite numquam potuerit; an denique in lege Evangelica sit omnino abolita, adeo ut unitas censi debeat prima christiani matrimonii proprietas.

Quod vero spectat ad polygamiam successivam, ea quamvis unitati christiani matrimonii non adversetur, eius tamen perfectioni minus congruit. Hinc ecclesia secundas ulterioresque nuptias semper quidem habuit ut validas atque legitimas, at simul erga eas disciplinam plus minusve severam adhibuit: nostri itaque muneris erit ecclesiae hac de re doctrinam disciplinamque illustrare.

Ita porro si pro viribus quaestionibus satisfecerimus, quas de polygamia simultanea ac successiva indicavimus, eo ipso prima christiani matrimonii proprietas, nempe unitas, illustrabitur et vindicabitur.

CAPUT I.

DE POLYGAMIA SIMULTANEA.

ARTICULUS I.

Non solum christiani Matrimonii unitati, sed ipsi Matrimonii notioni, spectato etiam solo iure naturae, directe opponitur polyandria et uxorum communio.

Vix olim de polyandria a theologis disserebatur: at plerumque penes omnes uti ratum fixumque assumebatur, eam abominandam turpitudinem praeserere. Attamen nunc cogimur ipsam adoriri postquam pessimi homines doctrinam de polyandria foede invexerunt. Sansimoniani proclamarunt veluti principium fundamentale *communitatem foeminarum*, ac *foeminae emancipationem*, *foeminam liberam* (1). Fourie-

(1) Ita Louis Blanc in *Histoire de dix ans*. Paris 1842. tom. II. pag. 269. ubi scribit: «Les Saints-simoniens ébranlaient dans le *Globe* toutes les vieilles bases

ristae ac Phalansteristae commendarunt communitatem, cuius membra promiscue degerent in eadem domo, viverentque in communi sub unica *capacitatis lege, harmoniarum et affectionum* (2); et ita porro docere non sunt veriti Icariani, atque communistae caeteri, quorum pestis nunc longe lateque societatem depopulatur.

Isti a suis cineribus exsuscitarunt quidquid foedi et obscœni antiqui docuere philosophi; Plato praesertim, divinus nempe ille Plato, qui in sua chimaerica republica communitatem pariter foeminarum constituerat (3); quidquid cynismus ethnicus, gnosticismus orientalis effutierat; quidquid demum latrocinium albigense media aetate, atque anabaptistae impuri excogitarunt.

Quamvis porro nemo istorum aperte, conceptisque verbis polyandriae theorice patrocinium susceperit, practice tamen eam omnes admittunt ac profitentur, eamque propensionibus humanis valde congruentem adstruunt sub *communismi foeminei* denominatione, ita ut possit foemina unaquaeque tot viris se coniungere, quot ipsi bonum visum fuerit.

Ex protestantibus Thomasius polyandriam *aliquo modo*

de l'ordre social... que le mariage, législation de l'adultère fit place à la souveraineté des penchants et à l'émancipation du plaisir.» Enfantin unus ex praecipuis huius sectae propagatoribus iam an. 1831. promovebat *rehabilitationem carnis per foeminam liberam*. Id ipsum postea praestitit Proudhon an. 1846. Cf. op. *Le communisme et ses causes*. Avignon 1848. prém. part. pag. 19 seqq.

(2) Ita Victor Considérant: *Exposition du système phalanstérien de Fourier* pag. 72. et pag. 98. « La famille pour eux, inquit, n'est qu'une simple réunion de reproduction; et le premier élément social, c'est le phalanstère ou la commune; 1200 personnes au moins habitant dans une même maison et y vivant en commun *sans concurrence* sous la seule loi de la capacité, des harmonies et des attraites.... Ils n'ont (les hommes) que l'embaras du choix.» Et in op. *Théorie des quatre mouvements* an. 1840. pag. 146. « Une femme, scribit, peut avoir à la fois 1. un epoux dont elle a deux enfants; 2. un géniteur, dont elle n'a qu'un enfant; 3. un favori, qui a vécu avec elle et qui a conservé le titre; plus de simples possesseurs, qui ne sont rien devant la loi.»

(3) Lib. V. *De republica* cuius verba in primo libro descripsimus.

illicitam prius pronunciavit (4); postea vero eam *ex regulis decori et honesti* reiicit (5). Ast ut optime observat Schwartz reiicere potius *ex regulis iusti* debuisset (6).

Iam vero polyandriam non minus divino iuri, quam naturali ac sociali adversari vix probatione indigere videtur.

Etenim quod attinet ad ius divinum exinde constat quod nusquam ac numquam in sacris litteris polyandriae exemplum ullum afferatur, licet habeantur, ut videbimus, exempla polygamiae. Quinimo Apostolus absolute pronunciat: «Mulier, vivente viro, vocabitur adultera, si fuerit cum alio viro, (7).» Excludit proinde quamvis cum pluribus viris mulieris legitimam coniunctionem.

De iure naturali non est pariter quod multa dicamus, cum pateat polyandriam repugnare primario coniugii fini. Siquidem finis primarius coniugii est procreatio proles, prout omnes fere admittunt (8), eiusque recta institutio non minus moralis quam physica. Huic autem fini aperte opponitur polyandria; cum per plurium virorum congressum hebetetur mulieris foecunditas (9), et incerta reddatur proles, adeoque incerta etiam patris ad eam educandam obligatio. Cum igitur fini primario ac essentiali matrimonii repugnet polyandria, nullum superesse dubium potest eam naturali iuri penitus adversari.

(4) *Iurisprud. divin.* lib. III. c. 2. n. 206 seqq. Num. vero 211. haec habet: «Polyviriam intimum gradum licentiae obtinere, et prohibitioni propiorem esse quam praecepto.» Quasi vero non esset absolute, ac natura sua prohibita.

(5) In *Fundament. iuris natur.* lib. III. c. 2. n. 36.

(6) *Instit. iur. publ. univers. nat. et gentium.* Venet. 1760. p. II. tit. I. *De statu hominis adventitio.* Resp. IV. pag. 13.

(7) Rom. VII. 3.

(8) Dixi *fere omnes* admittunt; nam non defuerunt, qui his ferme annis id inficiati sint autumantes primarium coniugii finem in mutua constituendum esse amicitia et societate. Attamen communis theologorum sententia, s. Thoma praecedente, constanter fuit finem praecipuum matrimonii esse generis humani, adeoque proles, propagationem et procreationem.

(9) Cf. Debreyne *Essai sur la théologie morale.* Paris 1843. III. part. §. 3. ubi inter cetera scribit: «On compte en général, dit Marc, deuxcents femmes prostituées ne produisent, que deux ou trois enfants par an.» p. 221.

Sed repugnat etiam polyandria fini matrimonii secundario, cuiusmodi est remedium concupiscentiae. Etenim non tam remedium concupiscentiae, quam fomentum ac irritamentum est mulier pluribus simul viris coniuncta, cum non valeat iis omnibus debitum reddere, ut ex ipsis physiologiae legibus depraehenditur, ex qua novimus id in valetudinis detrimentum cedere (10). Insuper imperii maritalis natura repellit virorum multipliciter. In una enim eademque uxore divisum foret eiusmodi imperium, quod sibi viri conditio vindicat, utpote firmiori prae foemina ingenio, iudicio, ac robore praecellentis, atque ad regendum ordinati; per polyandriam fieret, ut una eademque mulier plures simul dominos haberet, quorum nullus eam in solidum possideret.

Exinde factum est, ut apud nullas gentes, ne dum excultas, sed neque apud barbaras atque sylvestres umquam presse sumpta polyandria obtinuerit. Dixi *presse sumpta*; nec enim inficiamur fieri potuisse, aut etiam reapse aliquando contigisse, ut unica mulier pluribus simul fuerit addicta viris; ast eiusmodi congressus matrimonii nomine cohonestati non sunt, sed effraeni libidini potius atque *corruptelae apertae* tributi (11).

(10) Cf. Debreyne loc. cit.

(11) Prout adnotat Puffendorfius lib. VI. *De iur. nat. et gent. c. I. §. 15.* qui etsi plurium populorum exempla proferat, tamen fatetur *apertam corruptelam* fuisse, adiiciens: « Enim vero, quin haec omnia iuri naturali repugnent, dubitare fas non est.» Quinimo Thomasius op. cit. lib. III. c. 2. n. 36. scripsit: « Dubitandum esse homini, genuinis verae historiae fundamentis imbuto, » utrum extiterit mos de quo disserimus apud populos a Puffendorffio commemoratos. Attameu vix dubitari posse videtur apud nonnullos turpem eiusmodi obtinuisse corruptelam, ut apud Agathyrros, de quibus loquitur Herodotus *Histor. lib. IV. n. 104.* adiiciens huius moris causas fuisse, ut veluti consanguinei omnes sine odio et livore vitam degerent. Idem refert de Nasamonis, ac de Massagetis cap. 172. Sic eiusmodi polyandriam in Britannia olim obtinuisse testatur Iulius Caesar lib. IV. c. 10. *De bello gallico* scribens: « Uxores habent deni duodenique inter se communes.» Bardesanes apud Eusebium *Praeparat. evangel. lib. VI. c. 10.* idem refert. De Malabaribus et Ceylanensibus ut una uxor pluribus (ad sex usque) nubat fratribus narratur; uti et de Calecutianis refert Ezovius ad an. chr. 1487. n. XI. alique. Cf. I. A. Fabricium in *Bibliographia antiquar. c. XX. n. XI.*

Immo vero et illud animadvertimus, pluralitatem virorum quoad unam eandemque uxorem, fuisse veluti indirectum alterius sive doctrinae sive praxeos perversae consectorium de communitate uxorum, quam Stoici cum Platone effutierunt, non autem principium directum ac si polyandria per se probaretur. Eiusmodi vero uxorum communionem ideo illi sapientium propriam existimarunt, quod omnes patrum instar aequa charitate et amore sobolem prosequi deberent in chimaerica quam excogitarunt republica (12). Hac etiam de causa Spartani, Licurgo et

(12) Ita quidem interlocutores apud Platonem in cit. loc. De republica. Quandoquidem autem litteratorum plerique non desinunt Platonem eiusque confictam rempublicam extollere et admirari, non abs re erit iudicium proferre quod de eodem tulit D. Jafferson in suis *Mélanges politiques, et philosophiques* tom. II. pag. 257. « Je me suis amusé à lire sérieusement *la République de Platon*. J'ai grand tort, à vrai dire, d'appeller cela un amusement, car c'est bien une des plus lourdes tâches que j'aie jamais accomplies. Il m'était arrivé d'avoir par occasion quelques-uns de ces autres ouvrages; mais j'avais eu bien rarement la patience d'aller jusqu'à la fin d'un dialogue. Tout en surmontant, cette fois, la fatigue que me causaient les bizzaries, les puérilités, et l'inintelligible jargon de ce livre, il m'est arrivé souvent de le fermer, pour me demander comment il avait pu se faire que le monde se fût si longtemps accordé à soutenir la réputation d'un verbiage aussi dépourvu de sens...

L'éducation est le plus habituellement confiée à des hommes intéressés à soutenir la réputation et les rêves de Platon... Si l'on soumet Platon au jugement de la raison, et qu'on lui ôte ses sophismes, ses futilités, et tout ce qui a écrit d'incompréhensible, que restera-t-il? En vérité il faut le ranger dans la famille des purs sophistes, et s'il a échappé à l'oubli qui a fait justice de ses confrères, c'est grâce à l'élégance de sa diction, et surtout à l'incorporation de ses chimères dans la construction du système du christianisme artificiel. Son esprit nuageux présente les objets comme à travers un brouillard, qui ne les laisse voir qu'à demi, et ne permet de préciser ni leurs dimensions, ni leurs formes; et cependant ce qui devait le condamner de bonne heure à l'oubli, est justement ce qui lui a procuré cette immortalité de renommée et de vénération.

Il est heureux pour nous, subdit, que le républicanisme de Platon n'ait pas obtenu la même faveur que son christianisme, sans quoi nous vivrions tous aujourd'hui, hommes, femmes, et enfants pêle-mêle comme des brutes.-Malgré cela, Platon est un grand philosophe, disait la Fontaine.-Mais, lui répondait Fontenelle, trouvez-vous ses idées bien claires? - Oh! non, il est d'une impénétrable obscurité.-Ne le trouvez-vous pas rempli de contradictions? Certainement, repliqua la Fontaine, ce n'est qu'un sophiste.-Et cependant, quelques instants après, il s'écriait encore.-Oh Platon est un grand philosophe!»

Solone magistris, convenientem quibusdam in casibus naturali legi, et civili bono consentaneam habuerunt uxorum communitatem, prout et nonnullis romanis persuasum fuisse saltem quoad commodationem uxorum testatur Plutarchus (13).

Patet igitur verissimum esse quod affirmavimus polyandriam in germana sua significatione acceptam nusquam, theoretice saltem, directe obtinuisse, sed solum indirecte ex praepostera penes aliquot consuetudine inductam de communione uxorum, aut ex chimaerica nonnullorum ethnicorum philosophorum circa eandem rem doctrinam, quae fortasse numquam in praxin ab iis ipsis in societatem traducta fuit, sed intra theoreticae speculationis ambitus unice constitit. Adeo verum est communi hominum sensu tamquam a natura abhorrentem polyandriam habitam fuisse.

Nec obstat quod nonnulli censuerint polyandriam non repugnare fini primario in hypothesis quod maritus primus sterilis foret, praesertim si unica mulier superstes fuerit cum sterili marito; aut in hypothesis quod per *speciale pactum* matrimonii usus concessus non esset pluribus nisi in annos successivos, aut denique in hypothesis divinae dispensationis, quam Sanchez supponit (14). In quibus casibus polyandria primario fini matrimonii haud videretur adversari.

Siquidem huiusmodi omnes hypotheses stultae ac fictitiae sunt, ac nullo modo constituta principia quaterre possunt; neque enim nos de imaginaria aliqua hypothesis disserimus, sed de rerum natura, iuxta quam polyandriam naturali iuri repugnare affirmavimus. Quapropter si primus maritus esset sterilis, quin novum superinducat uxor maritum, prole carere debet. Quod si unica, ut fingitur, in

(13) In Numa pag. 62. et in Catone p. 771. ed. Paris. 1624.

(14) Lib. VII. disp. 80. n. 5.

universo hominum genere mulier superstes coniugali foedere cum sterili marito consociata remanserit, argumentum foret mundi finem advenisse, aut ut nonnulli censent, mariti sterilitas foret hoc in casu impedimentum dirimens, adeoque ob maius bonum conservandae humanae speciei, priori marito dimisso, posset alterum ducere (15). Quod ad alteram spectat hypothesim de speciali pacto, non satis per illud consuleretur prolis certitudini, neque idcirco debitae educationi, *ordinaria* saltem *ratione* in contractu illo successivo, ut alia silentio praetereamus. Similiter relate ad hypothesim divinae dispensationis, quidquid demum sit de singulari Sanchezii sententia, quam non ignobiles auctores falsam reputant, certe vel ipse fatetur *communiter* illam reiici, eo quod sit *contra prima naturae principia*, ut loquitur s. Thomas (16). Ast non est quod ulterius in otiosis eiusmodi hypothesibus excutiendis versemur.

His igitur dimissis, ut revertamur ad id unde discesimus, vel ipsi recentiores communistae ac sansimoniani locupletissimi testes sunt cum notione coniugii polyandriam non posse consistere. Nec enim ipsi directe propugnant polyandriam, sed potius eliminant ac destrunt ipsam coniugii notionem, dum proclamant uxorum communionem seu potius mulierum, quas solutas vellent a quavis matrimonii servitute. In istorum systemate coniugale vinculum est *servitus* respectu foeminae, quam ipsi emancipare contendunt, ut *liberam* faciant; siquidem iuxta ipsos leges connubii iugum constituunt intolerabile, atque penitus disruptendum; volunt utique *familiam*, at familiae

(15) Cf. Shwarz op. et loc. cit.

Hanc eandem difficultatem sibi proposuerat Bellarminus *De matrim.* cap. XI., responditque nullum esse periculum ut talis casus accidat. Deo enim curae est providentia generis humani. Alioqui etiam quaerere possemus num deberet pater filiam uxorem ducere, aut filius matrem, si nulli alii inter homines superessent. Demum et ipse in eiusmodi hypothesi recurrit ad solutionem prioris coniugii.

(16) In 4. Sent. d. 33. q. 1. art. 1. ad 7.

nomine significant coetum illius communitatis peculiaris in qua pecudum more vivitur; seu verius voluptatibus omnibus indulgetur.

Iam vero eiusmodi sectas, seu potius perversos homines in hac sentiendi agendique ratione simul iuri divino ac naturali omnino adversari, praeter ea quae diximus, facile evincitur ex eo quod moralitatis ac sanae ethices leges proculcent, omnes veterum haeticorum abominations renoveant, adeoque publicae honestati probro ac dedecori sint; denique mulieris cuius emancipationem ac libertatem iactant veram nativamque dignitatem deiiciant.

Quae quidem singillatim sic breviter evolvimus: ac primo quidem eiusmodi homines proculcare omnes sanae ethices leges exinde constat, quod receptas omnibusque insitas moralitatis notiones penitus pessumdent, iuxta quas sexuum commixtio non ad explendam libidinem ordinata est, sed est legitima coniunctio quibusdam certis devincta legibus prolis suscipiendae educandaeque causa, qui finis extra coniugalem societatem rite obtineri nequit. Quare apud omnes omnino gentes vel ab ipsis humani generis primordiis coniugii societatem in eum finem institutam ac receptam novimus. Licet vero nonnullae gentes ad tempus aberraverint ab eiusmodi institutione falsis permotae principiiis, cuiusmodi fuisse diximus Spartiatarum gentem, ea tamen sentiendi agendique ratio spectata fuit a populis reliquis veluti deviatio quaedam a connubialibus institutis, et improbata, ut deviationes aliae a naturae lege, cuiusmodi fuerunt furta, parentum aetate fatiscientium interemptio, atque id genus plurima (17), quae certe a moralitatis norma foede aberrabant. Promiscua igitur illa ac coeca foeminarum communitio, quam isti suadere ac propu-

(17) De quibus Plutarchus in *Licurgo*, alique passim Cf. Brenna *De generis humani consensu in agnoscenda divinitate*. Florentiae 1773. tom. I. part. alt. cap. 7 et seqq. Nonnulla et nos de his attigimus in tract. *De vera religione* cap. II. *De necess. revelat.* prop. I seqq.

gnare connituntur, a communi honestoque hominum sensu ac instituto universim recepto maxime abhorret, qui eam quovis tempore damnarunt ac detestati sunt.

Praeterea sansimonianos, ac generatim communistas veterum haeticorum abominationes renovare, historiae haereson earumque cum theoriis et praxi recentiorum comparatio luculenter ostendit. Notum est plerasque priorum seculorum haereses, gnosticorum praesertim, inde ortas fuisse, quod ethnicismum cum christiana religione coniungere immo et commiscere perversi homines sategerint, adeoque paganismi sordes in christiana castra inferre. Qui vero illis successerunt haetici eadem placita, quae cupiditatibus explendis absque verecundia idonea forent, adoptarunt. Istorumque soboles ac successio diversis sub nominibus diversisque impietatis formis numquam ad haec usque tempora desiit, donec omni disrupto aggere sec. XIX. longe lateque communistarum doctrina tamquam foeda colluvies exundavit. Sansimoniani et communistae suos habent seque dignos parentes, nullaque foeditas est a prioribus excogitata, quam non adoptaverint, propagaverintque recentiores, aut etiam superaverint.

Sane istorum omnium agmen duxit alter pariter Simon cognomento Magus, qui ut auctor novae sectae aggressus est *liberationem* cuiusdam Helenae prostitutae foeminae quam in prostibulo invenit; eam emit, se ipsum *virtutem Dei* altissimi proclamavit, Helenam vero *matrem* fecit spirituum sive aeonum, qui deinde mundum conderunt (18), et carnis libertatem induxit.

Hunc proxime secutus est Menander, qui pariter carnis propugnavit libertatem; stupra, fornicationes, adulteria operibus meritoriis adscribens (19).

(18) Cf. s. Irenaeum *Contra haeres.* lib. I. c. 23. ed. Massuet.

(19) Ibid. n. 5. Cf. etiam Eusebium *Hist. eccles.* lib. III. c. 26. s. Epiphanius *Haeres.* XXII. ed. Petav.

Verum prae ceteris Carpocrates eiusque discipuli car-pocratiani eminuerunt, qui inter praecipuos novae ipsorum doctrinae articulos posuerunt, *uxores oportere esse communes* (20).

Adamitae sec. ecclesiae secundo in omnem turpitudinem effusi apostoli quoque fuerunt eiusdem carnis libertatis ac muliebris licentiae (21).

Marcus eiusdem seculi haeresiarcha gnosticus marcosianorum parens non alia se ratione gessit erga mulieres quas decipiebat ipsis pollicens prophetiae donum, earumque se non minus pudicitiae proditorem, quam divitiarum, si quas habebant, expilatorem exhibuit (22).

Praetermissis vero montanistis sec. III. a Montano qui se Paracletum seu Spiritum Sanctum venditabat, originem habentibus, Priscillae et Maximillae pseudoprophetissarum illecebris captis, mulieres pariter extollentibus ac decipientibus (23), Artotyritae seu Pepuziani, aequalitatem virorum ac mulierum propugnabant, mulieres in libertatem asserebant, ac iniquum asserebant illas sub virorum potestate detinere; hinc mulieres etiam in episcopissas ac sacerdotissas consecrabant (24).

Non minus, imo magis insaniebant eodem tempore Antitacti, qui lascivias omnimodas inter officia moralia recensebant, eo quod opponerentur legi Mosis, quae utpote

(20) Cf. Clement. Alex. *Stromat.* lib. III. ed. Paris. 1641. pag. 428. Item s. Epiphan. *Haeres.* XXVII. n. 5.

(21) De his scribit Clem. Alex. lib. III. *Strom.* pag. 437. item Theodoretus *Haeret. fabul.* lib. I. c. 6. *De Prodigio*; s. Epiphan. *Haeres.* LII.

(22) De quibus fuse agit s. Irenaeus lib. I. c. 13. et s. Epiphan. *Haeres.* XXIV.

(23) Sic enim Montanum severe interpellabat Apollonius: «Dic mihi, propheta ne comam coloribus tingit? Propheta ne sumptuose et vestitu splendido ornatus incedit? Propheta ne tabulis ac tesseris ludit? Propheta ne foenus exercet? Ista vero mihi fateantur et dicant, utrum liceat usurpare, aut contra. Ego certe haec apud illas (prophetissas) factitata perfacile ostendam.» Apud Euseb. *Hist. eccl.* lib. V. c. 17.

(24) Cf. s. Epiphan. *Haeres.* XLIX.

mala abrogata fuerat, ac operam omnem conferebant, ut se se *malo* opponerent (25).

Taceo de manichaeis, qui dum nuptias tamquam malas atque a malo principio promanantes damnabant, incredibili libidine suis in conventibus diffluebant (26).

Eiusmodi porro doctrinae et abominationes quae diu ecclesiam afflixerunt, ac probrum christiano nomini, ipsisque ethnicis scandalum crearunt, instauratae sunt aetate media a sectis illius temporis non minori dedecore. Etenim Piccardi sec. XII. solos se in universa terra *liberos* esse iactabant, ceteros vero servos, eo quod verecundiores corporis partes contegerent. Mulieres piccardae in carcerem coniectae a quodam Bohemiae domino affirmabant eos qui vestes induunt non debere *liberos* homines aestimari (27). Piccardus sectae institutor haud dubitavit se Filium Dei nuncupare ac novum Adam a Deo missum ad homines docendos naturae legem, quae duobus constat praeceptis, *communitatis* videlicet *foeminarum* ac perfectae corporis nuditatis.

Idem dic. de novis adamitis, qui sec. XIV. veteres adamitas imitati sunt, effutientes viros esse totidem Adam, mulieresque totidem Hevas in innocentiae statu novum paradysum nudi incolentes (28).

(25) Cf. Clement. Alex. *Strom.* lib. III. ed. cit. pag. 431. et 452. Theodoretum *Haeretic. fabular.* lib. I. cap. XVI.

(26) Vid. s. Epiphani. *Haeres.* LXXVI. S. August. lib. *De haeresib.* cap. XLVI. Perperam vero Beausobre in sua *Histoire critique de Maniché et du manichéisme* adnisi sunt eos a turpitudinibus istis liberare ac nuper refutatur a Matter in *Hist. de l'église chrét.* tom. I. pag. 373.

Ceterum de his primitivis haereticis copiose et erudite scripserunt Massuetus in *Dissertat. praevius in lib. s. Irenaei dissert. I. De haereticis, eorumque actibus, scriptis et doctrina.* Card. Laurent. Cozza in *Commentar. Historico-dogmaticis in librum s. Augustini de haeresibus*, duo vol. in-fol. Romae 1707. Praeclara est perpetua eius collatio veterum haeresum cum haeresibus sec. XVI., Gaet. Maria Travasa *Storia critica della vita degli eresiarchi del primo e del secondo secolo della chiesa*, IV. vol. in-8. Venezia 1754-1759.

(27) Ermant in *Hist. des hérés.* art. *Picardiens.* Cf. etiam Bergier *Diction. art. Picards.*

(28) Quinam fuerit veterum adamitarum paradysus s. Epiphani. *Haeres.* LII.

Eodem medio aevo, ac eadem ferme aetate extitit Tanchelinus qui se ipsum Deum faciebat ac Iesu Christo parem, qui non alia de causa Deus dicebatur, nisi quia receperat Spiritum Sanctum cuius plenitudinem se quoque accepisse profitebatur, ex quo inferebat se non fuisse Iesu Christo ullo modo inferiorem. In omne autem vitium effusus promiscue quotquot poterat foeminis abutebatur, quem pariter eius discipuli imitati sunt (29). Hos secuti sunt Turlupini in omnem et ipsi turpitudinem effusi cynicos aemulantes (30).

Post haec persequi non vacat docendi ac vivendi rationem quam sectati sunt pseudo-mystici cuiusvis aetatis, uti massaliani (31), apostolici (32), lollardi (33), qui omnes nuptias deprimebant aut damnabant sub continentiae larva, et interim se libidinosae concupiscentiae prorsus tradebant. Idem contigit thaboritis (34), anabaptistis (35), quietistis (36), qui summis laudibus pudicitiam efferebant, dumque se in vitiorum luto volutabant, quamdam impec-

ed. Petav. nobis exponit; illorum coetus appellat *speluncam* seu *cavernam monstrorum* sine verecundia degentium. Cf. etiam Clement. Alex. *Stromat.* lib. III. p. 427 seqq. s. Augustin. *De haeresib. Haeres. XXXI.* Philastrium brixiensem cap. XLIX. Quoad recentiores cf. Pluquet *Diction. des hérés.* Paris. 1845. art. *Adamites.*

(29) Cf. Pluquet op. cit. art. *Tanchelin.* Hos etiam diris coloribus pingit Michelet in sua *Hist. de France*, tom. II. p. 396 seqq.

(30) Cf. Prateolum *De vitis, sectis et dogmatib. haeret. Elench. alphabeticus.* Coloniae 1581. lib. XVIII. pag. 491.

(31) Cf. s. Epiphani. *De haeres. Haeres. LXXX.*

(32) Cf. s. Bernard. in *Cantic. serm. LXV.* et seq. Mabillon. *Analect.* tom. III. p. 453. D'Argentré *Collect. iudic.* tom. I. p. 33. Nat. Alex. sect. XII. art. XI. De variis *apostolicorum* sectis late disserit Prateolus op. cit. lib. I. cap. 59. p. 58 seqq.

(33) Cf. Dupin *Hist. des controv. quatorz. siècle* p. 436. d'Argentré op. cit. tom. I. pag. 282.

(34) Cf. Prateolum op. cit. lib. XVIII. pag. 471.

(35) Cf. Sudre *Histoir. du communisme*, ed. cit. p. 79 seqq.

(36) Cf. Constit. Innoc. XI. contra errores Michael. Molinos data die 19. Febr. 1687. quae incipit: *Coelestis Pastor* apud d'Argentré op. cit. tom. III. p. 362 seqq. Cf. item Bergier *Diction. de théolog.* ad vocem *Molinosisme* ubi adversus Mosheimium eiusmodi damnationem vindicat.

cabilitatem sibi tribuebant veterum sectarum more, quae sibi omnia impune licere absque ulla peccati labe, quae ipsis imputari merito posset (37).

Quibus vix delibatis, pronum est patefacere sub diversis formis unam semper eandemque ab antiquissimis haereticis ad sansimonianos usque et communistas dimanasse doctrinam. Etenim ad unum omnes damnarunt nuptias, relaxarunt matrimonii vinculum, communionem foeminarum professi sunt, unice in votis habebant carnis quam vocant emancipationem, carnisque libertatem sive sub uno sive sub altero colore ac praetextu asserebant. Praecipui sectarum illarum architecti et auctores se ipsos aut Deum proclamaverunt, aut Filium Dei, aut Christum aut Spiritum Sanctum, aut certe intimam cum divinitate communicationem sibi tribuerunt. Denique omnes immunditiis omnigenis se tradiderunt eodem tempore quo propriam innocentiam ac puritatem extollebant, ac mulierum nobilitatem efferebant quas ex abiectiois et servitutis iugo relevare contendebant.

Iamvero etiam sansimoniani coeperunt ab hominum apotheosi, quos totidem deos, vel divinitatis participes fecerunt per pantheismum, seu pancosmismum quemdam, iuxta quem homo est suprema manifestatio divinitatis quam solam agnoscunt, nempe universi totius. Cultus sansimonianorum obiectum est caro, eius suprema potentia est foemina (38), quam vocare non verentur *convivium deorum*, cui omnes assidere debent indiscriminatim a iugo seu servitute matrimonii solutae (39); foeminas item sacerdo-

(37) His plures aliae posteriores sectae adiici possent eadem se gerentes ratione de quibus egit Grégoire in op. *Histoire des sectes religieuses depuis le commencement du siècle dernier jusqu'à l'époque actuelle*. Paris 1828. decem vol. in-8.

(38) *Doctrine de Saint-Simon. Première année. Introduction.*

(39) Ita istorum principia exponuntur in periodica collectione quae inscribitur *Le Globe*, quaeque Lutetiae ad plures annos prodiit.

tissas ac prophetissas esse decernunt. Sacerdos ac sacerdotissa, aiunt ipsi, proprium exercent ministerium ope suae pulchritudinis. Etenim sacerdotium futuri temporis carnem suam minime cohibet, faciem suam velo non obducit, non se scrutis tegit, flagellorum ictibus corpus suum non contundit. Pulchrum ipsum est, sapiens ac bonum (40). Attamen et ipsi eodem tempore propriam extollunt pudicitiam atque decentiam; ita enim prossequuntur: «Copia (id est *unio*) sacerdotalis totam sentit vim et incantationem decentiae ac pudoris ac totam quoque agnoscit gratiam donationis plenae et voluptatis. Ipsa imponit imperium amoris sui eorumque beatorum, quos sensus urentes decipiunt, atque ab ipsis tributum percipit arcanae ac pudicae teneritudinis sive affectionis (41). Inter cetera absurda sansimoniani expectant *foeminam messiam*, quam *matrem*, uti quondam Simon magus, sic et isti vocant; affectant et ipsi castimoniae ac sanctitatis professionem, uti gnostici veteres, dum in delubro versantur voluptatum (42).

Cetera non prosequar tum ne castas aures magis offendam, tum quia ea quae allata sunt ultro sufficiunt ad demonstrandum quod intendimus. Quandoquidem ex collatione veterum sectarum cum novis sansimonianismi et communismi doctrinis agendique ratione evidenter constat nihil novi recentiores attulisse, quod veteres non excogitaverint atque in praxin non deduxerint.

(40) Ibid. *Le Globe*.

(41) Ibid.

(42) Quidam Duveyrier unus ex sansimonianis apostolis ita respondit in tribunali parisiensi iudicum interpellationibus, qui ei proponebant advocatum, qui eius patrocinium susciperet: «Un avocat! Mais où trouverez-vous qui puisse me défendre? Les voilà tous; je leur ai parlé avant l'audience, et je leur ai dit: Vous ne pouvez me défendre, moi essentiellement religieux et moral, moi homme chaste! Car depuis six mois je vis dans le célibat le plus absolu, comme tous mes frères, tandis que vous, vous vivez tous dans l'adultère et la prostitution! Ils ont baissé la tête, et n'ont pas répondu.»

Quemadmodum igitur veteres illae sectae iam habitae sunt ut honestatis publicae ac societatis dedecus ac probrum, idem est ferendum de recentioribus iudicium. Revera huiusmodi communistarum sectae haberi debent ut publici societatis hostes non modo ob communionem quam praedicant bonorum omnium, sed etiam, imo maxime ob foedam illam communionem mulierum quam proclamare non verentur. Et nihilominus pessimi huiusmodi homines se iactant societatis reparatores, potissimum vero liberatores emancipatoresque mulierum.

Sed praeter dicta facile est directe ostendere huiusmodi communitatis foeminarum patronos non modo dignitati ac libertati quam iactant sequioris sexus minime prospicere, eamque promovere, sed potius mulierem a suo gradu deiicere, mancipiumque vilissimum efficere. Vera siquidem foeminae dignitas in verecundia consistit, in sanctis coniugii legibus rite servandis, in optima ac religiosa prolis institutione, in aequalibus status huius iuribus tuendis, in praebendo de se virtutum omnium exemplo, quae suum sexum exornare debent, in propria agnoscenda tuendaque dignitate, in fidelitate omnimoda coniugali custodienda, in muniis domesticae societatis obeundis, atque ut paucis omnia complectar, in eo est foeminae dignitas ut in se typum mulieris christianae praeseferat atque realem in se exhibeat eam mulieris ideam quam exhibet divina Christi religio. Quaevis ab his regulis ac legibus deviatio foeminam omnino deturpat, atque a gradu suo in quo illam christianismus collocavit, et ad quem illam extulit plane detrudit.

Vel ipse communis hominum sensus haec omnia confirmat. Quidquid enim sectarii, quos impugnamus, novis suis theoriis effutierint citra omne dubium est, solas illas mulieres passim apud omnes gentes aestimari, magni fieri et commendari quae castitate, pudicitia ac modestia flo-

rent; contra vero uti lutum platearum illas omnes contemni et despectui haberi quae contrariam viam inierint. In qua sententia perditissimi etiam homines permanent, qui illis prave abutuntur easque seducunt, ut experientia quotidiana patefacit.

Velint igitur nolint sansimoniani et communistae omnes, non alia dignitas, non alia excogitari libertas foeminae potest praeter eam quam sanctissimis suis legibus christiana religio ei comparavit et contulit. Haec sola fulgente aureola eius frontem ornavit quae mulierem christianis hominibus commendabilem reddidit. Haec sola foeminam a misera illa deiectione erexit in quam polytheismus ac falsae religiones eandem coniecerant, et in qua adhuc versantur apud populos omnes, qui nondum evangelica luce collustrati sunt, ut nempe mulieres habeantur, aut veluti animantia bruta ad onera ferenda destinata apud barbaros, aut veluti instrumenta voluptatum penes gentes excultas (43).

Hinc verissime illustris auctor affirmavit christianismum foeminam reddidisse ens quodammodo *supernaturale*, quia eam supra conditionem quam naturalis eius posceret conditio evexit (44). Quibus addere possumus novas has sectas foeminam infra naturalem conditionem prorsus deiicere.

Ut igitur quod assumpsimus concludamus, nec diutius hoc in argumento versemur, constat polyandriam, multo

(43) Inter plures quos recensere possem huius assertores veritatis unum afferam Buchanan, qui animadvertit: « Dans tous les pays où le christianisme ne règne pas, on observe une certaine tendance à la dégradation des femmes. » *Christian. Researches in Asia etc.* by the rev. Claudius Buchanan DD. Lond. 1812. p. 56.

(44) Comes de Maistre in op. *Du Pape*, livr. III. ch. I. cuius verba haec sunt: « C'est de lui (christianisme) qu'elle tient toute sa dignité. La femme chrétienne est vraiment un être *supernaturel*, puisqu'elle est soulevée et maintenue par lui jusqu'à un état, qui ne lui est pas *naturel*. »

Nonnullas etiam hac de re commentationes cf. apud cl. Tullium Dandolo in op. *Del cristianesimo nascente* ubi agit de B. Virgine, quod caput praemissum est alteri eiusdem auctoris operi *L'imitazione di Gesù Cristo*. recusum Mediolani 1857. pag. 67.

vero magis communionem foeminarum ne dum iuri divino, verum etiam iuri naturali penitus adversari.

ARTICULUS II.

Polygamia simultanea iuri naturae absolute non repugnat, eidem tamen minus conformis est et quadantenus etiam adversatur.

Breviter heic nos a prima quaestionis parte expediemus, cum penes catholicos omnes constet non ita eiusmodi polygamiam directe repugnare legi naturae, ut quandoque, Dei praesertim accedente dispensatione, licita fieri non possit. Id vero statuitur passim adversus Calvinum, qui autumavit numquam permitti polygamiam posse, eo quod legi naturali sit prorsus contraria. Hinc non veretur patriarchas reos traducere laesi iuris naturalis ob uxorum pluralitatem.

Sic enim arguit Saram quod Abrahae Agar in uxorem dederit: « Verum, inquit, ut res esset desperata (conceptio), non debuit tamen quidquam aggredi nisi *Dei voluntati et legitimo naturae ordini* consentaneum. Sarai conubii legem pervertit, lectum coniugalem, qui duobus dicatus erat, polluendo » et paulo post pergit loquens de Abraham: « Improperie tamen (Agar) vocatur uxor, quae praeter Dei legem in alienum torum inducitur. Quare sciamus hunc concubitum sic illicitum fuisse, ut inter scortationem et coniugium quasi medius fuerit (45). » Et iterum, disserens de Iacob, qui post Liam Rachelem duxit in secundam uxorem: « Ut malum, inquit, duplicet polygamia. » Deinde sic pergit: « Itaque ad tertium coniugium rapitur Iacob. Unde colligimus *nullum esse peccati finem*, ubi semel neglecta est Dei institutio.... Mirum est quod Deus

(45) *Comment.* in cap. XVI. Genes. opp. ed. Amstelodami 1671. tom. I.

adulterinum coniugium prolis honore dignatus fuerit. Sed ita interdum beneficiis certat cum hominum malitia, et indignos sua gratia prosequitur.... Paulo ante Moses uxorem vocavit Bilha quae tamen *pellex* dici merebatur (46)» et ita porro. Adeoque iuxta Calvinum primi patriarchae populi Dei, qui adeo chari Deo fuerunt in perpetuo contubernio ac fornicatione seu adulterio versati fuissent, gravissimisque habitualibus noxis se commaculassent, quin tamen Deo accepti esse desiissent. Moses dum Rachelis ancillam Iacob *uxorem* vocavit, turpiter errasset, cum pellicem dicere eam debuisset. Huc perducit systema spiritus privati in Scripturarum interpretatione, atque anticipatum iudicium (47).

Itaque ne in eiusmodi incidamus absurda, fateamur necesse est Deum posse illi legi derogare seu ab ea dispensare, quod profecto non posset, si polygamia foret intrinsece seu natura sua mala. Distingui igitur debent duo praeceptorum naturalium genera, quorum alterum constat ex universalibus et communissimis, quae sunt veluti principia prima iuris naturae; alterum constituitur ex conclusionibus, quae ex primis illis principiis derivantur. Iam vero principia illa prima ac universalissima et ab omnibus admissa rectitudinis normam ac regulam ita constituunt, ut nullo umquam in casu in iis dispensari possit; secundaria autem, quae nempe ex primis illis deducuntur, licet regulam rectitudinis contineant, non ita sunt firma, ut mutatis rerum, temporum ac personarum adiunctis in iis dispensari non possit ac ea mutari, non quidem ab hominibus, sed a Deo legis naturae auctore. Ad primum

(46) Ibid. in cap. XXIV. et XXX. Genes.

(47) De polygamia patriarcharum cf. Matth. Petididier *Dissert. X. in script. sac.* pag. 165 seqq. Guil. Seldenum in *Otiis* p. 349. *Vesperus groninganus* pag. 125. et 159. Patrie. Delong in libello anglice edito an. 1737. et recuso an. 1739. cui tit. *Reflections upon polygamy and the encouragement given to that practice in the scriptures of the old testament.*

praeceptorum genus in materia de qua agimus refertur polyandria, quae primario coniugii fini, ut ostendimus, adversatur; ad secundum pertinet polygamia, quae utique cum fine ille potest consistere.

Sane, si ex communi sententia primarius matrimonii finis est prolis procreatio, nemo est qui non videat finem hunc obtineri, si vir unus pluribus sit uxoribus coniunctus, quod et experientia iugis ostendit. Eo vero magis finis hic in coniugio intentus habebitur, si prior uxor sterilis fuerit. Hoc porro obtento, secundarii fines absolute, licet aegre, obtineri possunt; ac certe viro officium incumberet ut satageret modis omnibus cum fine primario componere, prout a patriarchis illis sanctissimis factum legimus (48).

Quum proinde polygamia primario iuris naturalis principio non repugnet, ac per ipsam primarius coniugii finis obtineatur, pronum est inferre, eam nec intrinsece malam esse, nec Deum ab ea dispensare non potuisse, secus ac Calvinus senserit, qui crimini propterea vertere debuit sanctis viris pluralitatem uxorum contra apertam sacrarum Scripturarum auctoritatem.

Iam ad alteram propositi partem accedamus oportet, ac polygamiam minus esse naturali iuri conformem, imo illi quodammodo adversari demonstramus.

Paulo implexior est quaestio quam excutiendam suscipimus ob difficultatem ipsi insitam et ob discrepantes theologorum sententias.

Difficultas enim inde orta est, quod, re in se spectata, seu praecisione facta a divina institutione et mandato, non videatur polygamia aliqua ratione a naturae lege dissentire, cum ex una parte, fatentibus omnibus, primarius coniugii finis obtineri possit, quandoque etiam melius; ex altera vero absolute fines secundarii, cuiusmodi sunt recta prolis institutio, domestica pax, concupiscen-

(48) Cf. Bellarmin. cap. X. *Prop. secunda.*

tiaeque remedium haberi valeant. Praeterea casus non infrequentes occurrunt, in quibus ad commune societatis bonum polygamia conducere, aut etiam interdum ad illud obtinendum necessaria omnino videatur.

Exinde factum est ut theologi ac iuris naturalis periti non infimae notae in varias concesserint sententias. Nam Durandus, Gersonius, Caietanus, Abulensis, aliique non pauci apud Sanchez (49); ex recentioribus vero Simonet (50), Sardagna (51), Schwarz (52), Biner (53), Merlin (54) docuerint naturae iuri haud repugnare polygamiam, aut saltem non satis id evinci. Atque ad id fidentius asserendum auctoritate utuntur sanctorum patrum, Augustini praesertim, qui loquens de Iacob quatuor uxores habente aperte scribit: « Quando mos erat, crimen non erat (55), » Hieronymi, qui docet antiquitus nulla lege interdictam fuisse (56), et aliorum qui idem sentiunt, ii praecipue, qui impugnarunt manichaeos legem veterem a principio malo datam autumantes, eo etiam ex capite, quod polygamiam uti licitam permetteret (57).

Id etiam confirmant ex consuetudine longe lateque per universas fere gentes antiquitus recepta de pluribus simul ducendis uxoribus. De hebraeis enim nulla est dubitatio; praetermissis siquidem patriarchis, Moyses tamquam de re vulgo admissa loquitur dum legem tulit: « Si habuerit homo

(49) Lib. VII. disp. 80. n. 5.

(50) Disp. IV. art. III.

(51) De matrim. n. CCCLXXXIII seq.

(52) Op. cit. part. II. tit. I. *Dicendum* 3.

(53) *Dissertat. sur la polygamie des patriarches contre Bayle* (qui vindicias Calvini susceperat). *Journal de Trévoux* an. 1736. Juil. 2. part. p. 1591.

(54) Op. cit. *Apparat. erudit.* loc. cit.

(55) Lib. XXII. contr. Faustum manich. c. 47. et 48. et alibi, praesertim lib. III. *De doctrina christiana* c. 12. 20. et lib. XVI. *De civit. Dei*, c. 38. n. 3.

(56) Epist. LXIX. *ad Oceanum*. n. 5. ed. Vallars.

(57) Inter quos eminent Theodoretus quaest. 85. in Genes. de quo postea sermo erit. Cf. Biner in *Apparatu erudition.* part. II. cap. I. q. 5. n. 27.

uxores duas alteram dilectam et alteram odiosam etc. (58).» Quod clarius adhuc patet ex iis, quae idem legislator constituit de regibus, quibus unice excessum in uxorum numero quas ducere possent interdixit his verbis: « Non habebit (rex) uxores plurimas; quae alliciant animum eius (59).» Hanc consuetudinem penes illum populum usque ad reipublicae interitum tum respectu privatorum, tum respectu virorum principum viguisse novimus (60). Quod vero attinet ad alios populos sive orientales praesertim, sive etiam occidentales, res est notissima, adeo ut longe facilius sit eos recensere penes quos obtinuit monogamia, quam eos qui polygamiam sunt sectati, idque a remotissimis temporibus, siquidem polygamia a noachica pene aetate coepit.

De aegyptiis quidem refert Herodotus eos monogamiam coluisse scribens: « Unusquisque nonnisi unam uxorem in matrimonio habet sicut graeci (61).» Ast Diodorus siculus testatur id penes solos sacerdotes viguisse, alios vero quotquot quisque vellet mulieres in matrimonium duxisse (62). Atheniensibus a Cecrope vetitam polygamiam ostendit Petitus (63), prout de Numa idipsum statuente testis est Festus (64). Ita de antiquis germanis scribit Tacitus quod prope soli barbarorum, singulis uxoribus contenti fuerint,

(58) Deut. XXI. 15.

(59) Deut. XVII. 17.

(60) De Iudaeorum polygamia cf. Heidegerum in *Historia patriarcharum*, Seldenum *Uxor hebraea* lib. I. c. 9. Montacutium in *Apparatu* p. 193 seqq. Triglandus ostendit Karaeos seu Karaitas nullo numero adstringere polygamiam in op. *De secta karaeorum* p. 147 seqq. Contra vero rabbanitarum secta ad quatuor uxores coarctabat, ut refert Lighphootus in *Horis hebr. et Thalmud.* ad Matth. V. 31.

(61) Hist. lib. II. §. 92. ed. Argentorat. 1816. tom. I. pag. 363.

(62) Lib. I. sect. I. n. 21 seqq. ed. Dindorfii Paris. Firm. Didot 1842.

(63) *Ad leges atticarum*, pag. 434. Attamen ex A. Gellio *Noctium atticarum*, lib. I. c. 17. et lib. XV. c. 20. ed. Oiscli Lugd. Batav. 1656. exempla contraria habemus.

(64) In *Pellex* apud A. Fabricium *Bibliograph. antiquar.* cap. XX. *Polygamia*.

exceptis admodum paucis, qui non libidine, sed ob nobilitatem plurimis nuptiis ambiuntur. «Virgines, inquit, unum accipiunt maritum, quomodo unum corpus, unamque vitam, nec ulla cogitatio ultra, nec longior cupiditas, ne tamquam maritum, sed tamquam matrimonium ament (65).» De recentioribus non loquor; compertum enim est non leve obstaculum experiri legis evangelicae praecones in suadenda christiana religione eaque firmanda apud infideles nationes dum ex praescripto legis evangelicae polygamiam abolere nituntur (66).

Ex hac porro fere universali polygamiae consuetudine nonnulli intulerunt illam nullo modo legi naturali adversari. Attamen communis theologorum sententia est polygamiam sin minus primario naturae iuri, saltem secundario seu derivato esse contrariam, nempe conclusionibus ex primariis praeceptis deductis, ut loquitur Angelicus. In hac autem sententia tuenda diversimode theologi incedunt; siquidem nonnulli tenent ideo polygamiam iure naturali esse prohibitam, quia secundariis adversatur matrimonii fini-

(65) *De morib. germanor.* n. 18-19. ed. Taur. 1821. tom. IV. Cf. Reinegerum qu. 92. ad Tacitum; nec non Zeidlerum in lib. *De polygamia*.

(66) Non aliam viam ad hoc superandum obstaculum protestantes invenerunt, quam polygamiam suis conversis aut convertendis indulgere, idque publico suffragio et consilio decreverunt. Legimus enim in ephem. *Tribune de New-York* collationem habitam fuisse dictorum *missionariorum* protestantium Calecutiae, cui interfuerunt ministri episcopaliani, presbiteriani, methodistae, baptistae et congregationalistae, postque profundum studium, pluresque consultationes, *unanimitate* suffragiorum decisum est, quod «Si un converti, avant de devenir chrétien, a épousé plus d'une femme suivant la pratique des Juifs, et celle des *églises primitives*, il lui sera permis de les garder toutes; mais il ne sera éligible à aucune dignité dans l'église.» Hoc publicum documentum refert David Ellen missionarius protestans apud indos annis 25. in op. *Missionum Asiae* quod vulgavit in provinciis foederatis Americae. An. 1856.

Item polygamia neophytorum probata fuit a Mylord Celenzo in Cafraria cuius extitit episcopus anglicanus, qui cernens difficultatem quam cafri praeseferebant ad conversionem ob uxorum pluralitatem, expedire iudicavit ut eas omnes quas duxerant retinerent etiam post baptismum. Cf. *Univers.* 9. Août 1856. Oh praeclaros Evangelii praecones!

bus, uti cum s. Thoma (67) sentiunt Billuart (68), Tournely (69), Kugler (70), qui plures alios adducit auctores, praesertim vero Bellarminum; immo ulterius progreditur constituens seclusa Dei dispensatione, matrimonium cum duabus aut pluribus uxoribus, spectata rei natura *nec licitum nec validum* fuisse aut esse; in quo, ut diximus, ulterius fortasse quam par sit, progressus est, neque ei auctores omnes allegati hac in re suffragantur. Alii, ut Collet, Theologia nanciensis, ac rothomagensis (71) censent polygamiam minus esse naturali iuri consentaneam propter incommoda, quae ex ea oriri consueverunt, atque idcirco ipsi repugnare solummodo ut aliquid minus perfectum.

Nos in hac sententiarum discrepantia quid probabilius videatur aperiemus, ac mediam terere viam, atque extrema devitare curabimus.

Itaque naturae iuri conformem esse polygamiam simultaneam cum quibusdam dicere non audemus; sed neque contendimus eam naturae iuri ita adversari, ut solo spectato naturae iure tum illicitum tum etiam invalidum dici possit coniugium, quod retenta adhuc uxore priori iniretur. Adeoque constituimus *primo*, polygamiam minus esse iuri naturae conformem; *secundo* eandem potius naturae iuri quodammodo adversari.

Ac re sane vera societas haec postulat aequalitatem iurium, scilicet alter coniugum totum se alteri tradere debet, et quidem donatione plena atque perfecta, vi cuius alter alterius fit, ita ut neuter possit dici compos corporis sui. Nimirum dependentia ex unione coniugali proveniens reciproca esse debet, tum mariti erga uxorem, et uxoris

(67) In 4. Sentent. d. 33. q. 1. art. 2. in Corp.

(68) Dissert. V. art. 1. §. 1.

(69) Qu. VI. art. 1. sect. 1.

(70) Quaest. XXXVIII. n. 1833.

(71) Apud Carrière, tom. I. part. II. n. 177.

erga maritum, salva superioritate quam vir uti supremum familiae caput habet erga mulierem in familiae regimine. Haec vero aequalitas in polygamia non servatur. Ea ergo minus conformis naturae iuri dicenda est.

Rursum: societas coniugalis societas est *amicitiae*, qua fit ut coniuges mutuo se ac intimo amore prosequantur, amboque in commune familiae bonum aequali ratione conspirent, suamque operam conferant ad eam nutriendam confovendamque. Haec autem perfecta animorum et intima coniunctio, quae ex societate coniugali oritur, in monogamia quidem facile habetur, at in polygamia haud parum impeditur. Itaque quemadmodum monogamia iuri naturae omnino conformis est, ita polygamia minus eidem conformis dici debet (72).

Accedit quod in polygamia nec ipsa officia, quae exigit coniugium, et ad quae unusquisque coniugum ius habet adimpleri semper possint. Nam eadem ratione qua vir coniugale debitum exigere ab uxore, ita et uxor a marito potest; iam vero si vir pluribus esset uxoribus obstrictus, huic obligationi satisfacere nequaquam valeret. In polygamia proinde saltem magna ex parte iure suo uxor defraudaretur non sine incontinentiae discrimine.

Demum in polygamiae seu polygyniae statu ad continentas in officio plures uxores non tam amore quam imperio vir innitatur necesse est; quod quidem imperium in domesticam pene tyrannidem facile vergit haud minimo eiusdem domesticae societatis detrimento (73).

(72) Cf. Taparelli *Saggio del diritto naturale. Dissert. VII. cap. III. art. II. §. II.* Roma 1855.

(73) Apposite Cantù in *Storia universale*, ed. V. Torino 1844. tom. II. p. 51. ad rem nostram scribit: « Che se noi cerchiamo la cagione per cui nell' Asia si perpetuò il despotismo, la troviamo ne' loro costumi. Imperocchè libertà politica e libertà morale van di conserva; nè mai sperì sollevarsi a franchigie civili chi non abbia cominciato dal riformare i costumi. Patria e famiglia sono idee associate in Europa, ove il miglior cittadino è il miglior padre, non così ove è

Atque ex his iam facile est inferre, quod secundo loco constituimus, polygyniam legi naturali quodammodo adversari. Dixi *quodammodo* ne viderer contendere *absolute* polygamiam iuri naturali repugnare, quia cum ex una parte, ut diximus, per eam finis primarius coniugii obtineri possit, et ex alia incommoda etiam quae eam comitantur vinci ac superari omnino valeant, temperandam idcirco aliquantulum censeo sententiam.

Ceterum in exposito sensu polygyniam naturali iuri adversari ex eo patet, quod secundarii, quos vocant, coniugii fines vix aut ne vix quidem cum polygamia haberi possint. Siquidem in mulierum pluralitate, spectata ipsarum indole ac natura, pax et tranquillitas a familia exulet necesse est, non modo quia mulieres rixosae esse solent et inquietae, verum etiam, imo potissimum ob zelotypiam, ob aemulationem, ob invidiam aliasque cupiditates, seu ut vocant *passiones*, quae ex eiusmodi consociatione suapte natura excitari, atque accendi vehementer consueverunt, uti experientia manifeste demonstrat. Praeterea unaquaeque sobolem suam prae aliena diligit, adeoque perpetua habetur occasio contentionis atque dissidii. Hinc fit ut apud orientales populos penes quos eiusmodi polygynia viget, mos obtinuerit ut foeminae omnes in gynecaeis tamquam in carceribus trudentur, ne in familia dissidia et confusionem ciere possint.

Neque obest quandoque foeminas ingenio pacificas reperiri, quae unionem animorum et concordiam consecuten-

stabilita la poligamia.-Essendo queste (donne) ancora bambine, nè ad altro abili che al diletto, voleasi un freno alla violenta agitazione delle loro passioni, all'amore, alla rivalità, alle gelosie. E l'orgoglio e le affezioni di esse rimanevano offese dalla poligamia, che tormenta i sensi colle privazioni, il cuore colle preferenze; onde lo sposo non poteva far conto sull'amore di esse; amore la più salda garanzia della fedeltà. Doveva pertanto dominarla con indomita severità, chiuderla con attentissime precauzioni, porvi a custodia uomini ridotti in guisa da non eccitare nè i desiderii delle fanciulle, nè la gelosia del padrone.»

tur. Siquidem istae exceptionis instar sunt, quarum ratio haberi nequit cum agitur de iis, quae communiter solent contingere. Nam ars perinde ac lex ea quae nonnisi raro admodum accidunt non spectat, sed ea quae frequenter atque ut plurimum evenire consueverunt (74).

Alter finis, qui in recta prolis institutione consistit, aegre pariter aut vix omnino comparari potest: idque ob peculiarem dilectionem quam maritus erga unam prae alia uxore affectus est. Qua praedilectione fit, ut eius quoque filios aliarum filiis praeferat cum ceterorum damno quos aut negligit, aut certo non aequali amore ac sollicitudine prosequi solet. Cuius rei monumentum indubium habemus in mosaica legislatione, in qua paulo post superius allegata verba: « Si habuerit homo uxores duas unam dilectam, et alteram odiosam » subditur: « genuerintque ex eo liberos, et fuerit filius odiosae primogenitus, volueritque substantiam inter filios suos dividere: non poterit filium dilectae facere primogenitum, et praeferre filio odiosae, sed filium odiosae agnoscat primogenitum (75). » Ex quibus patet quam pronum homini sit ob specialem praedilectionem, qua fertur in unam uxorem, huius gratia filios ex ea progenitos anteponere filiis alterius minus dilectae.

De tertio fine, qui est remedium concupiscentiae iam diximus illum obtineri haud posse, quin necesse sit hac in re diutius insistere.

Quae quidem omnia confirmantur ex iis, quae praecclare hanc in rem scribit Angelicus doctor: « Pluralitas uxorum neque totaliter tollit, neque aliquo modo impedit primum finem (matrimonii), cum unus vir sufficiat pluribus uxoribus foecundandis, et educandis filiis ex eis natis: sed secundum finem etsi non totaliter tollit, tamen multum impedit, eo quod non facile potest esse pax in fa-

(74) L. Nam ad ea ff. De legibus.

(75) Deut. XXI. 15-17.

milia, ubi uni viro plures uxores iunguntur, cum non possit unus vir sufficere ad satisfaciendum pluribus uxori- bus ad votum, et quia communicatio plurium in uno officio causat litem, sicut figuli corrixantur ad invicem, et similiter plures uxores unius viri (76).»

Illud obiter tandem iuverit animadvertere, spectato etiam solo naturae iure, difficile admodum esse, infideles, penes quos polygamia viguit, aut penes quos hactenus obtinet, a peccato excusare, ex eo potissimum quod ii non honesti alicuius finis gratia illam frequentent, sed solum libidinis aestu, quo fit, ut brutorum more ultra quam ferat hominis rationalis conditio ac dignitas, illa se implicant, ex qua innumera pene mala proficiscuntur, cuiusmodi sunt tyrannis in familia, filiorum inconsulta multiplicatio, illorum neglectus, interemptio interdum, aut saltem publica expositio in viis ac foris, ut notum est ex indis atque sinensibus, penes quos singulis annis innumerabilis recens natorum perit multitudo (77). Et haec de iure naturae.

(76) In IV. Sent. d. 33. q. 1. art. 1. in corp.

(77) Barbarum hunc morem exponendi in foris ac viis publicis infantes a parentibus nimia prole onustis antiquum esse nemo est qui nesciat. Nobis satis hic sit verba s. Augustini afferre ex Epist. XCVIII. ed. Maur. n. 6. quibus id testatur scribens « Aliquando etiam quos crudeliter parentes exposuerunt nutriendos a quibuslibet, nonnumquam a sacris virginibus colliguntur, et ab eis offeruntur ad baptismum.» Interdum vel ipsas matres hac de causa infantes suos necasse testis est s. Otto pomeranorum apostolus sic mulieres allocutus: « Et partus foemineos, quia vos, o mulieres, necare consuevistis; quod quantum abominationis habeat, exprimi sermone non potest... Sive igitur sit masculus sive foemina, diligenter enutrite partus vestros: Dei enim est et marem procreare, et foeminam.» Apud Bolland. mens. Iul. tom. I. in vita s. Ottonis cap. II. n. 77. pag. 397.

ARTICULUS III.

Polygamia simultanea iure divino positivo ante Evangelium absolute vetita non posse dici videtur, nec proinde necessaria divina dispensatio, ut veterum polygamia a crimine contra ius naturale vel divinum defendatur.

Inficiari non possumus polygamiam, quae obtinuit primaevae temporibus, deinde vero sub lege mosaica, minus fuisse conformem divinae matrimonii institutioni, quinimmo ab ea declinasse; tum etiam non quamlibet polygamiam fuisse permissam, sed eam solam, quae intra certos fines, ac quibusdam sub conditionibus iniretur. Id solum dicimus nullam expresse legem a Deo datam fuisse qua polygamia vetaretur, ita ut nullo in casu absque divina dispensatione licita fuerit, ac rei violatae legis divinae extiterint quotquot illam frequentaverunt.

Haec assertio, ut patet, mere *critica* est, atque speculativa, quae nullum locum post evangelicam legem, ut deinceps ostendemus, habere potest; atque potissimum eo spectat, ut validius refellatur Calvinus, eiusque hac in re assecla et patrocinator Baylius, qui vellent traducere patriarchas reos violati non minus naturalis quam divini iuris (78).

Loquimur porro de lege *expressa*, quae data positive a Deo fuerit ad vetandam polygamiam simultaneam; nam nemo inficias ibit, nosque saepius adstruximus, implicite, ut aiunt, eam legem contineri in ipsa originaria matrimonii institutione, quae praebuit fundamentum Christo Domino, ut matrimonium ad monogamiam revocaret, prout primitiva matrimonii institutio postulabat.

Hisce ita explanatis, polygamiam intra certos fines, iuxta dicenda, divino positivo iure antiquitus non fuisse

(78) Calvinus loc. cit. Bayle *Dictionn. critique et histor.* art. Sara not. I. Item in art. Agar.

vetitam, seu ei absolute non adversari sive ante sive post diluvium, nullaque proinde opus fuisse, aut tacita aut expressa divina dispensatione, inspecta ipsa matrimonii primaeva institutione, atque attenta patrum doctrina, haud difficile videtur ostendi posse.

Sane quum Deus instituit primaevum inter protoparentes nostros coniugium nonnisi *unam* Hevam *uni* Adae coniugem dedit, quo facto ostendit monogamiam hominis conditioni congruere, et adsignificavit hunc ei statum naturalem esse, suamque non obscure aperuit voluntatem. Alioquin, prout patres animadvertunt, plures foeminas condidisset, quae ei sociae essent et coniuges; eo vel magis quod eiusmodi mulierum numerus plurimum contulisset ad humani generis propagationem ex ipsa intentione Dei dicentis progenitoribus ipsis: « Crescite et multiplicamini (79). »

Hinc Tertullianus: « Et ideo homo Dei Adam, inquit, et mulier Dei Eva, unis inter se nuptiis functi formam hominibus Dei, de originis auctoritate, et prima Dei voluntate sanxerunt. Denique, erunt duo, inquit, in carne una, non tres neque quatuor. Alioquin, iam non una, nec duo in unam carnem (80). » Sic s. Hieronymus pariter scribit: « Una costa a principio in unam carnem versa est. Et erunt, inquit, duo in carne una, non tres neque quatuor, alioquin iam non duo si plures (81). » Sic alii patres passim.

Quae confirmantur, ut patet, etiam ex adductis patrum testimoniis, per ipsa verba ab Adam Deo inspirante prolata cum Hevam primum adspexit: « Hoc nunc os ex osibus meis, et caro de carne mea... Quamobrem relinquet homo patrem suum, et matrem, et adhaerebit uxori suae,

(79) Genes. I. 28.

(80) *De exhortat. castitat.* cap. V. ed. Rigalt.

(81) *Lib. I. advers. Iovinian.* n. 14. ed. Vallars. tom. II. col. 263.

et erunt duo in carne una (82);» quae tamquam a Deo ipso prolata refert Christus (83). Adeoque dubium nullum superesse potest de Dei intentione ac voluntate circa monogamiam.

Ast aliud est de Dei intentione ac voluntate disserere per factum ipsum manifestata; aliud vero de lege expressa, qua Adae posteris indictum fuerit, ut unam tantum uxorem ducerent, ac illegitimum et nullum declaretur coniugium quod post ductam primam uxorem initum fuerit. Haec expressa lex nusquam apparet in sacris litteris; patres vero in diversas sententias abire visi sunt. Nonnulli ex patribus Lamech traducunt ut violatae divinae legis reum eo quod duas simul habuerit uxores, ut Tertullianus, qui post relata verba scribit: « Numerus matrimonii a maledicto viro coepit. Primus Lamech duabus maritatus, tres in unam carnem effecit (84);» et alibi: « Semel vim passa institutio Dei per Lamech (85).» Item s. Hieronymus, qui et ipse addit post verba superius descripta: « Primus Lamech sanguinarius et homicida, unam carnem in duas divisit uxores: fratricidium et digamiam, eadem cataclysmi poena delevit (86).» Necnon s. Nicolaus I. qui scribit: « Adulterii autem flagitium, quod Lamech omnium primus in duabus uxoribus perpetravit, nonnisi Sanguine Christi abolitum extiterit, qui septima et septuagesima generatione secundum evangelium luxerit in mundum (87).» Alios afferre possem qui idem sentiunt.

(82) Genes. II. 23. 24.

(83) Matth. XIX. 5. 6.

(84) Loc. cit.

(85) Lib. *De monogamia*, cap. IV.

(86) Loc. cit. qui eadem ferme repetit verba Epist. LXXIX. ad Salvinam ed. cit. col. 503. scribens: « Primus Lamech maledictus et sanguinarius, et de Cain stirpe descendens, unam costam divisit in duas, et plantarium digamiae protinus diluvii poena subvertit.»

(87) *Ad consulta Bulgaror.* n. 51. apud Harduin. *Acta concil.* tom. V. col. 371.

Verumtamen non desunt patres alii, qui contrarium doceant. Etenim Clemens alex. non modo vetitam non dicit polygamiam a Deo, sed eo usque progreditur, ut affirmet Deum illam ad propagationem humani generis quodammodo exegisse scribens: « Idem vir et Dominus vetera renovans *non amplius concedit* polygamiam (in novo foedere). Tunc enim *id exigebat Deus*, quando oportebat augeri et multiplicari (88).» Eadem ferme habet s. Io. Chrysostomus cum ait: « Neque secundum statum, qui nunc est, opera quae tunc facta sunt iudices. Tunc enim quia principia erant, *permissum fuit* cum duabus vel tribus vel pluribus uxoribus misceri, ut humanum genus propagaretur. Nunc vero quia per Dei gratiam humanum genus valde multiplicatum est, virtus quoque incrementum accepit (89).» Nec obstat quod fere immediate subdit. « Ecce enim quoniam *mala erat* haec consuetudo, explosa est, et non licet ulli eam praetexere;» nam non eo sensu *malam* dicit, quod reipsa culpabilis esset, sed ut patet ex orationis serie, comparate ad monogamiam, quae illam praecellit; alioquin dicere non potuisset polygamiam fuisse *permissam*.

Immo vero vel ipse s. Hieronymus, qui pro contraria adducitur sententia, ut vidimus, non discrepat alibi sive a Clemente alex., sive a s. Io. Chrysostomo; siquidem nullo interposito discrimine ante aut post diluvium, universim pronunciat: « Et si post diluvium, et ante diluvium *viguit ista sententia: crescite et multiplicamini, et replete terram*, quid ad nos, in quos fines seculorum decurrerunt, quibus dicitur: *tempus breve est: et: iam securis ad radicem arborum posita est*, quae silvam legis, et nuptiarum evangelica castitate succidat (90)?» Cumque ad cohonestandam polygamiam a nonnullis eius aetate obiiceretur exem-

(88) Lib. III. *Stromat.* pag. 461. ed. Paris. 1641.

(89) Hom. LVI. in Genes. n. 3. ed. Maur. tom. IV. pag. 542.

(90) Epist. CXXIII. *ad Ageruchiam*, n. 13. col. 903.

plum patriarcharum, ipse opposuit verbis Geneseos verba Evangelii. Adnotat praeterea idem s. Doctor Apostolum bene novisse consuetudinem plures ducendi uxores lege mosaica fuisse probatam et patriarcharum exemplo « Sciebat (Apostolus), inquit, *lege concessum*, et exemplo patriarcharum ac Moysi familiare populo noverat in multis uxoribus liberos spargere: ipsis quoque sacerdotibus huius licentiae patebat arbitrium (91). » Quomodo vero haec componi possint cum iis, quae iuxta contrariam sententiam alibi scribere visus est, mox videbimus.

Interim, ut statim nonnulla alia veterum testimonia hac de re afferamus, se se offert Theodoretus, qui diserte affirmat nulla lege sive naturali sive scripta polygamiam antiquitus vetitam fuisse: « Rogavit (Sara), inquit, ea de causa Abraham, ut cum Agar congregaretur, quo ipsa liberos inde susciperet, quid peccavit Abraham? Maxime, *cum neque natura, neque lex ulla tum scripta* plures ducere uxores prohiberet (92). »

Nec minus luculenter eam doctrinam s. Augustinus professus est. Scribit enim: « Sufficiendae prolis causa erat uxorum plurium simul uni viro habendarum *inculpabilis consuetudo* (93). » Negat et ipse cum Theodoro ullam tunc temporis legem extitisse, qua vetaretur polygamia: « Eo tempore. quando multiplicandae posteritatis causa plures uxores *lex nulla* prohibebat (94). » Demum ostendit Iacob in ducendis pluribus uxoribus haudquaquam peccasse, eo ipso quod nulla impediretur lege sive naturali sive divina positiva: « Iacob quod pro ingenti crimine quatuor obiiiciuntur uxores, generali praelocatione purgatur. Quando enim mos erat, crimen non erat... Alia enim sunt peccata

(91) Epist. LXXIX. *ad Oceanum*, n. 5. col. 414.

(92) Quaest. LXXVII. in Genes.

(93) *De doctrin. christ.* lib. III. cap. XII. n. 20.

(94) *De civ. Dei*, lib. XVI. cap. XXXVIII. n. 3.

contra naturam, alia contra mores, alia contra praecepta. Quae cum ita sint, quid tandem criminis est, quod de pluribus simul habitis uxoribus obiicitur sancto viro Iacob? Si naturam consulas, non lasciviendi, sed gignendi causa illis mulieribus utebatur: si morem, illo tempore atque in illis terris hoc factitabatur: si praeceptum, *nulla lege prohibebatur* (95).»

Quid plura? vel ipse Tertullianus, qui montanista effectus polygamiam, ut vidimus, ab initio prohibitam a Deo asseruit, cum adhuc catholicus esset contrarium docuit, scribens: «Sane apud veteres nostros, ipsosque patriarchas, non modo nubere, sed etiam *plurifariam matrimoniis uti fas fuit*. Erant et concubinae... Necessarium fuit instituere, quae postea aut imputari mererentur... Igitur per *licentiam tunc passivam* (96), materiae subsequentium emendationum praeministrabantur, quas Dominus evangelio suo, dehinc Apostolus in extremitatibus saeculi, aut excidit redundantes, aut composuit inconditas (97).» Ex quibus patet ipsum adhuc catholicum non modo permissam, verum etiam *necessariam* putasse institutionem polygamiae, quae postea in evangelio abolenda omnino erat. Sibi praeterea contradicit, dum ex una parte constitutam monogamiae legem affirmat illis verbis: *et erunt duo in carne una*, adeoque reum violatae legis traducit Lamech eo quod duas duxerit uxores, ex altera vero affirmat illis Dei verbis: *crecite et multiplicamini*, licitam effectam polygamiam, dum ait: «Sane *licebit* (polyga-

(95) Lib. XXII. cont. Faustum cap. XLVII.

(96) *Licentiam passivam* Rigaltius sic enarrat: «*Nuptias multiples passim concessas.*» Item etiam La-Cerda sic exponit; qui praeterea verba illa: *Necessarium fuit instituere* ita interpretatur: «Vult scriptor (Tertullianus) *institutam a Deo* polygamiam, ut postea quanta esset vis evangelii nosceretur, reprimentis auctoritate sua luxuriam connubiorum, etiam aliquando licitam. Nollem diceret Tertullianus, *necessarium fuit instituere*: satis erat, *necessarium* fuit permittere.»

(97) Lib. I. *Ad uxor.* cap. II.

mia)...si etiam nunc locus vocis illius, *crescite et multiplicamini* id est, si nondum alia vox supervenit, tempus iam in collecto esse... Ut opinor autem unius et eiusdem Dei *utraque pronuntiatio et dispositio* est, qui tum quidem in primordio sementem generis emisit *indultis coniugiorum habentis*, donec mundus repleretur, donec novae disciplinae materia proficeret: nunc vero sub extremitatibus temporum compressit quod emiserat, et revocavit *quod indulserat* (98).»

Sed quid dicendum de s. Hieronymo, qui eadem ferme Tertulliani verba usurpavit, dum accusat Lamech gravis criminis ob superinductam alteram uxorem contra Dei voluntatem ac legem? Quid de Nicolao I., Innocentio III. et Gregorio IX. qui in eadem fuere sententia? Nam Innocentius III. statuit, quod Deus: «Non dixit tres vel plures, sed duo: nec dixit adhaerebit uxoribus, sed uxori. Nec ulli umquam licuit insimul plures uxores habere, nisi cui fuit divina *revelatione* concessum (99);» et Gregorius IX. scribit de Lamech: «Dum uxorem unam divisit in duas, sanguinarius factus est et virum in suum vulnus occidit (100).»

Dicendum haud aegre haec posse componi dummodo prae oculis tria habeantur, quae valde huic explanandae quaestioni inserviunt; ac *primo* advertimus Deum in primaeva coniugii institutione non modo patefecisse ex intentione ac voluntate sua monogamiam esse servandam, sed praeterea id clarius fuisse significatum per verba in

(98) *De exhortat. castit.* cap. VI.

Atque haec animadvertendum est Tertullianum in libris quos adversus catholicam scripsit ecclesiam acriter adeo perstrinxisse polygamiam, ut damnaret secundas nuptias: siquidem ipse permiscuit polygamiam successivam cum polygamia simultanea, et quasi de una eademque re ageretur, utramque damnat tamquam a Deo quovis tempore vetitam.

(99) Cap. *Gaudemus*, tit. XIX. *De divortiiis*, c. s.

(100) Epist. VI. ad Germanum archiep. graecor. *De unitate ecclesiae*. Apud Labbeum *Concil.* tom. XI. part. I. col. 325. ed. Parisiens.

quae ex Dei ipsius inspiratione Adam prorupit: *et erunt duo in carne una*, adeoque quamdam legem, ut ita dicam *implicitam* vel ab ipso mundi exordio extitisse de unitate matrimonii (101). Attamen lex eiusmodi non erat satis expressa, quod ad legem proprie dictam, omnibus omnino assentientibus, requiritur, ut vim obligandi habeat et sub peccato adstringat. *Secundo* ex divina institutione satis apparebat aequalia iura utrique coniugi convenire, adeo ut unusquisque totus alterius esset, ac mulier viro, ac vir mulieri esset ex aequo mancipatus; quocirca eo ipso quod idem ius utrique coniugi inesset, non poterat vir aliam superinducere nisi ex consensu prioris. *Tertio* ut polygamia certis finibus detineretur, atque non brutorum more, sed prout hominem decet, haberi posset, non libidinis explendae, sed unius procreandae prolis causa legitime poterat admitti (102).

Itaque sine contradictione affirmari poterit vel negari polygamiam esse contra legem, prout legis nomen vel presse vel laxius usurpatur, ac simili modo dicetur vel iusta vel iniusta prout consentiente, aut invita priori uxore frequentata supponatur; itemque honesta vel inhonesta prout eius finis est generis humani multiplicatio, aut licentia. Scilicet ut polygamia a crimine violatae legis divinae immunis credatur tres conditiones omnino requiruntur, ut nulla explicita lege vetetur, ut uxor expresse vel tacite consentiat (103), ut finis sit honestus: quod si

(101) Huc referuntur, quae conc. tridentinum sess. XXIV. exhibens doctrinam de sacramento matrimonii protulit: «Matrimonii perpetuum indissolubilemque nexum primus humani generis parens divini spiritus instinctu pronuntiavit, cum dixit: *Hoc nunc os ex ossibus meis...et erunt duo in carne una*. Hoc autem vinculo *duos tantummodo* copulari et coniungi, Christus Dominus *apertius* docuit, cum postrema illa verba, tamquam a Deo prolata, referens, dixit: *Itaque iam non sunt duo sed una caro.*»

(102) Cf. Merlin Diss. cit. §. IV.

(103) Nonnulli tamen hanc conditionem utpote non necessariam respuunt.

una ex his conditionibus desit, si ad libidinem potius quam ad multiplicationem humani generis adhibeatur, si primae uxori afferatur iniuria, si ratio habeatur legis, sin minus explicitae, saltem implicitae, tum enimvero eadem polygamia inhonesta dicetur, contra fas et ius, et contra spiritum legis, atque aliquo vero sensu illegitima.

Hisce ita praestitutis, pronum iam erit patrum dicta, quae sibi invicem pugnancia videntur, inter se componere. Nam vidimus s. Hieronymum in gratiam multiplicationis humani generis uti licitam sive ante sive post diluvium polygamiam habuisse. Quod si arguit Lamech verbis a Tertulliano usurpatis, non eadem mente ac Tertullianus montanista id praestitit, sed quod libidinis explendae causa alteram uxorem duxerit, prout pessima viri huius agendi ratio suadet; alioquin s. Doctor sibi haud cohaereret.

Tres vero commemorati pontifices rationem habuere primigeniae matrimonii institutionis, ac proinde satis manifestae divinae voluntatis circa monogamiam et Dei legis lato sensu acceptae; non autem loquuntur de expressa Dei lege, quae nusquam apparet. Eodem vero sensu improbant factum Lamech ac s. Hieronymus cuius verbis utuntur (104).

Ex eo vero quod affirmavimus in altera animadversione de consensu prioris uxoris, atque ex cessione iuris quod ea acquisivit super maritum, hunc potuisse secundas et posteriores nuptias inire, non sequitur posse uxorem de consensu mariti alium virum ducere. Nam distinguere oportet inter ea iura, quae natura *exigit*, ab eis quae

(104) Non desunt interpretes, qui sub hoc respectu Lamech excusent. Inter quos Mersennius *Quaest. et Comment. in Genes. ad cap. IV. Quaest. 54. n. 191.* scribit: «Probabilius mihi videtur nec Lamechum ideo peccasse, quia duas uxores habuit, nec polygamiam in statu legis naturae corruptae ante diluvium prohibitam fuisse...immo ex patriarcharum post diluvium viventium exemplo satis conicio id non minus licitum fuisse ante diluvium, quia par erat propagandorum individuorum necessitas.»

natura *concedit*. Ius prioris generis habetur ut medium necessarium fini obtinendo, quem natura ipsa intendit; ut medium vero non omnino necessarium, at naturaliter utile ius habetur alterius generis. Iam vero ius quod habet maritus possidendi solus uxorem ius est prioris speciei, quia pluralitas virorum contraria est generationi et propagationi generis humani, quae est finis coniugii primarius et a natura intentus. Contra vero ius quod habet mulier possidendi sola maritum est alterius speciei, quia uxorum pluralitas fini primario matrimonii minime adversatur. Quod vero attinet ad fines secundarios, ii, licet aegre, absolute tamen, cum coniugio polygamo consistere possunt. Quo fit, ut uxor quidem cedere possit iuri suo, nequeat autem maritus. Quia cum agitur de iure mariti, agitur de bono naturae, quando autem de iure agitur uxoris, agitur potissimum de bono personae; hinc, nisi lex positiva aliqua obstet, prout obstat evangelica, potest utique uxor ius suum alii participare. Quapropter duplex etiam distingui potest polygamia, in quarum altera violatur ius quod acquisivit uxor possidendi sola maritum; quod si fiat, polygamia etiam ex lege naturali evadit illicita ac iniusta; altera vero in qua uxor sponte, nulla obsistente positiva lege, ut dictum est, iuri suo cedit, et haec spectato naturali iure, licita evadere potest. Prior polygamia intelligi debet damnata verbis illis Geneseos: *et adhaerebit uxori suae, et erunt duo in carne una*.

Quo sensu reipsa ea exposuit s. Io. Chrysostomus scribens: «Ea quae ab ipso sunt dicta de non repudianda uxore, non modo non repugnant, verum etiam valde cum Moyse conveniunt; considerandum autem est, quod non solum ab opificio, verum etiam ab ipso praecepto sententiam suam corroborat; non enim dixit, quia virum et mulierem unam solummodo fecit, verum etiam quia iussit, ut unus uni coniugatur. *Nam si voluisset alteram etiam*

conducere uxorem, uni viro creato, multas conformasset mulieres: nunc vero et creationis et sanctionis modo, unam uni perpetuo coniungi et numquam rescindi oportere perdocuit (105).» Ex quibus patet s. Io. Chrysostomo hanc stetisse mentem, solam illam polygamiam vetitam fuisse, quae induceretur ad divortium seu repudium faciendum prioris uxoris, adeoque laesione illius iuris quod haec acquisierat. Non sibi proinde contradicit, cum scribit olim polygamiam fuisse permissam illis verbis, quae nuper attulimus: «*Quia principia erant, permissum fuit (106).*»

Sic etiam s. Augustinus legitimam pro illa aetate pronuntiavit polygamiam, quae de consensu prioris uxoris fieret, ut liberi essent utrique quodammodo communes. En eius verba: «*Plane uxoris voluntate adhibere aliam, unde communes filii nascantur unius commixtione ac semine, alterius autem iure ac potestate, apud antiquos patres fas erat (107).*» Eadem ratione alibi idem s. Pater loquitur «*Nullam Iacob legitur petiisse praeter unam, nec usus plurimis nisi gignendae prolis officio, coniugali iure servato, ut neque hoc faceret, nisi uxores eius id fieri flagitassent, quae corporis viri sui habebant legitimam potestatem (108).*» Unde vero habuerunt uxores, seu potius prior uxor Iacob hanc legitimam habuit potestatem super corpus eius, nisi vi legis in Genesi promulgatae: *Adhaerebit uxori suae, et erunt duo in carne una?* Et iterum: «*Obediens (Abraham) coniugi, quae suae sterilitatis credidit esse solatium, si foecundum ancillae uterum, quoniam natura non poterat, voluntate faceret suum (109).*»

(105) Item LXIII. in Matth. n. 1. ed. Nivelli 1581. ed. autem Maur. Hom. LXII.

(106) Hom. LVI. in Genes. l. c.

(107) *De bono coniugal.* cap. XV. n. 17.

(108) *De civit. Dei*, lib. XVI. cap. XXXVIII. n. 3.

(109) Ibid. cap. XXV. Haec melius declaravit s. Doctor lib. XXII. *Cont. Faustum*, c. XXXI. scribens: «*Quis enim nescit uxorem marito tanquam domino debere servire? Sed quod ad membra corporis attinet, quibus sexus ipse*

Si igitur ex communi patrum doctrina polygamia simultanea in qua tres recensitae conditiones concurrerent nulla erat positiva atque expressa lege divina prohibita, adeoque licita per se erat sive ante sive post diluvium ob propagationem humani generis, iam patet nulla opus fuisse peculiari dispensatione ad eam frequentandam (110).

Sane huiusce dispensationis nullum occurrit in sacris litteris vestigium. Nonnulli quidem eam deprehendere visi sunt in eo quod dixit Deus ad Abraham: «Omnia, quae dixerit tibi Sara, audi vocem eius (111).» Porro Sara fuit, quae Abrahae dixit: «Ingredere ad ancillam meam (Agar), si forte saltem ex illa suscipiam filium... et dedit eam viro suo uxorem (112).»

At quibus hoc persuadebunt? Illa enim priora verba dicta sunt Abrahae relate ad eiectionem Agar et Ismaelis de domo sua, nec ullam relationem habent ad ea, quae ante plures annos dixerat Sara de congressu cum Agar.

Quin potius videmus Scripturam loqui de polygamia tamquam de re quae per se liceret; Pharaon a Deo flagellatus perhibetur, non quod alteram uxorem superinduceret, sed quod tulerit Saram iam matrimonio Abrahae copulatam (113). Idem dic de Abimelech rege Gerarae respectu Rebeccae uxoris Isaac (114). Et reipsa reperimus sanctos

distinguitur, Apostolus dicit, *Similiter et vir sui corporis potestatem non habet, sed mulier, ut cum in ceteris actibus ad humanam pacem pertinentibus mulier viro debeat servitutem, huius unius rei, qua sexus utriusque carnali sorte discernitur, et carnali commixtione concernitur, similem in se habeant potestatem, vir in uxorem, et uxor in virum. Prolem igitur quam de se habere Sara non poterat, de ancilla habere voluit.*

(110) Mirum videri debet recentiores non paucos theologos in adductis verbis Geneseos: *adhaerebit uxori suae, et erunt duo in carne una* legem, eamque positivam et expressam de qua loquimur, agnovisse de monogamia, quam patres ignoraverunt, adeo ut licet ipsis eadem verba comperta fuerint, tamen pronunciarint directe polygamiam *nulla fuisse lege prohibitam.*

(111) Genes. XXI. 12.

(112) Ibid. XVI. 2.

(113) Genes. XII. 17 seqq.

(114) Ibid. c. XXVI. 7 seqq.

viros data occasione, quin revelatio aut inspiratio requireretur, aut expectaretur, se pluribus uxoribus coniunxisse. Laban obtulit Iacob in coniugium Rachel post Liam, neque Iacob huic obstitit propositioni neque id illicitum esse reposuit (115). David cognita morte Nabal, viduam eius Abigail petiit ad nuptias, quin tamen prudentissima foemina quidpiam regeret. Quid plura? Esther coniugio traditur a Mardocheao regi Assuero, qui tamen ad populum Dei profecto non pertinebat, quique iam cum pluribus aliis uxoribus iunctus erat, et ita porro.

Nec sancti patres aliquando de eiusmodi sive revelatione sive inspiratione divina quidpiam suspicati sunt, sed absolute penes veteres polygamiam permissam tradiderunt, immo etiam quodammodo insinuatam. Constat enim ex allatis testimoniis Tertullianum dixisse quod hunc polygamiae ordinem ante Evangelium *necessarium fuit instituere*; Clementem alex. affirmasse illam a *Deo permissam*, et quod *Deus id exigebat quando oportebat augeri et multiplicari*; Chrysostomum et Theodoretum absque ambage scripsisse *fuisse permissam*; s. Hieronymum *viguisse* vi illius sententiae, *crescite et multiplicamini* prolatae tum ante tum post diluvium; s. Augustinum asseruisse Abraham *nihil contra mores et praecepta fecisse*, eo quod *mos ille obtinuerit, et nulla lege prohiberetur*.

Quod si nulla contra polygamiam existeret lex positiva, si eam insuper exigere videbatur (quodammodo) praeceptum de humani generis multiplicatione in illis mundi primordiis ex doctrina patrum, non video opus fuisse aliqua divina revelatione aut inspiratione, ut eadem licite frequentaretur. Quod si s. Augustinus alicubi scribit de Abraham «Non suae carnali cupiditati cessit, sed conjugali potestati obtemperavit; *credens hoc Saram ex Dei nutu voluisse*, qui iam ex se ipso illi haeredem promiserat.

sed *ex qua foemina non praedixerat* (116);» ut patet ex contextu significare haud voluit s. Doctor Abraham credidisse licitam sibi fore coniunctionem cum Agar eo quod Sara sive revelationem sive inspirationem habuerit, quando ei suggessit ut Agar coniungeretur, sed id solum significare voluit sanctum patriarcham putasse in consilio Sarae executionem contineri divini illius promissi: «Egredietur de utero tuo (filius), ipsum habebis haeredem (117);» quum enim Deus tunc ei nondum patefecisset utrum hunc filium suscepturus esset ex Sara, an vero ex alia uxore, ideo in animum induxit suum *Dei nutu* Saram voluisse ut alteri coniungeretur (118).

Iam ut aliquid innuamus de doctrina, quae etiam in scholis catholicis viguit, certe non pauci, neque infimi gradus theologi sententiae hactenus expositae adhaeserunt. Nam polygamiam ante legem evangelicam permissam fuisse, nullaque positiva et expressa lege fuisse prohibitam, adeoque ad eam consecrandam, nullam necessariam fuisse dispensationem aut revelatione aut inspiratione divinitus manifestatam tenuerunt unanimes Durandus (119), Tostatus, qui prae omnibus copiose de hoc egit argumento, cumque ostendisset nulla opus fuisse veteribus dispensatione divina ad plures simul ducendas uxores eo quod nullo sive naturali sive divino iure positivo id prohiberetur, solvit difficultatem petitam ex Innoc. III. cap. *Gaudemus, quod non licuit alicui sive reve-*

(116) Lib. XXII. Cont. *Faust.* c. XXXII.

(117) Genes. XV. 4.

(118) Sane iuxta s. Augustinum Abraham prius putavit promissi generalis divini de multiplicatione posteritatis suae adimplementum haberi potuisse in adoptato servo suo Eliezer, ut indicat quod cum Deo loquens, ait de vernaculo suo, *hic erit meus haeres*, tamquam diceret, ait s. Augustinus, «quia de meipso mihi semen non dedisti, in isto comple.»

(119) In 4. Sentent. d. 33. q. 1. ubi quaerit «Utrum quandoque licitum fuerit habere duas uxores *absque omni dispensatione*; respondet vero affirmative, eo quod polygamia nulli legi sive naturali, sive divinae adversaretur.

latione unquam accipere plures uxores simul. Exponit autem dictum pontificis «de illis, quibus constabat esse contra ius naturale, et contra ius divinum expressum verbo et opere ostensum: ut apparet ex probationibus illis quas inducit. Si quis tamen illas ignoraret, cum non esset datum aliquod praeceptum expressum de hoc: neque lex naturalis determinate ad hoc cogeat, non peccabat accipiendo plures uxores.» Hactenus ille (120), Palacios (121), Veracruz (122), Maldonatus (123), Mersennius (124), aliique (125).

Inter se autem utriusque placiti argumenta conferentes,prehendimus auctoribus, qui propugnant polygamiam lege divina antiquitus interdictam fuisse, nulla suffragari Scripturarum testimonia, ea autem verba quae ex Bibliis proferuntur de primaeva coniugii institutione, ostendere quidem monogamiam conformem esse divinae intentioni per eam patefactae, non autem legem expressam et positivam praeserere; immo quadantenus elidi ex iis verbis sive benedictionis sive praecepti: *Crescite et multiplicamini et replete terram.* Prehendimus etiam Scripturam exhibere polygamiae usum seu morem ubique in regionibus orientalibus primis temporibus receptam, quin ullum appareat dispensationis divinae vestigium, adeoque sanctissimos patriarchas in polygamia consecranda morem consuetudinemque pro aetate illa, atque illis in regionibus

(120) In cap. XIX. Evang. Matth. q. 33. et 34. ubi diligenter discutit rationes omnes quibus nonnulli permoti contenderunt necessarium fuisse ad licite utendum polygamia aliqua sive revelatione sive saltem inspiratione divina; utramque autem excludit. Sed ipsum adis.

(121) *Enarrationes* in Iesu Christi Evangelium secundum s. Matth. Coloniae Agripp. 1566. disp. I.

(122) *Speculum coniugiorum*, Mediol. 1599. part. II. art. 15. ubi prae ceteris ulterius progreditur. Cf. pag. 218 seqq.

(123) *De matrimonio*, quaest. 1. ad IV. argum. Opp. theologic. Lutetiae Paris. 1677. in fol. tom. II. pag. 435 seq.

(124) *Quaestiones in Genes.* Lutet. Paris. 1623. vol. un. in fol. in cap. IV. Genes. Quaest. LIV.

(125) Qui ab his ipsis allegantur quos recensuimus.

obtinebat, fuisse secutos. Deprehendimus illam postea a Moyse ipso fuisse in lege *sancitam*, qui regulas tantum praescribit ad eius abusum praecavendum (126). Deprehendimus patres omnes contrariae sententiae adhaesisse, quod nec adversarii dissimulant (127).

Ceterum quae pro contraria sententia adducunt auctores de quibus agimus ex Matth. XIX. ex trium rom. pontificum decretalibus, atque ex conc. tridentino optime, ut vidimus, componi possunt cum patrum doctrina, dummodo prae oculis habeantur tres animadversiones, quas huic disceptationi praemisimus.

Imo non aegre componitur cum sententia Bellarmini, qui cap. XI. contendit veteres patriarchas licite polygamiam frequentasse ex dispensatione quam habuerunt *per*

(126) Dixi a Moyse fuisse polygamiam probatam, de quo nullum dubium esse potest. Non desunt tamen, qui contendant postremis iudaicae reipublicae temporibus etiam apud hunc populum illam in desuetudinem abiisse. Quod quidem aliquo sensu admitti posse videtur; nam cum iudaeis dominarentur, iisque permixti essent romani qui monogamiam consectabantur, nullum dubium est quin istorum mores sive in bonum, sive in malum vim quamdam exercuerint, adeoque certe minus frequens erat penes iudaeos polygamia; attamen non omnino cessavit. Etenim Iosephus Flavius lib. XVII. *Antiquit.* c. 1. testatur adhuc sua aetate eam viguisse scribens: «Nam mos nobis est patrius eodem tempore plures habere uxores» Πάτριον γὰρ ἐν ταύτῳ πλείοσιν ἡμῖν συνοικεῖν. Et mox Herodis magni novem coniuges memorat. Immo et aliquanto post s. Justinus in *Dial. cum Tryphone* n. 134. adhuc exprobrat iudaeis, quod rabbinorum suorum doctrina decepti quatuor aut quinque uxores ducerent, inquires: «Satius est ut Deum sequamini, quam imprudentes et caecos magistros vestros, qui sane ad hanc usque diem *et quatuor et quinque* uxores habere unicuique *permittunt*: et si quis venustam inspiciens eam concupiverit, Iacobi, qui Israel dictus est, et aliorum patriarcharum facta commemorantes, ac negantes peccare si quis similia faciat.» ed. Theod. Otto Ienae 1849. tomi I. part. I. pag. 447 seqq. Cf. etiam notas hic appositae ex Seldeno et Maimonide.

(127) Sane Collet cap. V. *De unitate matr.* sect. I. §. ult. n. 71. scribit: «Dubitari tamen possit an patres omnes, Augustinus praesertim, et Theodoretus tam dure de polygamia vel ipsius Lamech sensit, cum generatim eam nulla lege prohibitam esse dicant. At haec eorum verba ad tempus patriarcharum referri possunt. Fieri potest, ut in rebus non absolute malis idem quandoque prohibeatur, quandoque toleretur.» Sed quando prohibita fuerit, non ostendit. D. vero Carrière n. 176. loquens de p. Merlin subdit: «Ait hanc esse ss. patrum sententiam, et quosdam textus citat, qui huic revera sententiae favere videntur.»

internam divinam inspirationem, quin ullum huius assertio-
nis documentum proferat. Innocentius vero III. si eius
urgeatur auctoritas, postulavit non simplicem *inspirationem*
sed *revelationem*, quam tamen non requirit Bellarminus
qui praeterea fatetur polygamiam non adversari nisi fini-
bus secundariis matrimonii.

Concludamus igitur adversus Calvinum eiusque asse-
clas, Bayle praesertim, veteres patriarchas non modo in
naturae ius presse sumptum polygamia non peccasse, sed
neque in legem aliquam divinam positivam, quae eam
vetuerit.

ARTICULUS IV.

Polygamia simultanea in lege Evangelica omnino est abolita, adeo
ut christiani Matrimonii proprietates prima
ac inviolabilis sit unitas.

Viam calvinistis oppositam iniverunt lutherani circa
polygamiam. Dum enim illi, Calvino duce, polygamiam iuri
presse naturali, atque divino contrariam pronunciarunt,
adeo ut reos violati utriusque iuris veteres patriarchas
inclamaverint, isti, Luthero magistro, eandem polygamiam
sub lege ipsa evangelica permissam quandoque, licitamque
adstruxerint. Cunctanter quidem ab initio, latenterque, ne
rei novitate nondum satis praeparatos christianorum ani-
mos offenderent, ut patet ex ratione qua sese gesserunt in
facultate danda secundarum nuptiarum Landgravio Hassiae;
deinde vero pedetentim magis ac magis eiusmodi doctrina di-
latata est ac disseminata, ita ut Lutheri apologiam conficere
in memorato Philippi facto eius discipuli susceperint (128).

(128) Inter quos eminent Seckendorffius lib. III. *Lutheranismi*; p. 277 seqq.
Cotta in editione *Locorum theolog.* I. Gerhardi tom. XV. Tubing. 1776. pag. 194.
Alex. Müller *Encyclopedisches Handbuch des Kirchenrechts seu Manuale en-
cyclopedicum ecclesiast.* Erfurt 1829. pag. 112. Monumenta porro hac de re iuris
publici fecere Ernestus princeps ex Philippi posteris, Carol. Ludovicus comes Pa-

Quod si in praxim eiusmodi doctrina non deducitur ideo est, quod vehementer obstet conscientia christiana, nec mores europaei illam ferant.

Verum quod lutherani vix pertentarent, nunc quovis pudore abiecto mormonitarum secta aperte profitetur, palamque consecatur. Nova haec secta, quae originem habet a quodam Iosepho Smith in provinciis foederatis Americae septentrionalis an. 1830. disseminari coepit (129) sub no-

latinus praeter Bossuetum sub finem lib. VI. *Hist. des variations*, Oudin *Hist. de la vie de Luther*. ed. V. Paris 1845. tom III. ch. XXI. *Bigamie du Landgrave de Hesse*, pag. 443 seqq. aliiq. passim.

(129) Haec secta brevi magnum incrementum accepit, prout refert ipsemet Smith in epistola data ad Danielelem Rupp. Cf. *Opus An original history of the religious denominations at present existing in the Unites States*. Philadelphia 1844. pag. 404 seqq.

Epistola de qua loquimur sic incipit: «Ecclesia Iesu Christi sanctorum novissimorum dierum, fundata fuit ex directa revelatione, sicut semper fuit vera Dei ecclesia secundum scripturas (Amos III. et Act. I.) Ex Dei voluntate ac beneficio, Ego hactenus fui in eius manibus instrumentum ad promovendam causam Sion. Itaque incipiam a vitae meae narratione.»

Narrat porro se credidisse et sperasse in verbo Dei, *si quis indiget sapientia postulet a Deo* (Iac. I.), adeoque quum videret tot in religione dissensiones se ad orationem contulisse, ut immediate a Deo doceretur; tum die 21. Septembris an. D. 1823. visionem Angeli habuisse, qui nunciavit tempus adesse ut testamentum Dei cum Israel completeretur, secundum Messiae adventum prope esse, iamque Evangelium in sua plenitudine nationibus praedicatum esse, ut populus ad regnum millenarium praepararetur. Narrat post multas angelorum visiones revelationesque de novissimis diebus, ab Angelo habuisse aureum prophetarum librum characteribus aegyptiis exaratum, qui per plura secula in tellure delituerat, quem ipse perlegit ope pellucidorum lapidum, quos ab Angelo accepit, quosque Hebraei *Urim et Thumim* vocaverant, quemque ex Dei virtute anglice vertit. In eo libro narratur colonos in Americam primo ex turri Babelica, dein ex Hierusalem venisse, potissimum Israelitas ex stirpe Iosephi. Christum post resurrectionem suam ibi, nempe in America, apparuisse, ac religionem non secus ac in nostra continenti regione fundasse, apostolos, prophetas doctoresque statuisse; populos dein a religione defecisse, ac ultimum prophetam Mormonem divinitus librum scripsisse, qui novissimis diebus e telluris sinu effodi debebat, ac Bibliis addi tamquam eorum complementum.

Post haec somnia, novae ecclesiae propheta Iosephus Smith narrat die 6. April. 1830. ecclesiam, ut ait, Iesu Christi sanctorum novissimorum dierum fundatam fuisse in urbe Manchester in statu Neo-Eboracensi, per prophetiam et revelationem et impositionem manuum ministros creatos fuisse, novumque Evangelium fuisse praedicatum, atque ecclesias pluribus in Statibus Americae institutas fuisse, potissimum in Statu, qui dicitur *Missouri*: Quum vero *Sancti* qui mirum in modum

mine *sanctorum novissimorum dierum*. Isti vero *novissimi sancti* ex prophetae seu praesidis sui venia tres, quatuor, aut plures ducunt uxores, repudiant aut immutant prout ipsis libuerit. Hac de causa difficultatem maximam experiuntur in secta propaganda penes gubernia, quae eiusmodi scandalum tolerare nolunt.

Iam ut ad rem accedamus, praeter polygamiam formalem simultaneam vi cuius uno eodemque tempore vir unus plures simul uxores retinet, altera distinguenda est, cum secunda ducitur uxor priori adhuc vivente, sed per divortium repudiata, aut coniugio quavis de causa dissoluto.

Iam vero prior polygamia, si excipias, ut diximus, mormonitas, nullibi apud protestantes obtinet: at posterior penes eosdem communis est, immo etiam apud illos catholicos populos in quibus viget lex de matrimonio civili, ut in primo libro ostendimus. Nam eadem ratione, qua civilis codex sancit matrimonium civile, sancit etiam sub datis conditionibus coniugii dissolutionem, adeoque is qui priorem coniugem repudiavit, vi eiusdem legis aliam ducere potest, priori adhuc superstite; et hac ratione polygamia simultanea apud ipsos christianos invehitur.

Quum igitur dicimus polygamiam simultaneam in lege evangelica abolitam esse, de utraque polygamiae specie haec recensita disserimus; siquidem non minus posterior quam

excreverant, inde fuerint per vim expulsi, ad statum qui *Illinois* dicitur, se receperunt, ubi urbem aedificarunt quam *Nauvoo* appellarunt, quae cito numeravit quindecim millia incolarum ad novam hanc Sion ex variis Americae Statibus, nec non ex Anglia, Scotia et Hibernia aliisque locis accitorum ad novi Evangelii praedicationem.

Hactenus Iosephus Smith in citata epistola. Nonnulla praeterea paulo inferius hac de secta innuemus. Interim compertum est primam originem tot tantarumque fraudum ac illusionum, fuisse manuscriptam fabulam (Romanzo) sub initio huius saeculi a ministro protestante ingeniose elaboratam quae in Iosephi Smith manus devenit, in qua decem tribuum Israel in Americam emigratio, earum vicissitudines, futuriq; eventus biblico prophetarum stylo describebantur. Cf. *Harpers New monthly Magazine*. New York 1853. vol VI. *The Mormons* pag. 607.

prior a Christo Domino repudiata est. Quod ut evincamus doctrinam exhibebimus, quae in sacris novi foederis litteris continetur; exhibebimus constantem ecclesiae sensum, ac demum eiusdem perpetuam praxim, quae nobis germanam divinorum oraculorum intelligentiam suppeditat.

Porro licet Christus Dominus directe Matth. XIX. 3. seqq. indissolubilitatem vinculi coniugalis statuatur per abolitionem libelli repudii, attamen negari nequit unitatem etiam matrimonii statuisse, quatenus coniugium revocavit ad primaevam suam conditionem, scilicet ad monogamiam, quae inter protoparentes fuit constituta. Verba Christi sic se habent: «Non legistis, quia qui fecit hominem ab initio, masculum et foeminam fecit eos? et dixit: Propter hoc dimittet homo patrem et matrem, et adhaerebit uxori suae, et erunt duo in carne una. Itaque iam non sunt duo, sed una caro. Quod ergo Deus coniunxit, homo non separet. Dicunt illi (pharisaei): Quid ergo Moyses mandavit dare libellum repudii et dimittere? Ait illis; quoniam Moyses ad duritiam cordis vestri permisit vobis dimittere uxores vestras: ab initio autem non fuit sic. Dico autem vobis, quia quicumque dimiserit uxorem suam, nisi ob fornicationem, et aliam duxerit, moechatur, et qui dimissam duxerit, moechatur.»

Quid sibi velit et quo spectet illa exceptio de fornicatione suo loco expendemus. Interim ex toto contextu patet Christum ad primaevam institutionem coniugium revocasse, in qua non nisi unus ^{foris}uni_{us} coniunctus fuit, et praeterea per posteriora verba constituisse, ut primordialis illa institutio deinceps, nulla interposita excusatione, secus ac in lege mosaica acciderat, perfecte servaretur, ita ut nullo umquam in casu, ne fornicationis quidem, fas esset viro duas aut plures uxores habere, sive dimissa sive retenta adultera uxore, adeoque quicumque id attentaret se reum adulterii constitueret.

Quod quidem clarius adhuc ex locis parallelis Marci et Lucae dignoscitur. Nam nulla adiecta conditione Christus Marc. X. 11. absolute pronunciat: « Quicumque dimiserit uxorem suam, et aliam duxerit, adulterium committit super eam, » id est *contra eam* (130); et apud Lucam XVI. 13. « Omnis qui dimittit uxorem suam et alteram ducit, moechatur, et qui dimissam a viro ducit, moechatur. » Si proinde absque piaculo quocumque in casu non licet alteram ducere uxorem, profecto monogamia ita sancita est, ut polygamia in lege christiana omnino sublata haberi debeat.

Christi praeterea sententiam Apostolus tum in Epist. ad Rom. tum in Epist. I. ad Cor. nobis declarat, dum omni exceptione remota infinite pronunciat: « Igitur vivente viro, vocabitur adultera, si fuerit cum alio viro; si autem mortuus fuerit vir eius, liberata est a lege viri, ut non sit adultera, si fuerit cum alio viro (131). » Et « Iis autem qui matrimonio iuncti sunt, praecipio, non ego, sed Dominus, uxorem a viro non discedere; quod si discesserit, manere innuptam aut viro suo reconciliari (132). » In priori testimonio cum praemiserit Apostolus ea verba: *Scientibus legem loquor*, patet ipsum alludere ad primigeniam matrimonii institutionem, qua matrimonii tum unitas, tum indissolubilitas constituta est, quamque Christus confirmavit Matth. XIX. 6. dum reiecto libello repudii a Moyse permissio, voluit ut ad pristinam conditionem coniugium revocaretur, ad perfectam scilicet unitatem et ad perpetuam indissolubilitatem. Quo fit, ut sive vir sive mulier numquam possint alteri coniungi, quacumque demum ex causa contigerit ut invicem separentur; quod si alteri coniungantur, semper debeant rei adulterii censi. Adulterium

(130) Cf. Maldonat. in Matth. XIX.

(131) Rom. VII. 3.

(132) I. Cor. VII. 10.

vero non haberetur, si liceret sive alterum virum, sive alteram ducere uxorem.

Dixi Apostolum hoc in loco alludere ad primaevam matrimonii institutionem a Christo confirmatam; alioquin cum ex lege mosaica non esset censenda adultera mulier, quae dimissa a marito alteri nuberet, falsum esset Apostoli assumptum, quod impium est cogitare, adeoque iure affirmavi Apostolum declarasse Christi sententiam de monogamia in sua lege servanda (133).

In altero autem testimonio cum aperte pronunciet idem Paulus: «*Praecipio non ego sed Dominus uxorem a viro non discedere; quod si discesserit, manere innuptam,*» evidens est ad legem eum respicere Matth. XIX. Marc. X, et Luc. XVI. a Christo latam de monogamia, vi cuius numquam fas est alteri nubere in vivis adhuc agente sive marito sive uxore. Nec obstat quod Apostolus solius uxoris mentionem iniiciat quasi nimirum viro liceat quod mulieri prohibetur (134). Nam ut liquet ex orationis serie Apostolus in eadem conditioe tum viri tum mulieris ius constituit, siquidem commate insequenti constituit nec virum fidelem debere *dimittere* infidelem mulierem; nec mulierem fidelem *dimittere* virum infidelem, si pars infidelis consenserit pacifice habitare eum parte fideli. Pares itaque fecit Apostolus virum et mulierem quoad dimissionem; adeoque pares fecit quoad conditionem ne iterum nubant, dimissione

(133) Cf. Estium *Comment.* in Epist. ad rom. ad h. l. item Bernard. a Piconio.

(134) Prout Ambrosiaster, et post ipsum Caietanus et Catharinus volvere, in quo turpiter lapsi sunt; horum expendemus sententiam, cum de indissolubilitate agemus vinculi coniugalis. Ceterum id vel ipsi expositores protestantes immo et rationalistae viderunt. Nam in recensione Koppiana Dav. Iul. Pott vol. V. part. I. Gottingae 1826. in hunc loc. cum Grotio sic adnotat. «Si hoc Christus viro dixit, cui tantum iuris dederat lex Mosis, quanto magis idem intelligi debet de foemina, cui lex Mosis nihil tale concesserat? Eadem ergo tolerantia quam in exercenda lege Mosis Christus viris praescripserat, multo iustius erat observanda foeminis, quibus ius a marito discedendi dabat non lex Mosis, sed romanae et graecae leges, illorum populorum ingeniis aptatae?»

secuta. Ideo vero de sola muliere, non autem de viro, locutus est Apostolus in cit. textu, quia ut animadvertit Estius, illud intelligendum ac supplendum reliquit ex superiori membro; praesertim cum id de viro satis fuisset a Christo Domino expressum (135). Haec vero Christi doctrina alte adeo defixa fuit christianorum menti ab ipsis ecclesiae primordiis, ut numquam in universa traditione et in ecclesiae praxi reperiamus ab ea declinatum fuisse, quod tum negative tum positive constat.

Negative quidem, quatenus nullum documentum ecclesiasticum pro contraria doctrina afferri umquam possit, et quamvis lutherani solliciti maxime fuerint in hoc conquiro, tamen eo pervenire non potuerunt, ut vel unum invenirent; si quod autem ab ipsis opponitur, ex eiusdem examine patebit aut nullum, aut ita aequivocum esse, ut argumentum ex eo deduci nequeat.

Contra vero positive luculentissimis fulcitur doctrina catholica testimoniis ac documentis, quae omnem vel umbram dubitationis tollunt. Nempe altas adeo radices monogamia in ecclesia fixerat ex Christi doctrina, ut non pauci in alteram partem declinare visi sint, ita ut sin minus oppositam, saltem ut minus Christi doctrinae conformem traduxerint ipsam polygamiam successivam. Verum hisce dimissis, quorum germanam mentem postea expendemus, nonnulla speciminis gratia afferemus ex veteribus documentis, quae directe ac propius ad rem nostram conficiendam inserviunt.

Itaque Hermas vir apostolicus « Dic, inquit, si vir vel mulier alicuius decesserit, et nupserit aliquis illorum, numquid peccat? Qui nubit non peccat, inquit (Angelus); sed si per se manserit, magnum sibi honorem acquirit (136). »

(135) Estius in h. loc. Id ipsum iam notaverat s. Augustinus, lib. I. *De serm. Domini in monte*, capp. 14. et 16. recolatur nota praecedens.

(136) In *Pastore*, lib. II. Mand. IV. n. 4. ed. Cotel.

Adeo nempe commendat hic auctor monogamiam, ut superstitem coniugem post alterius obitum vel a successiva polygamia dedoceat.

Theophilus antiochenus scribit: Apud christianos «temperantia adest, continentia exercetur, *monogamia servatur*, custoditur castitas (137).»

Clemens alex. «Sed idem vir et Dominus (Christus) non amplius concedit polygamiam. Tunc enim (in antiqua lege) *id exigebat Deus*, quando oportebat augeri et multiplicari. Monogamiam autem introducit propter liberorum procreationem et domus curam gerendam, ad quam data est mulier adiutrix (138).»

Athenagoras ita institutos ait christianos, «Ut quisque vel qualis natus est, maneat, vel *unicis in nuptiis...* Quicumque enim dimiserit, inquit (Christus), uxorem suam et aliam duxerit, moechatur, nec eam dimitti sinens, cuius virginitati finem quis imposuit, nec aliam insuper duci (139).»

Tertullianus adhuc catholicus in Apologetico «Christianus, inquit, uxori suae soli masculus nascitur (140).»

S. Iustinus «Quemadmodum, ait, etiam ii, qui ex lege humana duplex matrimonium ineunt, ita et qui mulierem adspiciunt ad concupiscendum eam, peccatores sunt apud magistrum nostrum (141).» *Duplicis autem matrimonii* seu

(137) *Ad Autolyicum*, lib. III. n. 15. ed. Galland.

(138) *Strom.* lib. III. ed. Paris. 1641. p. 461. Disp. autem hoc in loco Clemens adversus Tatianum damnantem nuptias ut impuras. Eadem habet p. 457. 459. 464.

(139) In *Legatione pro Christ.* n. 33. ed. Maran.

(140) Cap. XLVI. ed. Rigalt.

(141) Apolog. I. n. 15. ed. Maran; in quem loc. Cf. eiusdem editoris notam, qua ostendit loqui hic s. Martyrem de secundis nuptiis quas quispiam contraheret vivente adhuc priori coniuge, prout permittebant leges humanae, ipse autem damnat iuxta doctrinam christianam adulterii. Hanc eandem interpretationem probavit Theod. Otto secus ac contenderet Braunius, qui hunc locum exposuit de polygamia successiva; ita etiam cum Marano hunc textum exposuere Thirbius et Ritterus. Cf. *s. Iustini opera*, ed. I. C. Th. Otto ed. 2. Jenae 1847. tom. primi part. I. pag. 38.

διγαμίας nomine heic s. Martyr significat secundum matrimonium, quod iuxta leges romanas quispiam, repudiata priori uxore cum altera iniret, quod christianis vetitum esse affirmat. Sane inter sacrorum eloquiorum oracula, quae praemittit, illud etiam profert ex Marci X. *et qui ducit repudiatam ab altero viro moechatur.*

Minucius Felix scribit: «Unius matrimonii vinculo libenter inhaeremus. Cupiditatem procreandi, aut *unam scimus*, aut nullam (142).»

Et haec ex primis tribus ecclesiae seculis; nam quod attinet ad secula posteriora, vulgatissima sunt ac omnium trita manibus testimonia concilii milevitani, ss. Ambrosii, Hieronymi, Augustini, Innocentii I. qui Christi et Apostoli doctrinae innituntur in praedicanda monogamia. Etenim conc. milevitanum «Placuit, inquit, ut secundum evangelicam et apostolicam disciplinam, neque dimissus ab uxore, neque dimissa a marito alteri coniugatur; sed ita maneant, aut sibimet reconcilientur (143).» Quo canone, ut patet, alludunt concilii patres ad leges imperiales, a quibus, ut diximus, iteratae nuptiae post repudium permittebantur. S. Ambrosius «Non licet tibi, uxore vivente, uxorem ducere. Nam et aliam quaerere, cum habeas tuam, crimen est adulterii (144).» Eadem repetit s. Hieronymus expendens Christi verba apud Matth. XIX. *Quicumque* etc. «Ubicumque est igitur fornicatio et fornicationis suspicio, libere uxor dimittitur. Et quia poterat accidere, ut aliquis calumniam faceret innocenti, et ob secundam copulam nuptiarum, veteri crimen impingeret, sic priorem dimittere iubetur uxorem, ut secundam, prima vivente, non habeat (145).»

(142) In *Octavio*, n. 31. apud Galland. *Bibl. patr.* tom. II. p. 399.

(143) Conc. Milevit. II. cap. 7. et in codice Canon. eccles. Afric. can. CII. apud Harduin. *Acta concil.* tom. I. col. 913.

(144) Lib. I. De Abraham c. VII. ed. Maur. tom. I. col. 302.

(145) *Comment. in Matth.* c. XIX. ed. Vallars, tom. VII. col. 146.

Idem docet s. Augustinus dum ait receptum esse «in ecclesia Christi...ut nec sterilem coniugem fas sit relinquere, ut alia foecunda ducatur. Quod si quisquam fecerit, non lege huius saeculi, ubi interveniente repudio sine crimine conceditur cum aliis alia copulare connubia;... sed lege Evangelii reus est adulterii; sicut etiam illa si alteri nupserit. Usque adeo manent inter se viventes semel inita iura nuptiarum, ut potius sint inter se coniuges, qui ab alterutro separati sunt, quam cum his quibus aliis adaeserunt. Cum aliis quippe adulteri non essent, nisi ad alterutrum coniuges permanerent (146).

Nec non Innocentius I. qui scribit: «De his requisivit dilectio tua, qui interveniente repudio, alii se matrimonio copularunt. Quos in utraque parte adulteros esse manifestum est. Qui vero vel uxore vivente, quamvis dissociatum videatur esse coniugium, ad aliam copulam festinarunt, neque possunt adulteri non videri.» In cuius rei confirmationem adducit verba Christi Domini ex Matth. XIX. 9. (147).» Quia, ut alibi subdit «fide catholica suffragante... conventum secundae mulieris, priore superstite nec divortio eiecta, nullo pacto posse esse legitimum (148).»

Quapropter filum traditionis christianae insecuri romani pontifices eiusdem custodes ac vindices, numquam passi sunt polygamiam impune inter christianos induci, sed eam tamquam legi evangelicae et apostolicae contrariam semper execrati sunt. Nam Nicolaus I. ad Consulta bulgarorum: «Duas, inquit, tempore uno habere uxores nec ipsa origo humanae conditionis admittit, nec lex christianorum ulla permittit (149).» Et Innocentius III. declaravit plures simul retinere uxores *absonum esse, et ini-*

(146) *De nupt. et concup.* lib. I. cap. X. n. 11. ed. Maur.

(147) Epist. IV. ad Exuper. c. 6. apud Coustant col. 794.

(148) Epist. 9. XXXVI. ad Probum. Ibid. col. 910.

(149) Cap. 51.

micum fidei christianae (150). Idem iam declaraverat Alexander III. Innocentii praedecessor decernens eum, qui postquam cum una contraxit per verba de praesenti, aliam ducit: « etiamsi cum ista copulam habuerit, ab illa tamen debere separari (151). » Tandem concilium tridentinum tum adversus Lutherum qui profitebatur se « polygamiae consuetudinem nec introducere velle, nec improbare » posse quia « patrum exempla adhuc libera sunt (152), » tum adversus anabaptistas lutheranorum propaginem, hunc canonem tulit: « Si quis dixerit licere christianis plures simul habere uxores, et hoc nulla lege divina esse prohibitum, anath. sit (153). »

Ad haec omnia accedit quod in ecclesia christiana matrimonium semper habitum fuerit, prout ostendimus, uti sacramentum a Christo Domino institutum, quod esset signum ac symbolum unionis Verbi cum humanitate, ac Christi cum ecclesia sua quam sibi ceu sponsam coniunxit. Iam vero Christus nonnisi unicam habuit et habet sponsam quam acquisivit sanguine suo; ergo hoc ipso patet in ecclesia nonnisi monogamiam licitam ac legitimam haberi potuisse. Quare inauditum in ecclesia christiana est unum virum plures simul potuisse uxores habere. Exinde ortum illud scandalum quod universus orbis christianus exhorruit cum accepit datam a lutheranis permissionem Philippo Lantgravio Hassiae digamiam consecrandi (154).

(150) In cap. *Gaudemus* 8. *De divortiiis*. Loquitur autem pontifex de paganis, qui cum plures in infidelitate uxores duxerint, ad religionem christianam convertuntur, quos ait non posse ductas uxores retinere post conversionem, iuxta paganus institutum *religioni christianae inimicum*.

(151) Cap. *Licet etc.* 3. *De sponsa duorum*.

(152) Comment. in cap. XVI. Genes. Atque hic obiter observandum quid valeant Biblia privato sensu intellecta; Calvinus in commentario ad hoc ipsum caput Geneseos Abraham veluti reum, ut vidimus, legis naturae iurisque divini violati traducit; contra vero Lutherus ex eodem capite infert polygamiam adhuc liberam esse. Ita inter se cohaerebant isti Evangelicae reformationis duces.

(153) Sess. 24. can. 2.

(154) Cf. Bossuet *Histoire des variations*, liv. VI. a. n. I. ad X.

Adeo vero ab hac polygamia simultanea aliena semper extitit ecclesia, ut neque legitima habuerit connubia quae post primam uxorem celebraverint infideles. Quoties proinde contigit ut aliquis ipsorum ad religionem christianam converteretur, toties exegit, veluti conditionem sine qua non conferretur ei baptisma, ut prius valediceret omnibus uxoribus quas post primam duxisset. Cur enim vero? Nisi quia ecclesia numquam ut legitimas uxores eas habet mulieres quae post primam ducuntur. Etenim ipsi etiam infideles lege divina tenentur adeoque, quidquid censendum sit de naturae lege, aut de iure divino ante Evangelium, cum certum sit ex lege evangelica omnino abolitam, ac prorsus prohibitam fuisse polygamiam, profecto nec ipsi infideles absque piaculo iam possunt plures ducere uxores. Quocirca etsi ex ignorantia hac in consuetudine aliquo modo excusari possint, cum nondum eis lex evangelica promulgata est, tamen cum ipsis Evangelium est perspectum, eo ipso plures uxores retinere non possunt, adeoque coguntur eas deserere cum religionem christianam profitentur, ut pluries declaratum est a romanis pontificibus (155).

Haec autem quae diximus ostendunt polygamiam simultaneam ita vetitam esse ut neque plures simul uxores haberi possint, neque altera duci post repudium sive alterius sive plurium aliarum uxorum. De prima polygamiae specie vix quaestio esse potest, cum casus iste vix aut ne vix quidem vel inter ipsos protestantes, multo vero minus inter catholicos locum habeat; ast non est adeo insolens polygamiae species altera, ut ab initio diximus, quin imo passim recepta est ab illis omnibus penes quos obtinet lex civilis de divortio qua etiam datur facultas al-

(155) Cuius rei in superiori libro plura rom. pontificum ac rom. congregationum decreta dedimus.

teram ducendi uxorem, simul ac divortium a priore legitimum declaratur (156).

Porro si post civile divortium alia ducatur uxor, absque dubio polygamiae reatus inducitur damnatus a lege evangelica et apostolica atque a constanti traditione et sensu ecclesiae. Si enim rite expendantur quae ex Evangelio, ex Apostolo, ex patribus, conciliis, romanisque pontificibus adduximus documenta, patebit ea omnia magis directe hanc secundae speciei polygamiam respicere. Constanter enim fere loquuntur de iis, qui relicta aut abiecta priori uxore, alteram duxerint. Quocirca omnes istiusmodi ulteriores nuptiae totidem sunt adulterii crimina, utpote initae cum impedimento dirimente *ligaminis*, adeoque nullius valoris.

Quod vero speciatim attinet ad mormonitas, cum se christianos profiteantur eo quod credant in Evangelium et in ecclesiam primitivam, in pastores et doctores, saltem ut ipsi affirmant (157), tum ab Evangelio tum ab ecclesiae primitivae sensu ac praxi abunde refelluntur, tum a pastoribus ac doctoribus universis. Sed haec argumenta parum

(156) De Anglia res est explorata, post quam divortium concessum est.

(157) Sane Iosephus Smith auctor sectae inter articulos quibus mormonice fidei professionem exhibet, primo loco posuit: *Nos credimus in Deum Patrem, et in Filium eius Iesum Christum et in Spiritum Sanctum.* - Deinde vero art. 3. « *Nos credimus haec divinitus esse imposita ab Evangelio: 1. Fidem in Dominum Iesum Christum. 2. Poenitentiam. 3. Baptisma per immersionem in remissionem peccatorum.* Art. 6. *Nos credimus in eandem constitutionem quae extitit in primitiva ecclesia, id est apostolos, prophetas, pastores, doctores, evangelistas.* Art. 8. *Nos credimus Biblia esse verbum Dei... prout et credimus librum Mormonis esse verbum Dei.* Nos credimus quidquid Deus revelavit, et quidquid modo revelat, credimusque eum alia plura esse revelaturum multi momenti, quae ad Dei regnum pertinent. Credimus fore ut Israel literaliter congregetur, decemque tribus instaurentur, et Sion in hac regione (nempe in America septentrionali) aedificetur, et Christus personaliter in terra regnet. Ius nobis asserimus adorandi omnipotentem Deum iuxta nostram conscientiam, idemque privilegium omnibus concedimus quidquid, et quomodo ac ubicumque colere velint.» Demum concludit « *Dici potest nos sequi Pauli monitum, omnia credimus, omnia speramus.* » *An original history etc. p. 411.* In hac fidei professione ne verbum quidem adest de polygamia. At solemnem praxi id postea fassi sunt huiusmodi *sancti* quod ab initio verbis profiteri non audebant.

apud eos valent. Etenim rectius eos dixeris constituere religionem a christiana omnino diversam, nec novam quamdam sectam christianam, sed potius quemdam novum islamismum constituere. Revera quemadmodum islamitae in Evangelium et in Iesum Christum, sua tamen ratione, se credere profitentur at simul credunt etiam in Alcoranum tamquam in librum, qui Dei verbum continet, etsi Alcoranus in multis Evangelio adversetur, sic mormonitae et in Evangelium credere se dicunt at simul in librum Mormonis utpote qui verbum Dei contineat, polygamiam non secus ac islamitae divino iure sibi permissam arbitrantur. Ecclesia haec *sanctorum* sanctis suis iam ab hac vita delicias degustandas praebet paradisi ut dici solet islamitarum et epicuraeorum. Revelationem circa polygamiae usum ac ius datam fuisse dicunt uni ex ecclesiae primoribus Sidney Rigdon in urbe Nauvoo, de qua supra aliquid inuimus, ac primo haec immoralis doctrina coonestata fuit nomine *spiritualis polygamiae* licet ex ea non *spiritus*, sed *homines* procrearentur. Publica haec morum foeditas, praeter rationes politicas ob sectae incrementa, non ultima fuit ex causis cur quemadmodum antea ex *Missouri* ita dein ex *Illinois* per vim eiicerentur ac urbs ipsa Nauvoo deleteretur (158). Tum vero mormones incredibili alacritate et constantia in remotissimas desertasque foederatorum Statuum regiones immigrarunt, atque in valle quae dicitur Lacus Salis novi Status fundamenta iecerunt, quem *Déseret* vocant, atque illuc ex propinquis Statibus Californiae et Oregon, et ex tribus Americae et ex pro-

(158) Paulo post mormonum emigrationem ad urbis Nauvoo reliquias devenit ex Galliis colonia icarianorum, digni prorsus qui mormonibus succederent: tandem anno 1850. urbs prorsus deleta est simul cum templo cui mormones hanc inscriptionem affixerant. The house of the Lord: built by the Church of Iesus Christ of Latter-day saints. Holiness to the Lord. *Domus Domini aedificata ab ecclesia Iesu Christi novissimorum dierum sanctorum. Sanctitas Domino.* V. Harpers Magazine. *The Mormons.* New York. 1853. vol. VI. p. 615.

testantibus in Anglia (159) ad novam religionem conver-
sis, sanctos congregant, qui religioso fanatismo, vitae
licentia, simulque alacritate et constantia in colonia fun-
danda et promovenda eminent. Inter eos polygamia magis
magisque excrevit, iamque non solum eam publice pro-
fitentur, verum etiam innixi libertati conscientiae crimen
intolerantiae irrogant senatui Statuum Foederatorum qui
eam improbat. In ipsa urbe Washington periodica quae-
dam scripta publicantur, quae mormonitarum causae in-
serviunt, atque in iis polygamia non modo licita asseri-
tur, sed etiam ut medium ad beatitatem maiorem in vita
futura obtinendam suadetur et commendatur. Eo perven-
tum est ut doceant nullam mulierem ad coelestem gloriam
pervenire posse nisi virum habeat a quo illuc, ut ipsi
aiunt, introducatur; neque hominem ad perfectionem per-
venire posse sine una saltem uxore, et eo sublimiorem fu-
turam esse eius sedem in coelesti civitate quo maiorem
uxorum numerum secum feret (160). Sectae primores exem-
plo suo patefaciunt quam sublimem in novo a se excogi-
tato paradiso sedem sibi pollicere contendant uxorum quas
ducunt multitudine (161). Huiusmodi doctrinae, multo-

(159) Si fidimus sectae relationibus Mormones anno 1857. in Regno Unito An-
gliae, Scotiae et Principatus Gallensis numerabant 12. pontifices (high priests) 1761.
seniores (elders), 1590. sacerdotes (priests) 1226. doctores (teachers) et 682.
diaconos: fideles vero novo baptismo initiatos 50,000. eoque amplius, e quibus
17,000. ad sanctos fratres in Americam emigrarunt. Plerique ex iis ex Anglia ad
New-Orléans appellunt alii ad Californiam; atque inde ad urbem Lacus Salis in
Déseret conveniunt, ubi si fidimus eorum patrocinatori in urbe Washington
Elder Pratt anno 1853. iam 30,000. sancti numerabantur. V. loc. cit. p. 619.

(160) Vide *The Seer* quae publicatio est periodica singulis mensibus, in qua
passim polygamiae patrocinium suscipitur.

(161) In period. *Univers* 1. Févr. 1857. haec habentur: «On lit dans l'*Echo du
Pacifique* du 3. Déc. 1856. un correspondant du *San Francisco Herald* lui four-
nit de Fillmore city (Utah) sous la date du 15. Sept. dernier quelques renseigne-
ments assez piquants sur la polygamie chez les mormons: - Les membres du cou-
seil du gouvernement sont au nombre de 13. Ils ne paraissent pas être d'un
extérieur bien agréable d'après la peinture qu'on en fait, et cependant ils ont en-
semble 171. femmes. Les 26. membres de la chambre des représentants ont ensemble

que magis sectae incrementa effecerunt ut modo in America quaestio de mormonibus sub aspectu religioso politico ac sociali non sine sollicitudine agitur. In medio solitudinum vastissimarumque regionum, quae inter montes quos appellant saxosos protenduntur, paucis abhinc annis nova natio exorta dici potest (162), quae religioso fanatismo, dominandi cupidine non minus quam vitae licentia islamicas aemulatur. Quidquid sit, ut patet, mormonum polygamia armis potius ab iis quorum interest quam argumentis theologicis compescenda est.

Itaque mormonibus omissis, ut revertamur ad vetustiores polygamiae patrocinatores, duo polygamiae monumenta in causae suae subsidium proferunt, quorum alterum falsum esse videbimus, alterum saltem aequivocum.

Prius desumitur ex lege lata a Valentiniano seniore, referente Socrate, atque ex facto ipsius Valentiniani, qui

157. femmes; et enfin les employés de cette chambre au nombre de 5. en possèdent 22. Parmi ces derniers nous remarquons le chapelain qui en a jusqu'à 7. - A tout cela il faut ajouter les 68. femmes du Gouverneur Brigham Young (Summi nempe eorum pontificis et prophetae.) De telle sorte, que la législature et le pouvoir exécutif, en tout 45. hommes, n'ont pas moins de 420. femmes.»

Ibid. 5. Févr. 1857. exhibetur harum uxorum distributio, ut sequitur: Heber Kimbal consilii praeses habet uxores 57. - Daniel Wels consiliarius valde luscus 19. - Albertus Corringhton infirmus et claudus 21. - Opson Præt infirmus 7. - Wilford Wiodroff claudus 12. - Iohn Stokon invalidus 8. - Lorin Farr infirmus 25. - Laur. Soon infirmus 25. - Leonar. Narrington claudus 3. - Beniam. Johnson invalidus 4. - Isaac Morley an. natus 72. 5. - Iohn Ray 2. - Georg. Smith infirmus 5.

Membra conventus (Camera) *Repraesentantium* quae sunt 26. habent 157 uxores. Quinque *officiales* congressus retinent uxores 22. Demum gubernator Brigham Young, ut vidimus, 68. Ita res procedunt inter mormones.

(162) Anno 1846. mormones ex Nauvoo ad Déseret emigrarunt: iamque anno 1850 ea colonia gubernium quod vocant *territoriale* habuit donec completo lagali colonorum numero (60,000) iuxta leges Statuum Foederatorum constituere possit *statum* independentem. Hactenus dependet a praeside Statuum Foederatorum a quo a 1850. territorii gubernator constitutus fuit idem ille Brigham Young qui ab anno 1844. post violentam mortem Iosephi Smith a collegio XII. apostolorum electus fuerat ut prophetae successor. Cf. Harper *The Mormons* loc. cit. Is modo gubernii habenas negat novo gubernatori relinquere, ita ut armis tota quaestio finiatur necesse sit: secus Foederatis Statibus gravia ex mormonum potentia imminere possent pericula.

vivente adhuc Severa nec ea repudiata, Iustinam virginem duxit. Sic enim rem totam refert Socrates: «Legem a se (Valentiniano) dictatam publice per singulas civitates proposuit, ut cuiuslibet liceret duas simul uxores legitimas habere. Et lex quidem ita proposita est. Ipse vero Iustinam duxit uxorem, ex qua Valentinum iuniorem suscepit (163).» Verum; praeterquam quod eiusmodi documentum ecclesiasticum non est, sed mere profanum, quod etiam in hypothesis de eius veritate normam praebere non potest christianae doctrinae, si ad critices severioris lucem revocetur eius falsitas aperte se prodit.

Idque conficimus argumentis ineluctabilibus. Etenim 1. certum est Socratem deceptum fuisse in eo quod refert de ducta a Valentiniano Iustina virgine, cum constet ex Sozimo scriptore ethnico et synchrono, illam fuisse uxorem Magnentii (164). 2. Certum est adeo Valentinianum ab eiusmodi polygamiae flagitio fuisse alienum, ut alter scriptor ethnicus ac non parum animo in Valentinianum infensus, eius castitatem extollat, nempe Ammianus Marcellinus, qui de eo scribit: «Omni pudicitiae cultu domi castus et foris, nullo contagio conscientiae violatus obscenae, nihil incestum: hancque ob causam tamquam retinaculis petulantiam frenarat aulae regalis (165).» 3. Certum est nullum eiusmodi legis vestigium ullibi apparere, quae adversata fuisset legibus antea datis a Valeriano et Gallieno (166), ac deinde a Diocletiano et Maximiano Augustis (167).

(163) *Hist. eccl.* lib. IV. c. 31. ed. Vales. atque ex Socrate id ipsum retulerunt Paulus diaconus, Zonaras, atque Nicephorus.

(164) *Hist.* lib. IV. c. 19. qui refert Valentinianum minorem natum *de coniuge*, quae prius Magnentio uxor fuerat.

(165) *Hist.* lib. XXX. cap. IX.

(166) «Eum qui duas simul habuit uxores, sine dubio comitari infamiam.» Lib. 18. c. *Ad leg. Iul. de adult.*

(167) «Neminem qui sub ditione romani nominis, binas uxores habere posse, vulgo patet, quum etiam in edicto praetoris huiusmodi viri infamia notati sint.» Leg. 2. Cod. *De incestis nuptiis.*

4. Certum est Valentinianum uti austerum nimis vindicem violatae castitatis a s. Hieronymo in crimen adduci (168), quod confirmat Amm. Marcellinus referens sub eius imperio complures virgines et nuptas adulterii Romae esse damnatas (169). 5. Certum est a nullo unquam, sive ex rom. pontificibus sive ex ss. patribus, qui ea aetate florebant et legis evangelicae acerrimi erant propugnatores, Valentinianum tum ob eiusmodi legem tum ob perpetrata polygamiam fuisse sive reprehensum sive damnatum (170), quod certe facere non omisissent, si vera narasset Socrates. 6. Certum est Theodosium M. qui una cum Gratiano Valentiniani filio eidem in imperio successerat adeo aversatum polygamiam fuisse ut eam vel in Iudaeis insectatus fuerit: (171), quid porro fecisset si eam penes christianos reperisset? Reperisset porro si vera retulisset Socrates de data lege per universum orbem qua facultas omnibus fieret duas, aut plures ducendi uxores priori superstite. Immo non levis ubique excitatus fuisset tumultus, si quam duxissent alteram uxorem, eam dimittere ob abrogatam legem illam debuissent. 7. Denique certum est tum Theodoretum tum Sozomenum Socrati coaevos, quique gesta Valentiniani prosecuti sunt, ne verbum quidem sive de ea lege, sive de Valentiniani polygamia unquam fecisse. Itaque inter figmenta cetera eiusdem scriptoris et hoc referendum est, constituendumque Valentinianum post Severae obitum Iustinam duxisse legitimoque eam sibi copulasse coniugio, prout modo concedunt ipsi protestantes veritatis evidentiâ compulsus (172).

(168) In Epist. I. *De muliere septies percussa ad Innocentium*. Ed. Vallars.

(169) Lib. XXVIII.

(170) Erat tunc rom. pontifex Damasus, vivebant s. Ambrosius, s. Hieronymus, deinde vero s. Augustinus, Orosius, aliique qui passim suis in scriptis de polygamia egerunt, expendentes praesertim illud Apostoli I. Tim. 3. *Unius uxoris virum*.

(171) Leg. 7. *Cod. de Iudaeis*.

(172) Sane veluti fabellam Socratis historiam reiecit W. Lowth in notis ad

Hoc itaque sublato utpote *false* documento, expendamus alterum oportet, quod ad minus *aequivocum* diximus ad fulciendam polygamiam. Desumitur vero ex epistola Gregorii Iunioris seu II. ad s. Bonifacium qui pontificem hac de re interrogaverat, quid facto opus fuerit infirmitate laborante cuiusdam uxore? Respondisse autem pontifex his verbis perhibetur: «Nam quod proposuisti, quod si mulier infirmitate correpta non valuerit debitum viro reddere, quid eius faciat iugalis? Bonum esset, si sic permaneret, ut abstinentiae vacaret. Sed quia hoc magnorum est, ille qui non poterit continere, nubat magis: non tamen subsidii opem subtrahat ab illa, quam infirmitas praepedit, et non detestabilis culpa excludit (173).» Dixi autem eiusmodi subsidium *saltem aequivocum*, idque tum ex parte historica, tum ex parte iuridica. Etenim quoad partem historicam hoc pontificis rescriptum alii in dubium revocant ex eo quod sub eius successore Zacharia quamvis sedulo in archivis romanis conquisitum fuerit, repertum minime

cap. 31. lib. IV. nec non Basnagius in *Annal. politico-ecclesiast.* ad an. 375. n. IV. qui cum totum hoc negotium expendisset, concludit: «Quae igitur de Iustina virgine Socrates narrat, ea sunt a vero prorsus aliena. Defuncta ergo Severa, Valentinianus Iustinae nuptias adeptus est.» Quae cum ita sint, nescio unde desumpserit recens auctor Basnagium adducere pro polygamia legem et factum Valentiniani, et Gregorii II. rom. pontificis, cum Basnagius refellerit Socratem, nec ullam prorsus Gregorii II. mentionem iniecerit. Rursum Baronio ex quo nos argumenta ad Socratis respuendam narrationem desumpsimus adstipulatus etiam est ex protestantibus Melchior Zeidlerus in *Tract. de polygamia* p. 117 seqq. Waechterus tamen in epist. ad Io. Burchardum Menckenium inserta *Actis eruditor.* tom. 5. Supplementi p. 168 seq. nec non Vedelius lib. *De prudentia veteris ecclesiae*, p. 229. antiquiores lutherani Baronii argumenta ad an. 370. nihil solidi habere affirmant. Adeo possunt in animis anticipata iudicia! Cf. praeter Baronium an. cit. n. 124 seq. Valesium in notis ad loc. cit. Socratis, Pagium in not. ad an. 375. n. 5. Nat. Alexan. in sec. IV. c. ult. art. IV. Atque inter ipsos protestantes praeter Basnagium, Puffendorffium *De iure naturae et gentium.* Francofurti ad Moenum 1706. tom. I. lib. VI. cap. I. *De matrim.* §. 16. et Euddaeum *Instit. theol. dogmat.* Lipsiae 1741. lib. V. c. VI. §. 41. in not. pag. 1319. qui pariter eiusmodi fabellam confutant. Quare mirum est, quod Alb. Fabricius in sua *Bibliographia antiquaria*, c. XX. §. X. adhuc visus sit hanc Socratis narrationem admittere.

(173) Apud Hartzeim, *Concilia germanica.* Colon. Agripp. 1759. tom. I. p. 34. ac refertur a Gratiano *Causa XXXII.* q. VI. cap. XVIII.

fuerit. Quod certe suspicionem non immerito ingerit de eius veritate, cum incredibile videatur cito adeo tanti momenti documentum excidisse (174). Alii vero absolute negant eiusmodi epistolam fuisse a Gregorio II. exaratam innixi praeterea silentio Othonis, et Willibardi (175). Quoad partem vero iudicam, alii censent agi in ea de infirmitate perpetua, seu de impotentia, qua mulier illa laborabat, adeoque de impedimento dirimente. Quod coniciere fas est tum quia verba pontificis hanc interpretationem admittere possunt, tum quia epistola s. Bonifacii ex qua determinari posset genuina mens summi pontificis ad nos non pervenit, ac praesumptio favet huic docto sanctoque pontifici, qui profecto noluit ab Evangelica et apostolica doctrina recedere atque a constanti maiorum instituto (176). Aliis vero placet in illo rescripto agi de coniugio antea in infidelitate contracto, quod cum *verum* quidem fuerit, non autem *ratum* a pontifice iusta interveniente causa potuit dissolvi (177). Verum de hoc rescripto iterum in altera sectione redibit sermo.

Cum igitur ex universa antiquitate hoc unum documentum pro polygamia afferatur, illudque tot sit obnoxium sive criticis sive hermeneuticis difficultatibus, argumento est ineluctabili perpetuam constantemque ecclesiae doctrinam fuisse, monogamiam a Christo Domino constitutam esse, adeoque in lege evangelica illicitam omnino esse polygamiam.

Cetera vero quae afferri a nonnullis solent vix disquisitionem merentur, quia aut destituta sunt fundamento

(174) Ita Collet, *De matrim.* cap. V. n. 131.

(175) Uti Brintherim in op. *Monumenta primi, medii et novissimi aevi*, tom. VI. p. I. p. 431. qui tamen, ut postea videbimus, sententiam mutavit.

(176) Ita passim theologi respondere solent, etsi eiusmodi responsio Estio in lib. 4. Sent. d. 33. §. 6. minime arrideat, cuius verba in nostris Praelectionibus attulimus.

(177) Hanc sententiam amplexus est Sebastianus Berardi in op. *Gratiani canones genuini ab apocryphis discreti*, p. II. Ven. cap. 66. de qua egimus in Praelection.

historico et critico, aut facinus arguunt illorum, qui polygamiam in ecclesia christiana attentarunt.

Ad primam classem refertur polygamia comitis a Gleichen de qua scribit I. A. Fabricius « observandum est, quod etiam pontifex romanus Honorius III. *ab auctoribus non contemnendae fidei* traditur dispensasse polygamiam comitis a Gleichen (178) » allegatque ad huius historiae confirmationem Bayle in hoc Dictionarii articulo. Iam vero non modo nutare haec omnia, verum etiam prorsus fictitia esse facile evincitur. Etenim 1. nemo de hac polygamia a rom. pontifice concessa scripsit ante Hondorfium scriptorem lutheranum, qui opus suum exaravit secul. XVII. (179) ut aliquo modo vindicaret Lutherum ob datam Philippo Hassiae ducendae alterius uxoris facultatem (180); factum vero istud contigisset sec. XIII., nec ullum citat auctorem anteriorem, sed unice innititur sepulchro quod Erphordiae visitur in quo exhibetur comes inter duas uxores insculptus, ac fabulosae traditioni (181). Quasi nempe receptum ea aetate non fuerit, ut inter duas uxores successivas medius maritus sepeliretur aut insculperetur (182). 2. Non refert Hondorfius a quo pontifice data haec venia fuerit polygamiae, siquidem nomen Honorii III. de suo adiecit Fabricius. 3. Numquam sive Lutherus, sive

(178) In *Bibliogr. antiquar.* c. XX. §. XI. ed. 3. Hamburgi 1760. p. 913.

(179) Inscriptum est opus Hondorfii *Theatrum historicum* ed. Francofurt. 1633. in-8. pag. 533.

(180) Et haec est unica ratio ob quam Fabricius eam refert acceptatque, ut nempe aliquo modo se se opponeret Lindano, Maimburgio, Varillasio, Bossueto, qui *tantopere insultare solent B. Luthero*, ut ipse loquitur. Et hac ipsa de causa eandem historiolum exscripsere ab Hondorfio auctor op. *Polygamia triumphatrix*: Dresser, *Millenar.* VI. Zeillerus *Continuat. itineris german.*, Peccenstenius in *Theat. saxon.*

(181) En eius verba loc. cit. « Huius rei monumentum Erphordiae exstat: in quo ex utroque latere comiti uxores adstant. Regina marmorea corona ornata: Comitissa sculpta est nuda et infantes ad eius pedes reptantes.»

(182) Uti adhuc visitur in mausoleo comitis Petri de Mansfeld Luxemburgi Cf. Feller *Dict. hist. art. Gleichen.*

alii primi *Reformatores* ad cohonestandam concessam Philippo polygamiam se receperunt ad facultatem a rom. pontifice quondam concessam. 4. Numquam aliquis ex tot principibus qui maxime eam exoptassent apud rom. pontificem ut eam obtinerent exemplum comitis a Gleichen allegavit. Hinc est, quod nunc critici omnes ad fabulas amandent eiusmodi comitis polygamiam, saltem tamquam a pontifice concessam, ne Bayle ipso excepto, ad quem per vocat Fabricius (183).

Nihilo tamen minus illustris huius aetatis auctor visus est fidem adiungere huic facto, tum quod profundae traditioni innitatur, tum quod copiosis historicis fulciatur documentis (184). Verum duo haec, falsitas scilicet et ve-

(183) Fabricius allegat ed. secundam *Dictionarii historici et critici*; iam vero ego prae manibus habeo ed. tertiam Rotterodami 1720. attamen hic auctor tum in artic. *Gleichen* tum in nota *B* respuit ac refellit historiolum, quae ita narratur. Comitis amore captâ filia Sultani dum captivus comes degeret penes turcas, ei fugam tutam se praebituram promisit, dummodo suas sibi nuptias polliceretur, quamvis sciret eum iam matrimonio devinctum. Reipsa fugam arripuerunt, Venetias appulerunt, ac Romae a pontifice facultatem comes obtinuit eam superinducendi; cumque patriam repetiisset, comitissa eius uxor laeta excepit novam coniugem, quae utpote sterilis veluti suos spectabat liberos comitissae. Tota haec fabula ex sculptura sepulcri originem habuit. Cf. opus cui tit. *Disquisitione historico-critica in comitem de Gleichen, cuius monumentum est in ecclesia sancti Petri*. Auctore D. Placido Muth. Erfordiae 1788. in-12.

(184) Sic enim scribit cl. comes de Montalembert in Hist. s. Elisabeth ch. XVI. ed. sixième. Paris 1854. pag. 130. « On remarque parmi eux (croisés) le nom de ce comte Louis de Gleichen, si célèbre en Allemagne par ses aventures romanesques pendant cette croisade. Une tradition, enracinée et appuyée par de nombreuses preuves historiques, raconte qu'ayant été fait prisonnier en Palestine, et transporté en Egypte, il fut délivré par la fille du Soudan Melechsala, à condition qu'il l'épouserait, quoiqu'il eût laissé en Thuringe sa femme, née comtesse d'Orlamunde. Il l'emmena avec lui à Rome, où il obtint, à ce qu'on prétend, l'autorisation du pape pour cette double union, et de là à son château de Gleichen, où les deux épouses vécutent dans la plus parfaite union. »

Qui deinde in nota subdit: « Cette histoire déjà qualifiée dans une Chronique du XV. siècle de *Historiam nominatissimam comitis de Gleichen*, a été l'objet de nombreuses discussions entre les savants et historiens allemands des deux dernières siècles, qui ont tour à tour combattu ou affirmé la réalité de ce double mariage. On peut en voir l'énumération dans Justi (Dilich, Hess *Chron. II.* p. 92-94.) Le tombeau de ce comte, couché entre ses deux femmes, se voit dans la cathédrale d'Erfurth. Les traditions de la chevalerie française attribuent le même trait à Gilles de Trazegnies. »

ritas huiusce historiae haud aegre inter se componi posse videntur, si opportune distinguatur rei substantia ab eius adiunctis. Rei substantia in eo consistit, quod comes a Gleichen in sua expeditione in manus infidelium inciderit atque ab iisdem ex Palaestina in Aegyptum abductus, ubi filia sultani Melechsala eius amore capta ipsi evadendi opportunitatem obtulerit dummodo se vellet in coniugem ducere; quod, sponsione facta, ambo simul fugam arripuerint, Romamque se contulerint, atque exinde comes in vulgus sparserit facultatem se a rom. pontifice has nuptias iungendi obtinuisse, vivente adhuc priori uxore sua. Quae quidem omnia fidem non superant. Ast quod rom. pontifex reipsa secundas has nuptias ei indulserit, nullo modo admitti potest. Nam datae huius facultatis nullum prorsus extat documentum; nemo unus ex antiquis eam aut retulit aut obiecit; Honorii III. ut vult Fabricius, fidei ac disciplinae tuendae studium nulla ratione patitur, ut id admittatur. Itaque eiusmodi obtentae concessionis rumor ex parte comitis non fuit nisi quaesitus color quo turpem suam agendi rationem tegeret, aetate illa haud insolens. Quod vel inuere videtur cl. auctor quem adduximus (185), sicque omnia apprime componuntur.

Ad alteram classem referri debet polygamia a Lothario imperatoris Lotharii filio et Caroli Calvi nepote Lotharingiae rege pertentata, dum Theutberga repudiata, Waldradam ducere in uxorem contendit. Nam vix res Nicolao I. summo pontifici innotuit, ut causam eius discussisset, repudium improbaverit, acta concilii metensis exciderit, quod Lothario faverat, episcopos praevaricatores deposuerit, adegerit Lotharium sub excommunicationis inter-

(185) Ut patet ex verbis: *à ce qu'on prétend*. Qua de causa prudenter in versione itala adornata a Nic. Negrelli. Vienna 1838. quemadmodum etiam in eiusdem historiae compendio quod eodem an. Augustae Taurinorum a pia comite Solaro della Margarita editum est, totus hic tractus omissus fuit. Non item vero in versione anglica quam vulgavit Mary Hackett Dublin. 1852.

minatione ad Theutbergam recipiendam; atque ad Waldradam pellendam; Waldradam ipsam excommunicationis poena mulctaverit. Quae omnia confirmavit et executioni mandavit Nicolai successor Hadrianus II. (186). Ut vero magis pateat quo animi vigore ss. pontifex Nicolaus restiterit nefario Lotharii ausui, non abnuimus gravissima eius verba describere ex epistola quam ad episcopos Lotharii ditioni obnoxios scripsit, ut eos fortes redderet in oppositione adultero regi facienda: « Quapropter, inquit, obsecro vos per adventum D. N. I. C. ante cuius conspectum vel pro legitimis certaminibus coronam, vel pro desidia, quod absit, poenam percipietis: ut tandem aliquando recogitetis ministerium quod accepistis, proiciatis desidiam, pellatis a vobis servilem timorem, resumatis episcopalem libertatem, corripatis speculatorum et pastorum officium, et precando, obsecrando, suadendo, modo caduca huius mundi prospera exponendo, modo in aeternum mansura gaudia praedicando, iam nominatum regem (Lotharium) frequentius adeatis, et tam ex auctoritate Dei, quam etiam ex nostri apostolatus iniuncta vobis praeceptione, quousque, si non obedierit, hanc quam nunc habet *adulteram mulierem* proiciens, finitivam permansioramque demus super eum sententiam... Eruite hunc virum, qui ducitur ad mortem, qui trahitur ad interitum, liberare ne cessetis. Clamate, quasi tuba, exaltate voces vestras et annuntiate illi scelera sua, quibus peccat, et peccare facit Israel. Quod si ille non audierit, ipse in iniquitate sua morietur, sanguis eius super caput eius erit: vos autem animas vestras liberabitis (187). »

Iste ne erit pontifex, qui Lothario polygamiam indulserit? Praeterea non de polygamia directe agebatur, sed potius de indissolubilitate coniugii: quum rex non iam duas simul uxores habere contenderet, sed potius divortio

(186) Cf. Natal. Alexandr. Diss. IX. in Hist. Eccles. saec. IX. et X.

(187) Epist. Nicolai 52. tom. III. *Concil. Galliae* pag. 269 seqq.

facto cum priori uxore, et quidem legitimo, ut ipse autumabat, alteram duxerat; prout passim fit apud protestantes, et penes gubernia illa in quibus obtinent matrimonia mere civilia per legem sancita: neque tamen pontifex passus est Waldradam uxorem vocari.

Quum vero duo haec facta vel sola sint vel praecipua saltem, quae in favorem polygamiae simultaneae inter christianos afferri consueverint, alia minoris momenti non persequar, quae aut ad rem non faciunt, aut fabulosa omnino sunt (188), nec seriam disquisitionem exposcunt. Liceat ergo concludere unitatem ita esse christiani matrimonii proprietatem ut polygamia simultanea prorsus excludatur.

CAPUT II.

DE POLYGAMIA SUCCESSIVA.

ARTICULUS I.

Ecclesiae doctrina ac disciplina circa bigamiam, seu secundas nuptias, exponitur et vindicatur.

In hoc argumento operae pretium est sedulo ecclesiae doctrinam a disciplina secernere, quae diversis aetatibus obtinuit in ecclesia sive graeca sive latina.

Doctrina catholica semper haec fuit, validas licitasque esse secundas et ulteriores nuptias. Contra vero non pauci haeretici antiquiores secundas nuptias, multo vero magis ulteriores, defuncto priore coniuge, tamquam illicitas ac nullo modo ferendas improbarunt, et execrati sunt. Hunc errorem sub cuiusdam perfectionis obtentu professi sunt montanistae; cuius rei monumentum extat ineluctabile in variis Tertulliani libris, praesertim vero in libro *De monogamia*. Quemadmodum vero in aliis erroribus sic et in

(188) Cuiusmodi sunt censenda, quae ex Io. Bodino refert I. A. Fabricius op. et loc. cit.

isto montanistas novatiani imitati sunt. Hos omnes ecclesia catholica damnavit.

Licet autem ecclesia eiusmodi errorem proscripserit, attamen minus semper propensam se exhibuit erga nuptias successivas praesertim tertias et posteriores. Dum proinde magno prosequatur honore nuptias primas benedictione, coronatione, aliisque eiusmodi ritibus, ceteras contra hisce significationibus honoris sanctitatisque privavit, uti alias exposuimus (1); ast numquam eas omnino prohibuit; praesertim ecclesia latina.

Verum severiorem iugiter hac in re se exhibuit ecclesia graeca. Nam tertias, praesertim vero quartas nuptias improbavit; non quod senserit eas omnino ac absolute illicitas, sed in detestationem incontinentiae quam praesferre videbantur qui priori, multo vero magis, qui secunda, aut tertia uxore vita functa aliam ducerent.

Quoad vetustiores nonnullos patres, fatendum est interdum eos durius nimis locutos fuisse, ac benigna interpretatione emolliendas eorum locutiones esse.

His vix leviter generatim delibatis, distinctis articulis agemus primo de secundis nuptiis, deinde de ulterioribus ad vindicandam ecclesiae catholicae doctrinam, atque eiusdem disciplinam potissimum adversus graecos schismaticos.

Ecclesiam constanter praetulisse viduitatem iteratis nuptiis explorata res est. Ex omnibus enim eius actis, ex scriptis patrum et monumentis ecclesiasticis id luculenter patet. Siquidem ex iis constat vel a suis incunabilis magno honore ecclesiam fuisse prosecutam eas quae vere *viduae* fuissent ac *desolatae*, ut loquitur Apostolus (2). Eas episcoporum ac presbyterorum providentiae committebat, ut curam ipsarum susciperent; admittebat ad votum

(1) Lib. I. sect. I. cap. IV. art. II.

(2) I. Timoth. V. 5.

castitatis; in peculiare collegium cooptabat; instruendis iunioribus in rebus fidei, iisque praeparandis ad baptismum praeficiebat: alebat publicis fidelium oblationibus; in coetum diaconissarum praestantissimas ex iis deligebat; peculiari etiam habitu donabat quo a reliquis distinguerentur (3). Talis semper extitit ecclesiae spiritus, quae uti virginitatem coniugio sic viduitatem praetulit secundis nuptiis, quia quaecumque amore castitatis viduitatem servant eae magis idoneae sunt ad obsecrandum Dominum et ad instandam obsecrationibus et orationibus nocte ac die, curis seculi abiectis (4).

Non eo tamen ecclesia progressa est, ut secundas nuptias tamquam illegitimas proscriberet. Novit enim dictum ab Apostolo: « Mulier alligata est legi quanto tempore vir eius vivit, quod si dormierit vir eius, liberata est: cui vult nubat: tantum in Domino (5). » Quinimo ulterius progrediens Apostolus viduas, quae interiori spiritu destitutae in periculo versantur a recto tramite declinandi, ad iterandas potius nuptias hortatur dicens: « Volo ergo iuniores nubere, filios procreare, matresfamilias esse, nullam occasionem dare adversario maledicti gratia (6), » nempe ex indulgentia erga ipsarum infirmitatem; cum per se, ut alibi scribit: « Beatior erit si sic permanserit secundum meum consilium (7). » Quo satis ostendit se non damnare secundas nuptias, etsi eisdem praeferat uti perfectiorem statum viduitatis, quamdiu is melius conferat ad animae salutem: quod si aliquis hoc institutum sectando in periculum incurrat incontinentiae, ei alias nuptias concedit.

(3) Cf. Alph. Salmeronium *Dissert. in epist. D. Pauli*. Opp. tom. XV. Colon. Agripp. 1604. Diss. XIV. in I. ad Tim. V. qui haec fuse prosequitur suisque documentis confirmat.

(4) De hoc argumento s. Augustinus integrum librum scripsit *De bono viduitatis*; et ante ipsum s. Ambrosius librum *De viduis*, ut de reliquis taceam.

(5) I. Cor. VII. 39.

(6) I. Tim. V. 14.

(7) I. Cor. VII. 40.

Talis iugiter fuit ecclesiae spiritus, quae etsi summo opere illos commendaverit, qui castitatis amore in viduitate permanerent, tamen eos numquam reprobavit qui ex propriae infirmitatis experimento aut alia de causa vellet se iterum matrimonio coniungere.

Cuius assertionis vadem damus scriptorem antiquissimum, Hermam virum apostolicum, qui aperte profitetur eum qui iterum nubat non peccare dicens: « Qui nubit (post viduitatem) . . . non peccat (8): » Sic etiam Clemens Alex. scribit: « Apostolus propter intemperantiam et ustionem, ex venia secundum concedit matrimonium: nam hic quoque *non peccat* quidem ex testamento, non est enim a lege prohibitus; non implet autem summam illam vitae *perfectionem*, quae agitur ex evangelio (9).» Etiam Origenes, quamvis secundis nuptiis se aversum patefaciat, attamen minime eas absolute damnat, imo solum feliciter *deceptum* eum censet, qui ideo ab iterandis nuptiis se abstinere, quod eas damnabiles existimaverit. Scribit enim: « Sunt alii, qui ad secundas convolare nuptias nolunt, quod eas damnabiles putent . . . ei quae unicas nuptias contraxit, arbitror conducibilius esse *decipi* et putare bigamiam damnandam, et poenis aeternis esse afficiendam, ut ipsa a secundis nuptiis abstineat et puritati studeat, *quam rei veritatem agnoscere et bigamem fieri* (10).» Igitur iuxta rei veritatem secundae nuptiae illegitimae non sunt, nec peccat qui eas init, Origene auctore.

(8) In *Pastore* lib. II. mandat. IV. n. 4. cuius verba superius integra dedimus. Atque hic est locus ad quem alludit Tertullianus montanista lib. *De pudicitia* c. X. cum scriberet: « Sed cederem tibi, si scriptura Pastoris, quae sola moechos amat, divino instrumento meruisset incidi, si non ab omni concilio ecclesiarum etiam vestrarum inter apocrypha et falsa iudicaretur, adultera et ipsa, et inde patrona sociorum; a qua et alias initiaris.» Nempe Psychicus id est catholicus, qui iuxta Tertullianum montanistam ex libro Pastoris duo discit secundam poenitentiam et secundas nuptias.

(9) Lib. III. *Stromat.* edit. Sylburgi, Paris 1641. pag. 461.

(10) Homil. XCIX. in *Ierem.* n. 4. et *De la Rue*, tom. 12. p. 366 seq.

Neque ab hac sententia discesserunt posteriores patres. Nam s. Basilius expresse canonem hunc num. XLI. edidit: « Quae in viduitate habet sui potestatem, una cum viro habitare potest sine reprehensione, si nemo est, qui coniugium divellat, cum Apostolus dicat: *Si mortuus fuerit maritus libera est, ut nubat cui velit, tantum in Domino* (11). » S. Gregorius nazianzenus Novatum seu Novatianum infensum secundis nuptiis ita refellit: « An ne iuvenibus quidem viduis, propter aetatis lubricum, ineundi matrimonii potestatem facis? At Paulus hoc facere minime dubitavit. . . At haec minime post baptismum, inquis. Quo argumento id confirmas? Aut rem ita se habere proba, aut si id nequis, ne condemnes. Quod si res dubia est, vincat humanitas et facilitas (12). »

Nec aliter docet s. Io. Chrysostomus, qui exponens Apostoli verba: *Mulier alligata est legi*, haec habet: « Quae vero est libera, siquidem voluerit secundo nubere, non simpliciter neque temere hoc facit, sed cum legibus quae sunt a Paulo positae (13). » Sic etiam s. Epiphanius inter falsa catharorum seu novatianorum dogmata et hoc recenset: « Si quis post baptismum secundam uxorem duxerit, ab illis non amplius admittitur. Quod quidem *plane stolidum* est (14), » quem deinde errorem simul cum reliquis eiusdem sectae erroribus postea refellit. Theodoretus pariter expendens citata Apostoli verba 1. Cor. VII. « Notandum est, subdit, quod non beatam, sed *beatior* eam dicat (viduam), quae se continet; ita docens quod non beatitudine sit omnino destituta, quae secundum etiam

(11) Epist. XCIX. ed. Maur. tom. III. p. 396.

(12) Orat. XXXIX. in *Sancta lumina* ed. Paris. 1630. tom. I. pag. 686. Notandum porro est plerumque scriptores graecos Novatum ac Novatianum inter se confundere, ut patet etiam ex Eusebio, Epiphanio aliisque passim. . .

(13) Hom. *De libello repudii* ed. Maur. opp. tom. III. p. 208.

(14) *Haercs.* LIX. n. 3. ed. Petav.

matrimonium amplectitur (15). » Theodorus Studita ecclesiae doctrinam hac super re exponens scribit: « Digamia ergo permissa haud dubie hic fuit a s. Apostolo, et per ipsum a Christo. Verum haec lex non est... sed indulgentia (16) » et alibi idem inculcat.

Et haec de patribus graecis; quod vero attinet ad latinos patres clarius adhuc ex iis ecclesiae sensus patet. Etenim vel ipse Tertullianus adhuc catholicus sic ex communi sententia loquitur: « Apostolus de viduis quidem et innuptis, ut ita permaneant suadet, cum dicit: *Cupio autem omnes meo exemplo perseverare*: de nubendo vero in Domino, cum dicit; *tantum in Domino* iam non suadet, sed exerte iubet (17). » Nempe liberum esse cuique supponit secundas inire nuptias, at simul docet ex Apostoli praecepto eas, si ineanant, debere *in Domino*, iniri, scilicet cum fidei se iungere debere qui iterum nubunt.

S. Ambrosius aperte scribit: « Non prohibemus secundas nuptias, sed non probamus saepe repetitas (18). » Item s. Hieronymus, qui prae ceteris duriuscule de secundis et ulterioribus nuptiis interdum scripsisse visus est, tamen eas licite iniri aperte professus est cum ait: « Quid igitur? Damnamus secunda matrimonia? Minime, sed prima laudamus. Abiicimus de ecclesia digamos? Absit, sed monogamos ad continentiam provocamus (19). »

Demum s. Augustinus « Ne arbitreris, inquit, secundas nuptias crimen esse, vel quascumque nuptias, cum sint nuptiae, malum esse (20). »

(15) *Haeret. fabul.* lib. V. c. 26. quod totum est de hoc argumento adversus novatianos.

(16) Edit. Sirmundi Paris. 1696. tom. V. *Theod. Studitae epist.* lib. 7. ep. 50. p. 353.

(17) Lib II. *Ad uxor.* c. 7. ed. Rigalt.

(18) Lib. *De viduis* cap. XI. opp. ed. Maur. tom. I. pag. 203.

(19) Epist. CXXII. ad Ageruchiam n. 9. ed. Vallars. tom. I. col. 901.

(20) In lib. *De bono viduitat.* cap. XI. n. 14. Opp. ed. Maur. tom. VI.

Verum quod magis ad rem nostram facit est doctrina quam in conciliis ecclesia professa est, ex qua discimus uti legitimas secundas nuptias iugiter habitas fuisse, et damnatos fuisse qui id negarent.

Sane concilium oecumenicum nicaenum ita constituit: « De his, qui se nominant catharos, id est mundos, si aliquando venerint ad ecclesiam catholicam . . . Haec prae omnibus eos scriptis convenit profiteri, quod catholicae et apostolicae ecclesiae dogmata suscipiant et sequantur, id est, et bigamis se communicare (21).»

Concilium vero laodicenum quamvis nonnullis poenitentialibus operibus bigamos subiiciat ob incontinentiae labem quam praeserere videntur qui nuptias iterant, tamen pro legitime coniunctis eos habet, dum in can. I. edicit: « De his, qui *secundum ecclesiasticam regulam libere ac legitime* secundis nuptiis iuncti sunt . . . oportet, ut parvo tempore transacto, vacent orationibus et ieiuniis; quibus etiam, iuxta indulgentiam, communionem reddi decrevimus (22),» ducere igitur libere ac legitime secundam uxorem, priore defuncta, est secundum ecclesiasticam regulam; tantum abest, ut secundas nuptias aliquando Ecclesia interdixerit.

Ex his documentis patet quid de secundis nuptiis senserit ecclesia: eas nempe numquam in se reprobavit aut interdixit; sed si aliquando eas reprehendit ita se gessit potius ut ad perfectionem fideles provocaret, partim ex eo quod bigami praeter severiorem christiani instituti spiritum, intemperantiae indulgere viderentur, partim ob incommoda, quae provenire ex iteratis nuptiis in privatis familiis consueverunt, scilicet zelotypia et discordia praesertim filiorum qui ex primis eorumque qui ex secundis

(21) Can. VIII. ex vers. Dionys. Exigui apud Harduin. *Acta concil.* tom. I. col. 326 seq.

(22) *Ibid.* col. 781. ex vers. Dionysii Exigui.

nuptiis sunt procreati. Ceterum, ut diximus, eas numquam in se et absolute Ecclesia improbat (23).

Et haec quidem de Ecclesiae utriusque orientalis et occidentalis sensu ac mente dixisse sufficiat: at quod attinet ad privatos quosdam scriptores aut etiam patres, fatendum est nonnullos hac in re modum excessisse ac durius locutos esse.

Ne tamen eos sine examine ex communi praeiudicio damnemus, praestat eorum effata perpendere: fortasse enim ita emoliri possunt ac debent, ut licet prima fronte ab Ecclesiae sensu discordare videantur, penitius inspecta catholicum sensum fundunt.

Primo itaque Athenagoras exponens veterum christianorum mores « *Demonstratione, et disciplina* actionum res nostrae, inquit, continentur, ut quisque vel qualis natus est, maneat, vel unicus in nuptiis. Secundae enim *decorum adulterium*... Qui se ipse prima uxore spoliatur, etiamsi mortua sit, occulta quadam ratione est adulter; tum quod manum Dei transgrediatur (nam initio Deus unum hominem finxit ac unam mulierem), tum quod carnis cum carne coniunctionem quodam veluti vinculo ad commiscendum genus colligatam dissolvat (24). » Nonnulla tamen in hunc locum animadvertenda sunt, ac 1. quod Athenagoras loquatur iuxta communem ac receptam passim tunc temporis disciplinam iuxta quam secundae nuptiae vix, aut raro frequentabantur ob magnum pretium in quo monogamia habebatur, adeo ut secundae nuptiae quodam dedecore notatae viderentur; 2. quod non absolute secundas nuptias vocet *adulterium* sed eas quodam temperamento ob quamdam cum adulterio similitudinem, dicat *decorum et occultum* adulterium. Quod si existimasset secundas nuptias vere veritas, eas presse adulterium dixisset, illudque *indecorum* prorsus, ac *manife-*

(23) Cf. Chardon *Hist. des sacrém.* tom. VI. *Du Mariage* ch. IV. art. 1.

(24) In Legat. pro Christ. n. 33. edit. Maran.

stum vocasset, prout dicitur de polygamia simultanea, adeoque ex hoc ipso textu patet nuptias secundas permissas fuisse, nec posse per sese damnari: attamen qui secundas nuptias ineunt Athenagoras improbat quod ipsi discedant ab ea matrimonii ratione, quam Deus ab initio instituerat, dum unicam Adae uxorem condidit et quod prioris vinculi obliti videantur. Nulla igitur sufficienti ratione Tillemontius suspicatus est Athenagoram hac de causa montanistica labe infectum (25). Quin potius innuit saltem indirecte veram ecclesiae doctrinam (26).

S. Irenaeus pariter secundas et posteriores nuptias reprobasse visus est dum scribit « Samaritanae illi praevaticatrici, quae in uno viro non mansit, sed fornicata est in multis nuptiis (27). » Ast res est maxime incerta, cum iuxta nonnullos patres et interpretes quinque priores viri fuerint legitimi (28), iuxta alios vero adulteri, seu fornicarii, ita ut illa in meretricio quaestu ac libidine vixerit, seu ab illis repudiata fuerit (29). Quapropter ideo s. Irenaeus scripsit fornicatam Samaritanam in multis nuptiis, non quod censuerit illegitimas generatim esse secundas et posteriores nuptias, sed quod illegitimas ac fornicarias existimaverit nominatim fuisse quas illa inierat (30).

Sic etiam quasi improbantis uti illegitimas secundas nuptias Iustini effatum solet in medium afferri: « Quemadmodum etiam qui ex lege humana digamiam ineunt

(25) *Mémoires pour servir à l'hist. eccles. tom. II. Persecut. sous l'empereur Marc Aurel. not. IX. p. 323.*

(26) Cf. Maran. in not. ad h. loc.

(27) Lib. III. *Cont. haeres.* cap. XVII. ed. Massueti alias XIX. n. 2.

(28) Cf. Toletum in h. loc.

(29) Cf. Maldonat. et Calmet.

(30) Atque ita exponit haec s. Irenaei verba Fevardentius dicens annot. in hunc loc. « Non secundas vel tertias damnat nuptias: sed multorum adulteriorum ream Samaritidem intelligit. » Neque ab hoc sensu abludit Grabius. Et sane quomodo potuisset s. Irenaeus damnare in Samaritana polygamiam successivam ante promulgationem legis evangelicae, cum in veteri test. concederetur etiam polygamia simultanea?

peccatores sunt apud nostrum Magistrum, ita et qui mulierem adspiciunt ut eam concupiscant (31).» Ast si orationis seriem expendamus, patebit s. Martyrem haud damnasse secundas nuptias, quas *successivas* dicimus, sed vel eas vituperasse quae non soluto priore vinculo contrahuntur, ut vult Maranus (32); vel eas nuptias damnasse, quas uxore secundum leges dimissa, quis contraheret cum altera foemina ut alii contendunt (33); seu denique damnasse polygamiam *simultaneam*. Sane adduxerat Iustinus immediate ante Christi verba ex Matth. XIX, 12. *Qui ducit repudiatam ab altero viro, moechatur*, ubi de secundis nuptiis nulla est mentio.

Quod vero attinet ad Minucium Felicem, quem pariter adversantem secundis nuptiis plures perhibent, nobis videntur non solido niti fundamento qui id affirmant. Duo sunt loca quae ex eo in hanc sententiam proferun-

(31) *Apolog.* I. n. 15.

(32) In hunc locum nota *d.*

(33) Uti ex protestantibus tenent Thirbius et Ritterus in notis ed. novae opp. s. Iustini ab Otto adornatae Ienae 1847. in 8. tomi I. p. I. pag. 38. ubi legitur: « *διγαμίας*. Hac voce Maranus opinatus est nuptias a Iustino vituperari, quae non soluto priore vinculo contrahuntur (theologi *polygamiam simultaneam* vocant). Braunius secundum contendit matrimonium (τοὺς δεύτερου γάμου s. *bigamiam successivam*) improbari; Thirbius et Ritterus melius intellexerunt secundas nuptias *post divortia* contractas nec vetitas legibus humanis. Hic enim (animadv. in primam s. Iustini m. *apolog.* p. 14. seq.): « Non, inquit, negamus s. Iustinum improbasse secunda matrimonia successiva, quae mortua altera parte incuntur, quemadmodum plerique veteres ecclesiae patres fecere; verum ex eo non sequitur scriptorem hoc loco prae oculis habuisse et nomine *peccati* notasse: nam improbare aliquid et pro peccato habere plurimum inter se differunt. Notum est patres voce *διγαμία* triplici significatione uti, et primum quidem cum quis binas habeat uxores; deinde cum quis matrimonio prioris coniugis morte sublato ad secundas nuptias transierit, denique tertio loco, si quis uxore secundum leges dimissa aliam duxerit. Tantum de tertii matrimonii genere hoc loco Iustinum agere ex eo patet, quod in praecedenti oratione ex verbis Christi ad moechiam spectantia duo notaverat atque edixerat, primum si quis adspexerit mulierem ad concupiscendam eam, iam eam moechatum esse in corde suo, et si quis dimissam ab alio uxorem duxisset. Duo haec genera repetit hoc addens: secundum doctrinam christianam alterum quoque hoc adulterium esse, quamvis leges humanae soluto inter vivos matrimonio ad aliud procedere permittant.»

tur, quorum prior ita se habet: « Alia sacra coronat univira, alia multivira; et magna religione conquiritur quae plura possit adulteria numerare (34). » Posterior vero sic est: « Nos pudorem non facie, sed mente praestamus. Unius matrimonii vinculo *libenter* inhaeremus. Cupiditate procreandi, aut unam scimus aut nullam (35). » Verum ex primis verbis nullum potest argumentum colligi, quo reprobatae a christianis fuisse secundas nuptias evincatur; nec enim ea ad christianos referuntur, sed ad ethnicos quorum interlocutor suggillat mores, ac superstitiosos ritus. Illa praeterea *multivira* potest esse quae iuxta leges romanas pluribus nupserit maritis post divortium; nam polygamia simultanea legibus illis non permittebatur, ut vidimus. Hinc recte ea traducitur uti adultera ob illicitas eius coniunctiones immo illegitimas et nullas iure divino. Ex altero autem textu patet singularis christianorum amor erga continentiam, ac recepta consuetudo abstinendi a secundis nuptiis defuncto alterutro coniuge, ut paulo ante animadvertimus: at quod fornicariae haberentur secundae nuptiae, id a Minucio non dicitur.

Postrema haec animadversio iuvat ut recte mentem assequamur plurium veterum, qui adduci solent veluti digamiae adversarii qui tamen digamiam non improbant, sed solummodo institutum et consuetudinem primorum christianorum laudant qui ut plurimum post interitum alterutrius coniugis in castitate seu viduitate manebant, quin aliis nuptiis se implicarent.

Ita exponenda sunt verba Theophili antiocheni qui ait: « Apud quos (christianos) adest temperantia, continentia colitur, unicum matrimonium (*μονογαμία*) servatur, castimonia custoditur (36) » quibus commendatur quidem

(34) In *Octavio* n. 24. apud Galland. *Bibl.* pp. tom. II. p. 394.

(35) *Ibid.* n. 31. pag. 399.

(36) *Lib. III.* ad Autolyc. §. 16. *Bibl.* pp. Gallandi tom. II. pag. 128.

monogamia , usus communiter recéptus servandae castimoniae adstruitur, sed non ideo secundae nuptiae uti vetitae proscribuntur.

De mente Clementis alexandr. s. Basilii, s. Gregorii nazianzeni, s. Io. Chrysostomi, s. Hieronymi, quin eorum testimonia singillatim persequamur, ex iis, quae paulo ante adduximus satis constat. Nam isti omnes in eo conveniunt ut professionem continentiae post viduitatem extollant, quemadmodum virginitatis seu caelibatus statum statui coniugali anteponunt. Haec constans est sentiendi et scribendi ratio apud patres: alterum alteri statum ceu perfectiorem minus perfecto praeferunt, at non ideo damnant velut peccatum alteram professionem. In secundis praeterea nuptiis, cum peculiaris ratio ad eas cohonestandas non intercedit, deprehendunt, ut alias adnotavimus, quoddam intemperantiae aut incontinentiae indicium, et hac de causa eas interdum carpunt, idque ex amore quo iuxta Christi et apostolorum spiritum erga castitatem et continentiam ferebantur.

Neque ab istorum censu Origenem ipsum excludimus cuius etiam verba dedimus. Nam licet is quandoque ita locutus esse videatur ac si secundae nuptiae a regno Dei excluderent, tamen in eo ipso contextu ea continet quae sinceram doctrinam praeseferunt: Sic enim scribit: « Bonum est et primum (matrimonium), si qua potest virginitatis gratiam possidere. Si autem hoc non potuerit, sed evenerit ei ut perdat virum, vidua perseveret. Quod quidem non solum post mortem viri, sed etiam cum ille vivit debet habere in animo, ut etiam si non venerit voluntas ipsius et propositum, a Domino coronetur et dicat: Hoc voveo atque promitto si mihi humanum aliquid, quod non opto contigerit, nihil aliud faciam, quam incontaminata viduaque perseverem. Nunc vero et secundae et tertiae et quartae nuptiae, ut de pluribus taceam, re-

periuntur, et non ignoramus, quod tale coniugium eiiciet nos de regno Dei. Sicut enim ab ecclesiasticis dignitatibus non solum fornicatio, sed et nuptiae repellunt. Neque enim episcopus, nec presbyter, nec diaconus, nec vidua (diaconissa), possunt esse digami: sic forsitan et de coetu primitivorum immaculatorumque ecclesiae... eiicietur digamus: *Non quo in aeternum mittatur incendium, sed quo partem non habeat in regno Dei...* Puto enim monogamum et virginem, et eum qui in castimonia perseverat, esse de ecclesia Dei: eum vero qui sit digamus, licet bonam habeat conversationem, et caeteris virtutibus polleat, tamen non esse de ecclesia, et de eo numero, qui non habent rugam aut maculam, aut aliquid istiusmodi: sed esse de secundo gradu... et *qui salvantur quidem* in nomine Iesu Christi, nequaquam tamen coronantur ab eo (37).»

Igitur Origenes hoc in loco *regni Dei* nomine minime significat caelestem beatitudinem, neque *ecclesiae* voce militantem ecclesiam, sed peculiarem perfectorum coetum, qui in primo perfectionis gradu consistunt, ad quem spectant virgines et monogami peculiari gloria et corona donandi, a qua excluduntur bigami, utpote imperfecti et ad secundum gradum deiecti; verumtamen ex Origene hi ipsi *salvantur*, adeoque ex eius mente non illicito utuntur concubitu.

Ex horum documentorum disquisitione et examine facile est colligere haud multos esse ex veteribus patribus qui bigamiam habuerint ut illegitimam prout vulgo traditur (38), sed aut omnino paucos, et fortasse, ne unum quidem. Si enim hermeneutica diligentia veterum testimonia expendantur patet non aliam fuisse eorum mentem quam

(37) Hom. XVII. in Luc. ed. De la Rue. opp. tom. III. pag. 953.

(38) Uti Maran adn. in lib. III. s. Irenaei, item in loc. cit. Athenagorae, Otto in nova edit. opp. s. Iustini, Cotelerius in not. cit. ad mandat. IV. Pastoris, Martene *De antiquis eccles. Ritibus* lib. I. cap. IX. art. 1. n. 4. etc.

ut ad maiorem perfectionem fideles in custodienda castitate post viduitatem excitarent, atque ab eo quod minus decet retraherent. Sane Cotelerius, qui pro eruditione sua quotquot potuit in hanc sententiam collegit, non nisi undecim recensuit testimonia, nempe Athenagorae, Theophili Antiocheni, Irenaei, Tertulliani adhuc catholici, Minucii Felicis, Origenis, Gregorii nazianzeni, Chrysostomi, Amphiloerii, Ambrosiani et Hieronymi (39). Porro hi patres ad unum omnes, ut ostendimus, catholicum sensum praeferunt. Hoc erat adnotandum ad vindicias patrum agendas quos protestantes vellicare gestiunt (40).

Sed si ita est, regeret aliquis, quâ factum est ut bigami ab ecclesia variis poenis pro temporum varietate plecterentur? Responsio ex dictis in promptu est, quia ipsa quandam deprehendit in his nuptiarum iteratoribus incontinentiae labem, eo ipso quod Apostolus has secundas nuptias solum indulserit atque permiserit habita ratione horum infirmitatis, dicens: « Quod si non se continent, nubant, melius est enim nubere quam uri (41). »

Atque haec est ratio, quam praebent quotquot durius de secundis nuptiis loqui visi sunt. Iuverit uno alterove veterum testimonio id adstruere, ut melius illorum mens

(39) Coteler. in nota 34. ad lib. II. *Pastoris*.

(40) Cf. Ceiller, *Apologie de la morale des Pères de l'église* ed. Paris. 1718. pag. 31. seqq. necnon Mamachium, *Origin. et antiquit. christ.* Romae 1751. tom. III. lib. III. cap. 6. §. 4. p. 374 seq. Praecipue vero Daniel Tobenz in op. *Examen tractatus Io. Barbeyraci de doctrina morali patrum ecclesiae*. Vindob. 1785. Hic enim calamum strinxit adversus Barbeyracum post Buddaeum lutheranum, qui et ipse insurrexit adversus eundem in *Isagoge historico-theologica*. Lips. 1727. duob. vol. in 4. lib. II. cap. 4. Nec non post doctum Liberatum Fassonium in op. *De morali patrum doctrina adversus librum Io. Barbeyraci*. Liburni 1767.

(41) I. Cor. VII. 9. Quinimmo inveni in capitulis Theodori cantuariensis archiepiscopi cap. XVI. his verbis expressum: « In primo coniugio debet presbyter missam agere, et benedicere aubos: et postea *abstineant se ab ecclesia triginta diebus*; quibus peractis *poeniteant XL. diebus* et vacent orationi et postea communicent cum oblatione. » Apud Dacherium *Spicileg.* tom. IX. pag. 54.

innotescat. Omissis autem Clemente alex., Origene, Theophilo antiocheno, Basilio, Gregorio nazianzeno, aliisque quorum verba iam protulimus, Auctor commentarii in epistolas s. Pauli sub s. Ambrosii nomine, ita loquitur: « Quamquam a Deo primae nuptiae sint, *secundae vero permissae sunt*. Denique primae nuptiae sub benedictione Dei celebrantur sublimiter: secundae autem etiam in praesenti carent gloria; *concessae sunt autem propter incontinentiam*: et quia solent viduarum iuniores incurrere; ac per hoc concedit secundas (42).» Sic etiam Auctor operis imperfecti in Matthaenum loquitur: « Apostoli praeceperunt secundas adire nuptias, *propter incontinentiam hominum*. Nam secundam quidem accipere, secundum praeceptum Apostoli est: secundum autem veritatis rationem, vere fornicatio est; sed dum permittente Deo publice et licenter committitur, fit honesta fornicatio (43) » ut alios praeteream.

Hac ipsa de causa factum est, ut secundae nuptiae in ecclesia parum honorificae haberentur. Siquidem ecclesia digamos a sacris ordinibus tanquam irregulares adhuc arcet: antiquitus autem etiam poenitentiae subiecit. Cuius rei monumenta indubia extant in veteribus constitutionibus. De iis qui ob bigamiam a sacris arcentur ordinibus monumentum extat in ipsis canonibus apostolicis: « Si quis post baptismum secundis nuptiis copulatus... non potest esse episcopus, non presbyter, aut diaconus,

(42) Comm. in 1. Cor. VII. 40. In append. ad opp. s. Ambrosii ed. Maur. tom. II. col. 138.

(43) Homil. XXXII. in Matth. in append. opp. s. Io. Chrysost. ed. Maur. tom. VI. pag. CXXXIV. etsi hic auctor secundas nuptias absolute non improbet, nemo tamen negaverit ipsum temere de eis fuisse locutum dum secundas nuptias permissas ab Apostolo comparat cum permissione facta a Mose dandi libellum repudii. Nec mirum; hic enim auctor utpote arianus et anomaeus in plures errores lapsus est. Inter quos et hic recensetur de secundis nuptiis. Cf. *Diatribam ad opus imperfectum in Matthaenum quod Chrysostomi nomine circumfertur* a Maurin. editore, Monfauconio, praemissa loc. cit. pag. I. §. VI. et VII.

aut prorsus ex numero eorum qui ministerio sacro deserviunt (44). Hic canon exactus est ad normam apostoli Pauli, qui I. Tim. III. praecipit episcopum unius uxoris virum esse debere, seu neminem eligendum in episcopum nisi qui fuerit unius uxoris vir, idem statuit de eligendo in presbyterum Tit. I, 6. et in diaconum I. Tim. III, 12. unde Origenes: « Nec episcopus, nec presbyter, nec diaconus, nec vidua possunt esse digami (45). »

Poenitentiae praeterea publicae addictos quondam digamos fuisse exploratum pariter est, ut constat ex concilio neocaesariensi quod can. III. statuit « De his qui saepius nubunt, *tempus quidem poenitentiae* quod his constitutum est observandum; sed conversatio et fides eorum tempus abbreviabit. » Et can. VII. « Presbyterum convivio secundarum nuptiarum interesse non debere; maxime cum praecipiat *secundis nuptiis poenitentiam* tribuere. Qui ergo erit presbyter, qui propter convivium illis consentiat nuptiis (46)? »

Idem constat ex conc. ancyrano, quod can. XIX. sanxit: « Quotquot virginitatem promittentes irritam faciunt sponsionem suam, inter bigamos censeantur (47). » Nempe subiiciantur eidem poenitentiae qua bigami obstricti sunt; nec non ex concilio laodiceno a quo can. I. statutum invenimus: « De his... qui secundis nuptiis iuncti sunt... oportet, ut parvo tempore transacto, vacent orationibus et ieiuniis; quibus etiam, iuxta indulgentiam, communionem reddi decrevimus (48) » idem colligitur ex s. Ba-

(44) Can. XVII. vers. Dionysii Exigui apud Cotelierum *PP. Apost.* vol. I. p. 436. ed. Antwerp. 1698. In quem canon. Cf. Guillelmi Beveregii annotationes ib. pag. 463.

(45) Hom. cit. XVII. in Luc. Cf. etiam Tertull. *De exhort. castit.* c. 7. Epiphanium *Exposit. fidei*, Hieronymum lib. I. adv. Iovin. et in epist. ad Ageruch. de monogamia etc.

(46) Apud Hard. *Acta concil.* tom. 1. col. 284. celebratum est autem an. 314.

(47) Ibid. col. 279. ex vers. isid.

(48) Ib. col. 781. ex vers. Dionysii.

silio, qui in epist. prima canonica ad Amphilochium can. IV. « De trigamis, inquit, et polygamis definiere (Patres) eundem canonem, quem et *de digamis* servata proportione: annum videlicet in digamis (49). »

Adhuc sec. VII. et VIII. in capitulis Theodoro archiepiscopo cantuariensi adscriptis invenimus: « Digamus poeniteat primo anno, quarta feria et sexta feria, et in quadragesimis tribus absteat se a carnibus, et separetur. » Huc pariter capitulum refertur paulo ante adductum ex eodem Poenitentiali Theodori cantuariensis (50). » Idem constituit Ecgbertus eboracensis, qui bigamos ad abstinentiam a carnibus damnavit integro anno feriis IV. et VI. et spatio trium quadragesimarum; vetuitque quominus sacerdotes assisterent convivio bigamorum (51).

Insuper bigamis passim denegabatur in nuptiarum celebratione benedictio sacerdotalis, prout disertis verbis tradit s. Caesarius arelatensis dicens: « Qui uxorem optat accipere, sicut illam virginem invenire desiderat, ita ipse usque ad nuptias virgo sit: quia si non fuerit, benedictionem accipere cum sponsa sua non merebitur (52). » Idipsum testatus antea iam fuerat Ambrosiaster ut ex allatis eius verbis constat, dum in suo commentario in 1. Cor. VII. « Primae nuptiae, scribit, sub benedictione Dei celebrantur sublimer: secundae autem etiam in praesenti carent gloria (nempe benedictione) (53). » Idem eruitur ex lib. VII.

(49) Ep. ed. Maur. CLXXVIII. opp. tom. III. p. 271.

(50) In *Spicilegio Dacheriano* Paris. 1669. tom. IX. can. XIV. pag. 54. Huc pariter refertur capitulum paulo ante relatam ex eodem Poenitentiali Theodori cantuariensis.

(51) Apud David. Wilkins *Concilia magnae Britanniae*. Lond. 1737. tom. I. pag. 101 seq. *Excerptio. D. Ecgberti eborac. arch. can. XCI.* pag. 106. Cf. etiam *Poenitent.* ibid.

(52) Serm. 289. in append. ed. Maur. opp. s. Augustini tom. V. n. 5. col. 482. Si tamen heic sermo est de bigamis, et non potius de iis qui ante nuptias adulterinum commercium habuissent.

(53) *Loc. cit.*

Capitularium regum francorum quo decernitur: « Nemo usque affinitatis lineam ex propinquitate sui sanguinis connubia ducat, neque *virginibus* sine benedictione sacerdotis, quis nubere praesumat. . . tunc si *virgo* fuerit cum benedictione sacerdotis. . . ducenda est uxor (54), » ex quibus patet eos qui iterum nubebant benedictione caruisse. Et Alexander III. « Cappellanum quem benedictione cum secunda constiterit celebrasse, ab officio beneficioque suspensum (55) » esse declarat. Hinc Durandus: « Nuptiae, inquit, benedicendae sunt a sacerdote cum precibus et oblationibus. Verumtamen vir et mulier ad digamiam transiens, matrimonium contrahendo non debet a presbyteris benedici (56). »

Apud graecos pariter non coronabantur digami, cuius rei testis est Leo Allatius plura proferens documenta (57). Nos alias attulimus verba Theodori Studitae (58). Nicephorus etiam patriarcha constantinopolitanus aperte statuit: « Digamus non coronatur sed poenis subiacet (59). » Usus tamen postea inolevit in ecclesia constantinopolitana ut contra ceterarum Graeciae ecclesiarum morem coronarentur ac benedicerentur etiam bigami, teste eodem Allatio qui scribit: « Ecclesiam (ipsam constant.) bigamis etiam sponsalitiis coronas imponere » dum « Graeci omnes hoc tempore. . . digamos ubique sine ulla benedictione coronant (60) » Goarrius in Euchologio officium coronationis etiam pro bigamis exhibet (61). Verum ut animadverterat iamdiu s. Theo-

(54) In Capitulario reg. franc. ex ed. Baluzii cap. CLXXIX. pag. 1063.

(55) Tit. XXI. *De secundis nuptiis* in decreto lib. IV. cap. 1.

(56) In *Rationali* lib. I. cap. 9. Hic autem Durandus permisceri nequit cum altero Durando episcopo Sancti Porciani.

(57) *De perpetua consensione*, lib. III. cap. 13.

(58) Ex epist. 51. lib. 7. ad Naucratiū, quae tota est de hoc argumento apud Sirmundum tom. V.

(59) Apud Allatium l. c.

(60) Op. et l. cit. pag. 1134. et 1136.

(61) Pag. 403 seqq.

dorus Studita, eiusmodi coronatio aut benedictio, quae, peracta poenitentia, concedebatur bigamis erat a benedictione et coronatione nuptiali plane diversa (62). Immo haec benedictio pro bigamis sero introducta est ex quadam disciplinae immutatione post Leonem imperatorem qui *Philosophus* est nuncupatus (63). Sic in concordiam revocantur quae sibi invicem adversari videntur in ritibus graecorum, dum ex una parte absolute dicitur in ipsorum Euchologiis *digamus non coronatur* (64), ex altera vero invenimus officium peculiare pro coronatione digamorum.

Privabantur praeterea bigami ecclesiae eleemosynis, uti testatur S. Hieronymus scribens: « Non solum ab officio sacerdotali digamus excluditur; sed et ab eleemosyna ecclesiae, dum indigna putatur stipe, quae ad secunda coniugia devoluta est (65).»

Denique nonnisi sub quibusdam conditionibus secundae nuptiae permittebantur, quarum prima fuit, ut integer ab obitu coniugis annus fluere deberet antequam novae nuptiae inirentur: cuius conditionis mentio occurrit in actis s. Meygoldi martyris apud Bollandum in quibus legitur: « Sicut igitur lex canonica de viduis habet, transacto anno post obitum comitis Willelmi, celebrantur nuptiae de Geita et Meygolds (66). Canon reperitur in capitulis ita dictis Theodori cantuariensis his verbis expressus: « Muliere mortua liceat viro post mortem alteram accipere; mortuo vero viro, post annum liceat mulieri alterum virum accipere (67). Hic canon conformis

(62) Epist. cit.

(63) Renaudot. *Perpetuité de la foi* tom. V. pag. 437. nec non Chardon *Hist. des sacrém.* tom VI. p. 208.

(64) *Δίγαμος μὴ στεφανούτος.* Euchol. p. 601.

(65) Epist. cit. ad Ageruchiam. n. 6. ed. Vall. tom. I. col. 898.

(66) Ad diem 8. Feb. tom. II. pag. 193. col. 2. n. 7. floruit porro hic Meygoldus seu Mengoldus ac martyrio functus est sec. X.

(67) In *Spicilegio* Dacherii tom. IX. pag. 58. cap. LXXII. Haec ipsa totidem verbis leguntur in *Exceptis* Ecgberti eboracensis archiepiscopi c. 116.

fuit legi imperiali quae extat in codice Theodosiano: « Si qua ex foeminis perdito marito, intra anni spatium alteri festinavit innubere: (parum enim temporis post X. menses servandum adiicimus, tametsi exiguum putemus); probrosis inusta notis, honestioris nobilisque personae et decore et iure privetur; atque omnia quae de prioris mariti bonis vel iure sponsaliorum, vel iudicio defuncti coniugis consecuta fuerat, amittat. Et sciat nec de nostro beneficio vel adhortatione sperandum sibi esse subsidium (68).» Hunc autem canonem ac legem Innocentius III. abrogavit definiens: « Cum, secundum Apostolum, mulier, mortuo viro suo, ab eius sit lege soluta, et nubendi cui velit *tantum in Domino*, liberam habeat facultatem, non debet legalis infamiae sustinere iacturam, quae licet post viri obitum intra tempus luctus (scilicet unius anni spatium) nubat, concessa sibi ab Apostolo utitur potestate: cum in his praesertim saeculares leges non dedignentur sacros canones imitari (69).»

Altera conditio qua saltem alicubi tenebantur quicumque iterum vellent nubere haec erat, ut novum non celebrarent coniugium absque sacerdotum et populi consensu, prout constitutum reperitur in Capitularibus regum franco-

(68) Lib. III. tit. 8. leg. I. *De secundis nuptiis*, lata autem lex est Eucherio et Syagrio consulibus an. 383. Lex porro haec fuit veterum romanorum a Romulo ipso constituta, cum annus romanus decem tantum mensibus constaret. Licet autem postea a Numa annus protractus fuerit ad menses duodecim, tamen nihil immutatum est circa menses decem viduitatis, adeo ut quoties invenitur penes veteres viduam post mariti obitum lugere per annum, hoc de anno romano decem mensium tantum intelligi debeat. Atque ita res perduravit donec Theodosius duos adiecerit menses, confeceritque annum integrum. Cf. Bingham *Origin. ecclesiast.* tom. IX. lib. 22. cap. 2. §. 8.

(69) Lib. IV. *Decretal. tit. De secundis nuptiis* cap. ult. Idem cap. 4. *Super illam* ibid. statuit Urbanus III. atque hoc merito, nam ex allata Pauli sententia revocatae sunt omnes poenae et infamiae quae secundum leges civiles mulieri secundo nubenti infligebantur; maxime si infra tempus luctus, id est infra annum, aut infra decem menses nuberet. Hinc Plutarchus in Antonio refert, Octaviam sororem Augusti Caesaris, senatus consulto, et auctoritate dispensatam, ut iure posset M. Antonio nubere ante decem menses a viri obitu.

rum; ne christiani « viduas absque suorum sacerdotum consensu et conlibentia plebis ducere praesumant (70). » Hanc tamen conditionem ab ecclesia numquam adoptatam censeo.

Ex quibus omnibus pronum est inferre ecclesiam semper aegre tulisse secundas nuptias, etsi eas numquam prohibuerit. Nec mirum cuique esse debet si ecclesia minus se erga eiusmodi iterata coniugia propensam exhibuit ob indicium quod ea praeseferre videntur animi non admodum continentis pudicique; cum vel apud ipsos ethnicos haec opinio invaluerit (71), adeo ut digami passim despicerentur, ac magno in pretio et existimatione haberentur, quae fidem primo marito defuncto semper servassent.

ARTICULUS II.

Doctrina ecclesiae ac disciplina circa trigamiam ulterioresque nuptius successivas exponitur ac vindicatur.

Dubium non est de legitimitate trigamiae et subsequen-
tium coniugiorum, idem esse ferendum iudicium ac de bi-
gamia. Hoc solum intercedit discrimen iuxta veterem di-
sciplinam, quod severiori poenitentia multati fuerint, qui
ad ultiores nuptias transiissent, quam qui iterato semel
connubio contenti fuissent, ob maiorem incontinentiam
quam praeseferebant. Idque tum in ecclesia occidentali
tum potissimum in orientali quae iugiter se magis adver-
sam his successivis nuptiis exhibuit.

Peculiarem nihilominus proposuimus de hisce ulterio-
ribus coniugiis tractationem instituere, ut veteris ecclesiae

(70) Lib. VI. n. 408.

(71) Hinc Virgilius sic introducit Didonem dicentem:

Si mihi non animo fixum immotumque sederet,

Ne cui me vinco vellem sociare iugali

Huic uni forsitan potui succumbere culpae.

In lib. IV. v. 15-19. ubi repetere nuptias Dido *culpam* vocare non abnuit.

sensum circa illa patefaceremus contra nonnullos qui contendere visi sunt ecclesiam modum excessisse spectando, ut ipsi autumant, eiusmodi matrimonia tanquam absolute illicita immo etiam illegitima ac nulla. At vero rigor ille non dogma sed solam disciplinam attingebat.

Sane nulla erat ratio quare ecclesia trigamiam aut tetragamiam ulterioresque nuptias damnaret dum bigamiam toleraret, probaretque. Siquidem eidem fundamento omnes eiusmodi coniunctiones quae priori succedebant, innitebantur, verbis scilicet Apostoli tum in Ep. ad Rom. « Si mortuus fuerit vir eius liberata est (mulier) a lege viri, ut non sit adultera, si fuerit cum alio viro; » tum in I. Ep. ad Corinth. « Dico autem non nuptis *et viduis*, bonum est illis, si sic permaneant, sicut et Ego. Quod si non se continent, nubant » et iterum: « mulier alligata est legi quanto tempore vir eius vivit, quod si dormierit vir eius, liberata est, cui vult nubat: tantum in Domino. »

Quae sententiae generales sunt, neque coarctant nuptiarum repetitionem ad unam vel alteram tantum, sed indefinite se se extendunt ad tertias, quartas aut quintas nuptias prout iamdiu adverterat s: Augustinus licet viduitatem prae nuptiis et commendet et suadeat: « De tertiis, inquit, et de quartis nuptiis solent homines movere quaestionem. Unde, ut breviter respondeam, nec ullas nuptias audeo damnare. . . . Quis enim sum, qui putem definiendum quod nec Apostolum video definiisse? Ait enim: *Mulier alligata est quamdiu vir eius vivit*. Non dixit, primas, aut secundas, aut tertias, aut quartas: sed, *mulier*, inquit, *alligata est quamdiu vir eius vivit, si autem mortuus fuerit vir eius, liberata est, cui vult nubat, tantum in Domino. Beatior autem erit, si sic permanserit*. Quid huic sententiae, quantum ad hanc rem adinet, addi vel detrahi possit, ignoro. . . . Quapropter nec contra humanae verecundiae sensum audeo dicere, ut quotiens voluerit,

viris mortuis, nubat foemina: nec ex meo corde praeter Scripturae sanctae auctoritatem, quotaslibet nuptias audeo condemnare (72). »

Haec confirmantur ex iis quae respondit Christus Dominus sadducaeis ab eo sciscitantibus cuius futura esset uxor, quae septem fratribus nupserat. Nam eam non damnat quod septem viris nupsisset, ut iterum observat s. Augustinus scribens: « Ipsum quoque apostolorum magistrum et Dominum audio sadducaeis respondentem, cum proposuissent mulierem non univiram, vel biviram, sed, si dici potest, septiviram, in resurrectione cuius futura esset uxor. Increpans enim eos, ait, *Erratis, non scientes Scripturas, neque virtutem Dei. In resurrectione enim nec nubent, nec uxores ducent: non enim incipient mori, sed erunt aequales angelis Dei.* Eorum itaque resurrectionem commemoravit, qui resurgent ad vitam, non qui resurgent ad poenam. Potuit ergo dicere, erratis nescientes Scripturas neque virtutem Dei, in illa enim resurrectione multinubae istae esse non poterunt: deinde addere, quia nec aliqua ibi nubit. Sed nec ipsam, ut videmus, tot maritorum mulierem ulla suae sententiae significatione damnavit (73). »

Nec ab Augustini sensu reliqui patres abscedunt, etsi interdum eiusmodi connubia acerbe perstringant atque damnare videantur. Ita Clemens alexandr. qui ita disserit: « Quemadmodum avaritia, et plura habendi cupiditas, dicitur fornicatio, ut quae adversatur sufficientiae; et ut idololatria est ex uno in multos Dei attributio, ita fornicatio est ab uno matrimonio ad plura prolapsio (74), » nec non s. Gregorius nazianzenus, qui Apostoli verba *sacramentum hoc magnum est etc.* expendens: haec scribit: « Hac oratione secundas nuptias mihi deprecari videtur. Si enim

(72) Lib. *De Bono viduitat.* Cap. XII. ed. Maur. opp. tom. VI. col. 376 seq.

(73) Ibid.

(74) *Strom.* lib. III. pag. 464. ed. cit.

duo Christi sunt, duo quoque viri sint, et duae uxores: si autem unus Christus, unum ecclesiae caput; una etiam caro sit, secunda autem respuatur. Quod si secundum prohibeat, de tertio quid dicendum est? Primum lex est, secundum venia et indulgentia, *tertium iniquitas*: qui autem hunc numerum excedit, porcinius plane est, utpote ne multa quidem vitii exempla habens (75). »

Sed prae ceteris s. Basilius in tertias et quartas nuptias invehitur. Siquidem canone L. epistolae canonicae II. ad Amphiloichium ita constituit: « Trigamiae lex non est. Quare lege matrimonium tertium non contrahitur. Ac talia quidem, ut ecclesiae inquinamenta habemus, sed condemnationibus publicis non subiicimus, ut soluta fornicatione magis eligenda (76). » Et iterum in altera epist. canonica scilicet III. ad eundem, can. LXXX. « Polygamiam, inquit, patres silentio praetermiserunt, ut belluinam, prorsusque ab hominum genere alienam. Ea autem nobis videtur peccatum esse fornicatione maius. Quapropter consentaneum est eos subiici canonibus, ut scilicet postquam anno sleverint, et tribus substrati fuerint, sic suscipiantur (77). »

Iam vero hos patres ex amore quo ferebantur in castitatem ac caelibatum reprehendere potius ita nubentes quam *nuptias* ipsas inde patet, quod perpetuo insistant in incontinentia huiusmodi sive virorum, sive mulierum, quod animum gerant in libidinem effusum. Sane argumenta quae proferunt eiusmodi sunt, ut si presse urgerentur non minus afficerent tertias et quartas ultterioresque nuptias, quam secundas, quas tamen ex venia et indulgentia permitti ultro affirmant. Oculos praeterea intendunt in ecclesiae disciplinam severiorem erga trigamos et tetragamos

(75) *Orat.* XXXI. Opp. ed. Paris. 1630. Tom. I. pag. 301.

(76) *Epist.* ed. Maur. CXCIX. pag. 297.

(77) *Epist.* CCXVII. pag. 329.

quam in bigamos. Porro si ecclesia poenitentiae etiam bigamos subdebat, quanto magis tertio aut quarto nubentes? Accedit quod ecclesia graeca et cum ea ecclesia orientalis universa velut illegitimum tetragamiam respuerit lege canonica quae sin minus universim, saltem in plerisque ecclesiis obtinebat; multo vero magis posteriores nuptias quas decrevit esse nullas, apposito impedimento dirimente, quod lege ipsa civili adoptatum est adeoque non *per se* eiusmodi nuptias reprobarunt antiqui patres, sed ob ecclesiasticam legem qua nullae declaratae sunt, nec univ-erse quidem.

Theodorus Balsamon celebris orientalis ecclesiae iuris canonici peritus refert antiquam legem uti legitimas agnovisse etiam tertias nuptias, (liberosque exinde ortos uti haeredes qui erant sub parentum potestate). Ast canones sanctorum patrum, ait ipse, non modo haud agnoscunt tertium coniugium, verum etiam adiudicant secundum mediocri poenitentiae. Tempore imperatoris Leonis *philosophi* magna turbatio excitata est in omnibus mundi ecclesiis (78), quia se iunxit non modo in tertiis, sed in quartis nuptiis. Hac super re congregatio omnium ferme episcoporum cunctarum provinciarum orientalis imperii coadunata est indictione VIII. anno ab orbe condito 6428. et ab incarnatione 921. In ea discussio facta est quaenam coniugia possent uti legitima admitti, quaenam vero reiici deberent (79). Qui deinde refert, postea sub imperio Constantini porphyrogenitae ac Romani ipsius generis, constitutum fuisse, post varias consultationes ac severum examen. *tomum synodicum* ab imperatore firmatum, ac declaratum esse quartas nuptias abolendas (80); demum refert constitu-

(78) Nempe in ecclesia orientali, siquidem in ecclesia occidentali res aliter se habuit; ut postea expendemus.

(79) *Iur. Orient.* l. 5. pag. 389. apud Renaudot. op. et loc. cit.

(80) *Ibid.*

tum fuisse in eodem tomo synodico eos qui non excessissent quadragesimum aetatis annum, si post secundas nuptias liberos non habuissent, posse tertium contrahere coniugium ut defectui posteritatis supplerent; ita tamen ut quinquennio subiicerentur poenitentiae et absque communione permanerent. Insuper eandem veniam datam fuisse tertio iterandi nuptias iis, qui vidui extitissent an. aetatis trigesimo ob aetatis infirmitatem, etiamsi liberos suscepissent; privati tamen essent quadriennio communione, quo tempore elapso, ad eam admittebantur saltem ter in anno: Balsamon nihilominus addit tomum unionis veluti legem civilem habitum fuisse, et ecclesiam usque ad suam aetatem tertias nuptias non permisisse (81). Postea tamen alia consuetudo in ecclesia graeca inolevit (82).

Itaque ex his manifeste colligitur non ad dogma, sed ad disciplinam pertinere severam polygamiae successivae prohibitionem, quae in ecclesia graeca et orientali viguit, et adhuc, saltem ex parte viget, in qua velut impedimentum dirimens in tetragamia ac polygamia generatim constitutum fuit, atque ab immemorabili servatum (83).

Quapropter ut supra generatim innuimus, antiqui illi patres quorum testimonia descripsimus cohaerenter ad il-

(81) Ibid. Cf. etiam Photii *Nomocanon*. Tit. XIII. in *Biblioth. iuris canonici veteris* Voëlli Paris. 1661. Tom. II. pag. 1080.

(82) Cf. Renaud. loc. cit. pag. 407. cf. etiam Arcadium op. cit., c. 25. ubi fusius quae Balsamon obiter ac strictim refert, enarrat, ostenditque postea licitas vel apud graecos et orientales reliquos tertias nuptias evasisse. Non tamen mihi omnia probantur, quae idem auctor illic habet.

(83) Cf. Arcadium l. c. pag. 550. col. 1. ubi scribit: « Cum canonico iure quartae nuptiae apud graecos omnino sublatae sint. » Verum de his quartis nuptiis apposite nonnulla addemus paulo post, ob gravia iurgia propter eas excitata. Id ipsum consuit cl. card. Maius, qui in praef. ad vol. X. *Spicilegii Romani*, pag. XVI. scribit: « Quod denique quartas nuptias Nicolaus (cognomento *Mysticus* patriarcha constantinopolitanus) πορνείαν fornicationem, vel peius quiddam, audet cum priscis aliquot appellare pag. 295. id non aliter intellico, quam de impedimento, ut aiunt, dirimente, quod auctoritate ecclesiastica interpositum, nullas reapse reddit nuptias quamdiu tenet; ideoque ipsorum usus a πορνείας laebe non differt. »

lam disciplinam ac legem canonicam locuti sunt, dum tertio et quarto repetitas nuptias damnarunt (84).

Sane argumentum quod profert s. Gregorius nazianzenus impeteret etiam secundas nuptias, si quid valeret. Quando autem *iniquitatem* vocat tertias nuptias, ac porcinum ulterius nuncupat matrimonium, referri id debet ad legem ecclesiasticam ecclesiae graecae, quae posteriores has nuptias tanquam illegitimas respuebat, et ad animum incontinentem eorum, qui se his nuptiis implicabant.

Eadem ratione exponi debet s. Basilium immo vero longe potiori iure, nisi velimus eum secum committere. Ut enim apposite scribit Arcudius: « Non video quomodo haec sibi invicem cohaereant, ut trigamia sit fornicatio tantum non relaxata et ad unius foeminae complexus contracta, et tamen non dissolvatur: sed peracta aliquot annorum poenitentia trigami admittantur ad participanda ecclesiae sacramenta, cum interim simul habitent et procreent liberos. Si enim trigamia est fornicatio, non potest ecclesia Dei, ornatissima sponsa Christi, quae sine ruga est, non habens maculam, eiusmodi peccatum permittere. Quod si permittit, igitur non est fornicatio: quippe fornicatio non est aliquid indifferens, ut possit subire rationem boni et mali: sed si fornicatio est, semper mala est (85). » Et reipsa vidimus in art. praecedenti s. Basilium statuisse « de trigamis et polygamis definire (patres) eundem canonem, quem et de digamis, servata proportione: annum videlicet in digamis, alii vero duos annos: *Trigamos autem tribus et saepe quatuor annis segregant.* Id autem non amplius

(84) Censet idem auctor s. Basilium et Gregorium nazianzenum in suis ecclesiis ex iusta causa quaedam matrimonia irritasse. Ibid. p. 551.

(85) *De concordia* etc. lib. 7. cap. 78. Nonnulli, ut Zonaras, Balsamon, aliique censent s. Basilium in can. 89. non loqui de trigamia sed de tetragamia, quae per leges prohibita erat. Verum hae sunt merae coniecturae. Maurini sane editores ab hac sententia recedunt gravibus argumentis innixi quae in nota quam ad hunc can. 80. apponunt, videri possunt.

coniugium, sed polygiam appellat, vel potius *moderatam fornicationem* . . . jam vero consuetudine accepimus in trigamis quinquennii segregationem, non a canonibus, sed eos qui praecesserunt sequendo. Oportet autem eos *non omnino arcere ab ecclesia*, sed auditione digamos duobus vel tribus annis, ac postea ipsis permittere, ut consistent quidem, abstineant vero a boni communione, et sic exhibito poenitentiae aliquo fructu, communionis loco restituere (86). » Adeoque constat iuxta s. Basilium non divino iure, sed iure tantum canonico trigamiam, multo vero magis tetragamiam vetitas fuisse, et quodam temperamento identidem circa trigamos opus fuisse; prout reipsa postea factum est.

De tetragamia autem seu quartis nuptiis speciatim nonnulla addenda sunt. Hanc canonica auctoritate in ecclesia graeca explosam fuisse uti fornicationem, aut fornicatione peiorem nullum dubium esse potest iuxta antiqua quae suppetunt documenta (87). Verum heic non steterunt nonnulli ex iis qui tetragamiam impugnarunt. Siquidem ob eximiam potissimum ss. Basilii ac Gregorii nazianzeni auctoritatem factum est ut aliquot tum antistites tum imperatores tetragamiam *divina lege* vetari censuerint. Haec potissima, immo unica ratio est qua permotum se dicit Basilius Macedo ad quartas nuptias proscribendas peculiari Novella quam his verbis conclusit: « Manifestum omnibus esto, quod si quis ausus fuerit ad quartas nuptias, *non nuptias* accedere, non solum pro nullis habebuntur hae nuptiae, nec liberi ex iis procreati pro legitimis agno-

(86) Ep. CLXXXVIII. can. 14. p. 271. ed. cit.

(87) Etenim in *Constitutionibus quae vulgo apostolicae aut Clementinae* nuncupantur lib. 3. c. 2. legitur: « Id quoque scire debetis, primas quidem et unicas nuptias . . . iustas esse. Secundas vero post professionem nuptias, esse illicitas, non propter coniugium, sed propter mendacium; tertias nuptias intemperantiam demonstrare; *at quodlibet post tertias nuptias matrimonium, manifestam esse fornicationem et indubitabilem petulantiam.* » Apud Coteler. *PP. Apost.* tom. I. p. 275. ed. Antwerp.

scentur , verum etiam ipse potius pollutorum scortationis sordidus subiicietur , eiusmodi videlicet personis a se invicem separatis (88). » Idipsum confirmavit Leo philosophus seu Sapiens Basilii filius nuptias etiam tertias poenis ecclesiasticis subiiciens (89).

Attamen hic idem Leo Sapiens non contentus ipse tertiis nuptiis , verum et quartas celebravit cum Zoe iam antea pellice sua ex qua filium procreaverat quem sibi in imperio successorem designavit. Quae res conturbationem non minimam excitavit ; nam Nicolaus cognomento Mysticus patriarcha constantinopolitanus imperatorem communione privavit : quum vero imperator ad apostolicam sedem appellasset , Sergius pontifex nuptias Leonis probavit cohaerenter ad traditionem ac disciplinam ecclesiae romanae. Hinc imperator exilio multavit Nicolaum pontificis iudicio obnitentem , contendentemque divino iure illas nuptias vetitas esse , nec a rom. pontifice dispensari in illis potuisse. Suffectus fuit Nicolao in constantinopolitana sede Eutymius qui imperatori favebat. Hinc schisma inter graecos ortum , aliis Nicolao , aliis Eutymio adhaerentibus : donec alternantibus prosperis et adversis casibus , pax inita est. Nam Nicolaus tandem eo se recepit ut fateretur nonnisi ecclesiastico iure prohibitas quartas nuptias fuisse , constitutum tamen voluit ut disciplina pro ecclesia graeca contra tetragamiam sanciretur et numquam deinceps relaxaretur , neque apostolica sedes huic sanctioni obstitit (90).

(88) Lib. 2. *Iuris orient.* apud Arcudium.

(89) In Novella 90.

(90) Epistolas omnes Nicolai Mystici , quae hactenus in bibliotheca vaticana sermone graeco delituerant , primus vulgavit card. Maius in cit. *Spicilegio romano* tom. X. Sunt autem hae epistolae numero CLXIII. quas laudatus editor in septem classes distribuit. Quae ad rem nostram referuntur , continentur in tertia classe ac datae sunt ad rom. pontificem eiusque ecclesiae homines , nempe ad Ioannem X. vel Anastasium III. Hic Nicolaus qui a Leone Sapiente electus fuit ad patriarchalem sedem an. 895. quadriennio post Photii obitum ,

Nunc vero quod sciam, nemo est qui contendat quartas et ulteriores nuptias divino iure esse prohibitas, licet mordicus severiori disciplinae de reiiciendis eiusmodi nuptiis graeci insistant. Nec mota amplius est hac de re querela in concilio lugdunensi II. Eugenius vero IV. in concilio florentino in decreto pro iacobitis seu armenis edixit: « Quoniam nonnullos asseritur quartas nuptias tanquam condemnatas respuere, ut peccatum, ubi non est, esse putetur, cum secundum Apostolum, mortuo viro, mulier sit ab eius lege soluta, et nubendi cui vult in Domino habeat facultatem, nec distinguat, mortuo primo, vel secundo, vel tertio, declaramus non solum secundas, sed tertias et quartas, atque ulteriores, si aliquod impedimentum non obstat, licite contrahi posse. Commendatiores tamen dicimus, si ulterius a coniugio abstinentes in castitate permanserint: quia sicut viduitatis virginitatem, ita nuptiis castam viduitatem laude et merito praeferendam esse censemus (91). »

Et haec de graecis et orientalibus; quod vero ad latinos et occidentales spectat benignior semper fuit quod ad trigamiam et tetragamiam ulterioresque nuptias spectat loquendi ratio ac disciplina. Non defuerunt quidem ex antiquioribus etiam latinis patribus, qui has nuptias carpere plus aequo visi sunt, non quod eas absolute damnaverint ac si divinae legi adversarentur, sed eam potissimum ob causam quam plus semel attulimus; nempe ob effusam et inverecundam in venerem propensionem quam ii patefaciunt qui tertio et quarto nubunt.

Notum est s. Hieronymum inter patres latinos se maxime tertiis ac ulterioribus nuptiis infensum praebuisse. Si-

Sancti nomine a Baronio et a bollandianis, 'Cupero scilicet, in patriarchis constantinopol. et Henschenio, in *Actis sanct.* die 15. maii donatus est cf. Maium praef. cit. pag. VI seqq. nec non Arcudium loc. pariter cit.

(91) Apud Harduin. *Actu concil.* tom IX. col. 1028.

quidem interdum terna ut ipse loquitur, et quaterna coniugia, *non tam coniugia* dicit, quam « miseriarum solatia, et extremam tabulam naufragorum (92); » interdum vero hoc uno nomine tolerandas affirmat tertias nuptias, quod praeferendae sint cum pluribus scortationi dicens: « Tolerabilis est uni homini prostitutam esse quam multis: siquidem et illa in evangelio Ioannis samaritana sextum se habere maritum dicens, arguitur a Domino quod non sit vir eius. Ubi enim numerus maritorum est, ibi vir, qui proprie unus est, esse desiit (93), » et alibi passim eadem repetit (94).

Nec ab hac sententia discrepare videtur s. Fulgentius qui bigamiam tantum aut trigamiam ex indulgentia permissam docet, nec ulterius progreditur (95); nec non Herardus turonensis episcopus, qui inter capitula a se collecta, hoc etiam inseruit: « Nullus laicus plus quam duas uxores habeat: quod extra est, ad adulterium pertinet, similiter et mulier (96). » In Poenitentiali romano apud Hugonem Menardum ad librum sacramentorum s. Gregorii M. constitutum est: « Si cuiuslibet hominis mortua fuerit uxor, habet potestatem accipere alteram: similiter et mulier. Si tertium acceperit, ieiunet hebdomadas tres: si quartum acceperit, ieiunet hebdomadas viginti et unam (97). »

Haec quidem verissima sunt, ostenduntque ecclesiae spiritum respectu viduitatis et castitatis, ceterum nemo

(92) *In Ierem.* lib. III. cap. 16. vol. I. opp. ed. Vallars. tom. IV. col. 951.

(93) *Lib. I. adv. Iovinian.* ed. cit. tom. II. col. 263.

(94) Ut in ep. ad Ageruchiam de monogamia ed. cit. n. 123. quae tota est de hoc argumento, ubi ad persuadendam monogamiam pleraque desumpsit ex Tertulliano, etsi diversa omnino mente. Nam Tertullianus ut illegitimam polygamiam successivam traducit; contra vero s. Hieronymus ab ea abducit viduos aut viduas maioris perfectionis causa.

(95) *De Fide ad Petr.* cap. 3. n. 43. Item c. 41. n. 83. ed. Paris. 1684.

(96) N. CXI. apud Labb. tom. VIII. concil. p. 635. floruit autem Herardus an. 858.

(97) *Opp. s. Greg.* ed. Maur. tom. III. col. 469.

ex his qui recensiti sunt proprie polygamiam successivam damnavit.

Etenim vel ipse s. Hieronymus qui durius prae ceteris locutus est, mentem suam data occasione exposuit; cum enim ipse hac de causa in suspensionem apud nonnullos aemulos potissimum ac detractores venisset, apologiam scripsit eorum quae in lib. contra Iovinianum hoc de argumento exaraverat. Ait autem inter cetera in hac apologia s. Doctor. «Erubescat calumniator meus, dicens me prima damnare matrimonia, quando legit: *Non damno digamos et trigamos, et si dici potest octogamos*. Aliud est non damnare, aliud praedicare. Aliud est veniam concedere, aliud praedicare virtutem. Si autem durus in eo videor, quia dixi: quidquid aequaliter licet, aequali lance pensandum est; puto non me crudelem iudicabit et rigidum, quia alia loca virginitati et nuptiis, alia trigamis et octogamis, et poenitentibus legerit praeparata. Christum in carne virginem, in spiritu monogamum, quod unam haberet ecclesiam, noster in reliquis sermo testatus est, et crediti sumus nuptias damnare (98)! »

Post adeo diserta verba facile est emollire duriusculas eius phrases quibus identidem trigamiam aliasque ulteriores nuptias vellicavit. Sic sensus patet eorum quae scripsit contra Iovinianum: « Considera, quod quae duos habuit viros, etiamsi anus sit et decrepita, et egens, ecclesiae stipes non meretur accipere. Si autem panis illi tollitur eleemosynae, quanto magis ille panis qui de caelo descendit, quem qui indigne comederit, reus erit violati corporis et sanguinis Domini (99)? » Reus nempe efficitur ob animum lascivientem quem praesefert, non ob nuptias in se spectatas. Idem dic de eo quod in epist. ad Ageruchiam affirmat: « Ab officio sacerdotii digamus excluditur . . .

(98) Epist. XLVIII. ad Pammach. ed. cit. n. 9. tom. I. col. 217.

(99) Lib. I. n. 14. ed. Vallars. tom. II. col. 264.

Quamquam lege sacerdotali teneatur et laicus, qui talem praebere se debet, ut possit eligi in sacerdotium. Non autem eligitur, si digamus fuerit. Porro eliguntur ex laicis sacerdotes. Ergo et laicus tenetur mandato, per quod ad sacerdotium pervenitur (100).» Nempe loquitur hic s. Doctor de quadam convenientia et congruentia, non autem de obligatione presse sumpta, alioquin in absurda dilapsus fuisset.

Eorum autem, quae scripsit s. Doctor in comment. in Ieremiam sensus planus est, si eius contextus inspiciatur, qui ita se habet: «Unde superflua novi haeretici (Ioviniani) reprehensio, qua docuimus digamiam et trigamiam non ex lege descendere, sed *ex indulgentia*. Aliud est enim facere, quod *per se bonum sit*, aliud *ideo concedi ne peiora faciamus*. Dicit enim et ipse (Apostolus) caussas, cur velit adolescentulas viduas nubere, inferens: *Iam enim quaedam earum abierunt retro post satanam*. Simulque praeceptor continentiae, et perpetuae castitatis, et *aequalem se blasphemans Deo*, laudat terna quaternaque coniugia, quae ego non tam coniugia, quam miseriarum solatia, et extremam tabulam naufragorum: nisi forte tribuit indulgentiam amazzonibus suis, ut usque ad decrepitam senectutem bella libidinum experiantur (101).» Itaque non absolute iterata eiusmodi coniugia s. Doctor damnavit et in se, sed unice respectu nubentium.

Ex his pariter vis illarum phrasium colligitur quas s. Hieronymus identidem usurpavit ad iteratas nupias deprimendas, uti cum eas vocat mitiores *prostitutiones*, aut

(100) N. 6. ed. cit. col. 898. atque hic obiter noto, quod antea indicavi ipsum argumentum prolatum fuisse a Tertulliano, atque inde a s. Hieronymo desumptum licet sine spirituque diverso. Sic enim ratiocinabatur Tertullianus in lib. *De exhortatione castit.* ut adstrueret universim monogamiae necessitatem: «Omnes nos Deus vult dispositos esse, ut ubique sacramentis eius obeundis apti simus. Unus Deus, una fides, una et disciplina. Usque adeo nisi et laici ea observent per quae presbyteri adleguntur, quomodo erunt presbyteri, qui de laicis adleguntur?»

(101) Loc. cit. in Ierem.

scortationes; aut cum viros priori superinductos cum viris comparat mulieris samaritanae, qui post primum proprie viri non fuerunt, cum talis ex eius sententia nonnisi unus fuerit (102). Quo sensu idem s. Pater intelligi debet cum refert se Romae vidisse « duo inter se paria vilissimorum e plebe hominum comparata, unum, qui viginti sepelisset uxores, alteram, quae vicesimum secundum habuisset maritum, extremo sibi, *ut ipsi putabant*, matrimonio copulatos. Summa omnium expectatio virorum pariter ac foeminarum, post tantas rudes quis quem prius efferret. Vicit maritus, et, totius Urbis populo confluente, coronatus, et palmam tenens adoremque, per singulos sibi acclamantes, uxoris multinubae feretrum praecedebat. Quid dicemus, subdit, tali mulieri? Nempe illud, quod Dominus Samaritanae: viginti duos habuisti maritos, et iste a quo nunc sepeliris, non est tuus (103).» Nam in hac ipsa epistola in qua hoc factum refert, aperte protestatur se non damnare digamiam dicens: « Quid igitur? damnamus secunda matrimonia? absit: sed monogamos ad continentiam provocamus.» Quod autem heic scribit s. Hieronymus intelligi aequum est non de stricta tantum digamia, sed de poly-

(102) Notandum est non modo s. Irenaeum pro certo habuisse quatuor viros quos habuit Samaritana post primum non fuisse legitimos eius viros, saltem ex nonnullorum interpretatione, ut vidimus, sed id ipsum tenuisse s. Basilium epist. ed. Maur. 188. ubi can. 4. scribit: » Quapropter et Dominus Samaritanae, quae maritos quinque per vices habuerat, *quem nunc*, inquit, *habes maritus non est*: Quippe quod ii, qui digamiae mensura exciderunt, digni non sunt, qui vel mariti vel uxoris nomine appellentur. » Idemque censuisse s. Hieronymum. At dubitari nequit viros illos de quibus loquitur Christus vere fuisse legitimos, uti s. Augustinus, Beda, Eutymius, aliique passim docent, atque ut etiam patet ex antithesi quam instituit Salvator inter quinque priores viros quos habuit mulier illa, et sextum quem dicit non fuisse eius virum. Praeterea constat in veteri lege nunquam polygamiam successivam fuisse prohibitam, ac determinatam ad secundum tantum coniugium. Immo patet saltem septem potuisse mulierem viris successive nubere, ex casu a sadducaeis Christo proposito de septem fratribus, qui successive eandem mulierem in uxorem susceperant. Cf. Salmeron. in I. ad Cor. c. VII. Cornel. a Lap. in cap. IV. s. Ioan.

(103) Epist. CXXIII. ad Ageruch. n. 10.

gamia generatim, ut constat ex aliis eiusdem testimoniis quae superius descripsimus, eo vel magis quod non dif-
fiteatur viginti duos priores, quibus haec mulier nupserat,
fuisse maritos.

Et haec de Hieronymo. Quod vero spectat ad s. Fulgentium nullam facessit difficultatem quod in secundis et tertiis nuptiis constiterit neque ulterius fuerit progressus. Nam non in sensu quem vocant exclusivo ea scripsit, perinde ac si posteriores nuptias abiecerit, sed ideo stetit in tertiis nuptiis, quod ut plurimum in eis homines sistere soleant. Nihil est quod nos cogat alio in sensu verba eius accipere, quae ita se habent: « Firmissime tene, et nullatenus dubites . . . Nuptias quoque divinitus institutas et benedictas . . . Nec solas primas nuptias a Deo institutas: sed etiam secundas et tertias, pro eorum, qui se continere non possunt, infirmitate concessas. » Sane s. Fulgentius ubique fidissimum s. Augustini discipulum se profitetur; cum autem s. Augustinus et tertias et posteriores probaverit nuptias tanquam licitas, non alio sensu enarrari debet s. Fulgentius.

Herardus archiepiscopus turonensis varios canones disciplinares collegit quos ecclesiae suae servandos proposuit sancivitque in concilio a se celebrato. Non indicat vero fontes unde eos adsciverit; forte hunc de quo est sermo, ex aliquo auctore graeco decerpsit trigamiae ad-
verso. Aut etiam *adulterii* vocem latiori significatione usurpavit ut viduos magis a consecrandis tertiis et ulterioribus nuptiis deterreret eadem ratione qua se gessit s. Hieronymus. Quod etiam coniicio ex iis quae constituit idem Herardus can. XLI. « Quicumque viduam infra XXX. dies viduitatis invitam vel volentem acceperit, ultra eam non attingat: et *adulterii* poenas luet (104), » nam si de vero coniugio, ut videtur, hoc in canone agitur, non potest

(104) Apud Labb. loc. cit. col. 630.

nisi in lata significatione vox adulterii accipi, ob indecentiam scilicet eiusmodi citissimae coniunctionis. Quidquid porro sit, exploratum est hunc canonem adversari doctrinae et praxi ecclesiae romanae, imo et universae ecclesiae occidentalis.

Demum Poenitentiale romanum aperte ostendit ceu legitima spectata ab ecclesia latina fuisse coniugia trigamorum ac tetragamorum; nam qui sic nuptias contraxerunt invicem non separantur, prout separari iubentur qui altero coniuge vivente alium duxerit. Sic enim in eodem Poenitentiali statuitur: « Si quis legitimam uxorem habens dimiserit illam, et aliam duxit, *illa quam duxit non est illius*. Non manducet neque bibat, neque omnino in sermone sit cum illa, *quam male accepit* (105).» Apposite in hunc obiectum locum Hugo Menardus. « Haec constitutio, scribit, *si tertiam accepit* etc. notanda: quamvis enim bigamos, trigamos etc. permittat ecclesia, quia tamen haec polygamia, seu nuptiarum repetitio aliquid incontinentiae in homine notat, eiusmodi homines praeter irregularitatis notam quibusdam aliis poenis olim subiacere voluit (106).»

Illud autem pro certo exploratoque in universa ecclesia tum orientali tum occidentali habitum semper fuit, excludendos esse digamos a sacris ordinibus ob Apostoli auctoritatem scribentis « Oportet episcopum esse unius uxoris virum (107). » Quae quidem ad ceteros sacerdotii gradus extensa sunt ab ecclesia iuxta Apostoli mentem. Ex innumeris prope documentis, quae hanc in rem afferri possent, contentus ero testimonio s. Epiphani, qui expresse affirmat quod « secundis nuptiis implicatus in ecclesia ad sacerdotium non admittitur; tametsi aut sese ab

(105) Opp. s. Greg. M. tom. III. col. 469.

(106) Loc. cit. col. 476. Cf. etiam de hoc argumento Cotelerium in nota 66. ad caput II. libri tertii *Constit. apostolic.*

(107) I. Tim. III. 2. et ad Tit. I, 7.

uxore contineat, aut sit viduus. Eiusmodi, inquam, ab *episcopi, presbyteri, diaconi, et subdiaconi* gradu reiicitur (108).» Haec eadem alibi inculcat scribens: «Ita enim profecto sese res habet, ut post Christi in orbem terrarum adventum eos omnes, qui secundum priores nuptias mortua uxore alteris sese nuptiis illigarint, sanctissima Dei disciplina reiiciat: propterea quod incredibile est sacerdotii honor et dignitas. Atque istud ipsum sacrosancta Dei ecclesia cum omni provisione diligentiaque servat (109).» Quod adeo verum est, ut ne ariani quidem contra communem illam, receptamque consuetudinem agere ausi fuerint. Nam idem s. Pater refert Iosephum comitem cum ariani, ut ad partes suas illum traherent, episcopatum ei pollicerentur, ne invitus ab illis ordinaretur, priore coniuge defuncta, secundas nuptias iniisse (110). Testimonium Origenis hac pariter de re disertum superius attulimus. Quare concilium valentinum sub Damaso celebratum statuit «Uti digami ne ordinentur clerici, etiamsi gentiles adhuc se infelicis sortis necessitate maculaverint (111).» Quod dictum est de bigamia multo magis de trigamia intelligi debet; nam conc. toletanum I. can. IV. decrevit: «Subdiaconus, defuncta uxore, si aliam duxerit, ab officio in quo constitutus fuerat, amoveatur, et habeatur inter ostiarios vel inter lectores . . . Qui vero tertiam, quod nec dicendum, aut audiendum est, acceperit; abstentus bien-

(108) In *Expositione fidei* n. XXI. ed. Petav. tom. I. pag. 1104.

(109) Heres. LIX. n. 4. eiusd. ed. tom. I. pag. 496. loquitur autem de *episcopis presbyteris et diaconis*.

(110) Haeres. XXX. n. V.

(111) Apud Hard. *Acta conc.* tom. I. col. 795. qui canon constitutus est ad excludendam interpretationem praeposteram nonnullorum qui verba Apostoli *unius uxoris virum* de unica uxore ducta post baptismum intelligebant. En integra canonis, qui est n. I. verba: «Sedit igitur, neminem post hanc synodum, qua eiusmodi illicitis vel sero succurritur, de digamis, aut internuptarum maritis, ordinari clericum posse. Nec requirendum, utrumne initiati sacramentis divinis, ane gentiles hac se infelicis sortis necessitate macularint, cum divini praecepti casta sit forma.»

nio , postea inter laicos reconciliatus per poenitentiam , communicet (112). »

Atque haec de ecclesiae spiritu et doctrina circa polygamiam sive simultaneam sive successivam dixisse sufficiat. Quibus ea quae nobis proposuimus in hac prima sectione absolvimus quae ad matrimonii unitatem spectant in quovis ordine ; tum nempe in ordine naturali , tum in ordine politico ; tum in ordine religioso sub quo expendimus quatenam in lege mosaica unitas viguerit , et quatenam vigeat in lege evangelica sive respecta polygamiae simultaneae sive respectu polygamiae successivae.

(112) *Ibid.* col. 990. Cf. Petavium in not. ad haeres LXXX. Messalianorum tom. II. opp. s. Epiphan. p. 346. seqq. ubi explodit haeticorum exceptiones.



SECTIO ALTERA

DE INDISSOLUBILITATE MATRIMONII CHRISTIANI

Ad eum modum quo monogamia in perfectam et imperfectam distinguitur, sic indissolubilitas alia plena est et perfecta, alia vero imperfecta. Indissolubilitas perfecta respicit vinculum, adeo ut coniugium (consummatum saltem) numquam dissolvatur quoad *vinculum*, ac numquam propterea liceat vivente coniuge coniugium aliud iniri; imperfecta vero respicit domesticam societatem, quae dissolvi potest, quin tamen liceat coniugibus ita divulsis ad alias nuptias transire, adeoque, manente vinculo, solvi coniugium tantum possit quoad torum et cohabitationem.

Rursum indissolubilitas spectari potest in matrimonio fidelium vel iam consummato, vel rato tantum necdum consummato; illud indissolubile prorsus est, hoc quandoque dissolvi potest.

Praetermissa vero disceptatione, utrum matrimonia infidelium, quae *vera* sunt, sed *non rata* per professionem christianae religionis dissolvi possint nec ne, cum de ea quantum opus erat alias disseruerimus (1), plures sunt agitandae quaestiones circa coniugia fidelium sive quoad dissolutionem perfectam, sive quoad imperfectam. Ex his aliae sunt theoreticae, aliae practicae.

Ad quaestiones theoreticas revocamus indissolubilitatem perfectam spectato iure naturae et lege mosaica. Inter practicas recensemus ius evangelicum et ecclesiasticum

(1) In *Praelect. theolog. tract. De matrim.* cap. II. prop. II. nec non in superiore libro quoad dispensationes.

tam relate ad indissolubilitatem perfectam, quam ad imperfectam; quae quidem quaestiones non levis sunt momenti tum ob novatorum potissimum, quos *sacrorum emendatores* vocant, placita, tum ob graecorum doctrinam et praxin; tum etiam ob leges quasdam civiles pluribus in regionibus diversisque temporibus hac de re constitutas; tum denique ob incredulorum impiorumque hominum conamina, qui una cum non paucis sive communistis, sive etiam theologis, saltem nomine tenus, catholicis adversus ecclesiae doctrinam indentidem insurrexerunt.

Primum itaque de indissolubilitate agemus christiani matrimonii iam consummati; deinde de imperfecta dissolutione coniugii, seu potius de coniugum divisione quoad torum et habitationem disseremus; denique matrimonium ratum et nondum consummatum solvi quandoque posse ostendemus.

Porro indissolubilitas coniugii spectari potest, ut inuimus, ratione habita sive legis naturae, sive legis scriptae, sive legis evangelicae.

Num divortium quoad vinculum, seu dissolubilitas perfecta iure naturae vetita sit an indulta, disceptatio viget inter iuris naturalis interpretes. Idem dic quoad ad dissolubilitatem coniugii in lege mosaica, circa quam non minima agitur controversia inter theologos. De dissolubilitate in lege evangelica nulla quidem inter christianos doctores movetur quaestio, cum ratum exploratumque sit penes cordatos catholicos doctores omnes, a Christo sublatam esse omnem divortii causam; ast gravis magnoque animorum aestu agitata est, et adhuc agitur quaestio inter catholicos et novatores, item inter catholicos et graecos, ac tandem inter catholicos et pseudo-politicos circa coniugii dissolutionem ob adulterium.

Cum nobis proposuerimus in altera huius tractationis parte pro viribus controversiam hanc sub omni respectu

expendere atque complecti, hinc singulis capitibus examini subiiciemus quae in controversiam veniunt sub multiplici respectu, ita tamen, ut brevius absolvamus ea quae mere theoretica sunt circa ius naturae, et circa ius antiquum legis mosaicae, quo diligentius quaestiones sub lege evangelica tum adversus novatores, tum adversus graecos, tum adversus pseudo-politicos versemus, ut sartam tectamque catholicae ecclesiae doctrinam et praxim habeamus.

CAPUT I.

DE INDISSOLUBILITATE MATRIMONII IUXTA LEGEM NATURALEM,
MOSAICAM ET EVANGELICAM.

ARTICULUS I.

De Matrimonii indissolubilitate spectato iure naturae.

Consummato etiam matrimonio, coniugale vinculum dissolubile esse, seu admittere posse divortium cum potestate aliud coniugium ineundi, non pauci scriptores ratione habita solius legis naturalis edixerunt vel *absolute*, vel saltem in *peculiaribus rerum adiunctis*.

Prae ceteris *absolute* dissolvi posse coniugium contendunt Hennet in Galliis (2), nec non Ben. Leon. Werkmeister (3), ac Adamus Braun (4) in Germania; pseudo-politici passim ac pseudo-philosophi, inter quos eminent Bentham

(2) In op. cui tit. *Du divorce* I. vol. in 8. 1785. Adversus quem scripserunt D. Chapt. de Restignac morte mulctatus die 2. vel 3. Septembr. an. 1792. ab impiis reipublicae gallicanae primoribus. Is igitur publici iuris fecit op. *Accord de la révélation et de la raison* duob. volum. in 8. 1790. Nec non Baruel: *Lettres sur le divorce à un député de l'assemblée nationale* vol. un. in-8. 1788.

(3) Apud Roskovány, qui plures auctores divortii patrocinatores in Germania recenset in op. cit. *De matrimon. in ecclesia catholica* tom. II. *De indissolubilit. matrim.* Augustae Vindelicor. 1840. pag. 28 seqq.

(4) In peculiari dissertat. de hoc argumento, quem impugnavit Iacobi in op. *Indissolubilitas vinculi matrimonialis* Moguntiae 1788. vol. un. in-8.

anglus (5), Ferrari italus iam pridem professor in parisiensi academia, communismi et socialismi fervens promotor (6), ac generatim omnes adstipulatores communismi et socialismi pro hac doctrina pugnarunt ac pugnant (7).

Dissolvi autem posse saltem in peculiaribus rerum adiunctis iure naturae coniugium illi omnes tuentur, qui propugnant infidelitatem in coniugio seu adulterium causam esse perfectae dissolutionis etiam in religione christiana, prout passim docent protestantes plerique omnes, de quibus suo loco agemus. Sane Pufendorfius hanc quaestionem expendens, quamvis indefinite minime admittat dissolutionem coniugii, tamen cum agitur de adulterio, illo interveniente, coniugium *iure naturae* dissolvi posse profitetur scribens: « Divortii iusta causa erit, si uxor alteri corporis sui copiam faciat, et quidem ultro; » imo etiam praeter adulterium, alias quoque causas divortii ex eodem iure subnectit: « Inde saltem, inquit, ex mero iure naturali alter coniugum *vinculo* liberabitur propter maliciosam alterius desertionem, et pertinacem atque ultroneam debiti coniugalis denegationem (8). »

Iurisconsulti dum ex solo rationis lumine quaestionem

(5) *Oeuvres de I. Bentham juriconsulte Anglais. Traité de législation civile et pénale* Bruxelles 1829. Troisième partie ch. V. *Du Mariage* sect. II. *Pour quel temps? Examen du divorce.* pag. 116 suiv.

(6) *Filosofia della rivoluz.* ed. di Londra 1851. p. 188. Cynicus hic auctor undique verrere non erubuit sordes scriptorum Germaniae et Galliae, qui notionem matrimonii penitus everterunt. Cf. de hoc auctore cl. Emil. Avogadro *Teorica dell' Istituzione del matrim.* Torino 1853. tom. I. cap. 7. et alibi passim.

(7) Cf. J. I. Thonissen *Le socialisme depuis l'antiquité jusqu'à la constit. française* du 14. Janv. 1852. duob. vol. in 8. Louvain 1852. Nec non Auct. op. *Le communisme et ses causes* duob. vol. in 8. Avignon. 1848. et 1849.

(8) Sam. L. B. A. Pufendorf. *De iure naturae et gentium.* Francof. 1759. tom. II. lib. VI. c. 1. *De matrim.* §. 21. qui ex principiis suae sectae iudicavit de iure naturae. Eadem ratione se gesserunt Heineccius ac Seldenus, qui praeterea valde se propensiores praebuerunt ad solvenda coniugia iuxta naturae ius. Cf. *La scienza del diritto pubblico del signor D. Damiano Romano, ovvero la scienza del diritto della natura e delle genti.* Napoli 1763. tom. II. part. II. *Della Morale.* Dissert. II. pag. 55 seqq.

hanc agitant, in diversas pariter abiere sententias, aliis contententibus ita indissolubile esse coniugii vinculum, ut nullo umquam in casu dirumpi posse censeant; aliis vero affirmantibus non modo posse, sed debere etiam pluribus in casibus connubium dissolvi, quod secus iniustum, ac importabile iugum foret (9).

Philosophi inter ethnicos sapientissimi matrimonii contractum indissolubilem esse non censuerunt, sed licita existimarunt repudia, ut constat de Platone (10), Catone (11), Tullio (12); deque iurisconsultis Paulo, Caio, Ulpiano (13), aliisque teste Plutarcho (14).

Inter protestantes alii affirmant ex solo etiam iure naturae matrimonium esse perpetuum; inter quos Pufendorfius, licet, ut nuper vidimus, exceptiones aliquot admittat, tamen generatim ait: «Nec minus natura tam arctae coniunctionis ostendit matrimonium debere esse perpetuum (15);» eidemque sententiae adstipulantur Heineccius (16), Kemmerichius (17), aliique. Sed alii indissolubilitatem ex iure potius positivo deducunt, uti Thomasius, Weherus, Wernherus, Fridericus Ludovici, aliique bene multi (18).

Sed haec heterodoxorum doctrina confundenda non est

(9) Horum prolixum elenchum exhibet Roskovány op. cit. in *Hist. litteraria* §. 2 seqq. et iterum in *Doctrina rationis* §. 34 seqq.

(10) Lib. I. *De legibus*. Dial. II.

(11) Apud s. Augustin. *De bono conjugali* cap. XVIII. et in lib. *De fide et operib.* cap. VII.

(12) Apud s. Hieronym. lib. I. advers. Iovinian. n. 48. Notum est eius repudium Terentiae, quae postea nupsit secundo Sallustio Ciceronis inimico, ac tertio Messallae Corvino.

(13) Lib. I. 2. De fin. ff. *De divortiiis*.

(14) *Quaestiones romanae*. opp. ed. Gulielmi Xylandri interpr. tom. II. pag. 276 seq. Francof. 1599.

(15) *De officiis hom. et civis* lib. II. c. 2. §. 5. item *De iure nat. et gent.* lib. VI. c. 1.

(16) *Elem.* lib. II. c. 2. §. 449.

(17) *Elem.* lib. II. c. 2. §. 4.

(18) Apud Schwarz *Institut. iur. natur. et gent.* part. II. tit. I. Instat. §. I.

cum scientia gravissimorum quorundam theologorum ecclesiae catholicae. Hi enim etsi matrimonium, spectata sola naturali lege, solvi aliquando posse defendant; id tamen non faciunt, ut eius indissolubilitatis legem impugnent vel laxent, sed quod eam iure divino positivo, atque potissimum propter sacramenti rationem datam esse arbitrantur. Neque ut illi, de quibus supra, multis et obviis de causis, humana maxime auctoritate connubium dirimi posse statuunt; sed eius nexum solo naturae iure non ita firmum esse, ut nulla de causa, etiam divina dispensatione, solvi queat.

Hoc igitur sensu Sanchez (19), Bellarminus (20), Swartz (21), aliique negant indissolubilitatem coniugii ex iure naturae provenire. At longe plures (22) contendunt eam ex solo etiam iure naturali satis probari: tales sunt Lyra, Abulensis, Sotus, Covarruvias, Corduba, Gutierrez, Ledesma, Lopez (23), aliique.

Hae sententiae sin minus ad concordiam revocari, saltem conciliari aliquo modo possunt, si accurate primarii iuris naturae praecepta a secundariis distinguantur, quemadmodum nos etiam praestitimus in priore huius libri sectione, dum de unitate matrimonii dissereremus. Hac distinctione posita, haec statui posse videntur: 1. legem indissolubilitatis non pertinere ad primaria atque essentialia praecepta naturae, qua concessione aliquid damus iis, qui sententiam negantem tuentur: et 2. addimus eam

(19) Lib. II. disp. 13. qui novendecim pro hac sententia auctores adducit.

(20) *De matrim.* cap. IV. n. 2.

(21) *Instit. iuris publ. univers. nat. et gent.* part. II. tit. I. n. 3 seqq. ubi plures etiam protestantes pro eadem sententia allegat.

(22) Prout testatur s. Alphonsus *De matrim.* n. 156., qui magno numero adducit auctores pro hac sententia contra Sanchez. Ast non videtur satis discernere ius naturale stricte sumptum, primarium atque essentialia a secundario: qua distinctione facta, forte discrepantes sententiae conciliari possunt, ut videbimus.

(23) Apud Sanchez lib. II. disp. 13. n. 4 seqq.

indissolubilitatem iure naturae esse omnino consentaneam ; atque adeo 3. ex iure secundario profluere.

Et sane ad primum quod attinet , indissolubilitatem omnimodam esse necessario atque essentialiter a iure naturae praeceptam probari non potest : imo spectata natura matrimonii non semper dissolutio illi videtur adversari. Etenim ad duo potissimum institutum est matrimonium, in officium naturae ad speciei conservationem ac proinde proli procreationem atque educationem. Iam vero neuter interdum finis obtineri potest, quum uxor est sterilis, vel quum morbus diuturnus matrimonii usum intercipit. Quomodo vero solo rationis lumine evinci poterit in utroque aut in alterutro casu ius naturae ad perpetuam continentiam aut ad proli privationem obligare, dissolutionemque coniugii esse essentialiter malam ? Hinc Bellarminus « si consideres, inquit, matrimonium ut officium naturae ad propagandam sobolem aegre reddi potest ratio cur ob sterilitatem coniugis non liceat eam dimittere aut aliam ducere. Si consideres matrimonium ut est in remedium contra fornicationem institutum, cur non poterit uxor perpetuo morbo laborans dimitti, cur non poterit alia duci (24) ? » Quod si secundarii matrimonii fines spectantur, cuiusmodi sunt remedium concupiscentiae, mutuum subsidium, et si quae sunt alia, ea non semper nec necessario perpetuitatem coniugii flagitant, neque ostendunt eam esse a iure naturae stricte praeceptam.

Praeterea certum est, Deum interdum, imo saepius, ut videbimus, hac in re dispensasse, dissolutionemque vinculi coniugalitatis permisisse. Ergo evidens est non esse coniugium ita firmum, spectato iure naturae, ut numquam possit dissolvi: si enim dissolutio stricto et primario naturae iuri opponeretur, ea utpote essentialiter ac semper mala, numquam a Deo permitti posset. Iam vero constat

(24) *De matr.* cap. IV. n. 2.

ex Bibliis eam fuisse permissam in lege mosaica ; imo certum est etiam nunc consummata ipsa infidelium cœniugia ex Dei voluntate quandoque dissolvi. Si qua igitur est naturalis lex indissolubilitatis , ea non pertinet ad ius naturae primarium atque essenziale.

Pronum vero est ostendere , eam esse naturali iuri prorsus consentaneam , adeoque ad ius naturale secundarium pertinere. Id satis suadet ipsa societatis coniugalis natura , quae iuxta rationalis naturae dictamina debet iniri. Siquidem ratio suadet societatem coniugalem perpetuitatem indissolubilitatemque exposcere. Nam cum sese sponsi huic societati mancipant natura duce et auctore ex affectus vehementia in perpetuum se obstringere intendunt , ac firma voluntate individuam vitae consuetudinem ducere eligunt. Proles non modo procreatio , sed physica quoque ac moralis institutio eandem indissolubilitatem permanentem postulat, amor ipse instinctivus , ut ita dicam , parentum erga liberos quos communiter procreant ad eam inducit ; amor liberorum pariter erga parentes ; ac demum parentum ipsorum indigentia cum ad aetatem perveniunt in qua sibi providere amplius nequeunt , quum soboles vices rependere debeat parentibus pro bonis quae per illos adepti est , nuptiarum perpetuitatem exposcunt (25). Quae quidem omnia rationis dictamina haud parum labefactantur , si inita coniugia possent ex contrahentium voluntate et electione dissolvi.

Verum hanc ipsam naturae intentionem ad coniugii perpetuitatem publicae societatis bonum mirifice confirmat. Siquidem ex mutua coniugum separatione suapte natura oriuntur familiarum dissidia , simultates , odia ob

(25) Quae paucis verbis complexus est Romagnosi scribens: « In questa politica fisiologia la famiglia si comincia col matrimonio, si prosegue colla educazione, e si finisce coll'assistere alla vecchiezza. » *Inst. di civ. fil.* tom. I. pag. 431. et tom. VI c. 3. §. 3.

utriusque coniugis relationes, amicitias, affinitates, quae temporis progressu non modicum detrimentum afferrent publico societatis bono, eique dissolutionem pararent; contra vero indissolubile coniugii vinculum familiarum amorem erga patriam fovet (26). Publica item honestas non parum laederetur, immo vero etiam pessumdaretur, ubi semel obtineret inter cives progressiva eiusmodi coniugiorum dissolutio, quae necessario induceret in foedam morum corruptionem. Quapropter cum homo natura sua vocatus sit ad publicam societatem, haec autem floreat animorum unione inter cives et morum probitate, primum est inferre divortium vitae sociali atque idcirco iuri naturali haud esse consentaneum (27).

Atque exinde factum est, ut quo nationes ad divortia magis proclives se se ostenderunt, eo etiam magis penes eas incresceret morum corruptio, et e converso, quo magis nationes corruptae essent, eo faciliores ac propensas se ad divortia perhibuerunt. Duo enim haec inter se iuncta pari gressu progrediuntur.

Haec sane praecipua assignatur ratio corruptelae romanorum, quod ita levibus, aut nullis de causis divortia apud eos frequentarentur contra instituta maiorum, de qui-

(26) Hinc ipse Heeren in op. *De la polit. et du comm. des anciens*. Didot 30. pag. 78. tom. I. affirmavit, quod « Chez les peuples civilisés d'Europe, l'attachement à la famille enfantait l'amour de la patrie. »

(27) Cf. Taparelli *Saggio teoretico di diritto naturale*. Diss. VII. c. 3. n. 1307 seqq.

Barruel Epist. s. cit. his verbis damna divortii exponit: « Le bonheur de l'état est dans la paix et la concorde des citoyens, dans l'intelligence des diverses familles. Le mariage unissant deux époux, rapproche les parents, les alliés: en faisant deux heureux, il fera vingt amis. Le divorce viendra, il fera vingt ennemis mortels; il suscitera les parents, les amis de l'épouse contre l'époux, contre sa famille, et contre ses amis. Le mariage avait confondu les intérêts, raffermi les fortunes; le divorce viendra diviser les intérêts, renverser les fortunes, élever des discussions, susciter des procès, anéantir des testaments, et les tribunaux ne retentiront plus que de plaintes contre l'époux, qui laisse à l'épouse après avoir consommé sa fortune; contre l'épouse, qui laisse là l'époux en demandant ce qu'elle aura dissipé » pag. 12.

bus Tertullianus scripsit: « Ubi est illa felicitas matrimoniorum de moribus utique prosperata, qua per annos ferme sexcentos ab Urbe condita nulla repudium domus scripsit? Nunc in foeminis prae auro nullum leve est membrum; prae vino nullum liberum est osculum: repudium vero, iam et votum est, quasi matrimonii fructus (28).» Imo vero res eo devenerat, ut Seneca scribere non dubitaverit: « Numquid iam ulla repudio erubescit, postquam... tres quaedam ac nobiles foeminae, non consulum numero, sed maritorum annos suos computant? Et exeunt matrimonii causa, nubunt repudii? Tamdiu istud timebatur, quamdiu rarum erat, quia vero nulla sine divortio acta sunt, quod saepe audiebant, facere didicerunt (29),» ut alia praeteream documenta, quae facile congeri possent, ad ostendendum in quantam morum corruptionem romana respublica cecidisset (30). Praecipua haec causa extitit ruinae et casus tantae reipublicae. Id ipsum contigit in Galliis, quum sub finem seculi elapsi sub Ludovico prae-

(28) *Apologet.* cap. VI. ed. Rigalt.

Sane Valerius Max. lib. II. cap. I. n. 4. ita scribit: « Repudium inter uxorem et virum a condita Urbe usque ad vicesimum et quingentesimum annum nullum intercessit. Primus autem Sp. Carvilius uxorem sterilitatis causa dimisit. Qui quamquam tolerabili ratione motus videbatur, reprehensione tamen non caruit, quia nec cupiditatem quidem liberorum coniugalis fidei praeponi debuisse arbitrabantur.» Eadem confirmat A. Gellius lib. IV. c. 3. Si excepias paucos annos; item Servius Sulpit. aliique. Cf. Valer. Maxim. cum notis variorum Lugdun. Batav. 1660.

(29) *De beneficiis*, lib. III. c. 16. ed. Morelli. Paris. 1613.

(30) Nota est censura Iuvenalis, Satyr. VI. v. 142 seqq.

« Cur desiderio Bibulae Sertorius ardet?
Si verum excutias, facies, non uxor amatur.
Tres rugae subeant, et se cutis arida laxet,
Fiant obscuro dentes oculique minores;
Collige sarcinulas, dicet libertus, et exi:
Iam gravis es nobis et saepe emungeris, exi
Ocius et propera: sicco venit altera naso.»

ed. Taur. Alia eiusmodi cf. apud Pufendorf. loc. cit. Ceterum ut pateat quousque devenerit Romae corruptio ex quo divortia obtinuerunt, cf. *Annales de Philosophie chrétien.*, tom. VIII. pag. 30 seqq. ed. 2.

sertim XV. et XVI. morum foeditas longe lateque diffusa est; exinde enim coepere divortia passim obtinere, lege etiam sancita et cohonestata in cuius schemate duodecim vinculi coniugalis dissolvendi motiva, seu causae propositae sunt (31).

Tum igitur ius individuale, tum ius domesticum, tum denique ius publicum conspirant in damnando divortio, adeoque in sancienda perpetua indissolubilitate coniugii. Nemo proinde negaverit eam iuri naturae maxime consentaneam esse (32).

Ast hic non subsistimus, sed ulterius progrediendo affirmamus tertio loco indissolubilitatem societatis coniugalis a naturae lege constitui, atque illius dissolutionem damnari.

Etenim quod natura suadet, eique maxime conveniens est, cuiusmodi esse vidimus firmitatem coniugalis vinculi, quod impellente veluti natura nativo quodam rationalique instinctu homines appetunt; quod ad singulorum non minus quam ad familiae ac societatis felicitatem ac bonum est unice conducens, id a naturae lege proficisci censendum est. Iam vero ex hactenus allatis rationum momentis, huiusmodi est coniugii indissolubilitas; ergo a naturae

(31) Cf. Barruel lit. cit *Sur le divorce* pag. 31. ubi eas singillatim recenset. Fuerunt autem 1. *La mort civile*; 2. *la condamnation à une peine infamante*; 3. *la prison de longue durée*; 4. *la captivité*; 5. *l'expatriation forcée ou volontaire, ou la disparition d'un des conjointes*; 6. *l'infécondité*; 7. *Une maladie incurable*; 8. *la démence*; 9. *un crime quelconque*; 10. *l'adultère*; 11. *le désordre extrême*; 12. *l'incompatibilité des caractères*.

(32) Quod quidem non diffitetur vel ipse Bentham, etsi maxime dissolutioni coniugii patrocinetur; sic enim scribit op. et loc. cit. « Le mariage à vie est donc le mariage *le plus naturel*, le plus assorti aux besoins, aux circonstances des familles, le plus favorable aux individus pour la généralité de l'espèce. N'y eût-il point de lois pour l'ordonner, c'est-à-dire, point d'autres lois, que celles, qui sanctionnent les contracts, cet arrangement serait toujours le plus commun, parce qu'il est le plus convenable aux intérêts réciproques des époux. L'amour de la part de l'homme, l'amour et la prévoyance de la part de la femme, la prudence éclairée des parents et leur affection, tout concourt à faire imprimer le caractère de perpétuité au contract de cette alliance.»

lege repeti debet indissolubilis coniugii firmitas. Siquidem hoc est aptum criterium ad dignoscendum quid naturae lex praecipiat, quid vero vetet: praecipit nimirum perpetuitatem, vetat autem dissolutionem coniugii.

Revera ex communi hominum sensu, qui usu non sit corruptus, coniugii dissolutio aliquid exhibet foedum et iuri ipsi naturae contrarium. Hinc etiam ss. patres rationibus ab ipsa rei natura petitis ostendere consueverunt foeditatem divortii, quod lege evangelica prorsus sublatum est. Sufficiat heic afferre praeclarissima Ambrosii verba: «Noli ergo uxorem dimittere, ne Deum tuae copulae diffitearis auctorem. Etenim si alienos, multo magis uxoris debes tolerare et emendare mores.... Quo cum parvulis foeta dimittitur? Quo titubanti vestigio grandaeva detruditur? Durus, si excludas parentem, pignora teneas, ut ad contumeliam charitatis, addas etiam pietatis iniuriam; durus, si propter matrem etiam filios pellas; cum magis redimere a patre liberi debeant culpam parentis. Quam periculosum si fragilem adolescentulae aetatem errori offeras? Quam impium, si eius destituas senectutem, cuius defloraveris iuventutem? Ergo inhonoratis stipendiis et veteranum imperator dimittat inglorium, atque imperii sui possessione detrudat: et rusticum laboris sui effaetum agro suo propulset agricola? An quod in subditos nefas est, in comparem fas est?... Audi legem Domini cui obsequuntur etiam qui leges ferunt, *quae Deus coniunxit homo non separet*. Sed non solum hîc coeleste praeceptum, sed quoddam etiam opus Dei solvitur. Poterisne, oro, liberos tuos, vivente te, esse sub vitrico; aut incolumi matre, degere sub noverca? Pone, si repudiata non nubat. Et haec viro tibi debuit displicere, cui adultero fidem servat? Pone, si nubat. Necessitatis illius tuum crimen est; et coniugium quod putas, adulterium est (33).» Itaque ipsa duce ratione

(33) Lib. VII. in Luc. n. 4-6. Opp. ed. Maur. tom. I. col. 1471.

satis ostenditur legem naturae indissolubilitatem coniugii praecipere, ac dissolutionem vetare, adeoque non debet coniugii perpetuitas ex solo positivo iure deduci.

Urgent nonnulli omnem coniugii firmitatem ex eo praecepto positivo pendere: *Quod Deus coniunxit homo non separet*, et ex Christi voluntate, qui ad sacramenti dignitatem matrimonium evexit; simulque indissolubilitatis omnimodae legem tulit; hinc est, inquit, quod vel ipsi Christi discipuli cum eum dicentem audissent: *Qui aliam duxerit, moechatur*, seu quum legem indissolubilitatis primum ferri intellexissent, scandalizati sunt, uti expendit Sanchez (34), ac dixerunt: «Si ita est causa hominis cum uxore, non expedit nubere,» quod non dixissent, si indissolubilitatem scivissent ex ipso iure naturae, non autem ex novo difficiliusque divino praecepto repetendam esse.

Ast ut hinc exordiamur, mirum non est Christi discipulos in ea verba prorupisse: cum enim essent assueti legi mosaicae, quae repudium permittebat, percelli utique ex Christi sententia debuerunt: legem itaque mosaicam mente volvebant, at de lege naturae verisimilius est ne cogitasse quidem. Christus vero non novam tulit legem, sed solum abstulit repudii permissionem, matrimoniumque ad pristinum statum revocavit, prout ipsa rei natura postulabat, atque idcirco ea verba: *Quod Deus coniunxit, homo non separet*, vel intelligi debent de praecepto non positivo sed naturali, prout Deus est auctor naturae, vel de praecepto utique positivo, sed quo obligatio non inducitur primum, at confirmatur et roboratur. Ita etiam institutione sacramenti Christus matrimonii indissolubilitatem sanxit, confirmavitque, ut infra videbimus; quam etiam coniugalis societatis natura, prout a Deo naturae auctore pendet, postulabat.

(34) Sanchez fuse hac de re agit, et haec aliaque urget lib. II. *De matr.* disp. 13.

Quod si ex naturae lege indissolubilitas vinculi coniugalis dimanat, non igitur, quemadmodum quidam pseudo-philosophi affirmant, ex mera contrahentium electione privataque voluntate, aut ex institutione magistratuum civilium, seu humani cuiusvis legislatoris ea repeti potest, aut debet. Quapropter ut hoc etiam heic obiter innuamus, contra legem naturae agunt, qui coniugia dissolvunt, nulliusque roboris civilia, aut politica statuta sunt, quae matrimonii consummati dissolutionem quibuscumque tandem in casibus audent decernere (35).

Ex his quae diximus praeoccupata sunt argumenta praecipua, quibus quidam patrocinatores dissolutionis coniugalis persuadere nisi sunt, spectato solo naturae iure, omnimodam perpetuamque coniugii firmitatem statui non posse.

Ipsi enim eam impetunt in primis ex contractus natura, qui cum voluntarius sit et ex electione admittere potest condiciones quas contrahentes apponant, prout fit in contractibus ceteris, adeo ut ex. gr. se iungant tantummodo ad praefinitum tempus, nempe usque ad prolis procreationem, eiusque physicam ac moralem institutionem, et non ulterius; aut dummodo uxor sit foecunda; aut etiam non intercedat ex alterutra parte infidelitas sive adulterium; aut denique nisi oboriantur rixae, odiaque mutua ex quibus fiat ut coniuges consistere simul nequeant, aliaque eiusmodi (36).

Enim vero eiusmodi difficultates ex falsa hypothesis oriuntur. Supponunt quippe adversarii contractum coniugalem eiusdem esse naturae ac contractus ceteri, qui ver-

(35) Cf. Taparelli *Saggio etc.* loc. cit. n. 1530.

(36) Haec sunt rationum momenta, quae urget Bentham loc. cit. quaeque nos in compendium atque ad praecipua capita redegimus. Ibi quatuor sibi proposuit difficultates, quas perperam solvere connititur. Alii deinde ex hoc auctore haec ipsa argumenta desumpserunt, seu exscripserunt.

santur circa res homini obnoxias, cum tamen sit prorsus singularis, suique generis; et quamvis voluntarie ineatur, conditiones tamen habet, quae non ex arbitrio, sed ex ipsa rei natura necessario dimanant, adeo ut liberum sit matrimonium inire aut non inire, at dissolvendi matrimonii semel initi nulla supersit libertas. Contrahentes praeterea moralem illam unionem coniugalem non sibi solum, sed et toti humanitati, ipsique proinde naturae auctori Deo, pro omni vitae tempore spondent, hinc datum consensum revocare amplius nequeunt (37).

Ex hoc generali principio pronum est inferre haud esse in potestate contrahentium tempus praefinire circa durationem coniugii. Non enim id pendet a privata ipsorum voluntate, sed a naturae lege, quae ad commune bonum exigit illud debere esse perpetuum. Privata voluntas, ut in aliis pluribus, sic et in hoc subordinata et obnoxia est voluntati generali naturae, seu potius eiusdem naturae auctori.

Ex eodem principio reiicitur altera conditio ex sterilitate deprompta. Nam mali accidentaliter nulla ratio habenda est, quum praevaleret universale bonum. Qui matrimonio se cum altero copulat, illis omnibus legibus se subiicit quibus eiusmodi status obnoxius est, sive istae faveant sive obsint particulari contrahentium bono.

Idem dic de infidelitate, si qua contigerit; haec enim, ut suo loco videbimus, praebet quidem ius se ab infideli coniuge separandi, sed non ita ut dirumpatur maritalis societatis vinculum; alioquin via ampla pateret innumeris prope abusibus, atque immoralitati omnimodae, ut idoneo pariter loco expendemus. Infidelitas in pactis servandis tunc solum ius dat resiliendi, quum tertii ius non laeditur, secus vero cum tertius damnum pateretur; acquitas

(37) Cf. Roskovány *De indissolub. matr.* Augustae Vindelic. 1840. §. 36. pag. 38.

ac iustitia hoc in casu non sinit contractum discindi ab eoque resilire. Iam vero eiusmodi damnum in coniugii dissolutione multiplici ex capite proveniret. Coniuges enim vinculum contraxere coniugale ad procreandos instituentesque filios Deo ac societati; at vero filiis, religioni societatique damnum ex solutione coniugii immineret (38).

Neque ius tribuunt solvendi coniugii aut rixae, aut odia mutua; alioquin non iam rationis ductu, sed cupiditatis utilitatisque personalis contractus iniri convinceretur. Ecquis porro diceret posse militiam deseri ob incommoda, quae in illa professione inveniuntur? Idem dic de quolibet statu cui quis praesertim libere sese addixit et mancipavit. Ob individuale incommodum aut personalem molestiam resiliri nequit a contracta obligatione, ubi ex eiusmodi egressu damnum tertio immineret, prout diximus soboli, societatique publicae ex coniugii solutione obvenire. Ratio, qua duce initur hic contractus, debet cupiditatibus imperare, eisque fraenum iniicere, atque eas cohibere ne in malum prosiliant, prout in ceteris omnibus fieri debet (39).

Nec defuit qui opponeret; si res ita se habet, ut cogantur coniuges in eiusmodi statu violento perseverare, gravi homicidii etiam patrandi tentationi exponi possent.

(38) Ergo perperam Pufendorf op. et loc. cit. §. 21. concludit: «Ergo divortii iusta causa erit, si uxor alteri corporis sui copiam fecerit;» et paulo post: «Communis pactorum natura est, ut quando una pars conventis non stetit, neque altera amplius teneatur. Et hactenus quidem, ut non solum laesa pars cum perfida coniuge non amplius teneatur cohabitare, sed et laesae parti transire ad secunda vota liceat.»

(39) Ex his diluitur quod Bentham loc. cit. obtrudit veluti absurdum, quod in contractu coniugali ineundo clausula includatur de perpetuitate; postquam enim constituit iuxta naturae votum esse coniugii perpetuitatem, subdit: «Mais que penserait-on si la femme y ajoutait cette clause: - Il ne me sera pas libre d'être quitte de toi, dussions-nous arriver à nous haïr autant, que nous nous aimons à présent? - Une telle condition paraît un acte d'inéptie: elle a quelque chose de contradictoire et d'absurde, qui choque au premier coup d'œil: tout le monde s'accorderait à regarder un pareil vœu comme téméraire et à penser que l'humanité doit le faire abolir.»

Utique fieri id potest in iis qui solo instinctu, cupiditibusque reguntur, non autem in illis, qui rationis obsequuntur dictamini, prout homines decet, qui lege morali tenentur. Quot tentationes superare homines debent in tot, quibus premuntur, difficultatibus? Alioquin viam latissimam omnibus facinoribus aperire deberemus, ne homines tentationibus obiicerentur: quod nemo sanus dixerit unquam.

Omnibus igitur rite perpensis patet matrimonii indissolubilitatem non esse quidem naturae praeceptum primum, sed naturali iuri congruere, eique plane esse conformem: immo et ab eodem iure secundario omnino profluere. Si res ita temperetur, diversae theologorum, ut diximus, sententiae conciliari possunt: nam etiam ii, qui ex lege positiva indissolubilitatem coniugii arcessunt, concedunt tandem aliquo modo eam etiam a lege naturae dimanare. Sane Sanchez (40) non modo non inficiatur, sed aperte etiam fatetur «aliqualem inseparabilitatem esse de natura matrimonii, et ita competere etiam matrimonio rato de iure divino et naturali....et ita tenet etiam s. Thomas 4. d. 33. q. 2. art. 1. Bellarminus lib. 1. De matr. c. 4.» Ita quidem ipse n. 7. et rursus n. 10. subdit: «Matrimonium ex se est vinculum perpetuum nisi a superiore causa dirimatur.» Dicit itaque potest discrepantiam sententiae inter theologos hac de re tantam non esse quanta prima fronte apparet. Quod vero attinet ad pseudo-philosophos, qui indissolubilitatem ipsam impugnant, satis vidimus difficultates quas illi contra coniugii firmitatem opponunt, non a recta ratione depromi, sed ex cupiditatibus, aut ex systemate potissimum, quod vocant utilitario, quae proinde nullo in pretio haberi debent. Sane videmus illos omnes et solos dissolubilitatem maxime promovere, qui moribus perditii sunt, increduli, ratio-

(40) Lib. II. disp. 13.

nalistae, pseudo-politici, quorum aliqui eo pervenerunt, ut ne dum indissolubilitatem, sed vel ipsam coniugii notionem e medio tollere vellent, ut vago possent frui concubinato, quemadmodum ex historia tum antiqua tum recentiori probari facile posset (41).

Ceterum mirum non est, quod hominum cupiditates effraenisque libido quae iura omnia perfringunt, vinculum etiam perfringere ausae sint connubii, quod tamen ipso rationis lumine indissolubile ostenditur. Matrimonii indissolubilitas sancte servata est ad longum tempus a mundi primordiis, donec pedetentim invalescente morum corruptione apud antiquas gentes divortium introduci coeperit, ac in dies magis augeri ac propagari magis. Sane apud aegyptios divortium obtinuisse nonnulli contendunt (42). De graecis vero nullum est dubium. Diversae hac de re latae fuerunt leges, ex quibus aliae habenas magis divortiis laxabant, ut apud cretenses atque athenienses, qui levissimis de causis divortia indulserunt; quamvis apud hos non sine libello divortii id fieret, in quo eius ratio contineretur, ut si repudiata ad ius provocaret, a summis magistratibus comprobaretur (43). Sic etiam vigerunt hae leges apud spartianos, etsi raro fierent penes ipsos divortia. Hinc legimus Lysandro mulctam ob id solum a magistratibus Ephoris nuncupatis irrogatam fuisse, quod divortium fecisset (44). Aristoni tamen indultum fuit ob sterilitatem, qua uxor eius laborabat (45). Arctius vero a divortiis faciendis coarctabantur uxores; summo

(41) Cf. Avogadro op. cit. *Teorica dell' istituzione del matrim.* qui innumera prope huius nostrae affirmationis in utraque operis parte documenta profert.

(42) Apud Martorelli *Errori corretti sul divorzio*. Roma 1792. opusc. II. lib. I. c. 2.

(43) Cf. Alex. ab Alexandro in op. *Genial. dier.* lib. IV. c. 8.

(44) Ibid.

(45) Ut refert Herodotus in *Erato* seu lib. V. c. 63. ed. Scheweighauser. Argentorati 1816. qui scribit: «Ita igitur tertiam uxorem, *repudiata secunda* Ariston duxit.»

enim dedecori habebatur si qua uxor maritum desereret. Hinc Medea conqueritur de dura mulierum conditione, quibus nullum remedium erat adversus virorum inclementiam, sed primo maritos maximis opibus comparare cogebantur, deinde vero malam ab ipsis tractationem subire, nulla spe reliqua de illis emendandis, quemadmodum canit Euripides (46). Athenienses tamen uxoribus potestatem dabant maritos iustis de causis relinquendi; tenebantur vero prius appellare ad Archontem, eique offerre libellum iniuriarum, quas erant perpessae, ut patet exemplo Hipparetis Alcibiadis uxoris apud Plutarchum (47). Matrimonii vinculum saepius solvebatur consensu partium, quibus novas nuptias inire licebat, cuius rei pariter exemplum nobis Plutarchus suppeditat in *Pericle* (48).

Notum est apud romanos Romulum non modo ius viris dedisse divortium faciendi ab uxoribus, verum etiam eas interficiendi in nonnullis casibus, fac adulterii, ebrietatis etc. (49); dempta facultate uxori dimittendi maritum utcumque vitiiis irretitum. Sexto ab Urbe condita seculo ea lex adhuc perseverabat, teste Plauto, qui floruit an. 553; qui etiam inducit Syram conquerentem de iniusta eiusmodi inaequalitate ac *dura lege* (50). Attamen ut plus

(46) *Medea* v. 230.

Omnium autem, quaecumque sunt animata, et mentem habent,
 Nos mulieres sumus, miserrima propago,
 Quas primum quidem oportet maximis opibus
 Comparare maritum, dominumque corporis
 Accipere: illo enim malo hoc longe gravius,
 Et in hoc maximum periculum, aut malum accipere,
 Aut bonum: non enim honesta (sunt) divortia
 Mulieribus, neque licet abdicare maritum,

(47) In Alcibiade.

(48) Cf. plura hac de re apud Io. Potterum *Archaeolog. graec.* tom. II. lib. IV. cap. 12. Venet. 1734. nec non Meursii *Themidem atticam* lib. II. cap. 19.

(49) Cf. apud A. Gellium *Noct. Attic.* lib. X. c. 23.

(50) Plautus in *Mercatore*. Act. IV. v. 794. ita anum Syram loquentem inducit ex recens. I. H. Böthe ed. Taurin. 1822.

Ecaster *lege dura* vivunt mulieres

semel adnotavimus omnium primus qui inter romanos divortii libertate usus fuerit, severioribus moribus vigentibus, dicitur fuisse Spurius Carvillus sterilitatis uxoris suae obtentu et tamen non sine infamiae alicuius nota id peregit; postea vero frequentior usus invaluit. Immo adeo progressa est licentia, ut et uxores viros suos passim repudiarent, et mariti exemplo graecorum (51) proprias uxores ad tempus aliis cederent, ut de Catone notum est, qui Martiam Hortensio concessit, quae consuetudo, inquit Strabo, *vulgaris fuit* (52) tum apud veteres romanos tum apud alios plures.

Haec vix indicare placuit, ut pateat quomodo a tenuibus exorta principiis morum corruptela magis iugiter ac magis dilatetur et crescat, donec ad instar incendii omnia pervadat, atque devoret, legisque ipsius naturalis perspicua principia quodam veluti fumo densisque tenebris obvolvatur.

ARTICULUS II.

De Matrimonii indissolubilitate, spectato iure divino positivo,
ac nominatim in lege mosaica.

Quae hactenus constituta sunt circa coniugii omnimodam indissolubilitatem e lege naturae mirifice confirmantur ex iis, quae de primaeva matrimonii institutione in libro

Multoque iniquiore miserae quam viri.

Nam vix si scortum ducit clam uxorem suam

Id si rescivit uxor, impune est viro,

Uxor vero si clam domo egressa est foris

Viro fit causa, exigitur matrimonio

Utinam lex esset eadem, quae uxori est, viro!»

(51) Socrates, ut refert Tertullianus *Apolog.* cap. 39. uxorem suam Xantipam Alcibiadi cessit. In nonnullis Graeciae locis uxores a viris mutuo aliis tradebantur. Cf. Io. Potterum op. et loc. cit.

(52) *Geograph.* lib. VII. Cf. etiam Plutarchum in *Demetrio*; et Valerium Max. lib. V. cap. VII.

Geneseos leguntur. Siquidem ibidem legitur, quod cum Deus ex Adae costa mulierem condidisset, seu costam aedificasset in mulierem, eamque ante Adae conspectum constituisset, dixerit Adam: «Hoc nunc os ex ossibus meis et caro de carne mea....Quamobrem relinquet homo patrem suum et matrem, et adhaerebit uxori suae, et erunt duo in carne una (53). Quae quidem verba ex Dei inspiratione Adam protulisse, non obscure significavit Christus, qui ea Deo ipsi adscripsit, ut postea videbimus.

Interim hic iuverit animadvertere 1. allata verba non quidem expressam legem positivam, quam dicunt, praeseferre, sed tamen satis aperte divinam voluntatem circa rationem naturamque coniugii tunc divinitus instituti significare (54); 2. ad utramque quidem matrimonii proprietatem, unitatis videlicet atque indissolubilitatis verba illa referri, sed ita ut magis directe ad indissolubilitatem quam ad unitatem referantur. Sane Christus ad perpetuum matrimonii vinculum firmandum ea in medium adduxit, ut falsam pharisaeorum sententiam de coniugii dissolubilitate refelleret.

Iam vero ex allatis Geneseos verbis indissolubilitatem matrimonii patefieri liquet, si eorum vis penitus expendatur. Revera iis verbis primi coniuges tamquam unum quid inseparabile exhibentur. Nam habita ratione originis mulieris, haec veluti pars integralis exhibetur viri utpote quae aedificata est ex eius costa, seu ex membro ipsius, quod natura sua tendit ad unionem seu compaginem cum reliquo corpore. Si ratio praeterea habeatur verborum quae ab Adam ex Dei instinctu prolata sunt, magis adhuc id clarescit; dixit enim protoparens ad Evae conspectum: *Hoc nunc os ex ossibus meis*, quasi nempe significaverit esse

(53) Genes. II. 23. 24.

(54) Prima lex positiva a Deo data, ea fuit qua esus ex fructu arboris scientiae boni et mali fuit vetitus.

mulierem quasi alterum seipsum; adeoque adiecit: *vocabitur virago* (55). Pergit deinde dicens: *quamobrem... adhaerebit uxori suae*, seu prout in versione Alexandrina vertitur: *conglutinabitur* (56). Demum concludit: *et erunt duo in carne una* ad magis declarandum indissolubilem nexum illius coniunctionis, qui ex maritali consortio efficitur, atque ita perstringitur, ut alter coniux ab altero dissociari nequeat.

In ipso protoparentum coniugio praesignatam fuisse coniugalis vinculi indissolubilitatem confirmatur ex eo, quod symbolum esset ac signum futurae coniunctionis Verbi cum humanitate, et Christi seu Verbi incarnati cum ecclesia sua ex interpretatione Apostoli dicentis potissime de protoparentum coniugio: « Sacramentum hoc magnum est; ego autem dico in Christo et in ecclesia (57). » Porro nemo negaverit indissolubilem fuisse et esse tum coniunctionem Verbi divini cum humanitate assumpta per unionem hypostaticam, seu coniunctionem *physicam*, tum coniunctionem Verbi caro facti cum ecclesia, seu coniunctionem *moralem* per gratiam.

Accedit quod Patres omnes et catholici interpretes in hanc sententiam conveniant, indissolubile vinculum con-

(55) Hebraice אִשָּׁה , quae vox prae ceteris exprimit aptissime quod intendit Adam ad significandam quamdam veluti uxoris suae cum semetipso identitatem. Cf. *La sainte Bible avec un commentaire littéral*. A la Haye 1743. tom. I. ad hunc loc.

(56) In versione cit. est *προσκολληθήσεται*

(57) Seu prout clarius dicitur in graeco textu: *τὸ μυστήριον τοῦτο μέγα ἐστίν· ἐγὼ δὲ λέγω εἰς χριστὸν καὶ εἰς τὴν ἐκκλησίαν*. Seu «Mysterium hoc magnum est; ego autem dico in Christum et in ecclesiam.» Quod autem Apostolus ad hoc primum coniugium mysterium hoc referat, non quidem exclusive, sed ut diximus, *praecipue*, ex serie orationis patet. Hinc Estius sic hunc Apostoli locum enarrat: « Sacramentum seu mysterium praecedentibus verbis significatum magnum est. Arcissima illa coniunctio viri et mulieris de qua dictum est, *relinquet homo patrem et matrem etc.* magnae alicuius sacrae et arcanae rei signum est. *Ego autem dico*, id est mysterium hoc explico, et intelligendum doceo de Christo et ecclesia.»

iugale probari ex verbis ab Adamo prolatis in institutione matrimonii, et quod caput est, concilium etiam tridentinum hoc ipsum declaravit in expositione doctrinae de sacramento matrimonii dicens: «Matrimonii perpetuum indissolubilemque nexum primus humani generis parens divini Spiritus instinctu pronunciavit, cum dixit: *Hoc nunc os ex ossibus meis, et caro de carne mea; quamobrem relinquet homo patrem suum et matrem, et adhaerebit uxori suae, et erunt duo in carne una* (58).»

Matrimonii itaque indissolubilitas, quae ut supra ostendimus a secundario naturae iure dimanat, positiva Dei institutione confirmata est, atque idcirco a Deo repeti debet tum prout est naturae auctor, tum prout auctor est ordinis supernaturalis.

At si coniugium tum naturali tum positivo iure est indissolubile, quid dicendum de patriarcharum agendi ratione, ac nominatim de Abraham qui Agar uxorem dimisit? Quid potissimum dicendum de libello repudii qui a lege mosaica permittitur? Ad primum quod attinet facilis est responsio. In dubium revocari nequit quin Agar fuerit vera uxor Abrahae, secus ac nonnulli existimaverint; nam expresse uxor vocatur Genes. XVI. 3.; at relate ad repudium, quod primum est exemplum in Scripturis relatam, duo sunt animadvertenda, primo, non probari illud verum fuisse divortium quoad vinculum, quum Agar numquam alteri nupserit; deinde quod caput est, ex peculiari Dei mandato factum fuisse, ut constat ex Genes. XXI. 10-12.

Quod vero spectat ad libellum repudii plura dicenda sunt. Praemittimus verba prout in nostra editione vulgata leguntur Deut. XXIV. 1-4. Sunt autem: «Si acceperit homo uxorem, et habuerit eam, et non invenerit gratiam ante oculos eius propter aliquam *foeditatem*: scribet libellum repudii, et dabit in manu illius, et dimittet eam

de domo sua. Cumque egressa alterum maritum duxerit, et ille quoque oderit eam, dederitque ei libellum repudii, et dimiserit de domo sua, vel certe mortuus fuerit, non poterit prior maritus recipere eam in uxorem: quia polluta est, et abominabilis facta est coram Domino.»

Quae verba de permissione seu indulgentia a Deo facta ob duritiam cordis israeliticae gentis, non autem de praecepto intelligenda esse, ut autumavit Lutherus (59), ex Christo discimus: neque de hoc ulla est controversia.

Sed magna olim contentione inter ipsos iudaeorum doctores ac magistros disceptatum est de vi huius permissionis, deque eius amplitudine. Aetate praesertim Christi Domini quaestio fervebat inter scholam hillellianam et sammeanam, de quarum scholarum placitis suo loco, prout opus fuit, aliquid scripsimus (60). Exinde nonnulli existimant factum esse ut pharisaei a Salvatore, quid de ea quaestione ipse sentiret interrogatione exquisierint: « Si licet homini dimittere uxorem suam quacumque ex causa (61)? » inter recentiores etiam adhuc viget sententiarum dissensio.

Ratio huius dissensionis orta est potissimum ex interpretatione hebraicae vocis עֲרֹוֹת דְבָרַר (*hervath dabar*) quam vulgata reddidit *aliquam foeditatem*, et ex aliis verbis: *quia polluta est et abominabilis facta est coram Domino*.

Itaque sunt qui censent nihil Mosem circa libellum repudii constituisse, cum iam hic usu, et consuetudine tum apud reliquos populos, tum apud hebraeos ipsos, praesertim ex longa huius populi apud aegyptios commoratione obtinisset (62). Iuxta istorum placitum sensus ver-

(59) In sua versione germanica Bibliorum.

(60) In *praelect. theolog. Tract. de matrim.* cap. II. prop. V. in not. *ad resp. dif.* 2.

(61) Matth. XIX. 3.

(62) Ita Io. David Michaëlis in op. germ. *Ius mosaicum.* part. II. ed. 2. Francofurt. 1776. pag. 321.

borum Mosis hic esset « Si mulier ope libelli repudii a marito dimissa, alteri viro nupserit, et ab hoc etiam dimissa fuerit, aut si alter eius maritus mortuus sit, non poterit prior vir eandem denuo ad se recipere (63),» nempe in istorum mente, supposito iamdiu libelli repudii usu, Moses solum vetuisset quominus viri repudiatam uxorem denuo reciperent, quum ea sive reiecta fuisset ab altero marito, sive eo mortuo vidua mansisset; adeoque Moses potius fraenum aliquod repudio iniecisset, sublata omni spe repudiatam uxorem umquam recipiendi.

Verum praeterquam quod gratis assumitur in hac expositione sive apud gentes ceteras, sive apud patriarchas et hebraeos obtinuisse matrimonii divortium, cum huius affirmationis nullum afferri possit documentum, ac in mera coniectura consistat, eidem adversantur Christi verba dicentis apud Matthaeum « Moses ob duritiam cordis vestri *permisit vobis* dimittere uxores vestras, ab initio autem non fuit sic,» ex quibus deprehendimus et quod Moses *permiserit* dare libellum repudii, et quod ab initio ita non fuerit, non solum in institutione primaeva coniugii, sed etiam post, ita ut usque ad Moysen nullum forte divortii pleni exemplum inveniatur; idque ex traditione de instituta a Deo matrimonii indissolubilitate, quae iugiter servata est, ut plures censent.

(63) Boehmerus, *Ius ecclesiastic. protestantium* tom. IV. lib. IV. tit. 19. §. 4. dicens: « Mosen dumtaxat disposuisse, ne repudiatam vir denuo duceret.» Popp pariter in op. german. *De divortio* Amburgi et Sulzbach 1800. pag. 41 seqq. Liebetrut *De matrimonio in sua idea et in sua historica explicatione* Berolini 1834. pag. 55. et hi quidem protestantes. Ex catholicis vero eandem sectati sunt sententiam Bened. Leonhart in op. germ. *Observationes de disputatione Domini Iesu: utrum divortium e doctrina Scripturae liceat nec ne.* Wurzburgi 1805. pag. 11 seqq. Kistemaker in op. germ. *Disputatio exegetica de primatu Petri et de matrimonio vinculo.* Gottingae 1806. §. 5. pag. 86. nec non in op. *Sacrae Scripturae novi Testamenti translatae et explicatae.* Monasterii 1825. tom. III. pag. 84 seqq. et Jo. Ant. Binterim, *De matrimonio ac divortio* Düsseldorfii 1819. pag. 103. apud Roskovàny op. cit. pag. 114 seqq.

Quod vero spectat ad vim vocis *hervath dabar* quae rem turpem significat, aut rem pudendam (64), quaeque utpote vaga plures admittere potest interpretationes, expositores in diversas abiere sententias, dum definire connisi sunt quid praecise Moses significare per eam voluerit. Tertullianus (65), et post ipsum Paulus Burgensis (66), Franciscus Ribera (67); ex recentioribus vero Ant. Franc. Iager (68), aliique existimarunt *adulterium* ea voce significatum fuisse. Ulterius progressus Ben. Leon. Werkmeister contendit voce seu phrasi illa plura tum corporis tum animi vitia significata fuisse (69). Quam expositionem plerique omnes divortiorum patroni amplexi sunt. Ast iamdiu Origenes (70) animadverterat haud posse Mosis verba de adulterio accipi, quum ob illud mulier ex lege vetere lapidanda fuerit; adeoque censuit significatum fuisse quodvis peccatum propter quod mulier viro suo gravis ac intolerabilis redditur. Ob eandem causam ab Origene allatam expositio de adulterio merito respuitur tum a Carolo de Lessaux (71), tum ab Herinco Klee (72). Eam vero expositionem ex praepostero principio reiiciunt protestantes Ant. Tholuk, et Acoluthus, qui autumant verbis Mosis *hervath-dabar* adulterium ideo significari non posse, quod secus Christus Matth. XIX. dicere haud potuisset, Mosen ob

(64) Cf. Sanctes Pagnini in *Thesaurō linguae sanctae* ad vocem עֲרִוּהָ nec non ex recentioribus Winer, praesertim vero Gesenium in *Thesaurō philologico-critico* ad eandem radicem.

(65) Lib. IV. contr. Marcion. c. 34.

(66) In *Deuteron.* XXIV. add. I.

(67) In *Malachiam* c. II. n. 36.

(68) In op. germ. *Exam. quaest. utrum divortium secundum doctr. etc. sit nec ne permissum?*

(69) In op. pariter germ. *Observat. in exam. D. Iager.*

(70) In *Matth.* XIX. n. 21.

(71) In op. germ. *Concordia legum gallic. de divortiis cum Verbo Dei.* Confluentiae 1816. p. 66.

(72) In op. germ. *Matrimonium.* Tractatio dogmatico-theologica. Moguntiae 1833. pag. 26. not. (c)

duritiam iudaeorum libellum repudii permisisse, quum ea permissio ob cordis duritiam latius patere dicenda sit, adeo ut etiam aliis ex causis praeter adulterium admittatur (73). Hug autem etsi catholicus formulam *hervath dabar* censuit latius patuisse, pluresque interpretationes admisisse ex ipsa Mosis voluntate atque intentione, ne illis ad quos spectabat legis interpretatio facultas praeriperetur, mutatis temporibus, eam strictius vel latius exponendi, prout necessitas aut publicae utilitatis ratio flagitasset (74).

Cl. Roskovány totus in eo est, ut evincat phrasi *Ervath dabar* Mosem significasse unice *fornicationem* seu *moechiam* cuius rea facta fuerit uxor, ob quod crimen, imo etiam ob adulterii suspicionem libellus repudii ad eam dimittendam dari poterat. Deinde ostendere adnititur ideo *abominabilem* et *pollutam* dici foeminam illam factam esse, quae post repudium viro alteri nuberet, quia illegitime eiusmodi nuptiae factae fuissent, antequam mulier fuisset dimissa (75). Primum assertum adstruit tum ex eo quod Moses voces has e viginti et novem vicibus, quibus illae in eiusdem libris occurrunt, certe vigesies et septies pro *impuro negotio*, seu *fornicatione* sumpserit, tum ex eo quod iudaeorum magistri eodem ac Moses sensu voces has usurpaverint (76). Alterum deducit ex eo quod illa sive abominatio sive pollutio praedicetur *coram Domino*, adeoque in sensu morali accipi necesse sit. Iam vero non-

(73) Tholuk in op. germ. *Philologico-theologica enarrat. sermonis Christi in monte secund. Matth.* Hamburgi 1833. pag. 245 seqq. Acoluthus *De aquis amoris.* Lips. 1682. pag. 220. Quamquam innocua videri possit eiusmodi interpretatio, ut paulo post dicemus, si coaretaretur ad solam legem mosaicam, nisi eam vellent extendere etiam ad legem evangelicam, prout protestantes extendendam esse contendunt. Hoc enim sensu eam sententiam improbamus.

(74) *De coniugii christiani vinculo indissolubili.* Friburgi 1816. Hanc sententiam merito impugnavit Frid. Liebetrut in ep. germ. *Matrimonium prae sua idea et historica explicatione.* Berolin. 1834. pag. 70.

(75) Op. cit. pag. 127 seqq.

(76) Cf. Drusium in *Crit. sacris* tom. I. item Huberti *Dissert. De libello repudii* 1804.

nisi tres hypotheses fieri possunt, quod nimirum eiusmodi abominatio sita sit, aut in separatione a primo marito, aut in separatione a secundo, aut demum in eo quod post separationem a primo viro, mulier dimissa ad secundas nuptias transierit. Porro ex his tribus hypothesis priores duae vix possunt statui, siquidem et primo et secundo marito Moses potestatem fecerit dimittendae uxoris; restat igitur hypothesis tertia (77).

At quominus huic expositioni animum adiiciam nonnulla sunt quae me impediunt. Nam 1. Si ipso fatente, Moses praecepit adulteros morte plecti (78), non intelligo quomodo per *foeditatem* seu *rem turpem* significari possit adulterium, quo delicto permittebatur marito dare libellum repudii. 2. Non video quare si voluisset Moses exprimere fornicationem aut adulterium, non definita certaue locutione usus fuerit, sed potius locutione vaga, incerta et ambigua quae non minimis haesitationibus et controversiis locum praeberet (79). 3. Si dimitti uxor poterat tantum ob adulterium, quisnam dimissam adulteram in coniugium sibi copulare ausus esset? Et tamen Moses supponit eam ad secundas nuptias transiisse, aut saltem transire potuisse. 4. Supponitur etiam a Mose uxorem a secundo quoque marito dimitti; iam vero si unica dimissionis causa fuisset adulterium, vix credibile est, idem crimen secundo pariter divortio causam praebuisse, quin fuerit punitum.

Reliquum igitur est, ut per *hervath dabar nuditatem rei* seu *rem pudendam*, aut *foeditatem* generatim significari

(77) Ibid.

(78) Levit. XX. 10. « Si moechatus quis fuerit cum uxore alterius et adulterium perpetraverit cum coniuge proximi sui, morte moriatur, et moechus et adultera; » et Deut. XXII. 22. « Si dormierit vir cum uxore alterius, uterque morietur, id est adulter et adultera, et auferes malum de Israel. »

(79) Exploratum autem non est viginti novem vicibus quibus occurrit in Mosis libris formula *hervath dabar*, viginti septies adhibeatur ad fornicationem significandam; nam, ut ex dicendis patebit, gratis id auctor egregius assumit.

dicamus, quidquid tale sit propter quod merito displiceat uxor marito, sive id de novo advenerit, sive adesse deprehendatur, cum antea lateret; huiusmodi sunt vel in rebus moralibus odiosi mores, pertinacia, inobedientia, dicacitas, furta, veneficii aut gravis alicuius criminis prudens suspicio etc. vel in physicis deformitas superveniens, defectus corporis latens, epilepsia, lepra, mania continua aut interrupta, sterilitas, aliaque id genus, quae incomperta prius penitus fuerint, aut saltem non adeo gravia, prout postea se patefecerunt, alioquin iustam non dedissent marito causam uxorem dimittendi (80). Eiusmodi exegesis conformis videtur ipsi textui: « Si acceperit homo uxorem et habuerit eam, et non invenerit gratiam ante oculos eius propter aliquam foeditatem etc.»

Remanent nunc expendenda ea verba: *quia polluta est et abominabilis facta est coram Domino*. Hic etiam probare non possum sententiam quam cl. Roskovány, ut inui, proposuit. Licet enim dem, heic non agi de abominatione et pollutione physica, non inde sequitur illico agi de abominatione morali: potuit enim esse pollutio et abominatio mere legalis. Certe moralis pollutio non potuit esse in eo quod secundae nuptiae a dimissa inirentur. Etenim quomodo moralis pollutionis et abominationis rea

(80) Ita Bonfrerius *Comment.* in hunc loc. Neque abludit Gesenius, qui ad vocem עֲרֵבָה inter cetera scribit: « E recentioribus Michaelis (*Iure Mos. II.*

§. 250.) rectius contra Schammai cum suis, severioris disciplinae ubique, non nisi de re turpi et indecora, velut de adulterio (neque tamen de hoc solo), vel habitu indecoro, scissis ad nuditatem usque vestibus cet. (v. *Misna* et *Genes. Gittin* 9. 10. Seldeni *Uxor hebraica III.* c. 16-20. Buxtorf *Sponsal. et divort.* p. 85 seq. 122 seq.); *quamquam ipse legislator adulterium, ut morte (non divortio) puniendum dicere non potuit, et locus unicus Deut. XXIII. 14. Vitium in corpore situm intelligere iubeat.* LXX. satis bene ἀσχημον πρῶγμα, Saadias foedum, turpe quid verterunt; sed ab Onkelos, *transgressio quaedam, Arab. aggressus est, et patravit turpe quid redditum est. Inde dedecus, ignominia.*» Ex quibus patet, excluso adulterio, causas sive physicas sive morales iustificasse libellum repudii.»

esse potuit mulier, quae id fecisset quod a lege permittebatur, quodque erat plane legitimum? Iam vero constat ex lege mosaica mulierem per libellum repudii dimissam potuisse alteri viro se se legitime copulare: hoc aperte ostendit divinus legislator dum ait: « Cumque egressa (repudiata) alterum *maritum* duxerit. » Vir ergo alter vere maritus adeoque mulier vere uxor censeri debet. Accedit quod secundus etiam maritus non posset sine libello repudii hanc uxorem dimittere; ergo et is verus legitimusque maritus et illa vera ac legitima uxor censebantur. Insuper Levitici XXI. Moses prohibuit ne sive summus sacerdos sive ceteri sacerdotes matrimonio se coniungerent cum dimissa muliere: ergo reliqui de populo poterant eam legitime ducere (81).

Ad triplicem vero hypothesim a cl. auctore propositam, respondeo pollutionem et abominationem haud fuisse sitam aut in separatione a primo marito, aut in separatione a secundo, aut, ut auctor contendit, in eo, quod dimissa ad secundas nuptias transierit, sed in eo (quod auctor omisit), quod mulier a secundo viro dimissa, vel eo mortuo iterum ad priorem virum rediret. Haec est quarta hypothesis addenda, non autem in hoc reditu, in hac instauratione coniugii prioris post alterum coniugium pollutio et abominatio legalis, et si placet, etiam moralis tota consistit (82), prout paulo fusius mox ostendemus respondendo difficultatibus quae ab aliis fuerunt propositae.

Sunt enim qui autumant per libellum repudii ablatam quidem fuisse *poenam* ab iis qui illum uxoris tradidissent, non autem *culpam*, adeo ut peccarent coram Deo qui ita se gererent, licet nullam poenam legalem incurrerent. Idque colligunt ex Christi verbis « Moyses ad du-

(81) Cf. Drach, *Du divorce dans la Synagogue*. Rome 1840. Première époque §. IV. ar. p. 17.

(82) Cf. Bonfrerium in h. l. Pentateuchi, et Sanctium in cap. II. Malach.

ritiam cordis vestri permisit vobis dimittere uxores vestras; ab initio non fuit sic (83); » tum etiam ex eo quod uxor dimissa iuxta ipsos non posset sine culpa ad novas transire nuptias; quandoquidem *polluta et contaminata* non tantum coram hominibus, verum etiam coram Domino fieret quae semel repudiata alteri coniungeretur viro iuxta illud Ieremiae: « Vulgo dicitur: si dimiserit vir uxorem suam, et recedens ab eo, duxerit alterum, numquid revertetur ad eum ultra? Numquid non *polluta et contaminata* erit mulier illa (84)? » Quae quidem eam confirmant interpretationem verborum Deuteronomii quam ex cl. Roskovàny attulimus. Praeterea a Malachia ex Dei nomine graviter reprehenduntur iudaei eo quod libellum repudii uxoribus darent: « Cum odio habueris (uxorem tuam), dimitte, dicit Dominus Deus Israel; operiet autem iniquitas vestimentum eius (85), » scilicet dimittentis, ut ex hebraica veritate habetur (86), ob iniquitatem nempe perpetratam in uxoris dimissione fiet ut iniquitas nullo vestimento contegi queat. Quo referunt sententiam s. Augustini scribentis: « Libellus repudii magis fuit *exprobratio* divortii, quam approbatio (87) » et rursum: « Sicut duobus pluribusque servire, sic a viro vivo in alterius transire concubitus, nec tunc licuit, nec nunc licet, nec umquam licebit (88). » Demum concludunt, quod si citra culpam potuisset fieri divortium, omne tolleretur discrimen inter con-

(83) Matth. XIX. 8.

(84) Ierem. III. 1.

(85) Malach. II. 16.

(86) Hebraice enim legitur על-לְבָשׁוֹ super vestimentum eius. In paraphrasi chald. Ionathanis: « Ne operias peccatum vestimento tuo. » In vers. Alexandr. Et operiat impietas tua cogitationes tuas. In syriaca: Et iniquitatem pallio suo ne tegat. Demum in vers. arabica: Et operiet impietas tua vestimenta tua.

(87) De bono coniug. cap. VIII.

(88) Ibid. cap. XVIII.

iugium liberamque fornicationem, cum perpetuus transitus fieri posset ab uxore ad uxorem (89).

At qui contrariam tuentur sententiam his minime permoventur. Quamvis enim ob cordis duritiem permiserit Moses, seu potius Deus per Mosem dare libellum repudii, etiam contra primaevam coniugii institutionem, non exinde sequitur peccasse eos, qui hac facultate utebantur. Siquidem plura sunt, quae interdum ob cordis duritiam conceduntur ita ut culpa vacent qui concessione utuntur (90). Praeterea si poena tantum per legem fuisset ablata, sequeretur Deum magis sollicitum fuisse de poena quam de culpa, quod absurdum foret vel cogitare. Adde, quod si non sine culpa potuissent uxores dimitti, id in lege sanctissima, cuiusmodi fuit mosaica a Deo data conceptis verbis, ut legem decet, significatum aliquando fuisset (91), quod tamen nusquam nec aperte dictum, neque obscure insinuatam reperitur. Deus praeterea in adversariorum hypothesi tot indulgisset adulteria, quot nuptiae a repudiata uxore initae fuissent, quod a Dei sanctitate abhorret; eo vel magis quod Deus severissimas poenas decreverit in adulteros; in sententia vero qua de agitur, adulteria *palliat*a prope innumera patrata impune fuissent.

(89) Ita quidem inter ceteros pugnant Estius in 4. sent. dist. 33. Sylvius *Suppl.* 9. 67. et alii cum ipsis, qui adducunt pro se s. Hieronymum in cap. V. *Matth.* et s. Bonaventuram.

(90) Nonnulli ad hoc declarandum afferunt exemplum sive refetiunculae vespertinae ab ecclesia concessae ieiunii tempore, ut sese ipsorum infirmitati accommodaret, secus ac ab initio obtinuerit; sive esus carniū, qui poscentibus duris rerum adiunctis ac temporum, passim ab ecclesia permittitur diebus esurialibus, nemo tamen dicit peccare eos, qui dato indulto utuntur.

(91) Quod iamdiu animadverterat s. Thomas 3. part. q. 67. art. 5. dicens: « Quia lex vetus, quamvis gratiam non conferret, tamen data erat, ut peccatum ostenderet, ut communiter sancti dicunt... Si (iudaei) repudiando uxorem peccassent, hoc saltem eis per legem aut prophetas indicari debuisset, secundum id Isaiae 58. *Annuntia populo meo scelera eorum*, alias viderentur nimis esse neglecti, si ea quae necessaria sunt ad salutem, quae non cognoscebant, numquam eis nuntiata fuissent; quod non potest dici, cum iustitia legis tempore suo observata vitam mereretur aeternam. »

Quod si *polluta et abominabilis* declaratur uxor repudiata, quae ad nova transisset vota, praeter quam quod eiusmodi sive pollutio sive abominatio non ethica, sed legalis dici potest, ea respicit, ut diximus, non quidem dimissae uxoris cum alio marito coniunctionem, sed regressum ad pristinum maritum. Revera si iste permissus fuisset regressus, repudium non fuisset nisi fucatum, et aditus apertus fuisset ad quamdam veluti commutationem uxorum quae sane *abominatio coram Domino* (92) foret. Et hac ratione evanescit difficultas ex Deuteronomio atque ex Ieremia petita (93).

Malachiae qui opponitur locus diversa ratione exponi consuevit; sunt enim qui ipsum faventem potius divortio seu repudio exhibeant quam adversantem. Iuxta hos arguit Deus per prophetam suum iudaeos, quod *superinducerent* ex alienigenis pellices et despicerent uxores suas, quas tyrannice ac dure tractabant eo quod senuerint, venustatemque pristinam amiserint. Hae lacrymis ac fletibus suis ob passam iniuriam templum replebant; quocirca Deus non iam ironice, ut aliqui autumant, sed serio eis indicit, ut si odiosae ipsis redditae uxores esse coeperint, potius per libellum repudii liberas dimittant, quam dure ac tyrannice sub servitute retineant; sicque possint liberae esse, ac si eis libuerit ad novas se transferre nuptias. Interim viris comminatur gravissimas poenas ob

(92) Sic enim allegata verba efferuntur in hebraica veritate, et in paraphrasi chaldaica, et in vers. alex. nec non in vers. syriaca et arabica. Ita enim legitur in hebraico textu *כִּי־תוֹעֵבָה הָיָא לְפָנַי יְהוָה* *Quia abominatio ipsa ad faciem Domini.* In paraph. cald. *Quoniam abominatio est coram Domino.* In vers. LXX. *Quoniam abominatio est ante Dominum Deum tuum.* In vers. syriaca: *Quia abominanda res est coram Domino.* In arab. *Hoc enim execrabile est in conspectu Dei.* Itaque non ad mulierem, quae alterum maritum duxit eiusmodi *abominatio* refertur, sed ad eam quae ad priorem virum regrederetur.

(93) Cf. Drach Op. cit. pag. 30 seqq. ubi plures hanc in rem rabbinorum auctoritates profert.

hanc iniustam cum uxoribus suis agendi rationem (94). Alii vero supposita libelli repudii permissione, contendunt Deum per prophetam iudaeos arguere ob abusum abnormem huius indulgentiae seu permissionis, uti rabbinorum plerique, ut mox videbimus. In utraque hypothesis seu expositione, patet ex Malachiae textu argui haud posse libellum repudii *ex se* culpam involvere coram Deo.

Quod vero attinet ad duo loca quae ex Augustino obiiciuntur, animadvertendum est s. doctorem dum ait libellum repudii exprobrationem potius fuisse, quam approbationem divortii, hoc significare voluisse, per libellum repudii non fuisse infinite *approbatum* divortium, sed solum *permissum* ob duritiam cordis israelitarum. Quandoquidem causa ob quam ipse inurit quamdam notam ipsi repudii libello (95), est quodammodo divortii ipsius exprobratio. Et hoc quoad priorem textum; ad alterum vero quod spectat, facilior adhuc responsio suppetit, cum hoc in loco s. Augustinus directe loquatur de polygamia simultanea potius, quam de dissolutione coniugii, et tamen ipsam simultaneam polygamiam quam hic damnat, in eodem capite agnoscit licite a patriarchis frequentatam fuisse.

Neque tandem concedi debet, quod si citra culpam novae iniri poterant nuptiae per libellum repudii, discrimen inter coniugium et fornicationem sublatum esse; siquidem qui fornicatur vagam venerem consecratur, quin sollicitus sit aut de prole aut de eius institutione, et quidem id operatur ex arbitrio. Contra vero ex lege mosaica licet permitteretur uxoris dimissio, id fieri tamen non poterat quacumque ratione, sed gravi ex causa probantibusque iudicibus, et non pro voluntate, sed ex legis praescripto,

(94) Ita Sanctius in hunc loc. ubi diffuse, solide et eleganter rem hanc exponit.

(95) Nam comparat morem hunc cum gentilium consuetudine in dimittendis uxoribus, et refellit eos, qui in lege christiana voluissent hunc eundem morem inducere sub praetextu concessi a Mose libelli repudii.

adeoque perpetuus ille transitus de uxore ad uxorem, quem adversarii dicunt fornicationi simillimum, ex legis abusu ad summum, non autem ex ipsa lege dimanasset.

Itaque divortium in lege mosaica Dei auctoritate ita erat permissum ut vere licitum esset. Absit vero quod quis cum Luthero affirmet, Mosis institutum de divortio fuisse *praeceptivum*; absit; nec enim *mandavit* Moyses, sed *permisit* tantummodo dari libellum repudii. Quae quidem permissio ex quadam tolerantia, indulgentia atque accommodatione huius divini legislatoris repeti debet, ratione habita durae indolis hebraici populi, qui si retinere odiosas uxores coactus fuisset, facile in homicidia aliaque crimina lapsus fuisset. Quidam existimant populum israeliticum inter Aegyptios commorantem a primaeva morum simplicitate descivisse, uxoresque suas dure ac tyrannice tractare consuevisse, immo et per nefas repudiare ad instar aegyptiorum. Quapropter Moses indulgit, ut quod prius penes ipsos contra ius et fas obtinuerat, deinceps legali ratione, ut ita dicam, fieret, gravi tamen interveniente causa, non autem ut antea pro arbitrio. Ita quidem, si admittatur, quod alii negant, uti paulo ante diximus, ante Moysen tum apud hebraeos tum apud alias gentes repudium obtinuisse.

Verum quidquid de hoc sit, quod certo definiri nequit, talem huius legalis permissionis indolem ac spiritum fuisse, vel ipsis hebraeis persuasum fuit, ut patet ex facto. Nam usque ad captivitatem babilonicam nullum penitus suppetit exemplum de dato libello repudii, quamvis polygamia passim apud hunc populum obtineret (96). Quinimmo nec ipso captivitatis babilonicae tempore certo constat re-

(96) Cf. Drach. op. cit. *Du divorce dans la synagogue*, pag. 49 seq. Non propterea inficias ibo fieri fortasse potuisse, ut interdum divortium in tanta saeculorum intercapedine locum obtinuerit, prout innuitur Is. 50. et Jerem 3. Unum illud exploratum est eiusmodi exempla aut numquam aut rarissime per id temporis occurrere. Cf. Seldenum *Uxor hebraea* lib. III. cap. 19.

puta facta fuisse. Nam quae leguntur Esdrae lib. I. cap. IX. et X. evincunt quidem alienigenas a iudaeis ductas fuisse, non autem repudiatas fuisse seu expulsas uxores israeliticas.

Adeoque non nisi serioribus iudaicae reipublicae temporibus, quum iudaei moribus corruptissimis se foedassent, coeptum est frequentari divortium, et agitata est quaestio de intelligentia legis mosaicae circa hunc articulum Deuteronomii. Progressus vero adeo est Hillel cum schola sua, ut effutiret quavis vel levissima ac futilissima causa intercedente licitum fuisse dimittere propriam uxorem aliamque ducere (97). Ceterum divortium non modo non fuisse praeceptum, sed solum aegre permissum constat etiam ex sensu traditionali ipsius synagogae, quae declaravit *virum odibilem coram Deo*, qui permissione divortii fultus propriam uxorem dimitteret (98); constat insuper ex eo quod illustriores rabbini Yarchi, Aben Ezra, Samuel Yaphè, aliique bene multi qui verba Malachiae II. ut nuper innuimus, de divortio intellexerunt, ad unum omnes tamquam Deo invisum traducant, qui facit divortium (99). Idipsum quoque non obscure colligitur ex omnibus conditionibus iuridicis, quae ad libellum hunc repudii con-

(97) In Thalmude tract. *Ghittin* seu *De divortiis* cap. IX. §. 10. et *Sota* seu *De adultera* fol. 4. Item *Bammidbar Rabbà* IX. ad Num. V. 30. de Hillelis schola haec referuntur: « Schola Hillel dicit: etiamsi combusserit decoctum eius, sicut scriptum est: si invenerit in ea harvat dabar nuditatem rei. R. Akihibà dicit: etiamsi illa pulchriorem invenerit aliam, ut scriptum est, si non invenerit gratiam in oculis eius. » Huic laxae interpretationi cui libenter populus ille degener animum adiciebat se se opposuit Schammai cum schola sua coartans divortii facultatem ad graves causas, utpotè severioris disciplinae cultor. Nonnulli censent hunc quem Iosephus Flavius *Archaeolog.* lib. XIV. c. 9. n. 3-5. et lib. XV. c. 1. §. 1. *Sammeam* vocat, ac veluti severum disciplinae censorem ab Herode in pretio habitum, et tamquam prophetam describit, eundem fuisse ac Simeonem de quo Luc. II. 75.

(98) Thalm. tract. *Ghittin* fol. ult. b.

(99) Apud Drach. op. cit. pag. 29 seqq. qui plurimorum rabbinorum testimonia allegat.

scribendum et tradendum coram testibus in manu uxoris repudiandae requirebantur. Eo nimirum consilio tot conditiones appositae erant, ut maritus non ex primo impetu ageret, sed ad saniora consilia se recipere posset, dum temporis mora satis longa insumeretur, ut iuridicae conditiones omnes explerentur (100). Demum ex eo pariter constat, quod soli viro tribueretur facultas dandi libellum repudii, mulieri autem haec denegaretur, adeo ut nonnisi sub extremis reipublicae temporibus effrontes mu-

(100) Formulam penes iudaeos receptam, et qua, ubi ipsis divortium permittitur, adhuc utuntur, inter ceteros exhibet Bonfrerius his expressam verbis: « In quarto sabbati, in duodecima mensis Tisri, anno a creatione mundi quatermillesimo centesimo tertio, in urbe Babylonis, ego Rabbi Simeon filius Rabbi Sadoc, filii Rabbi Aman, filii Rabbi Daniel, sponte mea, et ex animo, citra ullam coactionem, a me dimitto ac repudio Rachel filiam Rabbi Abraham, filii Rabbi Ioseph, filii Rabbi Salomonis, et concedo ei licentiam et potestatem, ut pro libito suo abeat quo voluerit, ducique possit ab omni viro, ne eam quisquam prohibere praesumat. In cuius rei testimonium dedi ei hunc librum repudii, et schedam dimissionis atque signaculum divortii iuxta constitutionem Moysi et Israel, praesentibus testibus infra scriptis. »

Decem porro erant caeremoniae in hoc negotio servandae: 1. ut uxor nusquam discederet nisi volente marito et accepta ab eo potestate; quam potestatem maritus se facere etiam in libello exprimebat; 2. ut libellus in manu uxoris traderetur; 3. ut adscriberentur ut minimum duorum testium nomina; 4. ut exprimerentur tres generationes viri totidemque mulieris, ut in libelli formula expressum est, licet alii veliat sufficere si una hinc inde generatio exprimeretur; 5. ut scriberetur libellus rotundis litteris, distinctis, atque perspicuis, ita ut una aliam non attingeret, ne quod scripturae vitium irreperet; 6. ut si inter scribendum aliquo actu atramenti in membranam decidisset guttula, libellus auctoritatem non haberet, aliasque denuo scriberetur, 7. ut in libello nullum rasurae vestigium appareret, ne suspectus esset vitii, 8. ut membrana longior esset quam latior 9. ut omnes testes qui aderant suum quisque sigillum imprimeret; 10. ut maritus diceret: *Accipe libellum repudii et esto a me abiecta et cuicumque marito permissa.*

Cf. etiam hoc de argumento Brouwer *De iure connub.* lib. II. c. 30. qui recensitis conditionibus addit: « Haec et alia plura divertenti Iudaeo observanda fuere, quae omnia si recensenda forent, integrum occuparent librum, ut scribit Buxtorffus. Scilicet cum minimas ob causas divortia admiserint, modus tamen divertendi adeo difficilem voluerunt Rabbini, ut ab iis ob moras, molestias, sumptus et difficultates deterrerentur mariti; simulque dum haec omnia rite parantur, ut interea ex amicorum intercessione, subsideret et mitigaretur mariti iracundia, et divortii loco sequeretur potius redintegratio coniugalis amoris. »

lieres iudaeae inventae sint, quae romanas imitantes ausae fuerint maritis libellum dare repudii (101).

Ex his omnibus patet eiusmodi constitutionem mosaicam non fuisse praeceptivam, sed tantum permissivam, ac per eam divinitus dispensationem datam fuisse primaevae legi indissolubilitatis a Deo ipso constitutae in nuptiarum institutione inter protoparentes.

ARTICULUS III.

Quaestio expenditur an et quomodo perfecta indissolubilitas, quae ex lege evangelica propria est Matrimonii christiani, deducenda sit e ratione sacramenti.

Apud theologos omnes catholicos ratum fixumque est in lege evangelica ita indissolubile esse coniugium, ut semel ac consummatum fuerit, numquam possit dissolvi. At si tantae firmitatis ratio quaeratur, non una est theologorum sententia. Qui ex solo etiam iure naturae matrimonii indissolubilitatem probari omnino contendunt, ut supra diximus, ii putant sacramenti rationem vix aliquid addere posse nativae indissolubilitati; alii eam potius deducunt ex praecepto positivo tum Dei, qui matrimonium ab initio ea lege instituit, tum Christi qui illud ad pristinam severitatem restituit; alii denique ex eo quod matrimonium christianum ad dignitatem sacramenti evectum sit et peculiari quodam modo unionem Verbi cum humanitate, et Christi cum ecclesia significet.

Nobis nunc disserendum tantum est de hac tertia sententia, circa quam vix dici potest quanta in ea proponenda sit opinionum varietas. Quidam enim maxime insistent rationi veri et proprii sacramenti novae legis, quae propria

(101) Salome et Herodias a Iosepho Flavio Archaeolog. lib.XV. c. 7. n. 10; et lib. XVIII. c. 5. n. 4. primae inter iudaeos foeminae perhibentur, quae contra maiorum consuetudinem, immo et legem ipsam libellum repudii maritis tradiderint.

est matrimonii christiani; alii sacramenti nomen etiam laxius usurpant atque insistunt illi significationi, quam diximus de Christi unione; quae quidem significatio aliquo modo inest matrimonio etiam cum non est sacramentum, prout fuerunt coniugia inita ante Christi adventum, et etiamnum coniugia infidelium; praeterea, alii rationem sacramenti proprie dicti, vel saltem rationem signi exhibent ut causam unicam indissolubilitatis omnimodae; alii ut causam saltem praecipuam; alii vix causae rationem in ea agnoscunt, sed potius eam habent ut signum aliquod positivae voluntatis Christi, ex qua tandem reputant christiani matrimonii firmitatem.

Argumenta quibus utuntur partim indirecta sunt; partim directa. Contendunt primò matrimonium non probari indissolubile ex lege naturae, neque ex primitiva institutione; restat ergo ut ea indissolubilitas a ratione sacramenti petatur. Deinde insistunt verbis Pauli Ephes. V. «Sacramentum hoc magnum est; ego autem dico in Christo et in ecclesia.» Hoc vero *sacramentum*, uti adversus Erasmus ac novatores sec. XVI. ostendit Vasquezius non ad Christum et ecclesiam, sed ad matrimonium refertur quatenus signum praesefert unionis Christi et ecclesiae (102). Cum igitur christianorum coniugium exhibeat signum indissolubilis coniunctionis Verbi cum humanitate et Christi cum ecclesia, ex ipsa natura rei quam significat omnimoda indissolubilitate praeditum sit oportet. Quapropter cum inter ceteras attulisset auctoritatem s. Thomae, qui scribit: «Matrimonium fuit quidem in veteri lege, prout erat in officium naturae, non autem prout est sacramentum coniunctionis Christi et ecclesiae, quae nondum erat facta, unde et in veteri lege dabatur libellus repudii, quod est contra sacramenti rationem (103)» con-

(102) Vasquez. *De matrim.* Disp. II. c. 6. n. 4 seqq.

(103) 1. 2. q. 102. ar. 5. ad 3.

cludit: « Hinc infertur omnimodam indissolubilitatem non competere matrimonio consummato ex naturae iure, sed ex Christi divino praecepto positivo *quod Deus coniunxit homo non separet*, ubi elevavit matrimonium ad esse sacramenti, et ut repraesentaret indissolubilem Christi cum ecclesia per carnem unionem (104).»

Huic etiam sententiae energice Bellarminus insistit, dum scribere non dubitat: « Illa omnimoda indissolubilitas in unis nuptiis non potest referri in causam primariam, et certissimam, nisi in signum coniunctionis Christi cum ecclesia, in quam causam perpetuo Augustinus eam insolubilitatem refert (105).»

Et sane s. Augustinus passim hanc doctrinam inculcat; sic in lib. I. *De nuptiis*: « Quoniam non tantum foecunditas, cuius fructus in prole est, nec tantum pudicitia, cuius vinculum est fides, verum etiam quoddam sacramentum nuptiarum commendatur fidelibus coniugatis, unde dicit Apostolus: *Viri, diligite uxores vestras, sicut Christus dilexit ecclesiam* (106).» Deinde subdit: « Huius procul dubio sacramenti res est (hoc est effectus), ut mas et foemina connubio copulati, quamdiu vivunt, inseparabiliter perseverent, nec liceat, excepta causa fornicationis, a coniuge coniugem dirimi. Hoc enim custoditur in Christo et ecclesia, ut vivens cum vivente in aeternum nullo divortio separetur. Cuius sacramenti tanta observatio est in civitate Dei nostri, in monte sancto eius, hoc est in ecclesia Christi, quibusque fidelibus coniugatis, qui sine dubio membra sunt Christi, ut, cum filiorum procreandorum causa vel nubant foeminae, vel ducantur uxores, nec sterilem coniugem facile sit relinquere, ut alia foecunda ducatur. Quod si quisquam fecerit, non lege huius seculi,

(104) Ibid. n. 8.

(105) *De matr.* c. IV. n. 2.

(106) Cap. X. n. 10. Opp. ed. Maur. tom. X.

ubi interveniente repudio sine crimine conceditur cum aliis alia copulare connubia; quod etiam sanctum Moysen Dominus, propter duritiam cordis illorum, israelitis permisisse testatur: sed lege evangelii reus est adulterii, sicut etiam illa si alteri nupserit (107).» Qui praeterea paulo post ita prosequitur: « Ita inter viventes manet quiddam vinculum coniugale, quod nec separatio, nec cum altera copulatio possit auferre. Manet autem ad noxam criminis, non ad vinculum foederis: sicut apostatae anima velut de coniugio Christi recedens, etiam fide perdit, sacramentum fidei non amittit, quod lavacro regenerationis accepit. Redderetur enim procul dubio redeunti, si amisisset abscedens (108), » ut alia eiusmodi s. Doctoris testimonia silentio praeteream, quae praesertim occurrunt in libro *De bono coniugali*.

Huc quoque referuntur quae Eugenius IV. in decreto pro armenis, qui indissolubilitatem affirmat esse bonum matrimonii ex eo quod indivisibilem coniunctionem Christi cum ecclesia significet (109). Hinc in Catechismo romano legitur: « Quamvis matrimonio, quatenus naturae est officium, *conveniat*, ut dissolvi non possit: tamen id *maxime fit*, quatenus est sacramentum (110).»

His tamen haud pauci non acquiescunt, eiusmodi rationibus ducti; 1. quia hoc signum coniunctionis Christi cum ecclesia iam habebatur tum in Adae et Evae coniugio, ceterisque veteris legis connubiis; tum etiam suo modo in ipsis gentilium coniunctionibus: sane Apostolus Ephes. V. locutus est de matrimonio in genere praemissis verbis Genes. II. *Propter hoc relinquet homo etc.* cum dixit: *Sacramentum hoc magnum est; ego autem dico in Chri-*

(107) Ibid. col. 285. 286.

(108) Ibid.

(109) Apud Harduin. *Acta conc.* tom. IX. col. 440.

(110) *De matrim.* sect. I. §. 11.

sto et in ecclesia. Attamen, omnibus fatentibus, vetera illa connubia dissolvi poterant, saltem ex Dei dispensatione; ergo indissolubilitas non bene deducitur ex ratione signi seu sacramenti.

2. Quia ratio sacramenti *presse sumpti* convenit tam matrimonio fidelium tantum rato, quam matrimonio consummato; ecquis enim inficias ibit matrimonium fidelium dum consensu perficitur esse vere et proprie Sacramentum? Nihilominus in aliquibus casibus ratum matrimonium dirimitur. Igitur sacramenti etiam proprie dicti ratio illa non est, quae indissolubilitatem omnimodam tribuat matrimonio.

3. Quia verum sacramentum habetur etiamsi fideles qui coniugium contrahunt, statuunt, seu paciscantur inter se mutuo consensu servare in matrimonio continentiam, ut constat de matrimonio inter s. Pulcheriam et Marcianum, ut alia omittam exempla, adeoque consummatio ad essentiam non pertinet sive sacramenti, sive matrimonii, prout mente concipitur a sacramento distinctum. Iam vero istud matrimonium solum ratum iugiter perseverans, etsi sacramentum vere sit, semper nonnullis in casibus solubile dici debet. Hinc redit eadem conclusio, quod sacramenti ratio per se omnimodam indissolubilitatem coniugio non tribuat.

4. Quia Christus ipse significavit indissolubilitatem a Deo repetendam esse dum ait: *Quod Deus coniunxit homo non separet*, scilicet vel ex naturali Dei praecepto, vel ex praecepto positivo, non autem ex ratione sacramenti fluit indissolubilitas.

5. Quia si ratio sacramenti causa esset indissolubilitatis, matrimonium in quo ratio sacramenti deficeret, dici deberet minus indissolubile, quam matrimonium in quo ratio sacramenti perfecta est. Iam vero matrimonia bigamorum deficiunt a mensura sacramenti, ut loquitur

Augustinus, et tamen indissolubilia prorsus sunt, non secus ac matrimonia in quibus ratio sacramenti est perfecta (111).

6. Quia quod attinet ad Augustinum, etsi praetermittatur Vasquezii singularis sententia iuxta quam s. Doctor numquam, cum agit de matrimonio, usurpaverit sacramenti vocem presso sensu de vero et proprio novae legis sacramento, etsi haec, inquam, sententia praetermittatur, quae allata sunt testimonia explicari posse videntur aut de sacramento naturalis vinculi quod ex ipsa lege naturae sanctum est atque insolubile, aut de sacramento *baptismi* ex quo fit, ut coniugium fidelium, qui sunt Christi membra, unionem Christi cum ecclesia significet; non autem de ipsa ratione veri et proprii sacramenti, quae matrimonio fidelium inest. Atque in hanc rem proferunt alia eiusdem sancti doctoris testimonia, uti ex libro *De nuptiis*, ubi ipse scribit: « Iam nunc si quodam modo interrogemus bona illa nuptialia, unde ab eis potuerit peccatum in parvulos propagari, respondebit nobis operatio propagandae prolis: ego in paradiso magis felix essem, si peccatum non fuisset admissum... Respondebit etiam *connubii sacramentum*: de me ante peccatum dictum est in paradiso: *relinquet homo patrem et matrem, et adhaerebit uxori suae, et erunt duo in carne una*. Quod magnum sacramentum dicit Apostolus in Christo et in ecclesia. Quod ergo est in Christo et in ecclesia magnum, hoc in singulis quibusque viris atque uxoribus minimum, sed tamen coniunctionis inseparabilis *sacramentum* (112). » Ex quibus verbis patet iuxta mentem Augustini matrimonium in paradiso lege indissolubilitatis devinctum fuisse, iamque ex institutione sua *magnum* fuisse *sacramentum* in Christo et in ecclesia. Fieri itaque non potest ut Augustinus ex

(111) Apud Pontium *De matr.* lib. I. c. XI.

(112) Cap. XXI. n. 23. Opp. ed. Maur. tom. X. col. 292.

sacramenti proprie dicti ratione coniugalis vinculi indissolubilitatem deduxerit.

Nec obstat interdum s. Augustinum ad illustrandam matrimonii firmitatem uti exemplis sacramentorum, nimirum baptismi, qui numquam deletur in haereticis fidem deserentibus, quod attinet ad characterem; nec non ordinationis ecclesiasticae; ad hoc enim tantum s. Doctor usus est praedictis exemplis, ut ostenderet, quod quamvis matrimonium exterius civili lege solvatur, re tamen ipsa vinculum manere, sicut character baptizati semper manet, quamvis ille, qui baptismo fidem nostram professus est, ab ea desciscat; et sicut manet re ipsa ordine insignitus is etiam qui ab officio removetur; non autem, ut adstrueret ex hoc quod matrimonium non secus ac baptismus et ordo sit proprie sacramentum, eius indissolubilitatem nasci, cum id non ferret scopus sibi propositus. Constat praeterea illis in locis Augustinum non solum agere de vinculo matrimonii christianorum, quod est sacramentum proprie; sed de vinculo praeterea cuiuscumque matrimonii in *populo Dei*; per populum autem Dei intelligit etiam antiquum populum patriarcharum, ut ex orationis contextu exploratum est. Ergo non potuit matrimonii indissolubilitatem ex propria sacramenti stricte sumpti ratione deducere.

Eugenius vero IV. dum in suo decreto asserit indissolubilitatem esse bonum matrimonii, eo quod significet indissolubilem coniunctionem Christi cum ecclesia, non debet intelligi in sensu exclusivo, ac si inde solum, non autem ex rei natura indissolubilitas penderet (113). Insuper, ut dictum est, ea ratio signi habebatur etiam in matrimoniis veteris foederis: ratio autem sacramenti proprie dicti habetur pariter in matrimoniis ratis fidelium, et tamen solvi possunt.

(113) Cf. Vasquez. l. cit. c. VI. n. 62.

Hinc concludunt argumentis omnibus, quae supra attulimus, ita confici matrimonium natura sua esse indissolubile, ut necesse non sit vel ad praeceptum positivum, vel ad sacramenti rationem recurrere.

Ita quidem non pauci neque ignobiles theologi, qui proinde acriter invehuntur in illos, qui tam abiecte sentiunt de vinculo coniugali ex iure naturae, quasi non exposceret omnimodam vi sua firmitatem ac indissolubilitatem nisi sacramenti ratio accessisset.

Quidquid porro de hac contentione sit, nobis videtur ex una parte coniugii indissolubilitatem ex ipso naturae exposci iure, adeo ut nihil sit in rerum natura quod illud dissolvere ac dirimere valeat, nullaque humana potestas, quae vinculum possit attingere. Verum et illud fatemur eiusmodi firmitatem omnimodam haud spectare ad iura primaria seu essentialia legis naturalis, alioquin nec Deus ipse posset illud disiungere, quod tamen nemo dicet.

Ex altera vero parte negari haud posse videtur maius adhuc robur, firmioremque indissolubilitatem nactum esse matrimonium christianorum tum ex iure positivo divino, dicente Christo; « Quod Deus coniunxit, homo non separet; » tum ex veritate sacramenti, quo fit, ut nullo unquam in casu matrimonium fidelium semel consummatum possit dissolvi. Quidquid porro Vasquezius ac nonnulli alii cum ipso sentiant, dubitari nequit s. Augustinum maiorem firmitatem agnovisse ac saepius inculcasse in coniugiis fidelium, quam in ceterorum connubiis, idque ob sacramenti dignitatem quam exclusive obtinet christianorum matrimonium.

Ad haec componenda aliqui theologi, inter quos eminet Basilius Pontius (114) in matrimonio generatim sum-

(114) Lib. I. a cap. XI. ad XV.

pto 1. intrinsecam et extrinsecam firmitatem distinguunt. Priorem, quae oritur ex natura rei unice ac totam repetunt ex naturae iure, licet non essentiali et primario, posteriorem vero arcessunt sive ex iure divino positivo, sive ex ratione sacramenti proprie dicti.

Qua distinctione praemissa, 2. illud etiam animadvertunt, obligationem aliquam natura sua esse posse perpetuam, neque tamen illico exinde sequi, cam neque a supremo rerum Domino dissolvi posse, vel ipsam rei naturam immutari atque attingi, si quod de se perpetuum et stabile esse deberet, Deo ita disponente, nec stabile sit neque perpetuum. Quod deinceps nonnullis exemplis declarant, confirmantque. *Status* quivis ex. gr. ex natura sua ita perpetuam firmitatem exigit, ut si ea desit, status ratio corruat, uti theologi, praeunte angelico Doctore (115), uno ore fatentur. Hinc status religiosus ex se, seu natura sua est omnino perpetuus; et tamen rom. pontifex potest, accepta a Deo auctoritate, illum dissolvere; sic votum absolutum ex se perpetuum est, et tamen potest eadem auctoritate a pontifice dissolvi, seu ab eo dispensari. Iam vero eiusmodi dissolutio aut dispensatio haud immutat sive naturam sive firmitatem, quam ex sese habent tum status religiosus, tum votum, quae non desinunt ex se esse perpetua, etsi per accidens ex perpetuis fiant temporalia. Igitur quamvis matrimonium vel in favorem baptismi vel in favorem religionis auctoritate divina dissolvatur, non obstat quominus ipsum matrimonii vinculum, quantum ex natura eius est, sit omnino indissolubile.

Quamobrem non bene arguunt ii, qui ex eo quod divinitus data est dispensatio inferunt matrimonium non esse indissolubile naturaliter, sed solum quatenus est sacra-

mentum. Nam si ea ratio quidpiam valeret, matrimonium neque naturaliter, neque prout est sacramentum indissolubile dici deberet, quum etiam matrimonium ratum fidelium dissolvi possit. Ut matrimonium naturaliter indissolubile dicatur, sufficit ut in rerum natura nulla vis sit, quae possit illud dirimere, quamvis naturae Auctor id possit; quemadmodum et alia plura iuxta naturae legem fieri nequeunt, quae tamen Deo ipso permittente et volente fieri possunt. Atque ut alio etiam exemplo utamur, anima hominis naturaliter incorruptibilis et immortalis dicitur et est, quia nulla est intrinseca corruptionis causa, nullaque vis naturae quae eam possit destruere, licet per se Auctor naturae id facere posset: ex eo autem quod Deus, indito naturali immortalitatis et felicitatis appetitu, ostenderit se id numquam facturum quod absolute loquendo facere potuisset, non sequitur animam non esse intrinsecus et naturaliter incorruptibilem, adeoque eius immortalitatem a sola Dei voluntate positiva pendere; sed solum sequitur, animam quae natura sua immortalis est et incorruptibilis, numquam destructum iri neque ab eo qui est extra ac supra naturam omnem. Simili ratione matrimonium est naturaliter indissolubile, quia nulla est intrinseca dissolutionis causa, imo nulla vis naturae, quae illud solvere possit, licet id fieri possit ab extrinseco, scilicet ab Auctore naturae. Ex eo autem quod Deus stauerit illud non solvere, nullatenus dici debet omnem indissolubilitatem ex ea positiva voluntate pendere, sed solum intrinsecae ac naturali extrinsecam etiam rationem firmitatis accessisse.

Hinc 3. iure optimo dici potest matrimonium christianum, quatenus est sacramentum, ac perfectius exhibet unionem Christi cum ecclesia, maiorem firmitatem habere, ac pressius esse insolubile, quam sit suapte natura; ex ratione enim sacramenti et signi extrinseca firmitas repe-

tendâ est. Cumque ea significatio indita sit matrimonio fidelium, eo ipso quod baptismum susceperunt, et membra sunt Christi, inde fit, ut matrimonium etiam in infidelitate contractum post coniugum conversionem sine novo consensu extrinsecam pariter hanc firmitatem acquirat.

Quod si 4. penitius etiam maioris huiusce firmitatis ratio quaeratur, res ita exponi potest, ut ratio sacramenti et significatio coniunctionis Christi cum ecclesia non sit proprie indissolubilitatis causa, sed potius signum a posteriori, quo intelligimus, suscepto baptismo, iam locum non habere eum casum, in quo supremus rerum Dominus disposuit matrimonium infidelium dissolvi in favorem baptismi, quando alter convertitur et alter pacifice cohabitare renuit. Sic etiam quum matrimonium fidelium consummatum est, cessat etiam alter casus ex his in quibus Christus disposuit, ut coniugium dissolveretur, nempe in favorem status religiosi. Haec porro maior indissolubilitas extrinseca est, neque aliunde tandem pendet quam a Christi voluntate. Licet enim matrimonium consummatum perfectius exhibeat coniunctionem Christi cum ecclesia, quam matrimonium tantum ratum, tamen si Christus voluisset, potuisset certe statuere, ut matrimonium etiam consummatum fidelium dissolveretur in favorem religionis, non obstante ratione sacramenti et signi perfecti, prout ea non obstante matrimonium fidelium non consummatum dissolvitur. Ea igitur sacramentalis significatio et ratio ipsa sacramenti non efficit per se indissolubilitatem, sed potius signum est a posteriori quo colligimus extrinsecam dissolubilitatem omnino cessasse.

Hac ratione 5. exponi possunt de extrinseca firmitate tum sancti Augustini, tum Eugenii IV. testimonia, tum alia patrum et conciliorum effata, quibus et matrimonium per se indissolubile dicitur, et simul maxime indissolubile asseritur, quia est sacramentum.

Tandem si haec probentur, prout probari posse videntur, diversae theologorum sententiae haud aegre concilian- tur. In hac enim doctrina quam exposuimus tum lex naturae, tum lex positiva, tum ratio sacramenti ad indissolubilitatem christiani matrimonii comprobendam mire conspirant; scilicet non *exclusive* ex uno aut alio capite, sed simul ab omnibus perfecta indissolubilitas deducitur, atque ex quavis sententia illud, quod verum est, seligi- tur, simulque componitur; atque adeo conciliari possunt, qui indissolubilitatem repetunt ex iure naturae, cuiusmodi sunt Lyra, Abulensis, Sotus, Lopez aliique apud Sanchez (116) cum iis qui eam deducunt ex iure positivo, uti Guillelmus Rubiva, Richardus, Iac. Almainus, Deca hispalensis, Iac. Latomus aliique apud Pontium (117); et cum his utrisque ii qui insistent rationi sacramenti, cuiusmodi sunt Bellarminus, Burgensis, Durandus, s. Antoninus, Caietanus, Medina aliique quos Sanchez allegat et sequitur (118). Sed insuper hac ratione inter se com- poni et perfici possunt non modo ea, quae de origine indissolubilitatis diversi auctores disserunt, sed etiam quae iidem diversis in locis docuerunt, atque ea quae nos ipsi de hac quaestione sive in praelectionibus, sive in hoc ipso tractatu exposuimus.

CAPUT II.

DE BIBLIORUM DOCTRINA CIRCA CHRISTIANI MATRIMONII INDISSOLUBILITATEM ETIAM IN CAUSA ADULTERII.

Doctrina est catholica christianum matrimonium in ipsa causa adulterii esse quoad vinculum indissolubile. Prima fronte huic doctrinae obstare videntur verba Matth. V. « Qui

(116) *De matrim.* lib. II. disp. 13. n. 4. seq.

(117) *De matrim.* lib. 7. c. 12. n. 4.

(118) Loc. cit.

dimiserit uxorem suam, *excepta fornicationis causa*, facit eam moechari; » et XIX. « Quicumque dimiserit uxorem suam, *nisi ob fornicationem*, et aliam duxerit, moechatur. » At dogmatica horum textuum interpretatio haec est, per fornicationem seu per adulterium, divortium quidem fieri posse quoad torum et habitationem, sed vinculum ipsum nullatenus dissolvi; seu dimitti posse uxorem ita ut fas non sit aliam ducere, adultera vivente.

Si liberiores quosdam criticos, etiam catholicos audiamus, difficultas quam ecclesiae doctrinae facessere videntur ea verba *excepta fornicationis causa*, et *nisi ob fornicationem* obtruncari posset, negata vel in dubium revocata eorum verborum authentia. Ea etiam ut par est admissa, quidam catholici interpretes dum ecclesiae doctrinam defendunt, quasdam proponunt eorum verborum exegeticas interpretationes, quae ita doctrinam ecclesiae de omnimoda christiani matrimonii indissolubilitate tueri videntur, ut difficultatem quae ex iis verbis petitur omnino praecedant: at eae nobis neque ad difficultatem solvendam necessariae, neque utiles videntur, neque, quod caput est, ad veritatis normam exactae.

Antequam igitur dogmaticam ecclesiae interpretationem contra protestantes et graecos vindicemus, criticas et exegeticas quaestiones cum catholicis breviter absolvemus; tum doctrinam ecclesiae de indissolubilitate coniugii etiam in causa adulterii ostendemus, primum ex Bibliis, dein ex sensu traditionis universae; postremo ecclesiae latinae et graecae hac de re doctrinam et praxim expendemus.

ARTICULUS I.

De authentia ac genuina lectione textuum Matth. V. et XIX.

Ab ipso controversiae initio utrumque Matthaei textum integrum praemittimus. Matth. V. 31. 32. legitur: « Dictum

est autem: Quicumque dimiserit uxorem suam, det ei libellum repudii. Ego autem dico vobis: Quia omnis, qui dimiserit uxorem suam, excepta fornicationis causa, facit eam moechari: et qui dimissam duxerit, adulterat» cap. vero XIX. 3. seqq. dicitur: « Et accesserunt ad eum (Iesum) pharisaei tentantes eum, et dicentes: si licet homini dimittere uxorem suam, quacumque ex causa? Qui respondens, ait eis: non legistis, quia qui fecit hominem ab initio, masculum et foeminam fecit eos? et dixit: propter hoc dimittet homo patrem et matrem, et adhaerebit uxori suae, et erunt duo in carne una. Itaque iam non sunt duo, sed una caro. Quod ergo Deus coniunxit, homo non separet. Dicunt illi: Quid ergo Moyses mandavit dare libellum repudii et dimittere? Ait illis: quoniam Moyses ad duritiam cordis vestri permisit vobis dimittere uxores vestras: ab initio autem non fuit sic. Dico autem vobis, quia quicumque dimiserit uxorem suam, nisi ob fornicationem, et aliam duxerit, moechatur, et qui dimissam duxerit, moechatur.» His parallela sunt quae leguntur Marci X. et Luc. XVI. quae inferius dabimus atque inter ea collationem instituemus.

Ut itaque a quaestione de genuinitate ac integritate istorum textuum Matthaei ordiamur, nonnulli hypercritici aetate hac nostra primum in dubium revocarunt, quae occurrunt Matth. V. 31. 32. Alii vero quae habentur XIX. 9. Nam quod attinet ad priorem textum Franc. Ant. Jäger autumavit clausulam: *παρεκτὸς λόγου πορνείας*, *excepta fornicationis causa* in genuinis evangelii codicibus defuisse. His porro argumentis innititur ad eiusmodi placitum statuendum 1. quod primorum temporum christianis numquam in mentem venerit temporaneam, seu quoad totum, ob adulterium matrimonii solutionem hoc textu firmare, sed constanter ad apostoli Pauli effata provocaverint; 2. quod Tertullianus referens Marcionis obiectionem

ex eo petitam, quod Christus se praebuerit Moysi contrarium, illam clausulam omnino praetermiserit *excepta fornicationis causa*; ait enim Marcion: « Sed Christus divortium prohibet dicens: *Qui dimiserit uxorem suam, et aliam duxerit, adulterium committit, qui dimissam a viro duxerit, aequè adulter est.* Moyses viro permittit repudium etc. (1).» Argumento igitur est, nondum aetate illa allegata verba in Matthaei evangelio genuino extitisse; 3. verisimile proinde est, serius verba illa ex cap. XIX. 9. Matthaei in cap. V. 32. illata fuisse, et e scriptis patrum, qui de separatione coniugum in causa fornicationis egerunt, in codices evangeliorum irrepsisse. 4. Ex historia primorum temporum optime explicatur confirmaturque huius interpolationis origo. Siquidem primi iudaei ad religionem christianam conversi, cum antea e lege Mosis divortia in casu fornicationis permissa fuerint, morem hunc ac permissionem in nova etiam lege, argumento ab apostolo Paulo separationem admittente petito, conservandam esse iudicaverunt, atque ex Clemente alexandrino *exceptionem in causa adulterii*, in loca evangelii Matth. V. et XIX. intulerunt, ut sic ex ipsis Iesu effatis probarent dimissionem uxorum in casu fornicationis licitam esse (2).

Quod vero attinet ad locum Matth. XIX. 9. sunt qui existiment, integrum hoc comma spurium esse; alii vero censent tantummodo fuisse interpolatum. Inter eos qui aliena manu inserta arbitrantur ea verba, quae ad fornicationem referuntur, eminet Leonardus Hug olim professor Friburgensis in Bisgovia. His porro argumentis movetur: 1. plures sunt variantes lectiones, quae in hoc versiculo in antiquis codicibus passim occurrunt (3). 2. Supersunt

(1) Lib. IV. *Cont. Marcion.* c. 34. ed. Rigalt.

(2) Ita läger in op. germ. *Investigatio in quaestionem, utrum divortium iuxta doctrinam scripturae et antiquissimam historiam ecclesiasticam irritum sit nec ne.* Arnstadt et Rudolstadt 1804.

(3) Scribit enim in cit. *Commentat. exegetica de coniugii Christ. vinculo*

in lucubrationibus veterum indicia haudquaquam obscura, exemplaria Matthaei omni quondam conditione caruisse (4). 3. Ptolemaeus scholae valentinianae alumnus saec. II. in sua ad Floram epistola, cuius magnam partem conservavit Epiphanius, impugnat antitheses Cerdonis sive Marcionis asserentium, alium Deum novi, alium veteris testamenti auctorem esse, cum utriusque foederis praecepta sibi contraria ex eadem divina mente prodiisse impossibile sit: sic mosaicum Deum divortia concessisse, prohibuisse Salvatorem. Adversus quae Ptolemaeus disserens, profert locum Matthaei XIX. 9. absque conditione, seu absque illis verbis, quae favent divortio (5). 4. Tertullianus lib. IV. advers. Marcionem ex Matth. XIX. quasi nec vola vel vestigium concessionis in hac pericope extiterit, diversitatem

insolubili Friburg. 1816. part. I. pag. 4. «Omnes fere Constant. et cum his aegyptiorum libri nonnulli Matth. XIX. 9. lectionem exhibent: ἀπολύση τὴν γυναῖκα αὐτοῦ μὴ ἐπὶ πορνείᾳ. Hanc sententiam aliqui particula conditionali εἰ exornarunt, εἰ μὴ ἐπὶ πορνείᾳ quorum calculum difficulter inire possis.» Deinde commemorat recensiones Millii, Wetstenii, Bengelii, Frid. Matthaei atque Griesbachii.

(4) Nempe particula εἰ, si, quam textui adiectam ipse autumat.

(5) Textus Ptolemaei prout ab Hugio adducitur ex s. Epiphanio *Haeres. XXXIII.* n. 3. in Grabii *Spicilegio ss. Patrum ut et haeret.* saec. I. II. et III. tom. I. saec. II. Oxon. 1700. p. 72. 73. ita se habet: «Quaedam in lege ad Deum ipsum eiusque sanctionem pertinent; alia autem Mosi tribuenda sunt, haudquaquam suggerente Deo, sed quatenus ex impulsu mentis proprio nonnulla constituit. . . . Quod quemadmodum sese habeat ex ipsis Salvatoris verbis demonstratum intelliges. Quodam enim in loco Salvator ad eos verba faciens, qui secum disputabant de libello repudii, quod a lege permissum erat, sic eos allocutus est: Moses ad duritiam cordis vestri permisit vobis dimittere uxores vestras. Ab initio autem non fuit sic. Deus enim, ait: coniugium hoc copulavit: et quod Deus coniunxit homo non separet. Dilucet exinde aliam Dei legem esse prohibentem separari a muliere; aliam vero Mosis concedentem separari propter duritiam. Sane haec Deo contraria Moses ordinavit; siquidem contrarium est eius non separari. Sed si Mosis mentem in ferenda lege consideremus, inveniemus cum non id sponte sua, sed necessitate fecisse . . . ne ea occasione in maiora scelera et perniciem propriam ruerent . . . Hoc in ea re consilium eius fuit, ad cuius ductum manifeste et citra controversiam ista contra Dei legem constituit.» Ast eiusmodi tractus neque convenit cum eo qui habetur apud Grabium, ut paulo post videbimus, neque cum eo qui habetur apud s. Epiphanium edit. Petav. tom. I. pag. 216. ac refertur etiam in append. ad quinque Irenaei libros edit. Massueti.

legis et evangelii inficiatur. Concessionem igitur divortii in suo exemplari non habuit Tertullianus. Post quae concludit Hug. «Sufficiunt hae rationes, ut exceptionem cap. XIX. positam tamquam additamentum reiiciamus, quod posterior manus invexit.» Qua vero ratione eiusmodi additamentum irrepere potuerit exponens ait: «Lectorum forte quisquam, cum in hunc Matthaei locum incidisset, videretque conditionem in oratione Domini adiituali cap. V. 32. lectam hic abesse, miratus quid rei subsit, aut quae huius diversitatis ratio reddi possit, notationem pro consuetudine veterum adposuit ad marginem libri, ut locum insigniret peculiari attentione dignum. Haec coniecta in marginem observatio, cum illis qui postea eo libro usi sunt, emendationis causa adscripta, et voces in contextu omissas exhibere videretur, pluribus pedetentim addita, et tandem cum nova exemplaria conficerentur, a librariis in media verba Domini illata est (6).»

Alii ulterius progressi contendunt colloquium Christi cum pharisaeis apud Matth. XIX. desiisse illis verbis: *Quod ergo Deus coniunxit homo non separet*, nempe in v. 6. inclusive; adeoque vv. 7. 8. et 9. supposititios esse, ac primo in evangelia quibus nazaraei ebionitae et cerinthiani utebantur irrepsisse. Paulusius Heidelbergensis suspicatus est verba saltem quae prostant v. 9. *καὶ ὁ ἀπολελυμένην γαμήσας μοιχᾶται*, et qui dimissam duxerit *moechatur* serius textui fuisse inserta, eo quod in plerisque codicibus desiderentur; pro verbis autem *μὴ ἐπὶ πορνείᾳ* (prout ipse legebat) verba *παρεκτὸς λόγου πορνείας* fuisse substituta (7).

Alii etiam verba Matth. V. 32. et XIX. 9. *Et qui dimissam duxerit, adulterat* interpolata fuisse crediderunt, inter quos Gregorius Mayer, qui censuit verba citata e co-

(6) In op. cit. §. 2. pag. 8. et 9.

(7) Apud Roskovány op. cit. §. 78. p. 129.

dicibus tam graecis quam latinis olim abfuisse, nec Augustinum, nec Chrysostomum, nec Basilium eadem legisse; in codice quoque cantabrigiensi locum hunc desiderari (8). Paulusius item eadem verba ideo potissimum uti non authentica reiecit, quia olim iam Clemens alex. et Origenes illa varie reddiderunt (9).

Alii autem particulam *εἰ* si excludendam censent ex verbis Christi v. 9. citati cap. XIX. quia omnes fere constantinopol. codices, nonnullique aegyptiorum libri sic lectionem exhibent: ἀπολύση τὴν γυναῖκα αὐτοῦ μὴ ἐπὶ πορνείᾳ dimiserit uxorem suam CUM NON SIT ADULTERA (ut explicat Kuinoelius). Cumque a plerisque codicibus *εἰ* absit, fortasse illatum censent a grammaticis fuisse, quoniam in loco parallelo legitur: παρεκτὸς λόγου πορνείας, *excepta fornicationis causa* Matth. V. 32., quae ipsa etiam verba in pluribus codicibus e loco mutato a grammaticis adscripta sunt (10). Hanc proinde sententiam aliqui particula hac conditionali exornarunt. Haec porro lectio observata fuisse videtur Clementi alex. qui Christi verba ex utraque Matthaei sententia conflata memoriae lapsu adducit lib. II. *Strom.* Οὐκ ἀπολύσεις γυναῖκα, πλὴν εἰ μὴ ἐπὶ λόγῳ πορνείας non dimittes uxorem praeterquam propter fornicationem (11). Alii praeterea codices, inter quos eminent vaticanus omnium antiquissimus et cantabrigiensis, graeci deinde illi quos recensuit Griesbachius; superioris insuper et inferioris Aegypti versiones, nec non latinae ante Hieronymum expriment *ἀπολύση τὴν γυναῖκα αὐτοῦ παρεκτὸς λόγου πορνείας, dimiserit uxorem suam*

(8) *Specimen animadversionum in graecum Matthaei textum eruditorum examini propositum.* Nuringbergae 1786. pag. 231.

(9) *Commentarii philologico-critici in novum testam.* Part. II. ed. sec. Lipsiae 1812. pag. 794. Quem non pauci alii sequuti sunt apud Roskovány op. cit. 129 seqq.

(10) Ita Kuinoel *Comment. in lib. novi test. historicos* ad Matth. XIX. 7-9.

(11) Ed. Paris. 1641. pag. 424. et in ed. Potter Oxoniens. anglicani episcopi Oxonii 1715. opp. tom. I. pag. 506.

excepta fornicatione. Locum igitur insigniter laesum ex hisce manifestum est.

Denique alii contendunt non Iesum ipsum Matth. V. 32. exceptionem *fornicationis* pronuntiasse, sed tantum evangelistam ex loco parallelo XIX. 9. ubi Iesus reipsa eam adhibuerat, adiecissee (12).

Ita quidem hodierni critici. Verum non est, quod istis permoveamur. Siquidem nonnisi levibus ut plurimum coniecturis innituntur, quemadmodum ex iis quae dicturi sumus palam fiet.

Etenim ut Iägeri primum argumenta excutiamus, ipse non evincit verba: *excepta fornicationis causa* e genuinis evangeliiis abfuisse, eo quod veteres solum uterentur, ut ille ait, verbis Apostoli I. Cor. VII. 10. 11. «Qui matrimonio iuncti sunt, praecipio non ego, sed Dominus uxorem a viro non discedere, quod si discesserit, manere innuptam, aut viro suo reconciliari, et vir uxorem non dimittat,» ad persuadendam temporaneam ob adulterium solutionem. Siquidem verbis evangelicis usus est iam sec. III. ineunte aut secundo exeunte Theophilus antiochenus: «Et qui ducit, inquit (Christus), *dimissam a viro moechatur*, et qui dimittit uxorem *excepta fornicationis causa*, facit eam moechari (13);» nec non Iustinus, qui pariter adducit quae habentur tum Matth. V. 32. tum XIX. 9. «Qui ducit repudiatam ab altero viro moechatur (14).» Item iis usus est Clemens alexandr. cuius modo verba attulimus; insuper Origenes, qui Christi effatum ex Matth. V. 32. «Omnis qui dimiserit uxorem suam, *excepta fornicationis causa*, fa-

(12) Uti Tholuck in *Expositione philologico-theologica orationis montanae* Hamburg. 1833. pag. 235-275. aliique apud Roskovány op. cit. pag. 108-seqq.

(13) Καὶ ὁ γαμῶν, φησὶν, ἀπολελυμένην ἀπὸ ἀνδρὸς, μοιχεύει καὶ ὃς ἀπολύει γυναῖκα, παρεκτός λόγου πορνείας, ποιεῖ αὐτὴν μοιχευθῆναι. Lib. III. ad Autol. cap. XIII. ed. Galland. tom. II. pag. 128.

(14) Apolog. I. n. 15. Ὁς γαμῶν, ἀπολελυμένην ἀφ' ἑτέρου ἀνδρὸς μοιχεύεται. Ed. Maur. p. 52.

cit eam moechari, profert in commentario in Matthaeum (15); atque ex Matth. XIX. 9. (16). Sic etiam Tertullianus ita effert Salvatoris nostri verba ex Matth. V. 32. « Qui dimiserit uxorem suam praeter causam adulterii, facit eam adulterari; aequè adulter censetur et ille, qui dimissam a viro duxerit (17). »

Ex his non solum habemus veteres, eosque antiquissimos Christi verba cum adiecta clausula *excepta fornicationis causa* attulisse, adeoque uti genuina eiusmodi verba habenda esse, verum etiam habemus alteram difficultatem ex Marcionis allegatione apud Tertullianum petitam plane solutam. Etenim ut patet ex adductis Tertulliani verbis, habemus ab eo expresse agnitam eam clausulam fuisse, quae a Christo apposita est. Quod si Marcion eam omisit, ratio est, quia is unum admittebat Lucae evangelium, illudque *decurtatum*, seu interpolatum, ut ipsum rei suae accommodaret; porro in evangelio Lucae eiusmodi clausula non habetur; et ex Luca protulit testimonium Marcion in obiecto loco, ut Christum Moysi adversantem traduceret.

Ad id quod tertio loco subdit Iäger dicimus, non esse nisi meram coniecturam, quae ex adductis patrum antiquissimorum testimoniis plane evertitur. Nam patres promiscue et ex cap. V. et ex cap. XIX. Matthaei verba promunt, nullaque est ratio quare dici queat ex cap. XIX. in caput V. clausulam de qua agimus translata fuisse; praesertim cum sit contra fidem codicum, qui constanter utrobique eam exhibent (18).

(15) Tom. XIV. n. 24. ed. Maur. p. 647. *Εὶ ἀπολύσει τὴν γυναῖκα αὐτοῦ παρεκτός λόγου πορνείας, ποιεῖ αὐτὴν μοιχευθῆναι.* Et iterum p. 648.

(16) Ibid.

(17) Lib. IV. *cont. Marcion.* c. XXXIV. ed. Paris. 1616. pag. 727. et iterum in lib. *De pudicitia* ibid. pag. 1109.

(18) Sane Wetstenius in critica sua recensione *Novi testamenti graeci* Amstelod. 1751. utrumque locum una cum adiecta clausula retinuit. Id ipsum fecit Griesbachius ed. III. Berolin. 1822. ex cura D. Scholz; nisi quod in textu Matth. XIX. 9. omittit particulam *εἰ* de qua postea.

Temeritatem sapit quod quarto loco absque ullo fundamento scientifico, sed ex mera coniectura et divinatione ipse adiecit, quasi nempe illi iudaeo-christiani potuerint insigni uti fraude ut persuaderent a Christo Domino permissum fuisse divortium in causa adulterii, prout in veteri lege indultum fuerat a Moyse. Haec enim non modo incredibilia, sed prorsus absurda esse deprehenduntur. Evangelii exemplaria omnium terebantur manibus; quomodo igitur potuissent isti ex iudaismo ad religionem christianam conversi ex scriptis Clementis alexandrini exceptionem in causa adulterii in illa evangelica loca transferre? Eo vel magis quod scriptores Clementi coevi ac suppres illam attulerint tamquam ex evangelio Matthaei depromptam, ut constat ex allatis documentis Iustini, Theophili antiocheni ac Tertulliani? Accedit, quod Origenes Clementis discipulus ac successor in schola alexandrina aperte neget a Moyse per *foeditatem* fuisse significatum id quod Christus per *fornicationis causam* expressit (19). Quod certe non fecisset, si ea verba recenti adeo interpolatione nuper inducta fuissent iuxta adversarii nostri somnium.

Iam expendendum est utrum feliciter Hug pugnaverit, dum uti ab aliena manu insertam totam pericopen Matth. XIX. 9. fuisse contendit. Profecto id primo non evincit varietas lectionum, quae in hoc commate reperitur. Siquidem tanta ea non est, prout fingit doctus hic et eru-

(19) En verba Origenis ex cit. tom. XIV. in Matth. n. 24. « Dicit fortasse iudaicus quispiam vir, ex iis qui Hospitatoris nostri doctrinae refragari audent, Iesum ipsum cum dixit: *Omnia qui dimiserit uxorem suam, excepta fornicationis causa, facit eam moechari*, repudiandae uxoris potestatem fecisse haud secus ac Moysen, quem pro duritia cordis populi legem tulisse dixit: et illud: *qui foeditatem in ea invenit*, idem esse docet ac fornicationis causam, propter quam iure mulier a viro repudiari possit. Verum huic respondendum est, etiamsi eo legis mandato, mulier adulterii rea lapidibus necanda sit, non ita foeditatem esse intelligendam, nec enim propter adulterium, vel similem aliquam turpitudinem libellus repudii scribendus est, et coniugi in manus tradendus, sed quodlibet forsitan peccatum, foeditatem nuncupasse Moysen etc. »

ditus professor, ut planum fit ex duabus memoratis recensionibus Wetstenii et Griesbachii in hunc locum (20). Accedit quod si hac ratione fas esset uti aliena manu inserta reiicere loca omnia, quae variantes lectiones habent, vix nobis aliquid permaneret ex sacris Bibliis, cum nullus fere locus sit, qui variantibus careat lectionibus, praesertim in Novo Testamento, ut percurrendo omnes editiones criticas graeci textus, quisque facile sibi persuadebit.

Esto interdum penes veteres reperiri quamdam in allegatione duorum istorum textuum diversitatem, prout secundo loco obiicit Hug; eiusmodi tamen varietas nullum praebet sive clarum sive obscurum indicium de intrusa conditione *excepta fornicationis causa*, vel *nisi ob fornicationem*, cum multiplex ratio dari possit eiusmodi diversitatis in horum textuum allegatione; videlicet id contingere potuit ob eorum similitudinem, qua factum est, ut alter pro altero allegaretur, cuius exempla occurrunt apud Origenem, qui ut adnotavit Griesbachius, ter commati Matth. XIX. 9. substituit Matth. V. 32. Idem praestitit Tertullianus lib. IV. contr. Marcionem c. XXXIV. (21). Ceterum nullum dubium est patres in suis exemplaribus in utroque Matthaei textu illam clausulam, et quidem constanter legisse, cum exinde, ut videbimus, orta sit vetus controversia de perfecta sive imperfecta coniugii dissolutione propter fornicationem, sive adulterium. Haec enim controversia nullum locum habere potuisset, dempto hoc commate, quod apud solum s. Matthaeum occurrit.

Quod tertio loco obiicit Hug ex epistola a Ptolemaeo Valentini sectatore ad sororem suam Floram scripta, ad rem non facit. Nam Ptolemaeus non sibi proposuit, ut in pro-

(20) Griesbachius inter codices qui exhibent hunc versiculum cum clausula *παρεκτός λόγου πορνείας*, memorat vaticanum omnium antiquissimum et cantabrigiensem seu alexandrinum. Possem alias recensiones criticas afferre Millii, Gregorii cantabrigiensis, Tittmanni, aliorumque magno numero, si opus esset.

(21) In nota *n* quam apposuit ad Matth. XIX. 9.

posita difficultate asseritur, ostendere adversus Marcionem aut Cerdonem alium non esse Deum auctorem veteris, alium Novi Testamenti, sed potius trifariam dividenda esse, quae in Pentateucho continentur, ita ut alia a Deo fuerint constituta, alia a Mose ut privato auctore, seu ut ipse loquitur, *per se ac suapte sponte aliquid constituyente*, alia a senioribus. Quod ut evincat exemplum profert ex libello repudii a Mose concesso scribens: «Quod quemadmodum sese habeat, ex ipsis Salvatoris verbis demonstratum mox intelliges. Hic enim quodam in loco ad eos verba faciens, qui de repudii libello secum disputabant, quod permissione legis licebat, sic illos allocutus est: *Moses ad duritiam cordis vestri permisit vobis dimittere uxores vestras. Ab initio autem non fuit sic. Deus enim, inquit, coniugium hoc copulavit: et quod Deus coniunxit, homo non separet.* Ubi aliam esse Dei legem ostendit, quae uxorem a viro seiungi prohibeat, aliam Mosis, qui ob duritiam cordis par illud dissociari permittat. In quo Moses quiddam Deo contrarium tulit, ei scilicet cautioni, qua dissolvi matrimonia vetuerat (22).» Cum igitur alius omnino scopus Ptolemaeo fuerit ab eo quem adversarius ei affingit, non erat ratio quare conditionem illam apponeret.

Tertullianus in lib. IV. contr. Marcionem non allegat cap. XIX. s. Matthaei, sed caput V. 32. et affert, ut vidimus, exceptionem. Adeoque dici nequit illum in vers. 9. capitis XIX. exceptionem de qua agimus non legisse. Quod vero citet caput V. 32. potius quam caput XIX. patet ex ratione, qua affert verba Christi, dicens: «Nam et in evangelio Matthaei: *Qui dimiserit, inquit, uxorem suam praeter causam adulterii, facit eam adulterari: atque adulter censetur et ille, qui dimissam a viro duxerit.* Ceterum praeter ex causa adulterii nec Creator disiungit, quod ipse

(22) In *Spicilegio ss. Patrum* I. E. Grabii Oxon. 1714. saec. II. tom. 1. pag. 72.

scilicet coniunxit (23).» In capite enim XIX. 9. habetur: *nisi ob fornicationem*, omissa voce *causa* quae occurrit Matth. V. 32. quamque heic bis repetit Tertullianus:

Cum igitur falsae sint praemissae ab Hug excogitatae, concidit conclusio, quam ipse ex illis intulit, nempe exceptionem, quae occurrit Matth. XIX. 9. spectandam esse veluti additamentum quod aliena manus invexerit.

Ratio verò, quae adducitur ab erudito auctore ut suadeat quomodo eiusmodi additamentum fieri potuerit, mera coniectura est probabili quovis fundamento destituta. Hinc vel ipse Kuinoel de hac professoris Hug coniectura scribit: « Verba quae Matth. XIX. 9. leguntur *εἰ μὴ ἐπὶ πορνείας* (*nisi ob fornicationem*) contra codicum fidem a grammaticis adscripta et a librariis male sedulis in ordinem translata putat (24). »

Nunc iam de interpolatione multiplici, quam alii critici biblici his in textibus deprehendere visi sunt, aliquid adiiendum superest.

Ac 1. Christi colloquium cum pharisaeis absolutum fuisse verbis illis: *Quod Deus coniunxit, homo non separet*, adeoque tamquam assutos abiiciendos esse vv. 7. 8. ac 9. nemini umquam persuadebunt neoterici isti, quum penes antiquos omnes, qui hoc de argumento egerunt, reperiantur, quae his versiculis continentur. Specimen dedimus in paulo ante adductis locis ex Theophilo antiocheno, Iustino, Clemente alex., Origene, Tertulliano. His addimus versiones omnes antiquissimas, cuiusmodi sunt versio latina et quidem antiquior recensione hieronymiana (25),

(23) Loc. cit. c. XXXIV. ubi Pamelius nota 542. ostendit verba quae hoc loco adduxit Tertullianus, desumpta fuisse ex cap. V. v. 32. s. Matthaei.

(24) *Comment. in lib. hist. N. T. ad v. 32. cap. V. Matth.* Et sane in editionibus criticis Wetstenii, Griesbachii et Tittmanni saltem *μὴ ἐπὶ πορνείας* ex fide codicum critic. retinentur.

(25) Cf. apud Sabathier *Bibl. sac. versiones latinae antiquae, seu vetus itala*: Remis 1743. tom. III. part. III. De hac ipsa versione antiquiore certe s. Irenaeo cf. Lachmannum in praefat. suae recensionis.

syriaca, arabica, aethiopica, persica, quae ad unam omnes eiusmodi versiculos exhibent (26). Quibus si addantur codices omnes melioris notae, quibus editiones seu versiones criticae adornatae sunt Novi Testamenti, profecto plena demonstratio de horum versiculorum authenticia exurget (27). Fuisse vero primo in evangelia quibus ebionitae, nazaraei ac cerinthiani utebantur insertos hos versiculos, ex quibus postea irrepserint in evangelium Matthaei, fabula est, nec ullo documento suffulta. Quum iamdiu eiusmodi evangelia perierint, qui hoc fingunt, divinare satagunt (28).

2. Nec magis firmum est quod Paulusius aliique autumant, verba: *Et qui dimissam duxerit, adulterat* inserta fuisse. Quamvis enim fateamur penes aliquot patres verba haec non reperiri (29), aut etiam in nonnullis codicibus desiderari, non inde tamen confici potest, ea utpote interpolata esse reiicienda. Obstant siquidem quominus id admittamus argumenta omnia quibus genuinitatem trium versiculorum vindicavimus, quae etiam pugnant pro versiculi noni integritate. Sane cernimus clausulam hanc apud alios vetustissimos patres reperiri, nominatim vero apud Theophilum antiochenum, Iustinum M., Tertullianum, quorum testimonia attulimus; tum etiam apud Clementem alex., qui ait expresse: *Qui autem dimissam ac-*

(26) Cf. in Polyglottis Waltonianis.

(27) Cf. Millii *Prolegomenon in N. T.* part. III. nec non Christ. Matth. Ifassii *Dissert. crit. de genuinis librorum N. T. lectionibus.* Amstelodami 1709.

(28) Cf. I. A. Fabricii *Codex apocryphus N. T.* Amburgi 1703. tom. 1. pag. 335. *Notitia et fragmenta evangeliorum (XL. fere) apocryphorum.*

(29) Cf. Sabathier loc. cit. ubi recenset sex codices in quibus comma hoc recitetur s. Germ. 1. Corb. 1. Corb. 2. Claram. Cantabrig. s. Gall. et Mai. Mont. s. Germ. 2. S. vero Augustinus ibid. bis allegat hunc textum sic: *Et si aliam duxerit, moechatur, vel si alteram duxerit, adulterium committit.* Cf. etiam Recensionem N. T. Lachmanni, Berolini 1842. tum in textu graeco quem ipse vulgavit, tum inversione latina antehieronymiana haec clausula constanter reperitur. Cf. etiam variantes lectiones quas ipse profert in hunc loc.

cipit uxorem, moechatur inquit (Christus) (30). » Quoad sensum vero eandem sententiam profert Origenes dum ait: « Quomodo autem adultera est uxor, etiamsi viro alteri nupta videatur, priore etiamnum vivo; ita et virum repudiatam duxisse visum, non tam ipsius maritum, quam adulterum esse dicendum a Servatore nostro demonstratum est (31). »

Sic etiam fatemur interdum pro *εἰ μὴ ἐπὶ πορνείας* a nonnullis veteribus dici: *παρεκτός λόγου πορνείας*. Verum id effecit utriusque textus Matth. V. 32. et XIX. 9. similitudo et identitas argumenti. Ceterum criticorum est sua cuique textui verba vindicare et collatione codicum et versionum antiquarum, testimoniisque veterum (32).

3. Etiamsi admitteretur particulam conditionalem *εἰ* si fuisse adiectam, nihil tamen quoad sensum amitteretur, cum integer subsistat, sive illa particula admittatur sive reiiciatur. Eodem nimirum res recidit. Porro ex eo quod in pluribus codicibus haec particula desit, recentiores critici protestantes in suis recensionibus plerumque eam expungunt, ut Griesbachius, et Tittmann. Alii autem eam retinent, uti Wetstenius, Io. Gregorius, Millius (33). Rursum a veteribus identidem cum conditionali legitur, ut apud Clementem alex. aliosque passim, ab aliis vero praetermittitur. Quae cum ita sint, cum in possessione sit vulgata editio, retineri ea omnino debet, nec quidpiam temere innovandum.

(30) Loc. cit. ed. Oxon. Potteri 1705. pag. 506. Ὁ δὲ ἀπολελυμένην λαμβάνων γυναικα, μοχᾶται, φησίν. Non video post haec, quomodo cl. Roskovány contentus fuerit asserere solum quoad sensum haec verba a Clemente exhiberi.

(31) In Matth. tom. XIV. n. 24. ed. cit. tom. III. p. 649. Aduotat autem Griesbachius verba haec propter ὁμοιοτέλευτον a librariis in multis libris omissa esse.

(32) Id. enim in non paucis textibus a sanis criticis praestitum est.

(33) Cf. iterum Lachmannum in cap. XIX. 9. Matth. in cuius textu gr. legitur: *παρεκτός λόγου πορνείας*, quae translata huc sunt ex cap. V. 32. In variantibus autem interdum habetur *μὴ* interdum *εἰ μὴ* et in versione veteri latina legitur: *Nisi ob fornicationem*.

Quod demum adiicitur ab Evangelista, non autem a Christo appositam fuisse *fornicationis* exceptionem, refellitur ex ipsa orationis serie, et ab unanimi veterum ac recentiorum interpretum consensu; quin opus sit pluribus gratuitam eiusmodi assertionem persequi.

Hinc etiam immerito Pottus et Eichornius autumarunt quae Matth. V. 32. leguntur, a Christo dicta esse alio tempore, cum nimirum ei quaestionem captiosam proposuissent pharisaei, coll. Matth. XIX. 3. seqq., Matthaeum vero propter argumenti similitudinem praeceptis ante datis ea huic loco adiunxisse. His calculum suum adiecit Kunoel. Quasi nempe Christus bis eadem de re disserere nequiverit; imo non desunt qui arbitrentur pharisaeos occasionem captasse proponendi illam quaestionem Matth. XIX. ex iis, quae in miro illo sermone in monte Christus expresse protulerat (34).

Et haec de authentia et integritate horum textuum adversus liberiores auctores dicta sufficiant. Quae enim hactenus disseruimus tum ex critices, tum ex hermeneuticae fontibus palam faciunt textus illos, ut prostant, utroque in loco omnino retinendos esse, nec immutari ullo modo debere aut posse ob nonnullas difficultates, quae si quidpiam valerent, actum vix non esset de universi fere Novi Testamenti fide, genuinaque lectione. Plures enim sunt textus in quos eadem, imo quandoque validiores difficultates urgeri possent, quin tamen quidpiam innovandum sit, prout a non paucis passim recentioribus protestantibus factum esse novimus ingenti sacri textus detrimento. Adeo verum est sine auctoritatis supremae principio nihil firmum consistere!

(34) Inter quos est cl. Drach in op. cit. *Du divorce dans la synagogue* pag. 21 seq.

ARTICULUS II.

De quibusdam exegeticis interpretationibus textuum
 Matth. V. et XIX.

§. I.

Nonnullae exegeticae eorum textuum interpretationes
 historice exponuntur.

Tum authentia tum integritate duorum textuum vindicata, praestat iam, ut varias eorumdem, aut saltem praecipuas expendamus exegeticas interpretationes.

Interpretatio inter protestantes communis est ita intelligendas esse clausulas *excepta fornicationis causa*, aut *nisi ob fornicationem*, ut interveniente adulterio matrimonium dissolvi possit quoad vinculum, ac datam proinde esse parti innocenti facultatem alteram uxorem aut maritum alterum ducendi; imo sunt, qui vocem *πορνείας* seu *fornicationis* intelligant de quovis flagitio. Contra vero constans ecclesiae catholicae interpretatio est, per illas clausulas non posse adulterii causa dissolvi coniugium nisi quoad torum et habitationem, vinculo indissolubili permanente, nec ob adulterii crimen aliudque flagitium quodcumque, vivente altero coniuge, posse quempiam novas nuptias inire. Graeci saltem in praxi priori interpretationi adhaerent, quin tamen falsae aut praeposteræ doctrinae latinam ecclesiam incusent, secus ac sentiant protestantes. Verum de his recurret sermo cum agemus de horum textuum dogmatica interpretatione.

Nunc exponendae potissimum sunt nonnullae catholicorum exegeticae interpretationes, quibus scientificè doctrinam ecclesiae tueri atque a difficultatibus expedire conantur. Cum enim duae illae clausulae iugiter torserint doctorum virorum ingenia ob difficultatem quam praese-

ferunt, ad eas conciliandas cum doctrina et praxi ecclesiae, alii aliam viam in illis exponendis inierunt.

Nam 1. plerique existimarunt Christum Dominum Matth. V. 32. libellum repudii a Mose permissum solum sustulisse, ac separationis causam ea clausula ad unam fornicationem seu adulterium coarctasse, atque id ipsum praestitisse Matth. XIX. 9. cum interrogatus a pharisaeis num liceret dimittere uxorem quacumque ex causa, respondit, non licere, nisi ob solam fornicationem, nihil vero protulisse de eo, quod, uxore dimissa, fieri posset, nimirum liceret nec ne aliam ducere (35).

2. Alii contendunt eam clausulam a Christo adiectam fuisse respectu tantum habito legis mosaicae, ad cuius mentem locuti fuerant pharisaei, non autem de eo fuisse locutum, quod in lege evangelica servari deberet, idque postea praestitisse quum secreto alloqueretur Apostolos, quibus patefecit nullam deinceps quoad vinculum matrimonii dissolutionem fore admittendam (36).

3. Ab hac sententia non admodum discedunt qui alterutrum saltem textum de matrimoniis iudaeorum intelligunt, non autem de matrimonio fidelium, nisi forte ex accommodatione seu quadam temporanea oeconomia qua divortium ob adulterium iis etiam permittatur qui ex iudaismo primum ad Christi fidem accederent. Ceterum utrumque locum ad matrimonia fidelium pertinere negant; at inter eos essenziale esse discrimen contendunt, quum alter textus iudaeos, alter vero fideles coniuges respiciat. Verum qui ita sentiunt inter se non conveniunt circa alterutrius loci genuinum sensum. Etenim Hug autumat apud Matth. XIX. « Iesum non solum morem divortiandi, (ut ipse loquitur)

(35) Cf. Bellarmin. *De matrim.* cap. XVI. n. 18.

(36) Ita Io. Motta in *Diatriba de divortiorum iure* ac Lud. Nachi in *Dissert.* Venet. edita 1792. Cf. *Praelect. theolog. De matrim.* cap. II. prop. V. n. 136. in nota (1).

in lege mosaica invalescentem et primevae institutioni societatis coniugalis adversantem castigasse, verum etiam normam exhibuisse ad quam matrimonia suorum sectatorum deinceps exigenda sint, ac proinde hunc locum vi obligandi pro sectatoribus Iesu praeditum esse; in alio autem loco, seu cap. V. Iesum nonnisi matrimonium superiorum temporum expendentem Mosis formulae instituisse, eamque explicuisse, et dixisse, unam tantum dari (e legis mosaicae spiritu) repudii causam, nempe adulterium, citra quam divortia sint irrita; hunc igitur locum ad ecclesiam catholicam non pertinere (37). » Contra vero Io. Ant. Iäger censet locos Matth. XIX. et V. in eo realiter ab invicem differre, quod in priori seu. XIX. Iesus nonnisi mosaicam legem de divortiis explicet et declaret, in posteriori autem, nempe V. iam directe statuatur quod sub sua lege de vinculo matrimonii observari voluit (38).

4. Alii distinguentes inter *πορνείαν* et *μοιχείαν* arbitrati sunt vocem *πορνεία* apud Matthaeum non esse intelligendam de *adulterio* sed de *fornicatione* presse sumpta, quatenus ab adulterio distinguitur, et ante matrimonium patratum; adeo ut sensus sit, non posse mulierem dimitti nisi fornicationis causa; scilicet nisi vir inveniat mulierem fuisse prius ab alio violatam, vel saltem foedum aliquod flagitium perpetrasse ante initum matrimonium: nam hi extendunt significationem vocis *πορνεία* ad quodvis foedum flagitium ante matrimonium, licet negent extendi posse in his locis Matthaei ad adulterium (39).

5. Demum recentiores aliqui nullam prorsus in horum

(37) *De coniugii christiani vinculo indissolubili commentatio exegetica.* Friburgii 1816. §. 4.

(38) In op. germ. *Investigatio in quaestionem, utrum divortium iuxta doctrinam scripturae et antiquissimam historiam ecclesiast. irritum sit nec ne* 1804. pag. 50. Eadem sententia ab aliis adoptata fuit.

(39) Quam sententiam ex recentioribus protestantibus tuitus est Paulus heidelbergensis in op. *Vita Iesu*, nec non in cit. op. *Commentar. philologico-critic. et historic. in Novum Testamen.*

textuum intelligentia reperiri difficultatem arbitrantur, si verbum ipsum *fornicationis* rite intelligatur. Siquidem iuxta ipsos verba illa: *excepta fornicationis causa...nisi ob fornicationem*, nec significant, neque significare possunt flagitium ab alterutro legitimorum coniugum patratum cum extraneo; hoc enim non foret *πορνεία* *fornicatio* sed *μοιχεία* *adulterium*; qua voce tale flagitium Christus constanter designavit in illis sermonibus, sed significant illud quod inter se patrant ii, qui coniugio non legitimo sunt copulati; hoc enim *πορνεία* id est *fornicatio* proprie vocatur. Hinc Christi sententia alia non est, nisi coniugium viri et mulieris dissolvi numquam licere, nisi si, ut theologi loquuntur, *fornicarium* sit, et *concupinatus* dicitur, quemque dissolvi non *licet* modo, sed et *oportet*.

Itaque iuxta quosdam clausulae illae, *excepta fornicationis causa - nisi ob fornicationem* intelligendae sunt de adulterio, sed ita, ut dent quidem ius separationis, at nullatenus ius etiam novi ineundi coniugii; vel referendae sunt ad matrimonia iudaeorum iuxta legem mosaicam, vel ad summum ex accommodatione quadam ad matrimonia primorum fidelium, qui ex iudaismo ad Christum accederent; iuxta alios eae clausulae non significant adulterium, sed vel actum fornicationis, aut foedum flagitium ante matrimonium; vel statum ipsum fornicarium et concubinatum. Harum interpretationum criticam nunc disquisitionem aggredimur.

§. II.

Sententia illorum expenditur qui putant exceptionem fornicationis factam a Christo fuisse tantum ad mentem legis mosaicae.

Praetermittimus epicrisin sententiae, quam primo loco attulimus, nempe Bellarmini ceterorumque asserentium Christum ad solam fornicationis sive adulterii causam coarctasse facultatem dimittendi uxorem, quin aliquid adie-

cerit de facultate alteram ducendi uxorem, priori dimissa. De hac enim sermo recurret, postquam genuinam horum locorum interpretationem exposuerimus.

Itaque ut initium faciamus epicrisis nostrae a sententia illorum qui existimarunt Christum utroque in loco genuinum tantummodo exposuisse mosaicae legis sensum circa causam dimittendae uxoris alteriusque ducendae post solutionem coniugii, nihil autem pronunciasse de eo quod in posterum ab asseclis suis fieri deberet, dicimus eam non paucis difficultatibus subesse. Nam etsi daremus quod illius patroni affirmant, 1. eiusmodi interpretationem cohaerere cum historia illius temporis, quae nos docet acriter inter iudaeorum doctores disceptatum esse circa causas, ob quas ex mente legis mosaicae dimitti poterat uxor, praesertim ob vagam significationem phraseos *hervath dabar*, quam vulgatus interpres reddidit *foeditatem*; qua ambiguitate factum est ut alii plus aequo has causas extenderint, alii vero nimis viderentur eas coarctare, uti superius vidimus. Item quaestionem hanc a pharisaeis ad Salvatorem fuisse delatam, qui causam divortii ad Moysis mentem ad solam fornicationem seu adulterium restrinxit; 2. talem praeterea esse hanc interpretationem, ut plane cohaereat cum doctrina catholica, quae tenet haud dissolvi coniugium quoad vinculum in casu adulterii, licet in lege mosaica dissolveretur; 3. nec omnino novam esse, cum eiusdem vestigia iam habeantur penes paulo antiquiores scriptores, nempe apud Paulum Burgensem (40), ac Riberam (41).

Etsi, inquam, haec omnia daremus, nihilominus eam admitti non posse exinde patet, quod 1. supponatur ab huius expositionis fautoribus pharisaeos Christum interpellasse de veriori ex disceptatis in scholis iudaicis sen-

(40) Addit. 2. ad Lyranum.

(41) *Comment. in XII. Prophet. min.* Malach. II. n. 36.

tentiis, cum tamen iuxta Evangelistam pharisaei accesserint ad Iesum *tentantes eum* (42); quod 2. ea ad summum dici posset valere ad exponendum textum Matth. XIX. ubi de pharisaeorum interrogatione fit mentio, non autem textum alterum qui habetur Matth. V. ubi Christus ex se mentem suam declarat; quod 3. ut ostendimus in capite superiore, iuxta legem Mosis causa dimissionis non fuerit adulterium; quod 4. denique utroque in loco Christus aperte novam legem suam opposuerit legi veteri dicens: *Ego autem dico vobis*; vel *dico autem vobis*, quibus omnem coniugii solutionem quoad vinculum in lege sua excludit; eo vel magis quod Christus non modo affirmaverit: *qui dimissam duxerit moechatur*, verum etiam generatim: *qui aliam duxerit moechatur* ob impedimentum quod statuit ligaminis; ex quibus liquet Christum de matrimonio iuxta legem evangelicam fuisse locutum, non autem iuxta legem mosaicam, per quam aliam ducere permittebatur. Et haec de argumentis intrinsecis; nunc iam accedunt graviores difficultates externae. Nam ecclesia iugiter hos textus, ut videbimus, intellexit de matrimoniis *fidelium*: hinc controversiae cum graecis et protestantibus; hinc usus separationis perpetuae quoad torum in causa adulterii, ut alias praeteream, quas deinceps evolvemus.

Quapropter passim haec expositio ab auctoribus catholicis reiicitur; nec enim satis est ut aliqua admittatur sententia per illam dogma catholicum in tuto poni, sed praeterea necesse est, ut ipsa sit vera.

(42) Cf. Drach op. et loc. cit.

§. III.

Excutitur eorum sententia, qui alterutrum Matthaei textum intelligunt de matrimoniis iudaeorum, vel primorum fidelium qui ex iudaismo ad Christi fidem transierunt.

Leonardus Hug et Franc. Ant. Iäger in eo ambo conveniunt, quod essenziale habeatur discrimen in duobus evangelicis capitibus relate ad divortium; quodque alter textus iudaeorum, alter vero fidelium matrimonia respiciat, ac si aperte invicem opponerentur. Siquidem ipsi alium textum assignant fidelibus, alium vero iudaeis, quasi Christus aliud constituerit pro coniugio fidelium, aliud autem pro coniugio iudaeorum. Ad hos proinde refellendos satis esset argumenta proferre, quibus unusquisque singillatim suam adstruit expositionem contrariamque evertere adnititur.

Attamen iuverit expendere fundamenta utriusque interpretationis. Ut autem ab Hug auspicemur, is ideo censuit Matth. V. 31. 32. Christum de solo iure iudaico disseruisse, quod coniugia superiore tempore inita expenderit, institeritque Mosis formulae, quam ipse per *λόγον πορνείας causam fornicationis* explicat, perinde ac si dixerit: divortia inter vos iam nullo alio iure reguntur, nisi ut vir scripto oblata formula uxorem res suas habere iubeat (43); ego vero edico unam tantum dari repudii causam, adulterium, citra quam irrita divortia sunt. Atque idcirco Christum fere ut Mosen necessitati, quam anterior rerum status invexerat, cessisse, et quae omni ex parte recusari nequibant, cum temperamento admisisse, et ita coniugia superiora ad disciplinam civitate christiana di-

(43) Alludit heic eruditus auctor ad concisam formulam repudii quae apud romanos obtinebat, nempe ut eam refert Pitiscus ad vocem *divortium*, qui allegat haec Caii verba §. XXIV. 2. 2. 1. « In repudiis, id est *renunciatione* comprobata sunt haec verba: *Tuas res tibi habeto.*» Hinc Cicero Philipp. II. n. seu §. 28. alias 69. « Antonius, inquit, frugi factus est; mimam illam *suas res sibi habere* iussit ex XII. tabulis: claves ademit, exegit.»

gnam revocavisse, iusque antiquum debito honore prosecutum cum sanctioribus morum praeceptis pro tempore reconciliavisse. Rationem porro redditurus quare ceteri Evangelistae huius exceptionis nullam iniecerint mentionem, ac solus s. Matthaeus eam referat, respondet quod Matthaeus ad incolas Palaestinae suum direxerit Evangelium, Marcus vero et Lucas, qui potissimum ad gentiles erudiendos opera sua instituerunt, haud proinde ea cura affecti fuerint, quae iudaici historiae scriptoris propositum direxit (44).

Et haec quoad textum Matth. V. 32. quem ad solos iudaeos ipse spectare autumat; ad alterum vero textum Matth. XIX. 9. quod attinet, constituit idem auctor: «Eo loco cap. XIX. in colloquio cum pharisaeis duo contraria ex adverso posuisse Dominum; priscam et ab ipso mundi Auctore profectam legem, et eum qui medio tempore invaluit, per Mosis indulgentiam concessum magis, quam sancitum morem; tum exhibuisse formam, ad quam sectatorum purioris ac excellentioris cultus matrimonia exigenda sint (45).» Ex his infert solum posteriorem hunc Matthaei textum ad legem christianam pertinere in qua ius omne perfecti divortii sublatum est.

Contra vero Iäger Matth. locum XIX. ita exposuit, ut ostendat Iesum tantummodo legem Mosis explicuisse, ac proinde dum iuxta hanc legem iudaeis divortium e capite adulterii permissum esse affirmavit, nequaquam una permisisse, ut in sua quoque lege fidelibus matrimonia in casu fornicationis penitus dissolvere liceat. Locum autem Matth. V. 31. 32. minime parallelum esse loco Matth. XIX. censet, statuitque Iesum legem mosaicam emendare volentem, de matrimonio adstruxisse, quod vinculum ma-

(44) Ita in cit. op. *De vinculo coniugii christiani indissolubili comment. exegetic.*, pag. 14-18.

(45) *Ibid.* pag. 11. 12.

trimonii ne quidem pro casu fornicationis solvi possit, alioquin nulla foret in his Matthaei locis antithesis, quam tamen haberi verba Iesu primo obtutu produnt (46). Hinc iuxta hunc auctorem locus Matth. V. spectat ad christianos, alter vero Matth. XIX. ad iudaeos, secus ac Hug statuerit: uterque tamen utpote catholici pugnant pro indissolubilitate omnimoda coniugii christiani.

Iam vero libenter admitto ea, quae Hug constituit circa caput XIX. Matthaei; at ipsi assentiri nequeo in iis, quae scripsit circa caput V. 31. 32; vicissim lubenti animo amplector quae habet Iäger de capite V. Matthaei, dum reiicere cogor quae ipse autumat circa caput XIX. Siquidem etsi duo hi loci inter se differant ob diversitatem occasionis in qua oracula in iis contenta a Christo prolata sunt, et ob diversitatem etiam audientium; tamen ad rem ipsam, seu ad substantiam quod attinet prorsus parallela sunt; in utroque enim textu Christus libellum repudii improbavit et abolevit, atque in utroque eandem exceptionem *fornicationis* apposuit. Disceptari utique potest de huius exceptionis amplitudine, de qua postea agemus, sed quidquid tandem ea significetur, patet ex utriusque loci collatione unam esse eandemque Christi sententiam. Negandum itaque est reale aut assentiale interesse discrimen inter utrumque locum, sed contra est affirmandum eos esse plane tum verbaliter tum realiter parallelos.

Insuper, ut vel ipse Kuinoelius animadvertit, nullum reperitur indicium ex quo colligi possit, praeceptum illud Christi, quod Matth. V. 32. legitur, fuisse temporarium et tantummodo iudaeis datum, qui ad Christi signa sese conferre vellent, et iam matrimonia contraxissent; quod nempe ipsi in adulterii casu possent suum matrimonium disrumpere, novumque inire. Nec perspicitur, cur Iesus severius egerit cum gentilibus, qui antequam christiani

(46) Op. cit. pag. 51. apud Roskovány pag. 69.

fierent, connubia ita inter se contraxerant, ut iis liceret divortia facere. Qui praeterea observat sententiae Hugii adversari auctoritatem s. Augustini, qui scribit ep. LXXXIX. «Ambobus quippe christianis (qui scilicet et ex iudaismo et ex gentilitate sunt christiani effecti) Dominus praecepit ne quisquam dimittat uxorem excepta causa fornicationis (47).»

Quod si Marcus et Lucas silentio praeterierunt exceptionem *de causa fornicationis*, non ideo id factum est, ut Hug suspicatur, quod Matthaeus in gratiam palaestinensium scripserit, alii vero ad erudiendos gentiles, ac propterea diversam doctrinam iudaeis conversis ille proposuerit ab ea, quam alii duo proposuerunt gentibus christianam religionem professis; sed ob rationes quas ipsos Marci et Lucae textus expedientes deinceps afferemus.

Quod demum spectat ad Iägeri expositionem textus Matth. XIX., Christum videlicet ad mentem pharisaeorum respondisse ut interpretem legis mosaicae, nihil addimus iis quae iam attulimus dum sententiam in superiore paragrapho allatam expenderemus; siquidem eadem haec expositio est ac illa quae a Motta et Nachi excogitata est.

§. IV.

Expenditur illorum placitum qui vocem *πορνεία* exponunt de fornicatione vel flagitio ante initum matrimonium patrato.

Qui ita sentiunt vocem *μοιχεία* quae *adulterium* significat sedulo distinguunt a voce *πορνεία* quae *fornicationem* indicat, quaeque in pressa sua significatione non nisi extra coniugium, seu inter personas solutas locum habere potest.

Ita vero hi suam interpretationem exponunt: Loca Matthaei sic reddi debent, ut sensus litteralis sit: Iesum in

(47) Kuinoël *Comment. in lib. N. T. histor.* ad cap. V. 31. 32. Matth.

casu *fornicationis* a muliere *ante* initum adhuc coniugium commissae solutionem matrimonii postea contracti, seu divortium licitum docuisse. At dum vox *πορνεία* ad crimen *ante* matrimonium patratum revocant, simul contendunt per eam, non solam fornicationem, sed alia etiam foeda flagitia ante matrimonium admissa significari, quae sunt causa divortii; idque non minus ex littera quam ex spiritu doctrinae Christi patere contendunt. Ex littera quidem, cum exploratum sit voce *πορνεία* non modo fornicationem, verum etiam gravia alia flagitia in sac. literis denotari; qua latiori significatione Iesum vocem hanc pariter usurpasse ex adiunctis loci Matth. XIX. praesumi debet. Ex spiritu vero quatenus Iesus abusus erroresque apud iudaeos ex praepostera legis interpretatione invalescentes amoliri sibi proposuit, ut hac ratione causas divortium faciendi coarctaret postquam rite initum fuerit coniugium. Verum cum Christus certe noluerit in lege sua illa permanere coniugia, quae tum ius naturale tum leges morales damnant, exinde colligunt Salvatoris verba in utroque Matthaei textu de fornicatione aliisque foedis flagitiis *ante* coniugii celebrationem patratum esse intelligenda (48).

His insistens Gartzius, non modo probat suamque facit expositionem vocis *πορνεία* pro fornicatione ante matrimonium peracta, sed et confirmare adnititur ex eo, quod Matthaeus scripserit evangelium suum pro iudaeo-christianis. Iam vero exploratum est apud iudaeos moris fuisse, ut sollicite ante omnia de sponsae virginitate quaereretur. Indidem et ipse intulit ex testibus Matthaei nullam contineri divortium faciendi prohibitionem, ubi viri compererint ductas a se uxores fornicationis flagitio ante initas nuptias fuisse coinquinatas. Etenim Matth. V. 32. Christus de illo speciali tantum casu locutus est, quo vir spon-

(48) Ita auctor dissertationis *De iustitia divortiorum*. Salisburgi editae an. 1812. apud Roskovàny op. cit. §. 52. pag. 82 seq.

sam suam iam ab alio violatam repererit, quamque ipse virginem adhuc fuisse arbitrabatur; cap. vero XIX. arbitraria tantum divortia damnavit, prohibuitque ad legis mosaicae mentem. Matthaeus porro de suo clausulam adiecit, *nisi ob fornicationem* ad pleniorum Christi mentis explanationem, quod nempe etiam in lege Christi matrimonium in eiusmodi rerum adiunctis dissolvi posset. Quinimo *fornicationis* voce in amplissima sua significatione accepta, indicavit Evangelista ex Christi mente non in solo casu fornicationis presse sumptae, sed quovis alio interveniente flagitio dissolvi posse coniugium a morali lege reprobatum ac in sua substantia ex culpa alterutrius coniugis vitiatum. Quocirca statuendum omnino est, concludunt, iuxta spiritum doctrinae biblicae parti innocenti ius solvendi coniugii prioris toties integrum manere, quoties pars altera effecit, ut matrimonium in essentia sua labefactetur (49).

Ast eiusmodi interpretationes verborum Christi Domini praeter quam quod adversantur sensui ac doctrinae ecclesiae catholicae, nulla ratione eas admitti posse facile evincitur.

Etenim 1. isti expositores assumunt Christum per vocem *πορνεία* designasse fornicationem, quae matrimonium praecesserit; ast si verba ipsa in suo contextu expendantur, planum fit Christum de fornicatione post coniugium iam initum, seu de adulterio locutum fuisse. Etenim sententiam suam declarat per oppositionem ad libellum repudii a Mose concessum. Nam Matth. V. 31. ait Christus: «Dictum est autem: quicumque dimiserit uxorem suam, det ei libellum repudii;» deinde v. 32. immediate subdit: «*Ego autem dico vobis*: quia omnis, qui dimiserit uxorem suam, excepta fornicationis causa, facit eam moechari; et qui dimissam duxerit, adulterat.» Cap. vero XIX. eadem ratione, commemorato libello repudii a Mose ad

(49) Ibid. §. 55. pag. 84 seq.

cordis duritiam permissio, adiecit Christus: «*Ego autem dico vobis*, quia quicumque etc. ;» quorum verborum obvius sensus est, non licere deinceps iuxta doctrinam suam, quod antea permissum erat, repudiare iam ductam uxorem ad aliam ducendam iuxta mosaicum indultum. Hoc autem concessum erat propter ea, quae, inito iam coniugio, ab uxore admittebantur.

2. Assumunt Christum tantummodo se uti doctorem praebuisse ac interpretem legis mosaicae, cum tamen se vere gesserit uti legislatorem, idque constituerit, quod a discipulis suis fieri in posterum deberet, ut patet ex antithesi: *Dictum est...Ego autem dico vobis*; quibus aperte ostendit se novam omnino hac in re legem dare. Praeterea paulo ante ostendimus eiusmodi sententiam de solutione controversiae, quae circa interpretationem legis mosaicae a pharisaeis agitabatur a Christo data, admitti non posse.

3. Assumunt ex una parte vocem *πορνείαν* presse sumendam de sola *fornicatione*, quatenus opponitur *μοιχεία* seu *adulterio*, ut evincant agi de copula ante matrimonium habita; ex altera vero parte, ut plures complectantur divortii causas, extendunt eiusdem vocis potestatem ad quaecumque flagitia significanda. Exploratum tamen est hisce in locis *πορνείαν* sumi de adulterio, ut postea ostendemus; et quidem de solo adulterio, quod ius praebet dimittendi coniugem adulteram, vinculo tamen conjugali perseverante. Quod hic tamquam lemma ponimus, cuius veritatem deinde evincemus.

4. Assumunt lege naturali dissolvi quodcumque matrimonium ob aliquod flagitium, quod ipsum deturpet. Hanc porro affirmationem ipsi enunciare contenti sunt, quin aliquo ostendant argumento. E converso autem constat ex lege naturali coniugium esse insolubile, nec nisi divina dispensatione indulta, in veteri lege fuisse gravi interveniente causa solutum, quaecumque demum ea fuerit.

5. Assumunt morali legi dissolvi coniugium ob fornicationem aliudve flagitium, quod illud praecesserit, minime vero si adulterium aut aliud crimen matrimonium subsequatur; attamen vel ipso naturali lumine compertum est longe gravius esse adulterii quam simplicis fornicationis crimen magisque morali legi illud quam istud adversari. Iam vero ipsis fatentibus, in lege christiana non dissolvitur matrimonii vinculum propter adulterium; igitur si secum ipsi cohaerere velint, fateantur necesse est nec dissolvi propter fornicationem, quae nuptias praecesserit, quaecumque demum hac super re fuerit iudaeorum sentiendi ratio, quod scilicet, censuerint iuxta adversarios, errorem aut ignorantiam circa innocentiam et honestatem ductae uxoris, quam postea aut fornicariam, aut alio gravi delicto foedatam fuisse deprehenderint. Quod certo ipsi probare nequeunt, sed gratis assumunt. Adeoque nec in hac hypothesis eiusmodi expositio admitti potest.

Quae cum ita se habeant, ex se concidunt quae ab his interpretibus excogitata sunt tum de *litera* et *spiritu* sententiae Christi, qui noluit ut permanerent matrimonia, quibus fornicatio praeiverit; tum de Matthaeo, qui pro iudaeo-christianis scripserit, ac de suo clausulam *nisi ob fornicationem* in eum finem adiecerit, ut persuaderet eis, adhuc perseverare dissolvendi coniugia facultatem etiam quoad vinculum, tum denique de spiritu doctrinae biblicae iuxta quem parti innocenti ius solvendi coniugii integrum maneat. Quae quidem omnia falsis, quae vocant, suppositis ac liberiori exegesi innituntur, quae doctrinam Christi eiusque in nova lege oeconomiam prorsus subvertunt.

§. V.

Sententia illorum excutitur, qui fornicationis vocem non de adulterio, sed de statu fornicario et concubinato exponunt.

Haec sententia, quam postremo loco inter exegeticas interpretationes textuum evangelicorum, de quibus agimus, enumeravimus, aliquatenus convenit cum illa, quam nuper expendimus ac reiecimus a protestantibus excogitatum et a nonnullis liberioribus catholicis admissam, quod nempe Christus Dominus apud Matthaeum locutus tantum fuerit de fornicatione seu de flagitio ante initum coniugium patrato. Ast in eo differunt, quod illi de fornicatione disserant quam alter coniugum ante initum matrimonium alio inscio commiserit, hi vero de fornicatione utrique communi; praeterea illi videntur locuti de fornicatione, ut ita dicam, transeunte, de uno videlicet alterove flagitio, hi autem intelligunt Christi effata de statu aliquo permanente, seu ut ipsi loquuntur, de statu concubinatus, quem quidem non solum *posse* imo et *debere* dissolvi nemo ignorat.

Verum enimvero etsi valde commendandus sit ipsorum conatus ad eam persuadendam ut causae catholicae inservant, ne tamen eam probemus et amplectamur plura sunt quae obstant.

Ac 1. obstat sensus obvius et naturalis eorundem textuum: siquidem Matth. V. 31. 32. dicit Christus: « Dictum est autem: Quicumque dimiserit uxorem suam, det ei libellum repudii. Ego autem dico vobis: quia omnis qui dimiserit uxorem suam, excepta fornicationis causa, facit eam moechari, et qui dimissam duxerit, adulterat.» Quibus verbis alludit Christus aperte ad locum Deut. XXIV. in quo Moses permittit dare libellum repudii *uxori*, in qua vir repererit *foeditatem*, non autem *concubinae*, locutus proinde est Christus de *vera uxore*, non autem de pel-

lice aut concubina; nec aliam causam admittit divortii praeter fornicationem, quae supervenerit vero coniugio iam inito. Idem dic de altero textu Matth. XIX. 8. et 9. ubi Christus eandem repetit sententiam clarioribus adhuc verbis dicens: « Quoniam Moyses ad duritiam cordis vestri permisit vobis dimittere uxores vestras: ab initio autem non fuit sic. Dico autem vobis, quia quicumque dimiserit uxorem suam, nisi ob fornicationem, et aliam duxerit, moechatur, et qui dimissam duxerit, moechatur. » Quisnam vero haec legens suspicaretur de dimissione concubinae cuiusdam aut pellicis extra legitimum connubium et non de vera uxore sermonem haberi?

2. Obstat huic expositioni subsequens Christi sententia. Etenim Christus utroque in loco decretorie pronunciat, eum qui dimissam duxerit, *adulterare*. Porro adulterat quidem qui uxorem alterius adhuc viventis licet dimissam, ducit, nullo vero modo adulterat qui concubinam ab altero dimissam in matrimonium sibi copularet (50). Immo si legitime id faciat ne peccat quidem. Attamen ex Christo: *qui dimissam duxerit, adulterat*; ergo aperta fronte eiusmodi expositio adversatur Christi sententiae.

3. Obstat vis ipsa ac potestas vocis *πορνεία*, quae ab iis ita intelligitur, ut duplicem tantum fornicationem designet sine coniugio, minime vero adulterium post ipsum legitimum coniugium.

Notum porro est ex cummuni Scripturae loquendi usu vocem *πορνείαν* fornicationem promiscue sumi ad quodcumque flagitium significandum extra legitimum conjugalem concubitum sive cum soluta, sive etiam cum coniugata patratum. Quo posteriori sensu adhibetur vox *πορνεία* ab Apostolo I. Cor. V. 1. « Omnino auditur inter vos

(50) Iuxta adversarios ille solummodo non adulteraret, qui dimissam concubinam duxerit. Optime. Ast quomodo id eruunt ex Christi verbis, qui expresse de uxore tantum disserit, et affirmat *adulterare* qui eam duxerit?

fornicatio (gr. *πορνεία*), et talis fornicatio, qualis nec inter gentes, ita ut *uxorem patris sui* aliquis habeat (51).» Sic Amos VII. 17. «*Uxor tua in civitate fornicabitur,*» ubi citra dubium sermo est de adulterio, ut alia non pauca eiusmodi loca praeteream, unde palam fit *fornicationis* vocem generatim in Scripturis usurpari promiscue pro illicito concubitu sive intra sive extra matrimonium (52). In sensu etiam metaphorico de infidelitate gentis israeliticae erga Deum sponsum suum eadem vox *πορνεία* ad spirituale *adulterium* significandum passim a prophetis adhibetur (53).

Nec refert Christum hisce in textibus commemorare distincte *πορνείαν* et *μοιχείαν* fornicationem et adulterium, cum ex orationis serie atque ex scopo aperte liqueat, eodem in sensu has voces promiscue ab eo adhiberi. Frustra autem adnituntur huius sententiae patrocinatores ostendere in sensu exclusivo simplicis fornicationis et per oppositionem ad adulterium Christum his in locis hac voce *πορνεία* uti. Id enim adversatur omnibus hermeneuticae regulis.

4. Obstat auctoritas veterum versionum, quae vim vocis genericae *fornicationis* determinant. Etenim versio aethiopica sic reddit v. 32. cap. V. Matth. «*Omnis qui relinquet uxorem suam sine fornicatione, facit eam fornicari: et qui relictam ducit, fornicatus est.*» Ex qua versione habemus primo, quod verba: *excepta causa fornicationis*, necessario referantur ad uxorem, quae relinqui nequit *sine fornicatione*; secundo, quod vox *fornicatio* necessario accipi debeat de adulterio, cum dicatur de eo qui alteram uxorem ducit: *fornicatus est* pro *adulterat*, et *facit eam fornicari* pro *facit eam moechari*. Sic versio ara-

(51) Cf. Estium in h. l. agitur de eo, qui cum noverca, vivente adhuc parente suo, commiscebatur.

(52) Cf. I. Cor. VI. 16. Io. VIII. 46. Ephes. V. 3. Galat. V. 17. etc.

(53) Ierem. III. 1. VI. 18. Ezech. VI. 9-XVI. 13. 16. 17. Osee I. 2. etc.

bica: «Qui repudiat uxorem suam praeter causam fornicationis, compellit eam ad *fornicandum*, et qui ducit repudiatam, iam *fornicatus est*.» Ubi eadem animadversiones locum habent. Clarius adhuc versio persica id ipsum exprimit: «Quicumque extra *causam adulterii* uxori suae repudium remiserit, eam in adulterium impulit: et quicumque dimissam duxerit, adulter est.»

Nec minus perspicue eandem vocis *πορνείας* determinationem habemus ex versionibus textus Matth. XIX. 9. Nam versio syriaca sic verba Christi reddidit: «Quisquis dimiserit uxorem suam *praeter adulterium*, et duxerit aliam, moechatur: quique dimissam duxerit, moechatur.» Versio persica: «Quicumque uxorem suam, *nisi stupri causa*, dimiserit, et quamlibet aliam duxerit, adulterium commisit: et qui mulierem repudiatam duxerit, in adulterio est.» Versio aethiopica «Si quis fuit qui dimisit *uxorem suam nisi propter adulterium*, et ducit alteram, moechatus est: et dimissam qui ducit, adulteravit;» ubi notandum est eandem versionem, quae Matth. V. 32. verterat vocem *πορνείαν* per *fornicationem*, hanc ipsam vocem reddidisse per *adulterium* (54).

Ad haec accedunt plura exemplaria antiquae versionis Italiae, quae pariter vocem *adulterii* voci aequivocae *fornicationis* substituunt. Sic ms. Claramontanum effert Christi verba Matth. V. 32. «Quicumque dimiserit...excepta ratione *adulterii*, facit eam moechari.» Pariter in cod. Corbeiensi 1. ita effertur cap. XIX. v. 9. «Quicumque dimiserit uxorem suam, excepta *causa adulterii*, facit eam moechari.» Sic etiam in Cantabrigiensi leguntur haec verba: «Quicumque dimiserit uxorem suam, excepta *ratione adulterii*, et duxerit aliam, moechatur (55).»

(54) Cf. Polyglott. Waltoni in his locis.

(55) Cf. apud Sabathier op. cit. in haec loca. Hic dici nequit esse versionem ex versione, sed habetur versio antiqua latina referens ipsam vocem *adulterii*.

Cum igitur habeamus antiquas versiones ac veteres codices vocem hanc *fornicationis* ambiguam ita determinantes figentesque, ut ei sufficiant vocem *adulterii*, ecquis iam ambigat talem esse potestatem illius vocis *πορνείας* his in textibus a Christo adhibitae, nec eum fuisse locutum de pellice aut concubina, sed de vera et propria uxore, quae se adulterio polluerit?

5. Obstat *unanimes* sanctorum patrum sensus, qui constanter Christi verba in hisce textibus de vera uxore interpretati sunt. Speciminis gratia nonnullos ex antiquioribus afferemus, qui vel ipsa Christi verba allegarunt, vel aperte ad ea alluserunt, ac dubium omne circa vim ac sensum vocis *πορνείας* seu *fornicationis* a Christo hic adhibitae removetur.

Itaque Hermas sic scribit: « Domine, si quis habuerit uxorem fidelem in Domino, et hanc invenerit in adulterio, numquid peccat vir, si convivit cum illa? Et dixit mihi: quamdiu nescit peccatum eius, sine crimine est vir vivens cum illa. Si autem sciverit vir uxorem suam deliquisse, et non egerit poenitentiam mulier, et permanet in *fornicatione* sua, et convivit cum illa vir, reus erit peccati eius et moecharionis eius. Et dixi illi: Quid ergo si permanserit in vitio suo mulier? Et dixit: Dimittat illam vir, et vir *per se* maneat. Quod si dimiserit mulierem suam, et aliam duxerit, moechatur (56).» Quibus aperte Hermas alludit ad textus Matthaei, ac voces *fornicationis* et *moechiae* promiscue usurpat, ac de vera agit uxore.

Tertullianus ita legit: « Qui dimiserit uxorem suam *praeter causam adulterii* facit eam adulterari (57);» et alibi: « Qui dimiserit uxorem, *praeter causam moechiae*, facit eam moechari (58);» et iterum: « Qui dimiserit uxorem,

(56) *Pastor* lib. II. mand. IV. ed. Cotel. tom. I. *Patr. apostolic.* pag. 86 seq.

(57) Lib. IV. *Contr. Marc.* cap. 34.

(58) Lib. *De pudicitia*, cap. 16.

et aliam duxerit, adulterium commisit, et qui a marito dimissam duxerit, aequè adulter est (59);» et paulo post: «Certe quid facit apud te maritus, si mulier eius commiserit *adulterium* (60)?» In hisce testimoniis tum verbum *adulterii* pro *fornicatione* reperitur, tum res per illud significata.

S. Zeno veronensis «Qui dimiserit, excepta *causa adulterii*, facit eam moechari. Quid heic respondere possint lubrici mariti, non video (61).»

Sic etiam s. Philastrius brixienis ita legit: «Qui dimiserit uxorem suam *sine causa criminis*, facit eam moechari (62).»

Hisce assentitur Iuvenicus presbyter canens:

«Sola viri recte *discedet adultera* tectis,
Ast aliae maneat; nam casti iura pudoris
Auctore amittet mulier deserta marito (63).

et iterum:

«Nunc temere exolvit casti qui iura cubilis
Alteraque illius thalamis sociabitur uxor,
Crimen adulterii populo sub teste subibit (64).

S. Hilarius pictaviensis exponens Christi verba Matth. V. 32. ita scribit: «Cum lex libertatem dandi repudii ex libelli auctoritate tribuisset, nunc *marito* fides evangelica non solum voluntatem pacis indixit, verum etiam *reatum coactae in adulterium uxoris* imposuit (65).»

Nec aliter accepit hunc locum s. Io. Chrysostomus, qui eundem textum explanans de adulterii rea intelligit,

(59) Lib. et I. c. Contr. Mare.

(60) Ibid.

(61) Lib. I. *Tract.* IV. n. 4. ed. Veron. 1789. pag. 43.

(62) Lib. *De haeresibus. Haeres.* LXXXIV. ed. Brixienis. 1738. pag. 60.

(63) Lib. I. v. 569 seqq.

(64) Lib. III. v. 476 seq. In utrumque locum cf. notas eruditi Arevali in ed. Rom. 1792.

(65) *Comment. in Matth.* cap. IV. n. 22. ed. Maur. Opp. tom. I. pag. 686.

scribens: « Nam eiecta adhuc manet *eiicientis uxor* (66). »

Item s. Ambrosius, qui eodem sensu Christi verba accepit, cum scripsit: « Etenim si alienos, multo magis *uxoris* debes tolerare et emendare mores. Audi quid dixerit Dominus. *Qui dimittit mulierem facit eam moechari*. Etenim cui non licet, vivente viro *mutare uxorem*, potest obrepere libido peccandi (67). »

Ceterisque omissis, de Hieronymi et Augustini sensu circa horum textuum interpretationem ne moveri quidem quaestio potest, an eos de vero coniugio intellexerint. Etenim s. Hieronymus, quid nomine *fornicationis* veniat exponit his verbis: « Sola fornicatio est, quae *uxoris* vincat affectum: immo cum illa unam carnem in aliam dividerit, et se *fornicatione* separavit a marito, non debet teneri; ne virum quoque sub maledicto faciat, dicente Scriptura: *Qui adulteram tenet, stultus et impius est*. Ubi-cumque est igitur *fornicatio* et *fornicationis suspicio*, libere uxor dimittitur (68). » Sic etiam s. Augustinus « Discipuli, inquit, cum audirent dictum a Domino non licere ullo modo *praeter causam fornicationis disiungi coniugia etc.* (69). » Et iterum exponens verba Christi, scribit: « Quemadmodum igitur si dixerimus: Quicumque a marito *praeter causam fornicationis* dimissam duxerit, moechatur, procul dubio verum dicimus; nec tamen ideo illum, qui *praeter causam fornicationis* dimissam duxerit, ab hoc crimine absolvi-mus (70). » Verum clarius adhuc alibi idipsum expressit scribens: « Item quaeri solet, utrum *moechia* nomine etiam *fornicatio* teneatur... Omnis *moechia* etiam *fornicatio* esse

(66) Hom. XVII. in Matth. n. 4. ed. Maur.

(67) *Expos. in Luc.* lib. VIII. n. 4.

(68) *Comment. in Matth.* lib. III. in cap. XIX. ed. Vallars. Opp. tom. VII. col. 145. et 146.

(69) *Enarr. in Ps. CIII.* serm. III. n. 4. ed. Paris. Opp. tom. IV. col. 1152.

(70) *De coniug. adulterin.* lib. 1. cap. IX. tom. VI. col. 392. Eadem habet s. Doctor lib. XIX. contr. Faust. et lib. XIV. *De civ. Dei* cap. XXII. et alibi passim.

intelligitur, sicut loquuntur Scripturae. Dominus enim dicit in Evangelio, *Quicumque dimiserit uxorem suam, excepta causa fornicationis, facit eam moechari*. Hic utique fornicationem appellavit, si cum alio peccet, quae virum habet, quod est moechia, id est adulterium. Omnis ergo moechia etiam fornicatio in Scripturis dicitur (71).»

Et hos attulisse sufficiat; nam alia ss. patrum testimonia in hanc rem, postea afferemus.

Hactenus non modo nullum inveni ex veteribus expostoribus ac ss. patribus, qui vel suspicando asseruerit, vel saltem innuerit binos istos evangelicos textus de concubina, aut de concubinato accipi posse, sed neque ullum offendi qui eos non exposuerit de moechiae flagitio. Quocirca tuto affirmare possumus novam qua de agimus interpretationem non solum esse *praeter*, verum etiam esse *contra* unanimum sanctorum veterum interpretationem, secus ac ex decreto tridentino et formula fidei Pii IV. a viro catholico Scripturae exponi debeant (72).

6. Obstat universalis ecclesiae doctrina iuxta quam potest alter coniugum ab altero se separare, et quidam in perpetuum ob adulterii crimen ab alterutro patratum. Adulterium enim iustam praebet separationis perpetuae a toro et habitatione causam. Iam vero haec doctrina, quae perpetua et constans ab initio in ecclesia viguit, quaeque sancita est a concilio tridentino sess. XXIV. can. VIII. non alio innitur fundamento quam hisce textibus de coniuge, quae se adulterio polluerit, intellectis; aut saltem ad eos perpetuo provocatur in iure canonico.

(71) *Quaest. in Exod.* lib. II. quaest. LXXI. n. 4. Opp. ed. Maur. tomi III. par. I. col. 444.

(72) Sess. IV. in Decreto *De edit. et usu sac. libr.* ubi quod dicitur: «In rebus fidei et morum....*contra* unanimum consensum patrum, ipsam Scripturam sacram (nemo) interpretari audeat,» in professione fidei plana, qui eam emittit, his verbis effert: «Nec, eam umquam, nisi *iuxta* unanimum consensum patrum accipiam et interpretabor.»

Sane in causa XXXII. ex Christi verbis Matth. V. 32. et XIX. 9. declaratur posse maritum propter fornicationis causam, vel in causa fornicationis uxorem dimittere, nec aliam interim, adultera vivente, ducere (73). Item in eadem causa qu. V. capp. 19. 21. 22. (74); nec non causa XXXIII. quaest. I. cap. I. Idem statuitur in lib. IV. Decretalium Gregorii IX. tit. I. cap. 9. tit. 19. cap. 8. ubi Innoc. III. c. *Gaudemus* ad adstruendum non licere plures simul habere uxores inquit: «Sane veridica haec sententia probatur etiam de testimonio Veritatis testantis in Evangelio: *Quicumque dimiserit uxorem suam, ob fornicationem, et aliam duxerit, moechatur.* Si ergo uxore dimissa, duci alia de iure non potest, fortius et ipsa retenta.» Ubi evidens est Innocentium vocem fornicationis de vero adulterio accipere. Ex sensu igitur et doctrina ecclesiae, Christi verba non de simplici fornicatione, sed de vero adulterio intelligi debent, quod perpetuae a toro et cohabitatione separationi iustam causam parti innocenti tribuit. Hac interpretatione sublata, nullum iam huic doctrinae et praxi fundamentum suppetit (75).

Cum praeterea in eodem iure canonico, ex relatis s. Augustini aliorumque patrum testimoniis, deceat maritum uxori suae delinquenti ignoscere eamque potius sustine-

(73) Cf. Gratianum in *Decret.* par. II. causa XXXII. q. VII. ubi c. 1 seqq. plures adducuntur auctoritates ex patribus et conciliis, in quibus ad hos textus provocatur; praesertim vero capp. 1. 3. 4. 6. 7. 10.

(74) Ibid.

(75) His addi potest quod etiam in Capitularibus Caroli M. legitur: «Placuit ut nisi causa fornicationis, non sit uxor secundum Domini sententiam dimittenda, sed potius sustinenda.» lib. VI. cap. 215. iuxta emendationem Cotelierii. Cf. Car. Sebast. Berardi *Commentaria in ius eccles. univ.* Taurini 1767. tom. III. cap. II. ubi scribit: «Ex causis (dissolventi matrimonium quoad cohabitationem) lege probatis... Prima est causa adulterii, quod si mulier admiserit, poterit a viro repelli iuxta evangelicas regulas Matth. V. 32. Neque in hac parte diversa est uxoris conditio, utpote quae a viro propter viri adulterium seiungi se iure postulabit can. 19. 20. et 23. caus. 32. q. 5.; can. 4. et 5. caus. 32. q. 6.»

re (76) si eam criminis sui poeniteat, cumque ea reconciliari; sequeretur iuxta interpretationem quam impugnamus, debere virum in concubinato pergere, postquam se cum concubina reconciliavit privilegio seu iuri sibi a Christo dato renunciando; quod quam absurdum sit nemo est, qui non videat. Rursum: cum ex iuris canonici dispositione, si vir pariter in moechiae flagitium incurrerit, non amplius possit actionem habere adversus uxorem adulteram, sed ei convivere teneatur (77); sequeretur pariter hac in hypothesis, in adversariorum sententia, concubinarios in rea consuetudine perseverare debere.

Possem urgere *unanimem* theologorum consensionem; nam quotquot sive scholastici sive theologi positivi ac polemici, ut vocant, antiqui ac recentiores adstruxerunt catholicam doctrinam de iure quo fruitur pars innocens dimittendi in perpetuum uxorem adulteram, profitendique vitam religiosam, aut suscipiendi sac. ordines, etiamsi uxorem admissi flagitii poeniteat veniamque petat, quotquot, inquam, sunt qui adstruxerunt hanc doctrinam, ad unum omnes, nemine prorsus excepto, innituntur verbis Christi Matth. V. et XIX. *Nisi ob fornicationem; excepta causa fornicationis*. Horum constans argumentum hoc est: Ex Christi lege licet viro dimittere uxorem, in causa fornicationis, seu adulterii, ab eaque se separare: atqui non potest eam dimittere aut ab ea se separare quoad vinculum; ergo potest eam dimittere, seque ab ea separare quoad torum et cohabitationem. Hoc est argumentum ineluctabile, quo omnes usi sunt, et adhuc utuntur adversus novatores ad propugnandum can. VIII. sess. XXIV. concii-

(76) Iuxta phrasim Capitular. Caroli M. modo relata; quae verba pariter habentur relata ex conc. parisiensi in addition. libri III. eorundem Capit. c. 2. « Et quòd nisi causa fornicationis, ut Dominus ait, non sit uxor dimittenda, sed potius sustinenda.»

(77) Cf. *Decret.* Gregor. IX. lib. IV. tit. 19. *De divort.* cap. 4. et 5. et lib. V. tit. 16. *De adult.* c. 6. et 7. Cf. etiam Berardi op. et loc. cit.

lii tridentini. Iam verò, interpretatione posita de simplici fornicatione, seu de concubinato, vim omnem suam eiusmodi argumentum amitteret; ergo talis interpretatio unanimi adversatur theologorum consensioni.

Insuper ad magis magisque ostendendam eiusmodi interpretationis novitatem ac falsitatem contra sensum totius antiquitatis argumentum promam prorsus ineluctabile ex diuturno illo, quod viguit, theoretico (78) et pratico dissidio inter graecos et latinos quoad dissolutionem coniugii ob adulterii flagitium. Siquidem, ut notum est, graeci ab immemorabili contendunt dissolvi matrimonium quoad vinculum in causa adulterii, latini vero, quorum doctrinam postea vindicabimus, tuentur non dissolvi coniugium hoc in casu nisi quoad torum et cohabitationem. Utraque pars ad suam doctrinam et praxim protuendam innititur unice Christi verbis, quae in binis Matthaei textibus reperiuntur. Adeoque tum graeci tum latini constanter vocem *fornicationis*, quae in utroque textu occurrit, intellexerunt de *adulterio*, numquam autem de simplici fornicatione, quae coniugium praecesserit (79), alioquin nullum umquam locum eiusmodi dissidium habuisset. Ergo qui de fornicatione, prout ab adulterio distinguitur, interpretantur Christi verba universae ecclesiasticae antiquitatis sensui ac intelligentiae contradicunt. Addatur denique et illud; ex tot rom. pontificibus, ex tot conciliis, ex tot patribus latinis, imo et graecis, qui propugnarunt omnimodam indissolubilitatem coniugii adversus eos, qui pro sua sententia et praxi in causa adulterii hisce textibus abutebantur, neminem umquam insinuasse, aut excogitasse quidem hanc interpretationem de concubinato, qua

(78) Saltem ex consequenti, ut suo loco expendemus.

(79) Dixi *coniugium praecesserit*, nam si in statu coniugali quispiam cum concubina consuesceret, profecto vero adulterii crimine se commacularet; nec proinde adversariorum hypothesis ac interpretatio alio sensu intelligi potest.

semel admissa, ut recentiores hi interpretes profitentur, nulla omnino extaret in illis verbis *difficultas*.

Quandoquidem vero unicum argumentum ad novam hanc interpretationem persuadendam petitur ex philologia, quia, inquit, verba illa *excepta causa fornicationis... nisi ob fornicationem* nec significant, nec significare possunt flagitium ab alterutro legitimorum coniugum patrum cum extraneo; hoc enim non foret *πορνεία fornicatio*, inquit, sed *μοιχεία adulterium*, qua voce tale flagitium Christus constanter designavit in illis sermonibus; praestat modo, ut ex ipsa philologia argumentum quod affertur evertamus.

Iam vero vocem *πορνείαν* genericam esse, et ad significandum promiscue scortationis crimen sive cum soluta, sive cum muliere matrimonio copulata tradunt vel ipsi graeci auctores. Sane Svidas unus ex ipsis « *πορνεία*, inquit, etiam est *intemperantia*, quod (scortatores) mentem habeant induratam, » in qua significatione pariter s. Athanasius scribit: « *πορνεία* dicitur, quod urat *iuventutem*; et quod depravet vel quasi excaecet mentem (80). » Est autem a *περνάω* vel *πέρνημι*, quod est *vendo*. Scortator enim corpus suum prostituit, et veluti vendit et ex eo quaestum facit. Adeoque, ut diximus, vox generica est, quae significat *prostitutionem* et *scortationem*. Ex subiecta autem materia determinatur, ubinam *πορνεία* de prostitutione cum soluta an vero cum matrimonio iuncta accipi debeat, nempe de simplici fornicatione aut de adulterio.

Sane videmus notione *adulterii* *πορνείαν* a graecis usurpari; sic Clemens alex. dicit *πορνείαν* esse *ab uno matrimonio ad plura prolapsionem* (81). » In hac eadem

(80) Vol. II. pag. 54.

(81) *Stromat.* lib. III. pag. 464. qui praeterea lib. VIII. pag. 744. inter *πορνείας* seu fornicationis species etiam numerat *φυλοδοσίαν voluptatis studium, luxuriam*, eodem sensu sumitur Rom. I. 29., ut exponit Teophylactus

significatione locutus est s. Io. Chrysostomus dum affirmavit. « Eum qui propria (uxore) non vivit contentus, salvari impossibile est: sed necesse est talem omnino perire, etiamsi infinita bona opera fecerit: fieri enim nequit, ut quis cum scortatione (*πορνείας*, *fornicationis*) in regnum coelorum ingrediatur (82). » Item s. Basiliius: « Si quis cum uxore cohabitans, postea matrimonio non contentus in *fornicationem* (*εἰς πορνείαν*) inciderit, *fornicatorem* (*πόρνον*) eum iudicamus (83). » In quem s. Basilii locum scribit Balsamon: « Hoc loco (s. Basiliius) eum, qui uxorem habet, et cum alia soluta uxore lasciviam committit, *scortatorem* esse dicit, non moechum *πόρνον* εἶναι λέγει, οὗ μοιχόν (84). »

Sic etiam profani scriptores voces *πορνεία*, et *μοιχεία* promiscue sumunt. Exemplo sit Dio Cassius, qui de Messalina Claudii imperatoris perdita uxore scribit: « Messalina *adulterii et stupri* non contenta (85). » Cetera exempla, quae magno numero afferri possent, silentio praetereo, quae apud lexicographos recolare facile est (86).

Igitur cum ipsa ethimologica significatio, et antiquorum sive ecclesiasticorum sive profanorum scriptorum usus *πορνείας* vocem ad significandum promiscue tum forni-

in hunc loc. Item Estius; perinde ac I. Thessal. IV. 3., ubi idem Apostolus dehortatur ἀπὸ πάσης πορνείας ab omni *fornicatione*, ut exponit Theodoretus in hunc loc.

(82) Hom. LXIII, al. LXII. in Ioan. n. 4. Sic porro vertit hunc locum Montfauconius: « Qui sua (uxore) contentus non est, salvus esse nequit; sed pereat oportet, etsi mille bonis operibus sit instructus. *Fornicantem* enim impossibile est intrare in regnum coelorum; imo id iam non *fornicatio* est, sed *adulterium* etc. »

(83) Can. XXI. ad *Amphiloch.* ep. CXCXIX. ed. Maur. tom. III. pag. 292.

(84) In hunc can. pag. 955.

(85) Hist. rom. lib. LX. n. 50. Ἡ μεσσαλίνα... καὶ ἐμοιχεύετο, καὶ ἐπορνεύετο ad litt. et *moechabatur*, et *fornicabatur*. Opp. ed. Sturzii vol. III. Lips. 1825.

(86) Cf. Svicerum *Thesaur. eccles. ex patr. graec.* Item cf. Henric. Stephani: *Thesaurus graecae linguae*, ed. C. B. Hase et Guil. et Lud. Dudorfii Paris. typis Firm. Didot. vol. VI. ad hanc voc.

cationis tum adulterii flagitium admittant ac postulent, falso proinde assumitur *πορνείαν* in nostris textibus, non *significare*, nec *significare posse* flagitium ab alterutro legitimorum coniugum cum extraneo patratum. Invertere imo potius ita possumus argumentum, generica vox *πορνεία* non modo latissimam habet significationem ad designandam quamcumque impudicitiae speciem, sed nominatim promiscue usurpatur tum pro fornicatione simplici, tum pro adulterio; ex substrata proinde materia in quonam sensu usurpetur diiudicandum est. Cum vero luculentissime constet in nostris textibus adhibitam a Christo esse de muliere matrimonio iuncta; merito concludimus, eam vocem in istis locis nec *significare*, nec *significare posse aliud quam* flagitium ab alterutro legitimorum coniugum patratum cum extraneo.

Non video autem quomodo adeo asseveranter affirmetur Christum *constanter* voce *μοιχεία* designasse in illis sermonibus adulterium, quatenus a *πορνεία* seu a fornicatione distinguitur, ac propterea, quod consequens est, *constanter* pariter voce *πορνεία* significasse fornicationem, prout distinguitur ab adulterio. Hoc vere est assumere quod in quaestione est positum, seu potius quod omnino negari debet.

Quinimo, eo ipso, quod Christus verba *μοιχᾶσθαι* et *μοιχᾶται*, scilicet *moechari* et *adulterat* protulerit, confirmatur vocem *πορνείας* fornicationis usurpasse in sensu *adulterii*. Ratio est, quia iuxta doctrinam catholicam, quam postea adstruemus, Christus his verbis concessit quidem parti innocenti separationem quoad torum et cohabitationem, non autem quoad vinculum, quod perpetuum manet etiam in casu adulterii alterutrius coniugis, adeoque, qui manente coniugii vinculo alteram in uxorem ducit, vere *moechatur* et *adulterat*, ac etiam *moechari facit* dimissam, quae alteri nubat. Quae verissima quidem sunt

si Christus locutus est de dimissione uxoris propter illius adulterium ; essent autem falsa in adversariorum interpretatione de concubina , vel de foemina ac viro qui fornicarie viverent. Quomodo enim posset esse adulter vel adultera , qui , relicto statu fornicario , legitime cum altero aut cum altera se coniungeret ?

Equidem haud ignoro huius interpretationis patronos exceptionem illam ad incisum etiam sequens protendere , ac ita Christi verba exponere ! « Omnis qui dimiserit uxorem , *excepta fornicationis causa* , vel *nisi ob fornicationem* , et aliam duxerit , moechatur et adulterat. » Verum praeterquam quod aleae res plena est eam clausulam etiam ad insequens incisum referre , quum id faciant ad alium scopum etiam protestantes , ut evincant scilicet in causa adulterii licere non solum *dimittere* uxorem , sed *aliam* insuper *ducere* ; hoc , inquam , omisso , si vera esset illa expositio , hunc funderent sensum Christi effata : « Omnis qui dimiserit uxorem suam , excepto casu , quod ea non vere uxor sit , sed tantum fornicaria seu mera concubina et pellex , vel praeter statum concubinatus et fornicariae unionis , moechatur et adulterat. » At quis non videt violentam , imo et absurdam sententiam ex hac hypothesisi , seu expositione exurgere ? Si est *uxor* et quidem *sua* , non est *concubina* ; si est *concubina* , non est *uxor*. Christus autem loquitur de uxore , et de viro qui dimittit *uxorem suam* , non autem *concubinam suam* , aut *pellicem suam* , quae talis esse nequit , nisi ante initum coniugium , aut per mortem alterius solutum , alioquin si in vero coniugio , aut cum coniugato delinqueret , esset *adultera* , quod adversarii nostri inficiantur .

Itaque quaqua versus spectetur novissima expositio horum textuum evangelicorum , sive nempe spectemus orationis seriem , sive scopum Christi , sive versiones antiquas , sive unanimem sanctorum veterum interpretatio-

nem, sive sensum ecclesiae, sive theologorum omnium consensum, sive controversias, quae hac de causa viguerunt ac vigent, sive sensum absurdum quem praeserrent Christi verba, evidens est eam nullo modo probari et admitti posse, etsi non diffitear optima intentione et in optimum finem invectam eam esse, ad eripiendum scilicet protestantibus praecipuum fundamentum cui innituntur ad ecclesiae catholicae hac in re concutiendam doctrinam. Ast baculus arundineus ineptus est ad fulciendum hoc argumentum, seu falsam ac praeposteram interpretationem. Et haec hactenus.

ARTICULUS III.

Dogmatica Ecclesiae interpretatio doctrinae biblicae
de indissolubilitate Matrimonii christiani argumentis
hermeneuticis scientificè demonstratur.

§. I.

Indissolubilitas matrimonii christiani etiam in causa adulterii ex scientifica
exegesi textuum Matth. V. et XIX. deducitur.

Ut ex ordine quaestionem hanc exordiamur 1. expendemus Christi scopum hisce in locis, 2. verborum contextum; 3. necessitatem catholicae interpretationis ad vitanda gravissima incommoda, quae ex novatorum et graecorum expositione ac sententia proveniunt. Quo autem firmitus res nostra constituatur, expendemus seorsum utrumque textum, ut appareat eandem iis subesse sententiam.

Christus igitur Matth. V. 31. 32. ita locutus est: «Dictum est autem: quicumque dimiserit uxorem suam, det ei libellum repudii. Ego autem dico vobis: quia omnis, qui dimiserit uxorem suam, excepta fornicationis causa, facit eam moechari: et qui dimissam duxerit, adulterat.» Iuxta adversarios, Christus his verbis: *excepta fornicationis*

causa, ob fornicationis seu adulterii causam facultatem praebuit tum dimittendi uxorem delinquentem, tum, illa dimissa, aliam ducendi.

Porro scopus Christi contrarium omnino ostendit. Et enim Christus novam legislationem, qua in ecclesia sua matrimonia regi debeant, opponit legi mosaicae, iuxta quam permissa erat vinculi coniugalis solutio. Iam vero finem hunc non attigisset, si quemadmodum in veteri lege, ita et in nova concessisset viro non solum dimittere uxorem, sed etiam repudiata prima, alteram ducere, itemque si mulieri dimissae post divortium concessisset alteri nubere, interveniente adulterii flagitio.

Quae ut clarius intelligantur, duo dispendenda hic sunt, ut plus semel diximus, facultas dimittendi uxorem, et facultas alteram ducendi. Primam coarctavit Christus ad solum fornicationis seu adulterii casum; et huc referuntur priora Christi verba: « Omnis qui dimiserit uxorem suam excepta fornicationis causa, facit eam moechari; » ad alteram spectant posteriora verba; « et qui dimissam duxerit, adulterat » quibus verbis facultas novas ineundi nuptias aperte negatur. Quod Christus in casu adulterii facultatem concesserit dimissionis quoad torum et cohabitationem nulla movetur quaestio, cum haec ab omnibus sive catholicis sive acatholicis facile admittatur, de qua et nos postea acturi sumus.

Igitur difficultas est quoad facultatem aliam ducendi, dimissa adultera, seu quoad vinculi solutionem. Hanc porro facultatem Christus omnino sustulit. Sane, si Christus per verba: *et qui dimissam duxerit, adulterat*, non sustulisset solutionem matrimonii quoad vinculum, non dedisset legem antiqua praecellentiorum; imo sub aliquo respectu legem dedisset mosaica deteriore. Iam vero Christus in hoc commate declaravit se uti novum legislatorem emendare velle, atque ad perfectionem adducere antiquam de

coniugio legem, ut patet ex illa antithesi: *Dictum est... Ego autem dico.*

Ac profecto non dedisset legem antiqua praecellentio-rem, cum non aliam matrimonio firmitatem, quam quae iam in veteri lege vige-
bat, constituisset. Siquidem quemadmodum in veteri lege, permittente Deo, poterat dimitti uxor et solvi coniugium, sic in nova posset uxor pariter dimitti et coniugium solvi. Nec obstat, quod Christus causam huius solutionis ad solam fornicationem coarctaverit; nam hoc ipso deterior aliquo modo fuisset huius legis conditio. In lege enim mosaica per libellum repudi uxori dimissae concedebatur facultas alteri nubendi, ast sine infamiae nota; etenim etiam sine ipsius culpa ob aliquem physicum defectum sive verum sive putatum, vel etiam ob mariti ipsius ingenium et ἀντιπάθειαν, vel odium aliamque eiusmodi causam poterat dimitti (87). Quod si infamis fuisset, ac de adulterio eiusve suspicione convicta, alium maritum invenire nullatenus, aut vix potuisset. Hac de causa, ne iniuria uxor repudiata afficeretur, in libello repudii minime recensebantur repudii causae, saltem singillatim; sed eo spectabat libellus repudii, ut posthac declararetur liberum esse uxori dimissae cuicumque nubere. Hinc Iosephus Flavius legem Moysis declarans scribit: « Qui a coniuge, quacumque de causa, ut saepe hominibus usuvenit, disiungi postulat, scripto ei securitatem faciat, quod eam nolit amplius. Sic enim *habebit potestatem alterius coniugis quaerendi*; alioquin divortium non permittitur (88). » Contra vero in evangelica lege, in adversariorum hypothesisi, numquam repu-

(87) Reipsa paulo ante ostendimus nullo modo per *hervat dabar*, seu *foeditatem* designari posse adulterium, eiusve suspensionem; quia hoc foret contra legem constitutam de adulterio, aut de adulterii suspicione. Quare ut non obscure colligitur ex Deut. XXIV. 4. et ex Malach. II. 2. sufficiebat ad repudium mariti odium. Cf. Salmeron *Comment. in hist. evangelic.* tom. V. tract. XXXIX. ed. Colon. Agrip. pag. 222. seqq.

(88) *Antiquit.* lib. IV. c. 8. n. 23.

diari posset uxor, quin publice esset infamia notata ac de adulterio convicta. Id vero absonum est, essetque hoc sub respectu evangelica lex, ut diximus, aliquo modo lege mosaica deterior.

Sed et ex alio capite deterior foret lex Christi lege Moysis, quod hic morte plectendos statuerit adulteros (89); contra vero Christus nova lege sua constituisset ut adultera aut adulter possent novis se iungere nuptiis, adeoque viam latissimam hac ratione coniugiorum solutioni, et adulteriis viam aperuisset, ita ut quoties coniuges vinculi sui pertaesi novo inhiarent coniugio, toties per adulterium viam sibi ad novum coniugium parare possent.

Eo vel magis quod in veteri lege, solis viris concessum esset uxori repudium dare (90), contra vero in nova, ut patet ex Marci X. 12. «Et si uxor dimiserit virum suum et alii nupserit, moechatur,» in adversariorum interpretatione, si vir fornicationis seu adulterii reus esset, posset uxor etiam coniugium dirumpere, et alii nubere. Nemo vero ignorat longe procliviores esse mulieres ad novas nu-

(89) Deut. XXII. 22. «Si dormierit vir cum uxore alterius, uterque morietur, id est, adulter et adultera: et auferes malum de Israel.»

(90) Quod etiam testatur Iosephus dum op. cit. lib. XV. c. VII. n. 10. disserens de Salome, quae Castabro marito suo ob ortum inter se dissidium, miserat libellum repudii ad dissuendum matrimonium, subdit: «Contra quam ferunt iudaeorum leges; nam viro quidem apud nos id facere licet; *neutiquam vero foeminae*, quae sponte discesserit, nec alteri nubere fas est, nisi prius a marito dimittatur.» Opp. edit. Havercamp tom. I. pag. 764 seq. In adductis verbis insinuat duplex dimissio, altera quoad vinculum per repudii libellum; altera quoad torum, quae sine libello repudii dari poterat. Per hanc posteriorem dimissionem coniugii vinculum non dissolvebatur, nec poterat uxor dimissa ad alia vota transire; per priorem vero, integrum ius erat dimissae novas celebrare nuptias. Hinc ex historia gentis et morum iudaeorum apparet quomodo iudaeis clara esse debuit ea Christi locutio, quae grammaticae videri posset ambigua; nimirum an ea exceptio ad solam dimissionem coërceri deberet. Nam quoniam apud iudaeos haec duo usu et consuetudine distinguebantur, scilicet uxorem simpliciter dimittere, et illi omni vinculo solutae novas nuptias permittere, hinc quoniam Christus exceptionem posuit post verbum *dimiserit*, nullam vero post verbum *duxerit*, intelligere iudaei satis potuerunt, adulterium legitimam esse causam solius dimissionis, non autem pleni repudii etiam quoad vinculum.

ptias quam viros, ac animo mobiliores. Hinc rursum hoc ex capite deterior evaderet lex Christi Mosis lege, contra apertum Salvatoris nostri sensum, qui eo spectabat, ut perficeret legem veterem, et omnem imperfectionem pro rerum ac temporum conditione illi inhaerentem prorsus tolleret.

Nisi igitur velimus aperta fronte Christi scopo adversari, fateamur necesse est, in hemistichio altero vers. 32. *Et qui dimissam duxerit, adulterat*, Christum omnimodam indissolubilitatem coniugii significare voluisse.

2. Verum idipsum ex verborum contextu, seu ex orationis serie non minus luculenter efficitur. Etenim verborum Christi tenor ita se habet: « Ego autem dico vobis, quia omnis, qui dimiserit uxorem suam, excepta fornicationis causa, *facit eam moechari*: et qui dimissam duxerit, adulterat. » Iam vero particula illa seu incisum: *facit eam moechari*, profecto ad uxorem referri nequit eo sensu, quod eo ipso censeri debeat adultera, quod sit a marito dimissa. Nam uxor in hac dimissione passive potius quam active se habet, adeoque si ipsa per se dimissio adulterium constitueret, hoc esset potius ex parte mariti dimittentis uxorem citra eius culpam, quam ex parte uxoris dimissae. Hinc adulterium, cuius per uxoris suae dimissionem vir causa extitit, in duplici tantum hypothese locum habere potest; aut nempe cum mulier dimissa alteri viro nubit, aut cum dimissa, quin secundo nubat, vitam agit fornicariam. Priorem casum seu hypothesin Christus diserte exprimit verbis illis: *Qui dimissam duxerit, adulterat*; quibus declarat mulierem quamvis a viro dimissam, adhuc in priori suo matrimonio quoad vinculum permanere, atque idcirco reum adulterii fieri, qui eam adhuc coniugali vinculo adstrictam in coniugium sibi copulaverit. Alterum vero casum seu hypothesin Christus *exclusit* iisdem verbis: *facit eam moechari*, significans eos

adulterare qui cum dimissa fornicariam vitam agente se coniunxerint; atque eiusmodi adulterinarum coniunctionum reum fieri maritum, qui uxorem suam repudiaverit, eo ipso quod vinculum sui coniugii etiam post dimissionem perseverat; alioquin dixisset Christus *facit eam fornicari*, non autem *facit eam moechari*.

Quod si mulier viro suo dimissionis iustam dederit causam propter fornicationem, seu potius adulterium cum altero patratum, vir eam dimittendo non poterit amplius reus esse adulterii, quod dimissa uxor patrauerit sive alteri nubendo, sive vitam inhonestam ducendo; malitiae enim suae unice adscribere ea deberet, sive attentaret secundum coniugium, sive cum alienis vitam inhonestam duceret; contra vero complex horum delictorum esset ex Christi verbis vir ille, qui absque fornicationis seu adulterii crimine uxorem suam in perpetuum dimitteret.

Quapropter sequitur ex orationis serie atque ex toto contextu verborum Christi, hunc illi sententiae subesse sensum: « Omnis qui uxorem suam praeter vel citra fornicationis causam dimittit, occasionem praebet, ut pari ratione adultera fiat, si post suam dimissionem alteri nupserit, prout illa, quae ob causam fornicationis dimissa fuit, adultera est, quia omnis, qui dimissam duxerit, adulterium committit; seu quod idem est, vir uxorem suam absque fornicationis causa repellens, quodammodo inchoat adulterium, quod per initum cum dimissa novum matrimonium consummatur; contra vero vir, qui uxorem suam ob causam fornicationis a se repudiat, separat quidem se ab illa tamquam infideli consorte, adulterii tamen ipsius causa et socius non efficitur, quippe quae ipsamet adulterium perpetrando, adulteram se facit; sed vir, qui ita dimissam ducit, adulterium ipsius continuat, cum non coniugalem societatem, sed adulterinum connubium cum

eadem iniisse censendus sit, quia *omnis qui dimissam ducit, adulterat* (91).

Quam quidem genuinam ac germanam esse Christi mentem in hoc effato melius etiam ostenditur ex abolitione libelli repudii a Moyse concessi, cuius effectus erat, ut vidimus, libertatem tribuere uxori dimissae alteri nubendi. Hoc igitur sublato, iam nulla remanet uxori dimissae aut eiectae potestas alias ineundi nuptias; et declaratur antea actum coniugium integrum quoad vinculum subsistere; nec maritum, dimissa uxore fornicationis causa, posse alteram ducere; neque uxorem eadem de causa dimissam posse alteri nubere, quin adulteriis se commaculent. Atque haec fuit plane res nova, ac antea in populo iudaico inaudita, omnimoda nimirum firmitas, seu indissolubilitas coniugii a Christo inducta.

3. Necessitas demum nostrae interpretationis verborum Christi efflorescit ex incommodis, quae in adversariorum sententia orirentur. Praecipuum porro ex his incommodis est, quod dimissa adultera in meliori esset conditione, quam innocens uxor, quae forte citra culpam dimitteretur. Etenim si ex causa tantum fornicationis seu adulterii coniugii vinculum solvi posset; hoc non interveniente, connubium indissolubile permaneret. Adeoque, si alia de causa, praeter quam ob fornicationem, vir uxorem dimitteret, haec nequiret ad novas transire nuptias; contra vero uxor fornicaria sive adultera, posset alteri nubere. Haec propterea praemium referret ex sua nequitia, illa autem poenam daret ob servatam pudicitiam. Quod quam absurdum sit, nemo est qui non videat. Itidem vir qui dimissam adulteram duceret, non moecharetur, moecharetur autem, qui duceret dimissam pudicam; quod aequè est non mediocriter absurdum.

Nonnulli vellent hoc in casu mulierem moecham de-

(91) Ita praeclare hunc textum enarrat Roskovány op. cit. §. 86.

bere in perpetuum privari iure suo alteri nubendi in poenam patrati criminis, sicque praefatum incommodum evanesceret. Ast, uti observat Bellarminus, etsi prohiberetur uxor adultera alteri nubere in poenam patrati flagitii, uxor tamen libera esset ac soluta a vinculo prioris coniugii, ac proinde peccaret quidem nubendo, et forte etiam matrimonium esset nullum, sed non *moecharetur* sive ipsa sive qui eam duceret; neque enim est adulterium nisi cum coniuge alterius; Dominus autem disertis verbis pronunciauit: *et qui dimissam duxerit, adulterat* (92). Haec quidem ipse; quidquid porro sit de sensu verborum Christi, *qui dimissam duxerit, adulterat*; quoniam adversarii ea accipiunt cum opposita clausula, *excepta fornicationis causa*, illud nos solum animadvertimus, quod in eorum hypothesi, qui duceret adulteram non foret *adulter*, adulteraret autem, qui iungeret se cum innocente, adeoque neque hac ratione vitare possunt incommodum a quo bonus et communis sensus refugit.

Alterum incommodum est illud ipsum, quod paulo ante inuimus, nimirum admissa adversariorum sententia, habenas laxari adulteriis ac proinde iugi coniugiorum dissolutioni, prout experientia penes protestantes, qui ita interpretantur Christi verba apud Matthaeum, evincit (93). Hoc vero pessumdat moralem Christi doctrinam.

Nunc gradum facimus ad Matth. XIX. 3 seqq. ubi Christus uberius adhuc et clarius eadem ipsa quae Matth. V. docuerat de absoluta coniugii indissolubilitate, declarat confirmatque. Id vero colligimus triplici ex capite, tum nempe ex responsione Christi ad propositam sibi a pha-

(92) *De matrim.* c. XVI. n. 4.

(93) Notum est plerumque tum in Borussia tum in aliis Germaniae provinciiis, non alia de causa tanto numero per annos singulos a tribunalibus sententias divortiorum pronunciari; alibi id ipsum de Anglia testati sumus; nunc vero eo facilius est divortiorum ibi facilitas ob novam, quae his fere diebus sancita est, legem de divortio.

risaeis quaestionem; tum ex generali eiusdem affirmatione ac sententia; tum denique ex discipulorum admiratione.

1. Igitur cum accessissent pharisaei ad Iesum «*tentantes* eum (94), et dicentes, si licet homini dimittere uxorem suam quacumque ex causa?» Respondit eis Christus: «Non legistis, quia qui fecit hominem ab initio, masculinum et foeminam fecit eos et dixit: propter hoc dimittet homo patrem et matrem, et adhaerebit uxori suae, et erunt duo in carne una. Itaque iam non sunt duo, sed una caro. Quod ergo Deus coniunxit, homo non separet. Dicunt illi, quid ergo Moyses mandavit dare libellum repudii et dimittere? Ait illis: Quoniam Moyses ad duritiam cordis vestri permisit vobis dimittere uxores vestras: ab initio autem non fuit sic.» Quibus verbis Christus declaravit coniugium in sua institutione fuisse prorsus indissolubile, utpote quod artissimo nexu coniuges ita uniret, ut non nisi carnem unam unamque moralem personam efficeret, quae separari seu divelli a se omnino nequit. Dissolvit exceptionem a Mosis lege petitam, exponens illam permissionem dandi libellum repudii, adeoque dissociandi coniugium, aliamque uxorem ducendi fuisse temporaneam, atque oeconomiae gratia ob duram populi indolem concessam, quae proinde auferenda esset, ut coniugalis unio ad primaevam divinam institutionem revocaretur.

2. Quod si ita est, suapte natura consequitur Christum insequentibus verbis: «Dico autem vobis, quia quicumque dimiserit uxorem suam, nisi ob fornicationem, et aliam

(94) Memores forte pharisaei eorum, quae Christus dixerat Matth. V. 32, eaque conferentes cum eo, quod Moyses permiserat iudaeis, repudiare uxores suas, quas odisse coepissent, dato libelli repudio, sperabant se eo acturos Dominum Iesum, ut in alterutrum dilemmatis cornu impingeret, nempe vel ut sibi ipsi contradiceret, quo fidem seu doctrinam suam ac proinde existimationem penes populum deicerent, vel Moysi repugnaret, quod scelus fuisset, et blasphemiae genus morte piandum. Cf. Drach. *Du divorce dans la synagogue* pag. 82 seq. Hoc ipsum insinuat s. Io. Chrysostomus hom. 62. alias 63. in Matth.

duxerit, moechatur, et qui dimissam duxerit, moechatur, » haud potuisse per exceptionem fornicationis restituere libellum repudii dando facultatem, illa interveniente, dimittendi uxorem aliamque ducendi. Qua in hypothesis contrarium ipse se praebisset illi firmitati, quam ab initio Deus in coniugio instituerat, quamque sibi instaurare proposuerat. Quocirca hoc ipso, quod pharisaei interrogaverunt Christum de dissolutione coniugii quoad vinculum, et Moyses eam legem quoad vinculum indulserat ob cordis duritiam, non potuit Christus illis verbis: *nisi ob fornicationem*, eiusmodi flagitium tamquam legitimam causam dissolutionis vinculi coniugalis assignare; alioquin et sibi ipsi fuisset contrarius et primaevae institutioni divinae. Permisit itaque ob fornicationem uxorem dimittere, vinculo tamen coniugii permanente, seu permisit dimittere unice quoad torum et cohabitationem.

Ad haec accedit, quod si Christus de omnimoda vinculi dissolutione locutus fuisset in primo versiculi 9. hemystichio: *Quicumque dimiserit uxorem suam, nisi ob fornicationem*, cum in hac hypothesis iam comprehenderetur facultas alteram ducendi uxorem, superflue addidisset: *et aliam duxerit*; nam id ipsum iam dixisset aequivalenter prioribus verbis. Ne igitur supervacanea eiusmodi additio admittatur, necessario sequitur prima verba intelligenda esse de *dimissione* quoad torum et habitationem, non autem quoad vinculum (95).

3. Reipsa germanam hanc esse Christi sententiam ex ratione, qua eam intellexerunt discipuli, manifestum fit. Nam cum Christum ipsi audissent dicentem: *Quicumque aliam duxerit uxorem priori dimissa, et qui duxerit dimissam etiam ob fornicationem moechari*, illico mirati dixerunt: « Si ita est causa hominis cum uxore, non ex-

(95) Cf. Salmeronium tom. VIII. tract. XLVIII. ed. cit. pag. 377.

pedit nubere. » Haec autem admiratio nullum potuisset locum habere, si Christus in textu Matthaei declarasset coniugium ita per fornicationem dissolvi, ut dimittens ac dimissa possent ad novas nuptias transire. Siquidem hoc in casu nihil novi Christus intulisset, quod receptum non esset penes iudaeos, si excipias maiorem facilitatem novas ineundi nuptias illo in casu, in quo iuxta mosaicam legem adulteri morte plectendi essent. Attamen discipuli mirati sunt, eo quod novum quid hactenus inauditum rigidae severitatis Christus protulerit. Christus autem discipulos ab hac verborum suorum intelligentia non modo non removit, sed etiam confirmavit respondens illis: « Non omnes capiunt verbum istud, sed quibus datum est. » Quid porro difficile intellectu fuisset, si Christus docuisset propter fornicationem seu adulterium, matrimonium dissolvi cum facultate alteram ducendi? Nam id omnes antea non solum intelligebant, sed et in praxim deducebant ob longe leviores causas. Christus vero ex discipulorum admiratione nactus est occasionem ut discipulos suos ad caelibatum amplectendum hortaretur.

Ut omnia proinde cohaereant in hac Christi sententia, dicendum omnino est, Christum his verbis unicam dimissionis causam intrinsecam scilicet et perpetuam, ut suo loco ostendemus, constituisse in solo fornicationis casu; et quidem ita, ut etiam in hoc casu, per abolitionem libelli repudii a Mose concessi, non liceat novum post dimissionem inire coniugium; adeoque clausulam de qua agimus *nisi ob fornicationem*, ad solam referri facultatem dimittendae adulterae, non autem ad facultatem novae ducendae uxoris. Seu quod idem est, Christus in priori hemistichio locutus est de separatione quoad torum, non autem quoad vinculum; alioquin ipse patrocinator esset mulieri adulterae, quippe cui facultatem fecisset in posterum libere, et in vero coniugio cum adultero permanere, si

id ei libuisset (96) ; aut etiam per nova iugiter flagitia transire de coniugio in coniugium.

Demum ; vel dissolveretur matrimonium quoad vinculum solo fornicationis actu , et tunc non posset maritus huiusce criminis conscius sine adulterii flagitio , aut saltem fornicationis se cum adultera muliere coniungere , quia haec non amplius esset eius uxor , utpote soluto coniugio ; vel id penderet a viri voluntate , aut per actum iuridicum , et tunc vir dissolveret quod Deus coniunxerat , quod ex Christo homo facere non potest. Ergo fornicationis scelus matrimonium quoad vinculum non solvit.

Nec obest , ut aliqui excipiant , quod si nostra admitteretur interpretatio , Christus non respondisset quaestioni pharisaeorum. Illi enim interrogaverunt de solutione quoad vinculum , prout ferebat lex Moysis permittens libellum repudii ; ipse autem locutus fuisset de sola solutione quoad torum. At vero hoc ipso quod Christus voluit eos abducere ab illa coniugii dissolutione , eamque prorsus abrogare nova sua legislatione , coniugiumque ad primaevam conditionem revocare , in qua a Deo institutum fuerat , opportune omnino respondisse dicendus est , dum in nullo casu coniugium dissolvi edixit , ac solam fornicationem praebere ius dimittendae uxoris , quin haec dimissa ius haberet ad alias nuptias , aut aliquis , quamdiu in vivis esset eius maritus , illam legitime ducere posset. Non desunt , qui dicant , eo ipso quod pharisaei ad eum tentandum accessissent , Christum consulto non respondisse ad mentem eorum , sed aliquid omnino diversum ab eo quod ipsi voluissent ; ideoque ita eum respondisse aiunt , ut turba praesens erudiretur , et illi confun-

(96) Cum ageretur in anglico senatu an. 1857. de probanda nova lege divortii , episcopus anglicanus eboracensis voluisset , ut saltem apponeretur in lege clausula , quod , dissoluto propter adulterium coniugio , non posset adultera adultero nubere. Ast perperam ; nam eiusmodi clausula plurimorum suffragio reiecta est. Attamen nemo est qui in hoc non deprehendat turpitudinem.

derentur et punirentur, quod exemplis aliis cofirmant (97). Esto, nihil est quod repugnet.

Ex collatione igitur utriusque textus, prout hactenus vidimus, aperte colligitur, Christum utrobique sibi proposuisse plenam perfectamque restituere coniugio firmitatem, quam Deus ab initio humani generis constituerat, omnemque vinculi coniugalissolvendi causam abolere, e medio tollendo a Moyse concessam libelli ripudii facultatem; seu, quod idem est, constituisse coniugium prorsus indissolubile etiam in causa adulterii, prout ecclesia catholica contra protestantes et graecos dogmatice docet.

Ex his pronum est inferre, prout alias innuimus, 1. quod Christus coarctaverit causam dimissionis ad fornicationem, quin quidpiam expresse dixerit, ut plures volunt, de eo quod fieri posset uxore dimissa; siquidem id postea secreto discipulis suis palam aperuit, ut constat ex Marci X. 11. 12. et Lucae XVI. 18. ut mox expendemus, dum nulla apposita exceptione ipsis palam denunciavit omnimodam ac perfectam coniugii christiani indissolubilitatem. Ideo vero solam assignavit fornicationis causam ad dimittendam uxorem, quia haec intrinseca est ipsi coniugio, cuius fidem fornicaria uxor infringit.

2. Interpretationem quam heic exhibuimus ac vindicavimus cum communi theologorum catholicorum consensu iuxta regulas hermeneuticas non modo defendere, verum etiam positive adstruere ac probare ecclesiae doctrinam, quin necesse sit ad novas ac peregrinas plus minusve a veritate abhorrentes interpretationes confugere, quas in praecedente articulo critice expendimus atque reiecimus. Invectae illae sunt ad nodum praecidendum difficultatis; ast nodus ille solvi optime potest ostendendo, prout praestitimus in praesenti paragrapho, solam exceptionalem clausulam a Christo appositam referri ad prius incisum de *di-*

missione, non autem ad incisum subsequens de alia ducenda aut non ducenda uxore (98).

§. II.

Eadem interpretatio textuum Matthaei de omnimoda christiani matrimonii indissolubilitate ex Marci X. et Luc. XVI. stabilitur.

Quae diximus de Christi mente circa omnimodam conjugalis vinculi firmitatem, mirifice confirmantur locis parallelis Marci X. 11. 12. et Lucae XVI. 18. Nam nulla iniecta de fornicatione exceptione, Christus utroque in loco absolute pronunciat adulterii reos fieri, quicumque, facto divortio, novas nuptias inierint. Ut autem utriusque textus vis appareat, praestat eorum quemlibet cum suis adiunctis referre et expendere, idque adversus eos, qui subintelligendam in iis esse putant eandem pericopen, quae apud Matthaeum occurrit, atque ex Matthaeo supplendum quod in aliis evangeliiis omissum est.

Refert igitur s. Marcus, quod cum audissent discipuli responsum a Christo pharisaeis datum de indissolubilitate coniugii, facta abolitione libelli repudii, revocatoque coniugio ad pristinam institutionem: « In domo iterum discipuli eius de eodem interrogaverunt eum. Et ait illis: Quicumque dimiserit uxorem suam, et aliam duxerit, adulterium committit super eam. Et si uxor dimiserit virum suum, et alii nupserit, moechatur. » Quae quidem verba adeo sunt perspicua, ut nullum tergiversationi locum relinquunt.

Verum hoc ipso nihil intentatum adversarii omittunt, ut illis tenebras offundant. Alii enim ex eo, quod Marcus mentionem iniecerit de *uxore dimittente virum suum*, quam Matthaeus praetermisit, inferunt Marcum non e sermone Iesu verba illa reddidisse, sed a Petro apostolo cuius fuit

(98) Cf. Bellarmin. *De matrim.* cap. XVI.

interpres, accepta, evangelio suo inseruisse (99). Alii animadvertunt mulieres quidem ex spiritu legis mosaicae potuisse maritos suos coram iudicibus accusare, eosdemque quodammodo ad repudiationem cogere, sed propria auctoritate dimittere haud potuisse (100). Verum haec levia sunt. Nam quod recensita verba a Christo prolata non fuerint, sed a Marco adiecta ex Petri doctrina, veritati evangelicae narrationis aperta fronte adversatur, ac sine ulla probatione atque ex mera coniectura, eaque gratuita ac temeraria affirmatur. Quod vero adiicitur de iure uxorum, ratione habita spiritus legis mosaicae, parum refert ad rem nostram. Quamquam rationes non desint, ob quas Marcus retulerit quae ad uxores dimittentes viros suos spectant; sive quod reipsa, ut nonnulli contendunt, et illae praestare id potuerint iuxta legem (101); sive quod saltem ex abusu mos iste iam invaluerit (102); sive denique quod Christus apostolos futuros gentium praecones, apud quas ius istud receptum erat, voluerit privatim, *in domo*, hac de re instruere (103).

Illud gravius est, quod plerique omnes protestantes contendunt, supplendam in Marci adeoque et Lucae narratione eam exceptionem esse de fornicatione, quae occurrit apud Matthaeum, idque autumant fieri debere, ne Marcus et Lucas cum Matthaeo pugnare videantur. Siquidem propositiones contradictoriae sunt: *Omnis qui dimiserit.... moechatur*, et *non omnis qui dimiserit moechatur*; iam vero

(99) Apud Roskovàny op. cit. pag. 160.

(100) Uti Michaëlis in op. *De iure mosaico* part. II. ed. 2. Francof. 1776. pag. 352.

(101) Cf. Danz, *Dissertatio: Uxor maritum repudians secundum leges hebraeorum*, recusa in *Meunchenii Novo Testamento ex antiquitatibus hebraicis illustrato* pag. 677.

(102) Paulo ante ex Iosepho retulimus Herodis Magni sororem Herodidem, Salome, aliasque earum exemplo repudiasse viros suos, libellumque repudii dedisse ad instar mulierum romanarum.

(103) Uti Kuinoel *Commet. in lib. histor. N. T.* in hunc loc.

posterior haec sententia ex Matthaeo colligitur, cum idem sit dicere: *Omnis qui dimiserit, excepta fornicationis causa, moechatur et non omnis qui dimiserit moechatur*; prior autem sententia apud Marcum et Lucam habetur, nisi eadem exceptio fornicationis intelligatur. Confirmant vero assumptum potissime respectu Marci, quod hic habeatur uti Matthaei epitomator; cum propterea in compendium illius evangelium redegerit, mirum esse non debet, si hanc clausulam de exceptione fornicationis omiserit.

Ut hisce difficultatibus respondeamus, sedulo quaestio principalis ab incidenti distingui debet. Quaestio principalis tum apud Matthaeum tum apud Marcum est una eademque, nempe indissolubilitas perfecta matrimonii christiani, ita ut non liceat uxorem dimittere et aliam ducere. Hic est Christi scopus libellum repudii abolere, atque omnimodam coniugii indissolubilitatem statuere, sublata dimittendae uxoris facultate. At quoniam dimissio generice sumi potest pro simplici dimissione, ac pro dimissione quae ipsum vinculum dirimat, incidenter apud Matthaeum aliqua dimissio licita dicitur; nempe fornicationis causa. Haec est exceptio quae incidenter ponitur, nulla addita explicatione, eo ipso quod quaestio principalis non esset, an liceat quandoque dimissio; quum potius scopus primarius sit indissolubilitatem docere. Marcus id quod pertinet ad quaestionem principalem refert; omissa propositione incidente, quae ad rei substantiam non spectat. Si ea clausula respexisset plenum divortium, tum salva rei substantia omitti a Marco non potuisset; secus, ut adversarii aiunt, aliqua adesset contradictio. At quoniam clausula solam dimissionem incidenter respicit, nulla prorsus contradictio habetur; imo una est apud Matthaeum et apud Marcum sententia, nimirum perfecta indissolubilitas matrimonii christiani. Discrimen igitur in hoc tantum est, quod apud Matthaeum praeter doctrinam de indissolubili-

tate, incidenter habetur aliquid de simplici dimissione, et aliquis apparet respectus ad libellum repudii. Hoc sensu dici potest textum Matthaei esse pleniorum, quatenus incidentem propositionem continet pro iudaeis potissimum opportunam: at sententia primaria ita plena est et absoluta penes Marcum, ac est penes Matthaeum.

Revera iam aetate sua Bellarminus animadverterat evangelistas omittere quidem interdum aliquid, aut addere, quod alii evangelistae non omiserunt aut non addiderunt, sed numquam ita omittere, ut sententia reddatur falsa: alioquin evangelistae homines, quibus evangelia sua tradiderunt, nulla mentione facta aliorum evangelistarum, decipissent. Porro cum Marcus Romae suum scripsit evangelium ex Petri praedicatione acceptum, non remisit romanos ad evangelium Matthaei, quod fortasse nondum Romam delatum fuerat, sed scripto illis dedit, memoriae causa, quod viva voce Petrus ipsis praedicaverat (104). Idem die de Luca, qui in gratiam gentium, quibus evangelium Paulus annuntiaverat, suum scripsit evangelium, antequam Matthaei ac Marci volumina ad eas pervenissent. Qui proinde his solis evangeliiis utebantur, decepti fuissent, si falsa essent, quae de absoluta indissolubilitate coniugii in hisce evangeliiis referuntur (105).

Ex his pariter concidit, quod de Marco Matthaei abbreviatore vulgo traditur. Nam praeter quam quod, hoc, ut innuimus, cum historia non congruit, ex ipsa utriusque evangelii collatione nunc penes criticos biblicos exploratum est, nullo modo s. Marcum in compendium evangelium Matthaei redegisse (106).

(104) Hanc veram occasionem conscripti a Marco evangelii referunt s. Irenaeus *contr. haeres.* lib. III. cap. I. Eusebius *Hist. eccles.* lib. II. c. 15. et s. Hieronymus *De viris illustribus*, in *Marco*.

(105) Bellarm. *De matr.* cap. XVI. n. 6 seqq.

(106) Sane abbreviatoris munus est ordinem persequi principalis auctoris, ac praeterea brevius dare quae fusius principalis auctor scripserat. At s. Mar-

Contradictio autem quam dicunt exurgere inter Marci ac Lucae evangelia atque evangelium Matthaei, nisi in illis subintelligatur exceptionalis clausula de causa fornicationis, innititur tantum anticipato iudicio de interpretationis veritate, quod Christus apud Matthaeum reipsa docuerit solvi coniugii vinculum per fornicationem, quod ostendimus aperte falsum esse pluribus argumentis. Hac sublata interpretatione, omnis contradictio plane evanescit: imo una prorsus est concorsque sententia: uxorem aliam duci numquam posse, priori superstite.

Sed nec desunt validissima argumenta ex intima rei natura petita, quae ostendant illam adiectionem ab evangelio Marci esse omnino respuendam, immo et repugnare contextui. Nam Marci si contextum introspeciamus, ex ipso Christi scopo, qui erat discipulos suos privatim, seu *in domo* de matrimonio instituere, illico colligimus,

cus ordini s. Matthaei non adhaeret; plura illustrat diversis adiectis circumstantiis; et si quae omittit, non pauca etiam iis adiecit quae habet Matthaeus. Ad ordinem quod attinet, alium omnino servat Marcus ab eo, quem prosecutus est Matthaeus cap. X. XII. et XIII. Insuper plura illustrat s. Marcus obscure dicta a Matthaeo; Ex. gr. ubi refert secessionem Christi in desertum, addit: *Eratque cum bestiis terrae*. Historiam decollationis Ioannis fusius refert Marcus, quam Matthaeus. Cap. I. 9. pro *domo Petri*, ut scribit Matthaeus, Marcus habet: *Domum Simonis et Andreae cum Iacobo et Ioanne*. In historia paralytici plenior est Marcus quam Matthaeus. In facto de spicis interseruit Marcus *sub Abiathar principe sacerdotum*. Alia non pauca praetermitto, ex quibus patet nullam fere ipsum attingere historiam a Matthaeo relatam, quin maiori circumstantiarum apparatu eam repraesentet. Tantum abest, ut sit Matthaei epitomator! Sed praeterea haud pauca habet Marcus quorum nullum vestigium occurrit apud Matthaeum, qualia sunt quae refert *de daemoniaco* I. 23. de caeco VIII. 22. de paupercula vidua mittente quadrantem in gazophylacium XII. 41. de apparitione Christi duobus discipulis euntibus in Emmaus XVI. 12. de ascensione Christi in caelum XVI. 19. deque nonnullis parabolis a Christo prolatis. Ex his concludi debet, quod ex accessione evangelii Marci historia de vita et rebus Christi multo iam clarior ac dilucidior facta sit, multoque auctior. Non inde tamen inferendum est cum Calvino, Dodwello, Lardnero et Michaëlis, quod Marcus ne viderit quidem Matthaei evangelium. Graecae enim dictiones, quae in utroque evangelio occurrunt, contrarium plane evincunt, et plura quae habet communia cum Matthaeo iisdem fere verbis relata, licet interdum brevis exponat quae fusius Matthaeus refert.

clausulam illam huc pertrahi non posse. In hypothesi enim adversariorum, manifestum est, quod sua responsione Iesus in maiorem adhuc perplexitatem discipulos suos induxisset. Siquidem ii turbati fuerunt ex responso pharisaeis dato, praecipue vero ex illa generali sententia: *Quicumque dimiserit uxorem suam nisi ob fornicationem, et aliam (nulla addita exceptione) duxerit, moechatur, et qui dimissam duxerit (nulla iterum exceptione addita) moechatur*; hinc iuxta relationem Marci, Dominum iterum domi interrogarunt *de eodem*. Iam vero si Christus clausulam, quam in hypothesi voluisset subintelligi, non expressisset, nonne in eadem eos obscuritate ac perplexitate reliquisset? Praeterea, si ea clausula *nisi ob fornicationem* insereretur Marci textui, hic exurgeret sensus: « Quicumque dimiserit uxorem suam, *nisi ob fornicationem*, et aliam duxerit, adulterium committit super eam: et si uxor dimiserit virum suum, *nisi ob fornicationem*, et alii nupserit, moechatur;» tunc vero Christi verba non essent declaratio, prout postulabatur, sed repetitio verborum apud Matthaeum, si excipias quod apud Marcum de mulieribus etiam viros suos dimittentibus inserta sit mentio, de qua tamen re quaestio non erat. Adeoque discipuli ad iteratam suam de matrimonio quaestionem nullum declaratorium responsum retulissent. Contra vero si Christus, omni obscuritate semota, quae ex adiecta clausula de *dimissione* oriri poterat circa *dissolutionem* etiam coniugii, aperte ipsis enunciavit perfectam perpetuamque indissolubilitatem coniugii in quocumque casu, nulla exceptione facta, res clara evasit; et id quidem congruit cum Christi agendi ratione, quoties maioris claritatis gratia discipuli ulteriorem ab eo explanationem sciscitabantur (107). Non modo igitur subintelligenda non est clausula de fornicatione in textu Marci,

(107) Sic Marc. VII. 17. IX. 22., perhibentur discipuli Christum interrogasse, et utrobique clarum responsum accepisse.

sed eam non patitur contextus, neque scopus Christi discipulos alloquentis. Et haec de Marco.

Ad textum vero Lucae XVI. 18. quod attinet, is ita se habet: « Omnis, qui dimittit uxorem suam, et alteram ducit, moechatur, et qui dimissam ducit, moechatur. » Haec verba clarissima sunt, ac divortiorum patronos prorsus perimunt. Ast hoc ipso technas omnes inquirunt ad eorum vim eludendam. Aiunt enim veluti ex abrupto ea a Luca referri absque ullo nexu cum antecedentibus et consequentibus, quae sunt parabolae de villico iniquitatis et de divite epulone. Item concisam nimis eam esse sententiam, quae propterea per textum Matthaei exponi debeat, apposita clausula de fornicatione. Denique eam ad nihil inservire in quaestione de matrimonio enarranda (108).

Verum enimvero id perinde est ac dare manus victas, nec ullam esse viam, qua se expediant, aperte fateri. Itaque *primo* falso assumunt hoc Christi effatum, prout a Luca refertur, nullo nexu cum praecedentibus coniungi, quum potius pateat illud optime cum praecedentibus cohaerere; falsum item est in praecedentibus nil aliud haberi, praeter parabolam de villico iniquitatis; post illam enim dixerat Christus: « Lex et prophetae, usque ad Ioan- nem: ex eo regnum Dei evangelizatur, et omnis in illud vim facit. Facilius est autem coelum et terram praeterire, quam de lege unum apicem cadere; » deinde subdit: *Omnis* etc. Quaestio itaque discutienda est de quanam lege heic Christus mentionem fecerit, de cuius implemento ad apicem usque sermo habetur. Porro nullum dubium heic agi de vinculi coniugalis perennitate, adeoque de lege, quae eiusdem vinculi perennem indissolubilitatem constituit, ita ut neque in casu separationis seu dimissionis, ad novas nu-

(108) Ita Hammondus, Heumannus, Pott; Christian. Marklin, quorum omnium sententias, nec non Kuinoelii copiose refert Roskovány §. 94.

ptias transire liceat. Cum vero huiusmodi in tota mosaïca oeconomia nusquam appareat, dicendum est aliam esse legem, ad quam hic Iesus respexit; nimirum illam, quam in suo cum pharisaeis colloquio iisdem in memoriam revocavit, et ad quam matrimonia suorum fidelium in nova lege conformari voluit. Ea autem habetur Genes. II. 24. in illis verbis ab Adam, Deo inspirante, prolatis: «Propter hoc dimittet homo patrem suum, et matrem, et adhaerebit uxori suae, et erunt duo in carne una.» Quibus verbis Iesus Matth. XIX. 6. adiecit: «Itaque iam non sunt duo, sed una caro. Quod ergo Deus coniunxit, homo non separet.» Haec lex illa est a iudaeis, Mose ipso annuente ob duritiam cordis eorum, neglecta, quam Iesus ad pristinam integritatem revocare voluit.

Iam vero, in hypothesi adversariorum, qui etiam textui Lucae inserere, seu potius intrudere vellent illam exceptionem, *nisi ob fornicationem*, ut in casu adulterii matrimonii vinculum abrumperetur, illud quod Christus v. 17. pronunciavit: «Facilius est autem caelum et terram praeterire, quam de lege unum apicem cadere « non amplius subsisteret; nec verba Iesu, quibus apud Matthaeum pharisaeos ad primaevam matrimonii institutionem revocavit, verificarentur, nec sensum commodum funderent. Siquidem iuxta adversarios verba Matth. XIX. 4 seqq. *Non legistis* etc. minime significarent oppositionem inter legem primitivam matrimonii et aliam posteriorem ex Moysis conniventia inductam. Attamen hanc oppositionem necessario designare debent, cum aperte dixerit Christus; *Ab initio non fuit sic*; seu matrimonium prout primitus a Deo constitutum fuit, indissolubile extitit, nec nisi serius ex Moysis indulgentia potuit dissolvi per libellum repudii dandum, cum vir in uxore repererit *foeditatem*. Dum igitur Christus profiteretur apud Lucam e lege ne unum quidem apicem cadere posse, hoc in matrimonio patefacit, dum de eo pronun-

ciat, tam arctam esse debere coniugalem coniunctionem qualis fuit ab initio; seu antiquam de matrimonio legem Genes. II. 24. expressam, in regno suo, seu in ecclesia sua ad apicem usque adimpleri debere, facultate quavis a Mose concessa dimittendi uxorem in posterum sublata (109).

Ex his colligitur non modo Christi effatum cum antecedentibus cohaerere, verum etiam ita cum antecedentibus connecti, ut omnem excludat exceptionalis clausulae locum, ac proinde in quovis eventu coniugium indissolubile ex Christi sententia permanere.

Iam si harmonice textus quos expendimus ex Matth. V. et XIX. Marci X. et Luc. XVI. disponantur et coordinentur, hunc iis inesse sensum colligimus, quem verbis ipsis efferam, quibus usus est cl. Roskovàny, qui egregiam hac super re operam navavit: « Vos, pharisaei, audistis, ad divortium non aliud esse a lege Mosis necessarium, quam ut maritus dimissae suae uxori scribat libellum repudii. Ego vero dico vobis Mosen concessionem hanc non nisi propter duritiam cordis vestri vobis permisisse, ab initio autem non fuisse sic. Excepta causa fornicationis, vir non potest suam uxorem dimittere, secus reus est adulterii, quod uxor eius post dimissionem suam alteri nubendo, perpetrat. Ex causa fornicationis potest uxor dimitti; neque in casu hoc vir uxorem adulteram repudians, adulterium committere censendus est, si uxor eius dimissa alteri nubat. Porro dico vobis: uxores a viris dimissas aliis viris nubere non posse, nec viros, qui dimittunt uxores suas, alias ducere: quia in hoc casu utrobique adulterium committeretur. Mea de vinculo matrimonii do-

(109) Ita rursus Roskovàny op. cit. §. 92. Cf. etiam quae hanc in rem scribit Estius *Comment.* in cap. VII. ad Rom. 2. ubi quaerens de quam lege disserat Apostolus cum ait *Mulierem alligatam esse legi* quamdiu vir eius vivit, ostendit non de alia lege intelligi posse quam de ea lege coniugii instituta in paradiso Genes. II. qua edictum est: *Relinquet homo etc.*

ctrina est: nec virum uxorem suam, nec uxorem virum suum dimittere, et post dimissionem in nova vota matrimonialia transire posse, quin adulterii rei fiant; ab initio enim (quum Deus hominem creasset) masculum et foeminam fecisse eos et dixisse: propter hoc relinquet homo patrem, et matrem, et adhaerebit uxori suae, et erunt duo in carne una, quod ergo Deus coniunxit, homo non separet (110).»

Ex his deprehendimus num vere divortiorum patroni affirmaverint textui huic aut inserendam, aut saltem subintelligendam clausulam exceptionalem de fornicatione; siquidem perinde id foret, ac locum perspicuum per obscurum exponere; deinde ut vim haberet istorum assertio, deberet supponi, quod falsum esse ostendimus, nempe per illam clausulam, Christum in casu adulterii coniugium dissolvi docuisse.

§. III.

Eadem textuum Matthaei interpretatio de perpetua coniugii Christiani indissolubilitate ex Apostolo Rom. VII. et I. Cor. VII. confirmatur.

Scribens Apostolus ad Romanos, ut ostenderet iudaeis ad religionem christianam conversis per Christi mortem liberatos fuisse a legis servitute, usus est similitudine seu allegoria coniugii, quod tamdiu insolutum perdurat, quamdiu coniuges in vivis sunt, solvitur autem per mortem alterutrius. Sic porro scribit: cap. VII. 1-4. « An ignoratis, fratres (scientibus enim legem loquor), quod lex in homine dominatur quanto tempore vivit? Nam quae sub viro est mulier, vivente viro alligata est legi; si autem mortuus fuerit vir eius, soluta est a lege viri. Igitur vivente viro, vocabitur adultera, si fuerit cum alio

viro. Si autem mortuus fuerit vir eius, liberata est a lege viri: ut non sit adultera, si fuerit cum alio viro.» Ex quibus verbis, atque ex ipsa similitudinis ratione, concludunt communi fere consensu theologi ac interpretes catholici omnimodam indissolubilitatem matrimonii praedicari, secus ac visum fuerit inter ipsos catholicos Erasmo (111), Caietano (112), Catharino (113), nonnullisque allis, praesertim vero neotericis divortiorum patronis (114). Nos prioribus assentimur, ea tamen ratione, quam postea subiiciemus.

Interim animadvertimus Apostolum heic non videri directe loqui de lege Christi, ut aliqui exponunt, siquidem ex parenthesi (scientibus enim legem loquor) perspicuum est Paulum alloqui iudaeos conversos, et quidem ex notione, quam in iis supponit, legis mosaicae. Quod magis elucet ex ipsa similitudinis, qua utitur, natura; nam comparat legem mosaicam viro, qui dominatur uxori quamdiu vivit; gentem vero iudaicam uxori, quae coniugio de-

(111) Tum in *Paraphras. in evangel. Matthaei*. Opp. ed. Lug. Batav. 1705. tom. VII. col. 97 seq. Tum in *Annotat. in epist. ad Rom.* col. 595. Tum denique in *Annot. in epist. ad Cor.* cap. VII. col. 696 seqq.

(112) *Comment. in Matth.* cap. XIX. et in *comment. in 1. Cor.* VII. ubi scribit: «Mirari se summopere, quod torrens Doctorum viro licentiam denuo ducendi (uxorem) abiudicaverit, cum Iesus causam fornicationis clare exceperit.»

(113) *Opusc. De matrimonio quaest. ult. Annotat. cont. Caiet.* lib. V. in fine. Ubi inter cetera haec habet: «Nec ex evangelio, nec ex Apostolo posse colligi, non licere in causa fornicationis aliud inire matrimonium, quod tamen cum variis canonibus ecclesiae sit prohibitum, fieri non debet nisi accedente iudicio et auctoritate ecclesiae; id autem soli viro, non uxori licitum esse, ita, ut solvatur vinculum ex parte viri propter adulterium uxoris, non solvatur vero ex parte uxoris quae sine spe secundi coniugii debet remanere.» Porro Caietanus et Catharinus opinionem suam ecclesiae iudicio subiecerunt; scripserunt autem ambo ante definitionem conc. tridentini sess. XXIV. can. VII. Nam Caietanus extremum diem clausit an. 1554. adeoque 19. an. citius quam habita fuerit illa sessio. Catharinus vero mortuus est an. 1553. nempe decennio ante eiusmodi sessionem, quae an. 1563. habita est. Caietanus enim expresse ait in cap. XIX. *Matth.* pag. 40. «Salva semper ecclesiae definitione, quae hactenus non apparet.»

(114) Cf. *Estium Comment.* in hunc loc.

vincitur vivente viro cui subiecta est, eoque mortuo, omni vinculo solvitur; ita nimirum per mortem Christi iudaica gens liberata est a legis mosaicae iugo. Animadvertimus praeterea hoc in loco sermonem esse de matrimonio, quod consummatum vocant, ut patet tum ex gr. voce ὕπανδρος, qua significatur quodammodo concubitus, tum ex eo quod sequitur: *si fuerit cum alio viro.*

Quibus positis, dubium non est, quin Apostolus verbis allatis significare intenderit, non dirumpi matrimonii consummati vinculum, adeoque haud posse uxorem ad alias, supposito etiam adulterii flagitio, transire nuptias, donec vir eius vixerit, ad eum modum, quo iudaei non poterunt se a legis servitute eximere, quamdiu per mortem Christi illa non fuisset abolita, non obstantibus tot eorum praevaricationibus. Quemadmodum igitur non poterant iudaei a lege veteri emancipari nisi per Christi mortem, sic uxor numquam poterit a coniugii sui vinculo liberari nisi per mariti obitum. Siquidem in hoc praecise consistit totius comparationis vis et scopus, seu ut vocant, *comparationis punctum.* Iam vero si exceptionem aliquam, saltem fornicationis aut adulterii, voluerimus in hunc textum intrudere, aut in eo subintelligere, tota pessumderetur Apostoli similitudo, imo falsa evaderet, ut per se patet.

Verumtamen in lege mosaica, regeant adversarii, per libellum repudii poterat dissolvi coniugium, et ad hanc legem alludit Apostolus; eius igitur mens est, ex *regula* quidem non dissolvi coniugium nisi morte, posse vero in casu *exceptionali*, interveniente scilicet adulterio. Ast praeterquam quod, uti ostendimus, Moyses non ob causam fornicationis seu adulterii libellum repudii dari permiserit, sed alias ob causas sive physicas sive morales, propter quas uxor gratiam apud virum non inveniret, Apostolus heic spectat quod lex per se postulat, non autem quod ex concessione liceret, illa vero lex ad quam respicit ea est,

quae habetur Genes. II. 24. «Relinquet homo patrem suum, et matrem et adhaerebit uxori suae, et erunt duo in carne una.» His autem verbis significatam esse indissolubilitatis legem docet Christus Matth. XIX, dum ex iis infert: «Quod ergo Deus coniunxit, homo non separet.» Id vero quod de lege repudii Moyses statuit, ostendit permittentis fuisse, non approbantis, et quidem ad duritiam cordis eorum, quibus lex illa data fuit, salva tamen lege primordiali, quam Deus per dispensationem non abrogavit. Hoc ipsum igitur Paulus etiam significat, dum praefatus se legem scientibus loqui, affirmat mulierem viro suo, dum is vivit, obligatam manere, nec nisi eius morte solvi a lege viri (115). Nisi enim id admittatur, uti iam diximus, nulla foret eius comparatio; quod sine Apostoli iniuria dici nequit.

Quapropter, etsi daremus Apostolum *directe* ad coniugia alludere, quae penes iudaeos celebrabantur, dicimus tamen eum loqui de iis iuxta legem primitivam omnimodae indissolubilitatis, prout a Christo lex ea fuit et declarata et confirmata, adeoque Apostolum allocutum fuisse fideles ex iudaismo conversos, similitudine petita ex notione, quam de matrimonio habebant tum ex lege, tum ex Christo, ut ostenderet legem ritualement ac iudiciale moseicam morte Christi cessasse.

Haec vero confirmantur, si ratio habeatur chronologiae, qua constat, epistolam ad romanos ab Apostolo scriptam fuisse plures annos postquam Marcus in romanorum gratiam suam exaraverat evangelium, in quo ex Petri praedicatione retulerat Christi doctrinam de perfecta coniugii indissolubilitate (116). Cum proinde iudaei fideles iamdiu

(115) Cf. Estium *Comment.* in epist. ad Rom. VII. 1 seqq.

(116) Nam s. Petrus Romam venit an. II. Claudii, nempe aerae vulgaris XLII. vel ad summum an. III. Claudii, aerae vulgaris XLIII. Marcus vero eum comitatus in Urbe evangelium suum scripsit antequam Alexandriam a Petro mitteretur ante obitum Agrippae, scilicet vel postremis mensibus anni aerae vulgaris XLII. vel ante medium anni insequentis XLIII. Cf. Patritium *De evangeliiis.*

imbuti essent, atque instituti in doctrina Christi de vinculi coniugalis perpetuitate, ac lege primitiva circa eandem coniugii indissolubilitatem, non alio sensu ea comparatione uti poterat Apostolus ad eos scribens. Rursum: biennio antequam ad romanos Paulus suam daret epistolam, praemiserat priorem quam ad corinthios scripserat (117). Porro, ut mox ostendemus, in hac perpetuam adstruxerat vinculi coniugalis firmitatem. Praeterea Christi de primitiva lege, deque indissolubilitate doctrina nota erat romanis ex evangelio Lucae, in quo, ut ostendimus, diserte doctrina Salvatoris de perpetua atque absoluta coniugii indissolubilitate refertur, quod quidem evangelium in Achaia scriptis consignatum est, priusquam Apostolus suam dederit ad romanos epistolam (118). Ad hoc autem evangelium iuxta veteres Paulus appellat (119); adeoque iuxta huius evangelii doctrinam circa coniugium locutum eum fuisse ad romanos dicendum est.

Ex his iam praeoccupatae sunt difficultates, quibus Erasmus, Caietanus, Catharinus inter catholicos permoti putarunt nullam esse vim propositi argumenti. Etenim aiunt Apostolum locutum ad mentem legis mosaicae, in qua tamen abmittebantur divortia; Apostolum praeterea dixisse:

Friburgi Brisgov. 1853. lib. I. cap. II. q. 2. Paulus vero epistolam scripsit ad Romanos ex Cenchreis an. aerae vulgaris LVII. Cf. Tirinum in Chronico, seu post secundam suam in Asiam peregrinationem. Cf. William Paley *La vérité de l'histoire de s. Paul prouvée par la comparaison des eplîtres*. Trad. de l'angl. Paris. 1821. ch. II. *Épître aux romains*, n. 2.

(117) Cf. Estium in argumento quod praemisit huic epistolae, nec non aa. cit. praesertim Paley, *Prémère épître aux corinthiens*, n. 10 seqq.

(118) Uti diserte testantur Nazianz. Carm. XXXIII. et Hieronymus comment. in Matth. adeoque circa an. LIV. aerae christ. aut etiam, ut aliis placet, scripsit Lucas Evangelium suum in Asia Min. circa an. aerae vulgar. XLVIII. ac proinde longe antequam Paulus scripserit epistolam ad rom. quae in Cenchreis exarata fuit circa an. LVII. Cf. Paley *La vérité de l'histoire de s. Paule*, c. II. Paris, 1821.

(119) Ita s. Hieronymus *De viris illustr.* c. 7. Item epist. ad Paulinum n. 8. s. Ambrosius in Luc. lib. I. §. 11. Origenes in Luc. Hom. I. Euseb. lib. III. c. 4. Chrysost. Hom. I. in Acta. Rom. X. in II. Timoth.

Quae sub viro est mulier, non autem simpliciter uxor, quo innuit se de ea loqui, quae nondum est a marito repudiata; tum videri Apostolum unice contendere vinculum non durare post mortem, non autem illud usque ad mortem permanere, ac denique similitudinem haud necesse esse ut in omnibus conveniat (120).

At vero, non ad mentem legis mosaicae, sed iuxta legem primitivam Apostolum esse locutum ex dictis manifestum est. Per *mulierem* autem ab Apostolo significatam esse vere *uxorem* seu *uxoratam* liquet ex eius verbis: *Igitur vocabitur abultera si fuerit cum alio viro; si adultera, ergo coniugio vineta. Sic pariter manifestum est ex Apostoli scopo ostendendi vinculum coniugii permanere reipsa usque ad mortem, prout permansit lex mosaica usque ad mortem Christi, nec nisi per mortem solvi (121). Quod vero additur de similitudine, utique necesse non est ut in omnibus similia conveniant, ast opus est, ut similitudo apprime conveniat in eo in quo consistit *punctum*, ut aiunt, *comparationis*, atque ex quo tota pendet argumenti vis et ratio ob quam comparatio instituitur (122).*

(120) Ita fere Erasmus in Annotat. ad v. 1. cap. VII. epist. ad rom. Opp. ed. Lugdun. Batav. 1705. tom. VI. pag. 595. Et post eum Caietanus *Comment.* in epist. ad rom. in hunc loc. ubi contendit Apostolum locutum esse *De statu*, ita ut sensus sit: quamdiu status coniugalis permanet, seu quamdiu mulier est in statu coniugali, et non est repudiata, aut mortuus non fuerit vir eius, tenetur lege coniugii. Ambrosius Catharinus in Annot. in annotationes card. Caietani id ipsum adstruit.

(121) Prout testatur idem Apostolus ad Hebr. cap. IX. 16. «Ubi testamentum est, mors necesse est intercedat testatoris.»

(122) Cf. Bellarm. cap. XVI. n. 28 seqq. Atque heic placet afferre paraphrasim quam exhibet ipse Erasmus huius paulini textus, quae ita se habet: «Nec enim aliud servandum est in legis obligatione, quam in obligatione mulieris viro iunctae lex ipsa iubet servari. Siquidem mulier viro nupta, et maritali subiecta dominio, tantisper obligata est viro, quoad vixerit vir. Is simul atque mortuus fuerit, eximitur uxor ab eius matrimonii vinculo, sui que iuris fit illico ab obitu mariti prioris. Proinde si vivo marito, in cuius ius semel venit, tentet alteri nubere, adultera censebitur, quae reliquerit eum virum, a quo *sola morte* liberari poterat. Contra, si expectet obitum mariti desinit

Reliqua missa facio, quum Lutherus, Calvinus, Chemnitius nihil novi addiderint; ac velle clausulam huc inferre de exceptione fornicationis esset vim facere Apostoli textui. Idem dic de aliis plus minus contortis recentiorum paulini textus interpretationibus, quae omnes a Pauli mente aperte abludunt (123).

Itaque ut accedamus ad alteram Pauli epistolam, quae est I. ad Cor. VII. duo sese offerunt textus ad rem nostram, quibus proprietates indissolubilitatis absolutae aperte adstruitur. Alter est vv. 10. et 11. ubi Apostolus scribit: «Iis autem, qui matrimonio iuncti sunt, praecipio non ego, sed Dominus: uxorem a viro non discedere. Quod si discesserit, manere innuptam, aut viro suo reconciliari.» Alter vero est v. 39. «Mulier alligata est legi quanto tempore vir eius vivit; quod si dormierit vir eius, liberata est: cui vult nubat: tantum in Domino.»

Ad horum textuum intelligentiam, atque ad evincendam ex iis plenam seu perpetuam connubii christiani indissolubilitatem, iuverit et hic nonnulla praemittere. Haec autem sunt; *primo*, quod Apostolus hoc in capite data opera, agat de matrimonio eiusque legibus, non autem solum obiter ac incidenter; *secundo*, quod respondeat variis dubiis seu quaestionibus per epistolam a corinthiis ipsi propo-

illi esse obstricta, sibi que iam reddita, ius habet alteri viro, cui volet, nubendi. Neque enim ut ius herile transit ad haeridem, et servus morte heri non mutat statum, sed dominum, ita mariti ius in uxorem, transit ad alium, sed ultra ipsius vitam non porrigitur. Quod si maritus esset immortalis, *semper* maneret obligata mulier. «Non poterat Erasmus clarioribus verbis Apostoli mentem exponere. Opp. ed. cit. tom. VII. p. 797 seq.

(123) Talis inter ceteras est illa I. Ioseph. Batz, qui contendit synonymas esse duas sententias: *Mulier marito fidelitate coniugali obstricta est, quoad illa vivit, et haec mulier fidelis marito esse debet, donec is illius maritus est.* In op. Germ. *Harmonia de nova in Bavaria lege circa dissolut. matrim. cum Bibliis et tradit.* Bambergae 1829. pag. 80. et D. Socher, qui vult Paulum de matrimonio ex professo non agere, atque eius comparisonem valere sive agatur de uxore, vivente marito priore, sive de ducta ab altero marito post repudium. In op. German. *De separatione matrimonii in statibus cathol.* Landshut 1822. pag. 71 seqq.

sitis; *tertio*, has quaestiones ad sex revocari, num scilicet christiano homini liceat matrimonii usus; an innuptis et viduis expediat nubere; an liceat divortium; num etiam insolubile sit fidelis cum infideli coniugium; quid de virginitate sentiendum; demum an viduis liceat iterum nubere (124).

Iam vero, ceteris omissis, quae ad praesens argumentum non faciunt, nos hic insistimus solutionibus, quas Apostolus praebet ad tertiam et sextam quaestionem. Ad quaestionem igitur, utrum liceat divortium inter fideles, respondit Apostolus vv. 10. et 11. ex doctrina Christi non esse divortium faciendum sive a marito sive ab uxore; nam par utriusque est ius, adeo ut nec maritus ab uxore, nec uxor a marito discedere debeat *nisi ob fornicationem*; quod si ob fornicationem aut aliam causam uxor separata fuerit a viro suo aut maneat caelebs, aut viro suo reconcilietur, perinde ac maritus separatus ab uxore. Adeoque declarat insolubile prorsus usque ad alterutrum mortem permanere inter christianos coniugii vinculum. Idipsum inculcat in solutione sexti dubii, dum v. 39. declarat mulierem, quamdiu in vivis eius maritus est, vinctam esse per legem coniugii, ita ut a viro discedere non possit, et alteri nubere, non secus ac vir, qui non potest discedere ab uxore sua vivente ac alteram ducere. Adeoque insolubile edicit quocumque in casu christianorum coniugium utroque coniuge vivente.

Ex his praeterea constat adhuc clarius quo sensu clausula, quae penes Matthaeum legitur, de exceptione fornicationis, intelligi debeat; nempe de sola quoad torum et habitationem separatione seu de discessione, nullo vero modo de vinculi ipsius dissolutione. Alioquin Apostolus numquam generalem illam protulisset sententiam: *mulier*

(124) Cf. Bernard. a Piconio in analysi ad cap. VII. 1. ad Corinth.

alligata est legi, quanto tempore vir eius vivit; neque praecipisset ex Christi mente in casu discessus seu separationis, mulierem debere manere innuptam aut viro suo reconciliari. Nam in sensu adversariorum, posset in discessu propter fornicationem seu adulterium, utpote vinculo soluta, alteri nubere, atque idcirco falsa redderetur Apostoli sententia. (125).

Quae ad infirmandam hanc doctrinam afferunt adversarii seu divortiorum patroni levia omnino sunt, vimque inferunt luculentis adeo Apostoli verbis. Erasmus in sua paraphrasi ita enarrat hos textus, ut in alienum plane sensum eos pertrahat. Nam eo rem deducit, ut ex mente Pauli, non qualibet ex causa, sed causa tantum fornicationis liceat divortium fieri, qua non interveniente, si separatio contigerit inter coniuges, non debet amittere uxor spem reconciliationis cum marito a quo discessit (126). In prolixa autem quam attexuit annotatione in hunc locum idem auctor, totus in eo est ut hanc interpretationem suadeat, imo et persuadeat.

Idem egit card. Caietanus (127); et post eum Ambrosius Catharinus (128). Verum isti omnes cum scripse-

(125) Cf. Estium in Comm. in hunc loc. ubi fuse argumentum istud expendit, ac in tota sua luce collocat Apostoli mentem.

(126) Tom. VI. in nota 42. col. 692. ubi inter cetera scribit: « Est autem Paulo peculiare nihil non torquere ad evangelii negotium, *pia christianaque vafrilitie*, dum in omnia se vertit, ut omnes Christo lucrifaciat... Opinor hanc esse praecipuam clavem ad intelligendam mysticam scripturam, dispicere quid agat is qui loquitur, praesertim in Paulo, qui lubricus est in disputando, nunc huc se proripiens nunc illuc.» Col. 100 seq. En cuius indolis esset liberior hic vir.

(127) *Comment.* in 1. ep. ad Cor. in hunc loc. ubi repetit quod alias docuerat, Apostolum loqui secundum *regulam generalem, cui non adversatur exceptio aliqua.* Haec autem exceptio iuxta eundem est causa fornicationis, qua disiungitur vinculum coniugale. Ed. Lugd. 1639. Opp. tom. V. pag. 109.

(128) In op. cui. tit. *Annotationes in comment. Caietani denuo multo locupletiores et castigatiores additae.* Lugd. 1542. in 8. *Annot.* ult. libri V. p. 500 seqq. Quamquam hoc in opere Catharinus iugiter et acriter vellicet Caietanum ob singulares atque interdum temerarias et erroneas sententias in

rint ante absolutum concilium tridentinum, ac sua scripta subiecerint ecclesiae iudicio, venia digni aliqua sunt in hac tuenda doctrina. Ast non ita dicendum est de iis, qui postremis hisce temporibus connisi sunt eamdem tueri sententiam, post editum canonem VII. sess. XXIV. istius concilii, quique eludere sategerunt argumentum, quod ex his Apostoli textibus habetur ad omnimodam constituendam coniugii perpetuamque indissolubilitatem, cuiusmodi sunt I. A. Braun moguntinus (129); Eusebius Amort (130); deinde vero Ant. Frenzel (131); Io. Ios. Batz (132). Sed neque isti novi quidpiam proferunt, dum et in his textibus paulinis contendunt subintelligendam clausulam exceptionalem de *fornicatione*, atque aiunt Apostolum non de *praecepto*, sed de *consilio* accipi debere, dum scribit uxorem *manere innuptam*, aut non disserere de absoluta et perpetua indissolubilitate; aut denique mentem Apostoli esse, corinthios docere vinculum coniugale cum morte cessare; seu ex communi *regula* esse indissolubile, a qua tamen exceptio locum habeat; vv. autem 39. 40. non proprie et expresse Apostolum loqui de iure divortii, verum eo solum respicere, num melius sit nubere, an sine uxore permanere.

Hae porro expositiones quam contortae atque violentae sint, facile ab unoquoque cognosci poterit, quin eas

quas cardinalis in suis commentariis in lib. N. T. illapsus est, in hac tamen sententia de solutione vinculi coniugalis propter adulterium, eidem assentitur, eamque dum defendit, iisdem plane argumentis utitur, quibus hac in re usus fuerat Erasmus, ut ex eorum collatione planum fit.

(129) *In Dissert. super can. VII. trid. sess. XXIV. De matrimonio. Utrum matrimonii vinculum et in casu adulterii alterius coniugum iure divino, an solum iure ecclesiastico insolubile sit.* 1787. ac recusa Dusseldorfii a A. Ios. Binterim 1847. qui eum refellit.

(130) *Demonstratio critica religionis catholicae.* Venet. 1744. fol. part. I. q. 15. pag. 79 seqq.

(131) *Diss. Num dogma catholicum sit matrimonii vinculum inter vivos coniuges nullo in casu solvi possit?* edidit. D. Derezer Uratislaviae 1818.

(132) *Op. et loc. cit.*

singillatim persequamur. Supponunt enim Apostolum aut ignorasse, aut e mente ei excidisse clausulam a Christo de fornicatione appositam ad solvendum coniugium. At vero Paulus non aliud sibi suis in epistolis proposuit, quam germanum sensum nobis exhibere eiusdem clausulae, quam utique prae oculis habebat dum haec scripsit; nempe significare voluit clausulam illam unice spectare ad temporaneam dissolutionem quam nos dicimus quoad solum torum et habitationem, non autem, quemadmodum pro certo assumunt adversarii, ad dissolutionem vinculi. Alioquin, ne obscuritatem ingereret, debuisset expressam illius mentionem facere, ac declarare hoc in casu coniugium solvi, prout declaravit solvi in hypothesisi de infideli discedente a coniuge fideli, aut renuente cum eo pacifice vivere, et sine contumelia Creatoris, prout a rom. pontificibus expositum est (133).

Locutum vero esse Apostolum de *consilio*, non autem de *praecepto*, non modo gratis adversarii affirmant, quin ullam adducant probationem, verum aperte id repugnat eiusdem verbis: « Iis autem, qui matrimonio iuncti sunt, *praecipio* non ego, sed Dominus, uxorem a viro non discedere, quod *si discesserit, manere innuptam.*»

Sic, quod addunt, Apostolum non de perpetua indissolubilitate disserere, aequè pugnat cum eiusdem verbis, et cum generali illa sententia v. 39. « Mulier alligata est legi (coniugii) quanto tempore vir eius vivit.»

Nulla autem erat necessitas Apostolo docendi corin-

(133) Atque hic me cohibere non possum, quin improbem I. P. Iacobum impugnatores Braunii dum in op. *Indissolubilitas vinculi matrimonialis* Moguntiae 1788. pag. 68. inficiatur iuxta Apostolum dissolvi matrimonium in infidelitate contractum per conversionem alterius coniugis, et discessum infidelis a fideli, respiciens canonem *Si infidelis* Innocentii III. utpote a Gratiano decepti; et *contra aggerem contrarie sentientium* opponit *Marcum, Lucam, Paulum, Hieronymum, et Augustinum* adiiciens: *atque hi mihi sufficiunt.* Ast hoc videtur nimis ac temere dictum. Cf. quae hoc de argumento scripsi in tract. *De matrim.* cap. II. prop. II.

thios vinculum coniugale cum morte cessare; ecquis enim inter corinthios hoc ignorabat?

Denique ea quae habentur vv. 39. 40. utrumque respiciunt, tum *ius* divortii, non quidem quatenus hoc locum habere posset post mortem, sed quatenus ante mortem eiusmodi ius inter christianos nullum existit; tum consilium permanendi in viduitate praebet, potius quam novis se nuptiis implicandi.

Biblicam igitur doctrinam eo spectare, ut neque in casu adulterii inter christianos dissolvi possit coniugii vinculum, quod sola morte dirimitur ex hactenus dictis manifestum fit. Atque ut quae fusiori calamo exposita sunt, paucis contrahamus, patet ex dictis totam difficultatem versari circa intelligentiam duorum textuum Matth. V. 32. et XIX. 9. ob interiectam clausulam: *excepta fornicationis causa, nisi ob fornicationem*: quae quidem clausula tum ad simplicem dimissionem, tum ad dissolutionem etiam coniugii referri posse videtur. At si prae oculis habeamus Christi mentem abolendi libelli repudii, atque revocandi coniugii inter fideles suos ad primaevam institutionem; si attente spectemus verborum contextum; si pensemus incommoda, quae provenirent ex eorum interpretatione, qui illam pertrahere vellent ad divortium perfectum, adeo ut in causa fornicationis, non modo liceret ream uxorem dimittere, sed etiam aliam ducere, dimissaeque liceret alteri nubere; si omnia haec rite perpendantur, omnia suadent, ac vero etiam persuadent ad solam dimissionem, clausulam illam esse coërcendam.

Haec autem mirum in modum confirmantur ac lucem accipiunt ex collatione praedictorum textuum cum iis, quae Christus privatim discipulis suis ipsum eadem de re interrogantibus cum essent *in domo* apud Marcum X. ubi loquens de vinculi indissolubilitate nullam exceptionem posuit. Confirmantur etiam ex iis, quae habentur apud Lucam

cap. XVI. Demum ex doctrina apostoli Pauli tum Rom. VII. tum 1. Cor VII. qui affirmat expresse sola coniugis morte matrimonii vinculum solvi; quibus in locis, nonnisi vim inferendo textibus, obtrudi potest fornicationis exceptio ex praeconcepta adversariorum sententia, quod Christus apud Matthaeum locutus fuerit de vinculi solutione. Itaque dogmatica ecclesiae interpretatio doctrinae biblicae de indissolubilitate coniugii ea est, quae scientificè argumentis hermeneuticis demonstratur.

His si addatur sensus traditionalis et constans ecclesiae praxis, omnis, si qua forte superesse posset, depellitur dubitatio; id vero est quod capite insequenti ostendere aggredimur.

CAPUT III.

DE SENSU TRADITIONALI CIRCA INDISSOLUBILITATEM MATRIMONII CHRISTIANI IN CAUSA ADULTERII IUXTA EVANGELICAM ET APOSTOLICAM DOCTRINAM.

Sensus traditionalis, qui determinet qua ratione textus biblici accipi debeant, si qua forte difficultas occurrat ad veram eorum intelligentiam arripiendam, desumi debet tum ex patribus, qui ea de re egerunt, tum ex decretis conciliorum, romanorumque pontificum, tum ex praxi quae iugiter in ecclesia obtinuit. Si igitur ostenderimus patres, concilia romanosque praesules, qui ecclesiae clavum tenuerunt, nec non iugem ecclesiae praxim in id conspirare, ut nos doceant in christiana lege coniugii vinculum propter alterutrius coniugis adulterium minime dissolvi, omnino patebit evangelicam et apostolicam doctrinam non aliam esse praeter eam, quam hermeneuticis argumentis scientificè adstruximus, propugnando ex Bibliis omnimodam coniugii christiani indissolubilitatem.

Id porro est, quod demonstrandum hoc in capite distincte assumimus, ut vindicemus canonem VII. sess. XXIV. concilii tridentini. In hac porro quaestione suae non desunt difficultates enodandae, ut ex iis traditionis fontibus, quos enumeravimus, genuinum sensum traditionalem eruamus. Nam divortiorum patroni nihil intentatum reliquerunt, ut argumenta ex iis petita nobis eriperent, persuaderentque universam traditionem sin minus suis placitis favere, saltem dubiam esse, ac pro utraque sententia pugnare. Verum non est quod adversariorum assertionibus perterrefiamus, neque eruditionis fuco permoveamur. Singula enim documenta expendentes, videbimus universam antiquitatem christianam veritati, quam adstruimus, suffragari. Quamvis vero longum atque impeditum iter quod percurrere debemus videatur, illud tamen ab aliis iam complanatum inveniemus. Cum enim quaestio, quam agimus, antiqua sit, primo ob dissensum ecclesiae orientalis et occidentalis saltem quoad praxim, quae apud graecos a longo tempore viget; deinde vero ob doctrinam pseudo-reformatorum saeculi XVI. factum est, ut ab eruditis catholicis viris haud exiguo seculorum tractu patrum testimonia pro alterutra sententia sedulo accurateque discussa fuerint.

Testimonia, quae favere videntur graecis, expendit Arcudius (1); quae vero prolata sunt a protestantibus, nominatim vero a Chemnitio, examini subiecit Bellarminus (2). Postea vero de hoc ipso argumento pertractavit Renaudotius, qui graecorum disciplinae favere videtur (3). At acrior evasit controversia de genuina patrum mente, ex quo non modo in Germania, verum etiam in Galliis et in

(1) *De concordia ecclesiae occidentalis et orientalis* lib. VII. ubi fuse a cap. VI. usque ad cap. XXXV. de hoc argumento pertractat.

(2) *De matr.* cap. XVII.

(3) *Perpétuité de la foi.* tom. V. liv. VI. ch. 7.

Italia nonnulli etiam catholici scriptores ad trutinam eam revocarunt. Hac ipsa de causa criticum examen denuo instituerunt eruditi catholici, qui, data opera, hoc de argumento scripserunt, inter quos eminent Martorelli (4), et Roskovány (5), quorum potissimum vestigia premimus, sedulam impenderunt operam in novis hisce dubitationibus et difficultatibus solvendis. His ducibus, facile nobis erit contortas violentasque ac doctrinae catholicae adversantes expositiones documentorum antiquitatis evertere, atque ostendere perpetuum sanctorum patrum consensum in tuenda perfecta firmitate christiani coniugii absque ulla exceptione.

Quandoquidem autem circa patres singulos, qui pro orthodoxa doctrina afferri consueverunt, tricas adversarii movent, cogimur distinctis paragraphis eos singillatim percurrere, tum maioris claritatis gratia, tum ut in aprico ponamus quae ad unumquodque testimonium infirmandum in medium allata sunt. Cum porro testimonia, quae pertinent ad prima ecclesiae secula, hac in re singulari indigeant disquisitione, hinc distinctis articulis prius documenta quinque priorum ecclesiae saeculorum singillatim expendemus, dein documenta sequioris aetatis brevius complectemur.

(4) In op. *Errori correnti sul divorzio*. Roma 1792.

(5) In op. saepius cit. *De indissolubilitate matrimonii* cap. IV. *Doctrina ecclesiae* §. 101 seqq.

ARTICULUS I.

De sensu traditionali circa indissolubilitatem christiani matrimonii
in causa adulterii prioribus quinque ecclesiae seculis.

§. I.

De Herma.

Omnium primus et antiquissimus, qui nobis exhibet receptam in ecclesia doctrinam de absoluta matrimonii indissolubilitate est Hermas vir apostolicus, cuius meminit Apostolus ad romanos (6), et cuius auctoritatem tanti fecerunt veteres aliqui, ut eius librum, cui titulus est *Pastor*, inter scripturas canonicas recensuerint (7).

Hic igitur lib. II. mandato IV. *De dimittenda adultera*, haec habet: « Domine, inquit, permitte me pauca verba tecum loqui. Dic, inquit. Et dixi illi: Domine, si quis habuerit uxorem fidelem in Domino, et hanc invenerit in adulterio, numquid peccat vir, si convivit cum illa? Et dixit mihi: quamdiu nescit peccatum eius, sine crimine est vir vivens cum illa. Si autem sciverit vir uxorem suam deliquisse, et non egerit poenitentiam mulier, et permanet in fornicatione sua, et convivit cum illa vir; reus erit peccati eius, et particeps moecharionis eius. Et dixi illi: Quid ergo si permanserit in vitio suo mulier? Et dixit: *Dimittat illam vir, et vir per se maneat*. Quod si dimiserit mulierem suam, et aliam duxerit, et ipse moechatur. Et dixi illi: Quid si mulier dimissa poenitentiam egerit, et voluerit ad virum suum reverti; nonne recipietur a viro suo? Et dixit mihi: Imo si non receperit eam vir suus, peccat, et magnum peccatum sibi admittit: sed de-

(6) Rom. XVI. 14.

(7) Cf. Io. B. Cotelerium: *Iudicium de s. Hermae Pastore*.

bet recipere peccatricem quae poenitentiam egit: sed non saepe. Servis enim Dei poenitentia una est. Propter poenitentiam ergo non debet, dimissa coniuge sua, vir aliam ducere. Hic actus similis est in viro et in muliere. Non solum moechatio est illis, qui carnem suam coinquinant: sed et is, qui simulacrum facit, moechatur. Quod si in his factis perseverat, et poenitentiam non agit, recede ab illa, et noli convivere cum illa, alioquin et tu particeps eris peccati eius. Propter hoc praeceptum est vobis ut caelibes maneatis, tum vir, tum mulier: potest enim in huiusmodi poenitentia esse (8).»

Hactenus Hermas, ex quo habes doctrinam in ecclesia romana receptam, prout instituta fuit a B. Petri praedicatione et Marci evangelio. Nempe habes per adulterium non solvi matrimonii vinculum; habes separationem quoad torum et habitationem; habes quo sensu accipi debeat clausula exceptionalis apud s. Matthaeum; habes demum parem conditionem in eiusmodi casu viri et uxoris. Et haec quidem luculenter expressa.

Quid ad haec qui huius viri auctoritate premuntur? alii impetunt huius Hermae personam; alii auctoritatem; alii denique sententiae veritatem: sed frustra.

Nam de persona perperam nonnulli contendunt eum diversum esse ab eo cui salutem dicit Apostolus, sed fratrem esse dicunt Pii I. adeoque a primo ad secundum ecclesiae seculum eius documentum transferunt antiquitatem, innixi carmini contra Marcionem libro III. quod falso Tertulliano adscribitur, et fragmento Muratoriano (9), cuius

(8) Ex ed. Cotelarii: *Patrum apostol.* tom. I. Autwerp. pag. 86-89.

(9) Uti Moshemius *Comment. de rebus christian. ante Constantinum M.* pag. 165. Schrickius in *Historia ecclesiastica christiana*, part. II. pag. 274. Lips. 1775.

Hoc fragmentum acephalum nobis exhibet Muratorius *Antiq. italic. medii aevi.* Mediol. 1740. tom. III. col. 854. in quo, suppositus Caius haec scribit: « Pastorem vero nuperrime temporibus nostris in Urbe Roma Herma conscri-

authenticia ab aliquibus in dubium vocata est, ac etiam negata. Nunc vero convenit inter saniores criticos non modo catholicos, verum etiam protestantes non alium esse hunc Hermam, quam eum cuius meminit Apostolus, eundemque esse auctorem *Pastoris*, prout aperte testantur Origenes, Eusebius, Hieronymus (10).

psit, sedente cathedra urbis Romae ecclesiae Pio episcopo fratre eius. *Et ideo legi eum quidem oportet, se publicare vero in ecclesia populo, neque inter prophetas completum numero, neque inter apostolos in finem temporum potest.*» Huic unico, dubio saltem, documento inmittitur Moshemius ad eius auctoritatem elevandam. Huic sententiae adhaeret D. Cruice in *Hist. de l'église de Rome*. Paris 1856. ch. V. p. 99.

Verum seposita etiam quaestione an genuinum sit necne fragmentum a Muratorio editum, certum est ex eo nihil extundi posse quod sapientiorum iudicium immutare valeat de libro *Pastoris*. Huius enim libri, cuius latina versio adhuc superest, quaeque adamussim congruit cum locis apud veteres prostantibus, auctor ab omnibus nominatur *Hermas*, nequaquam *Hermes*. Hinc factum est ut Rufinus duos distinguat Hermae libros, ut advertit Tillemontius (*Mémoires etc. Note sur Hermas*). Sed quod gravius est, novimus ex Auctore *Carmin. adv. Marcionem* s. Pio rom. pontifici fratrem fuisse Hermetem cognomento *Pastorem Angelicum*, quod ea retulerit, quae ab *Angelo* acceperat. Novimus item ex catalogo Burcheriano rom. pontificum, et ex pontificali Damasi, atque ex Anastasio Bibliotecario Hermetem Pii pontificis fratrem accepisse librum, quo iniungebatur *pascha* peragendum dominico die ex praescripto Angeli, qui Hermeti sub imaginé *pastoris* oblatus fuerat. Iam vero liber *Pastoris* qui adhuc superest, ne minimam quidem de paschate mentionem facit. Auctor igitur fragmenti muratoriani non loquitur de libro *Hermae*, sed de alio libro *Hermetis*, qui frater fuit Pii pontificis. Ad haec, *Hermas* in libro *Pastoris* ita loquitur de ventura tribulatione, deque iudicio et consummatione temporum imminente, ut christiani non satis assecuti sententiam Christi de ea re loquerentur ante excidium Hierosolymorum. Igitur ante annum aerae vulgaris septuagesimum hic liber exaratus est. Denique cum liber *Hermetis* de paschate tanti fuisset penes vetustissimos patres, ut eum perinde haberent quasi esset divino instinctu conscriptus, cur aetate Victoris in controversia de paschate nemo unus repertus est, qui hunc librum afferret ad rom. pontificis decretum confirmandum? Est igitur liber *Hermae*, quem adhuc habemus, longe diversus a libro *Hermetis* qui deperditus est.

(10) Ita Nourry in *Apparatu ad Biblioth. max. ss. Patrum*, diss. IV. Natal. Alexander, *Hist. eccles.* sec. I. cap. X. art. 9. Lumpfer *Histor. theol. critic. patrum* p. I. August. Vindel. 1783. pag. 98 seq. Ceiller, *Hist. des auteurs ecclesiast.* liv. III. ch. 9. art. 1. inter catholicos. Cave *Hist. lit. script. ecclesiast.* Wetstenius in *N. T. graec.* in cap. XVI. 14. epist. ad rom. Nec abnuat Rosenmüller in hunc loc. aliique passim inter protestantes ipsos.

Quod vero spectat ad eius auctoritatem, utpote sibi contrariam, adversarii nullo in pretio operis auctorem habendum esse palam edicunt, eumque traducunt sin minus ut deceptorem, saltem ut valde debilis mentis, et exiguae scientiae hominem habent, etsi viva phantasia ac imaginatione praeditum. Iamdiu Tertullianus montanista effectus, eo quod novis dogmatibus ab eo propugnatis hic auctor contrarius esset, et a catholicis illi obiiceretur, summo cum dedecore de eo disserit (11). Attamen nemo sanus inficiabitur magna eum ad probandum auctoritate pollere; siquidem ad eius auctoritatem appellarunt velut ad auctorem inspiratum s. Irenaeus (12), Clemens alexandr. (13), et Origenes (14). Quamquam vero ab hoc censu eam expungant s. Hieronymus (15), Eusebius (16) Athanasius (17); tamen omnes testantur eum auctorem magno in pretio a veteribus habitum fuisse, et eius librum *utilem* esse, et ad faciendam fidem veteris traditionis et doctrinae ecclesiae idoneum (18). Tantum autem abest, ut Tertullianus officere possit auctoritati Pastoris, ut eam potius evehat, cum ex eo habeamus illum habitum fuisse assertorem catholicae veritatis, cui montanistae novitates suas opponere voluerunt.

(11) Lib. *De pudicitia* c. X. ubi scribit: « Cederem tibi (psychice), si scriptura Pastoris, quae sola moechos amat, divino instrumento meruisset incidi, si non ab omni concilio ecclesiarum vestrarum inter apocrypha et falsa iudicaretur, adultera et ipsa, et inde patrona sociorum.»

(12) Lib. IV. *Cont. haeres.* c. 3.

(13) Lib. I. *Strom.* n. 29.

(14) In epist. ad rom. XVI. 14.

(15) *De viris illustr.* c. 10.

(16) *Hist. eccles.* lib. V. c. 25.

(17) In *epist. paschal.* Opp. tom. II. 39. 40.

(18) Sane s. Hieronymus l. c. agens de *Pastore*, scribit: « Apud quasdam Graeciae ecclesias etiam publice legitur. Revera *utilis* liber, multique de eo scriptorum veterum usurpavere testimonium.» Et s. Athanasius pariter loc. cit. ait: « Sunt et alii libri, non quidem canonici, sed quos patres sanxerunt legi iis qui ad fidem accedunt, cupiuntque in pietatis verbo institui, ut *Sapientia Salomonis et Pastor*. Cf. Ceiller loc. cit. art. 2.

Ut demum vim eludant luculenti adeo testimonii alii reponunt « Hermam non negare solvi matrimonium ob fornicationem, nec dicere Christi lege vetitum esse repudiare coniugem adulteram et alteram ducere, sed tantum negare solvi matrimonium in casu, ubi uxor semel adulterata est: quae sententia ex illius temporis disciplina ortum ducere videtur, iuxta quam plures christiani spe poenitentiae ab adultera agenda, a secundis nuptiis abstinabant (19). » Alii ex verbis: *Quod si dimiserit mulierem suam et aliam duxerit, et ipse moechatur*, nullum clarum sensum erui posse autumant, sed probabilius aliquid supplendum esse, adeoque locum Hermae ad perhibendum de fide indissolubilitatis testimonium impar omnino esse (20). Alii postremo excipiunt Hermam sententiam suam non sac. Scripturae, sed tantum poenitentiae illa aetate usitatae superstruere, dicendo: *propter poenitentiam non debet, dimissa coniuge sua, vir aliam ducere* (21).

At satis est eiusmodi exceptiones revocare ad textum Hermae, ut pateat illarum solutio; eidem enim penitus adversantur. Nam falsum est Hermam non negare solvi matrimonium ob fornicationem. Falsum item est eum non dicere Christi lege vetitum esse repudiare coniugem adulteram et aliam ducere. Falsum denique est de ea loqui, quae *semel* adulterium patrauerit; contrarium his omnibus dicit Hermas (22).

Subintelligendum aut supplendum aliquid esse ut eruat sensus, quem adversarii intendunt, certe fatemur; sed si doctrina Hermae sit prorsus contraria doctrinae, quam

(19) Ita Adamus Braun in cit. *Dissert. utrum matrimonii vinculum etc.*

(20) Ita auctor anonymus. op. Germanic. *Disquisit. theolog.-politica de potest. eccles. circa res matrimonial.* part. II. Francofurti 1791. pag. 176.

(21) Uti Ren. Leon. Werkmeister in libel. *Novae inquisition. de dissolut. vinculi matrim.* Bamber. 1806. pag. 65.

(22) Cf. Iacobi op. cit. *Indissolubilitas vinculi matrimonialis adversus* Braun. pag. 70 seqq.

adversarii tuentur, nihil est supplendum; textus clarus est, et doctrina patronorum divortii plane ab Herma excluditur.

Somnium denique est, Hermam solum ad poenitentiam sua aetate receptam alludere, et non potius implicite saltem ad Scripturam provocare, cuius verba describit prout leguntur apud Marcum, Lucam et Paulum. Hermas igitur nihil aliud dicit, nisi quod si maritus ob adulterii flagitium illam quoad torum cohabitationemque dimiserit, illamque sui criminis poenituerit, maritus eam in gratiam iterum recipiat.

§. II.

De s. Iustino M.

Ex sancto Iustino duo suppetunt pro indissolubilitate coniugii, etiam in casu adulterii, testimonia. Alterum occurrit in Apologia I. n. XV. ubi s. martyr volens Christi doctrinam afferre circa castitatem, has exscribit ex Evangelio sententias. « Qui inspexerit mulierem ad concupiscendum eam, iam moechatus est in corde apud Deum: et « si oculus tuus dexter scandalizat te, erue eum, expedit enim tibi unum oculum habentem ingredi in regnum coelorum, potius quam cum duobus mitti in ignem aeternum.» Et « *Qui ducit repudiatam ab altero viro, moechatur.*» Deinde subdit: « Quemadmodum etiam ii, qui ex lege humana duplex matrimonium ineunt, ita et qui mulierem adspiciunt ad concupiscendum eam, peccatores sunt apud Magistrum nostrum. Non enim is solum ab eo eiicitur, qui re et actu moechatur, sed etiam qui moechari vult; quippe cum Deo non facta solum, sed etiam cogitata pateant (23).»

Ex quo testimonio habemus 1. quod s. martyr ex Evangelio proferat auctoritatem absque clausula exceptionalis

(23) Ex vers. Maran.

de fornicatione, sed absolute prout apud Marcum et Lucam reperitur: *Qui ducit repudiatam ab altero viro, moechatur*; quo satis aperte significat nullo in casu licere christianis, altero vivente coniuge, alteram ducere, ac proinde insolubile permanere matrimonii vinculum, etiam interveniente adulterio, et uxore ob eam causam dimissa; 2. quod loquens de lege humana, qua divortium permittebatur, affirmet eos, qui secundum contrahunt coniugium, vivente reiecto coniuge etiam ob adulterium, *peccatores*, seu reos adulterii esse, non secus ac eos qui aspiciunt mulierem ad concupiscendam eam, qui iam moechati sunt coram Deo (24). Assertor itaque Iustinus est indissolubilis vinculi coniugalis, et testis hac super re catholicae doctrinae.

Alterum testimonium occurrit in Apologia II. n. II. ubi refert historiam illius mulieris prius flagitiosae coniugio coniunctae cum aequo flagitioso viro, quae ad religionem christianam conversa ad meliorem frugem revocata, satagit virum suum a vitiis inolitatis retrahere. Verum cum id frustra tentasset, virumque suum in peiora ruere comperisset: «Verita, prosequitur Iustinus, ne inique et impie factorum particeps fieret, si in coniugio maneret, *victusque ac tori consors esset*, misso eo, quod vocatis, repudio, discessit. Tum praeclarus et bonus ille vir, cum gaudere deberet, quod quae olim uxor cum servis et mercenariis in vinum atque omne vitiorum genus effusa licenter perpetrabat, ab his iam faciendis deterrita fuisset, ac ipsum etiam ab iisdem flagitiis deterrere studeret; repudium non obse-

(24) Maran in nota *d* ad hunc loc. haec scribit: « Non secundae nuptiae hic a Iustino vituperantur, sed quae, non soluto priore vinculo, contrahuntur. Illius enim mens ex testimoniis, quae ab eo referuntur, existimanda: et cum in testimoniis citatis nihil sit de secundis nuptiis, probabile non est illum ea de re loqui voluisse.»

Haec autem confirmantur ex iis quae ex Thyrbio et Rittero in praecedente sectione cum ageremus de polygamia successiva art. I. nota 33. attulimus iuxta editionem Theod. Otto Opp. s. Iustini. Ienae 1847. quaeque huc pariter referuntur.

quenti nuntiantem accusat, quod esset christiana. Atque illa quidem libello tibi, imperator, oblato postulavit, ut prius sibi domui suae prospicere liceret; deinde domesticis rebus compositis responsuram se accusationi. Atque id quidem annuisti.»

Ex his liquet mulierem hanc se quoad mensam torumque separasse ab adultero marito, seu quoad torum et habitationem (25), hanc proinde ob causam ei libellum repudii dedisse, exterius quidem iuxta leges romanas, quibus dissolutio perfecta coniugii permittebatur (26), sed quoad se, iuxta legem christianam, ex cuius praescripto licitum quidem est se ab adultero seiungere, non autem alteri nubere. Cum vero hanc agendi rationem Iustinus probet, hoc ipso nobis testis est de evangelica et apostolica doctrina circa indissolubile matrimonii vinculum, moechiae etiam interveniente flagitio.

Hac ratione fere iam praeoccupata sunt, quae ab adversariis opponuntur adversus utrumque testimonium. Opponunt quoad prius testimonium, quod s. pater nihil dicat de viri iure respectu adulterae (27), quasi nempe ignoraverit Iustinus ex Evangelio pares hoc in iure esse coniuges, prout etiam declaraverat Hermas, ut vidimus, in suo *Pastore*. Cum insuper reos adulterii traducat qui ex lege humana, priori uxore dimissa, alteram ducunt, hoc ipso par in utroque coniuge ius agnovit.

Sic etiam quoad posterius testimonium frustra animadvertit Launoius: « Per libellum repudii apud Iustinum veri

(25) Nam vir iste, ut praemisit Iustinus, Alexandriam se contulerat; porro infamis erat hic locus voluptatum fama, et quovis vitiorum genere notatus, uti animadvertit editor Iennensis Theod. Otto.

(26) Quod iuxta romanas leges repudium dederit haec mulier, exinde colligo, quod libellum supplicem obtulerit imperatori, dimisso viro suo legali ratione, nisi autem se ad legum praescriptum conformasset, profecto neque id facere ausa esset, nec ei imperator annuisset.

(27) Ita Braun Diss. cit. *Utrum matr. vinculum etc.*

nominis solutionem intelligi; cum secus Iustinus, si libellus repudii hoc sensu acceptus vel Christi Evangelio, vel disciplinae christianorum primitivae contrarium quid importasset, eundem sine dubio reprehensurus fuisset (28);» aut, ut alii adiiciunt, saltem incertum esse num Iustinus perfectum divortium, vel tantum separationem a toro et habitatione intellexerit (29); insuper narrare quidem s. martyrem mulierem illam ad novas non transiisse nuptias, non autem inficiatum esse ius ad illas habuisse; quod si iure hoc non est usa, repetendum id esse ex illius aetatis disciplina, iuxta quam primi fideles a secundis nuptiis, etiam defuncto alterutro coniuge, abhorrebant (30). Demum Iustinum in genere tantum de divortio esse locutum, neque adulterium commemorasse, adeoque perperam ad rem nostram proferri de indissolubilitate coniugii in casu adulterii, cum quo nihil commune habet hic Iustini locus (31).

Haec, inquam, a nobis iam praeoccupata sunt, nec minimum laedunt vim allatae auctoritatis pro re catholica. Siquidem, prout adnotavimus, mulier illa libellum divortii utique dedit in foro politico ad praescriptum iuris romani, iuxta quod plene dissolvebatur coniugium, sed in foro conscientiae se attemperavit legi christianae, cuius eximia cultrix fuit, quae vetat, vivente altero coniuge, novas inire nuptias, nec opus proinde erat reprehensione, ut autumat Launius. Dubium vero seu suspicionem, quam alii movent, utrum de partiali, aut de totali divortio locutus sit s. Iustinus, dissolvunt expressa verba de separatione *quoad torum victum-*

(28) *De regia in matrim. potest.* Opp. ed. Colon. Allobrog. tom. I. par. II. pag. 826.

(29) Ita *Pagellae linciens.* Linz. 1808.

(30) Ita Werkmeister in op. germ. *Novae inquisitiones circa dissolutionem matrimonii quoad vinculum iuxta principia cathol.* 1806. p. 66. 86. 169. Quem secutus est Carol. De Lasaulx in *Concordia legum gallic. circa dissolut. matr. cum verbo Dei et sensu catholico.* Coblen. 1816. p. 115.

(31) *Pagellae theolog. Ulmenses.* Ulmae 1811. pag. 80.

que, quae plane inutilia fuissent, si voluisset disserere de pleno divortio. Sic tertium dubium disiicitur de iure a muliere acquisito, ac de abstinencia ab aliis nuptiis, quod ita ferret illius aetatis disciplina, si ratio habeatur subiectae materiae, ex qua deprehendimus de hoc minime agi, immo ab ea excludi, eo quod sermo tantum sit de separatione *a toro victuque*. Quod vero postremo loco dicitur non commemorari a Iustino casum adulterii, deprehenditur falsum esse ex eo quod ipse referat, mulierem illam tandem se ad divortium faciendum determinasse ex iis, quae ipsi relata fuerant de flagitiosa viri sui conversatione Alexandriae.

Quid si diceremus mulierem illam tum perfectum fecisse divortium, tum ius habuisse ad alias ineundas nuptias, eo quod ageretur de viro infideli, qui sine contumelia Creatoris secum cohabitare renuebat? Hac ratione ipsa usa fuisset privilegio in favorem religionis christianae a Christo concesso, de quo loquitur Apostolus I. Cor. VII. 15. illis verbis: *Quod si infidelis discedit, discedat: Non enim servituti subiectus est frater, aut soror in huiusmodi*. In hac vero hypothesis, quae verissima est, omnes praeceduntur adversariorum difficultates, atque catholica veritas in tuto plenissime est posita. Sed hoc ad abundantiam.

Itaque Iustinus quoque locupletissimus alter testis est doctrinae catholicae circa firmitatem vinculi coniugalis, etiam cum intervenerit adulterii crimen.

§. III.

De Athenagora.

Iustino subnectimus Athenagoram utpote eidem fere supparem. Adeo vero aperte atque perspicue ipse nobis doctrinam de plena coniugii indissolubilitate exhibet, ut Launoius eius auctoritatem dissimulaverit. Haec porro

habet Athenagoras in Legatione pro christianis. « Ut quisque vel qualis natus est, maneat vel unicis in nuptiis. Secundae enim decorum adulterium: *Quicumque enim dimiserit*, inquit (Christus), *uxorem suam et aliam duxerit, moechatur*; nec eam dimitti sinens, cuius virginitati finem quis imposuit, nec aliam insuper duci. Nam qui se ipse prima uxore spoliatur, etiamsi mortua sit, occulta quadam ratione est adulter (32).» Nihil habent quod afferant adversarii ad hunc textum eludendum; quod si nimis severum se praebere videtur Athenagoras adversus secundas nuptias successivas, secutus est hac in re sententiam aetate sua vigentem passim, qua in suspicionem incontinentiae vocabantur quicumque iterum nubere, ut suo loco vidimus (33).

§. III.

De Tertulliano.

Mirum fortasse pluribus accidet, quod inter assertores indissolubilitatis coniugii christiani etiam Tertullianum connumeremus, quem adversarii non modo suum esse asserunt, verum etiam nonnulli catholici plane deserunt, atque inter eos accensent qui pro solutione matrimonialis vinculi in causa adulterii pugnarunt. Ast si clara eius testimonia seiungamus ab iis, quae obscura sunt, et contrariae doctrinae patrocinari videntur, quaenam vera eius mens fuerit, facilius assequemur. Dixi *quae obscura sunt*; nam si apprime ea excutiamus, patebit ipsum nec sibi nec nobis esse contrarium, vereque perpetuam sive omnimodam, etiam in causa adulterii, indissolubilitatem coniugalem propugnare.

(33) Ed. Maran n. 33. pag. 30.

(32) Cf. Maran in nota ad hunc loc. ubi eum ab errore montanistarum, immo vel ab ipsa huius erroris suspicione vindicat adversus Tillemontium, ut alias diximus.

Atque ut ab iis testimoniis, quae clara sunt, exordiamur, ea nobis suppetunt tum ex duobus libris *Ad uxorem*, tum ex libro *De patientia* et ex libro *De monogamia*.

In libro I. *Ad uxorem* cap. V. scribit: «Cum quid difficile videtur, difficiliora alios obeuntes recenseamus. Quot enim sunt, qui statim a lavacro carnem suam obsignant? Quot item, qui consensu pari inter se matrimonii debitum tollunt? Voluntarii spadones pro cupiditate regni coelestis. Quod si salvo matrimonio abstinentia toleratur, *quanto magis adempto*? Credo enim difficilior saluum derelinqui, quam amissum non desiderari (34).» Lib. vero II. *Ad uxorem* cap. I. «Proxime tibi, inquit, dilectissima in Domino conserva, quid foeminae sanctae, matrimonio *quacumque sorte adempto*, sectandum sit, ut potui, prosequutus sum. Nunc ad secunda consilia convertamur, respectu humanae infirmitatis, quarumdam exemplis admonentibus, quae *divortio, vel mariti excessu*, oblata continentiae occasione, non modo abiecerunt opportunitatem tanti boni, sed ne in nubendo quidem disciplinae meminisse voluerunt, ut in Domino potissimum nuberent (35).»

In libro *De patientia* cap. XII. scribit: «At enim cum omnem speciem salutaris disciplinae gubernet, quid mirum quod etiam poenitentiae ministrat, solitae lapsis subvenire? Cum disiuncto matrimonio, ex ea tamen causa, qua licet seu viro seu foeminae ad viduitatis perseverantiam sustineri; haec expectat, haec exoptat, haec exorat, poenitentiam quandoque inituris, salutem? Quantum boni utrique confert? Alterum non adulterum facit (36), alterum emendat.»

(34) Ed. Rigalt. Paris. 1664. pag. 164.

(35) Ibid. pag. 167. ed. Paris. 1641.

(36) Quae verba sic enarrat Rigaltius: «Disiuncto, inquit, ex causa adulterii matrimonio, patientia intercedit, ac plurimum boni utrique confert; alterum non facit, hoc est, coniugem, repudiata coniuge adultera, non mittit ad alterum coniugium. Sic est omnino: non facit, non mittit, *vadere non sinit*.» Quod ex Ter-

Ex his iam constat coniugio *quacumque de causa*, ac proinde ob adulterium dirempto, ex Tertulliano iuxta salutarem disciplinam, coniuges continentiam seu caelibatum profiteri, quin uspiam vel innuat quidem, alteris nuptiis se iungere posse.

Verum apertius adhuc Tertullianus mentem suam hac super re aperuit, scribens in libro De monogamia cum divortium in causa adulterii perageretur: «Evolvamus communia instrumenta scripturarum pristinorum. Hoc ipsum demonstratur a nobis, neque novam, neque extraneam esse monogamiae disciplinam, imo et antiquam et propriam christianorum; ut Paracletum (Montanum) restitutorem potius sentias eius, quam institutorem.» Deinde ad divinam matrimonii institutionem progrediens, ita prosequitur: «Si ita factum est a primordio, invenimus nos ad initium dirigi a Christo: sicut in quaestione repudii, dicens illud propter duritiam ipsorum a Moyse esse permissum, ab initio autem non ita fuisse; sine dubio ad initium revocat matrimonii individuitatem. Ideoque quos Deus ab initio coniunxit in unam carnem duos, hodie homo non separabit... Et adeo in Christo omnia revocantur ad initium, ut et fides reversa sit a circumcissione ad integritatem carnis illius, sicut ab initio fuit; et matrimonii individuitas, sicut ab initio fuit... Sed hae argumentationes potius existimentur de coniecturis coactae, si non et sententiae adstiterint, quas Dominus emisit in repudii retractatu, quod permissum aliquando iam prohibet; in primis quia ab initio non fuit sic, sicut matrimonii numerus; tum quia quos Deus coniunxit, homo non separabit; scilicet ne contra Dominum faciat. Solus enim ille separabit, qui et coniunxit; separabit autem, *non per duritiam repudii*, quam

tulliano esset in adulterium impingere; adeoque pro certo sumit matrimonii vinculum per adulterium non solvi, alioquin in eiusmodi statum per aliud matrimonium non impelleret, qui dimissa adultera, alteram duceret.

reprobat et compescit, sed per debitum mortis....Igitur, si quos Deus coniunxit, homo non separabit repudio... Caeterum et alia ratio conspirat, immo non alia, sed quae initii formam imposuit, et voluntatem Dei movit ad prohibitionem repudii: quoniam qui dimiserit uxorem suam, praeterquam ex causa adulterii, facit eam adulterari; et qui dimissam a viro duxerit, adulterat utique. *Non et nubere legitime potest repudiata*; et si quid tale commiserit sine matrimonii nomine, non capit elogium adulterii, qua adulterium in matrimonio crimen est? Deus aliter censuit citra quam homines, ut in totum, sive per nuptias, sive vulgo, alterius viri admissio adulterium pronuntietur. Videamus enim quid sit matrimonium apud Deum, et ita cognoscemus quid sit aequè adulterium. Matrimonium est, cum Deus iungit duos in unam carnem, aut iunctos deprehendens in eadem carne, coniunctionem signavit. Adulterium est, cum quoquo modo disiunctis duobus, alia caro, immo aliena miscetur, de qua dici non possit, haec est caro ex carne mea, et hoc os ex ossibus meis. Semel enim hoc et factum et pronuntiatum sicut ab initio, ita et nunc in aliam carnem non potest convenire. Itaque sine causa dices, Deum *vivo marito nolle repudiatam alii viro iungi*, quasi mortuo velit; quando si mortuo non tenetur, proinde nec vivo; tam repudio matrimonium dirimente quam morte, non tenebitur ei, cui per quod tenebatur, abruptum est, adeo non interest vivo an mortuo viro nubat. Neque enim in illum delinquit, sed in semetipsam. Omne delictum quod admiserit homo, extra corpus est: qui autem adulteratur, in corpus suum delinquit. Adulteratur autem, sicut supra praestruximus, qui aliam carnem sibi immiscet supra illam pristinam, quam Deus aut coniunxit in duos, aut coniunctam deprehendit. Ideoque abstulit repudium, quod ab initio non fuit, ut, quod ab initio fuit, munitur duorum

in unam carnem perseverantiam ne necessitas vel occasio tertiae concarnationis irrumpat, soli causae permittens repudium, si forte praevenerit, cui praecavetur. Adeo autem repudium a primordio non fuit, ut apud romanos post annum sexcentimum Urbis conditae, id genus duritiae commissum denotetur. Sed illi etiam non repudiantes adulteria commiscunt, *nobis, etsi repudiemus, ne nubere quidem licebit...* *Per mortem utique, non per repudium facta solutione; quia repudiatis non permetteret nubere, adversus pristinum praeceptum (37).»*

Ex qua proluxa Tertulliani argumentatione deprehendimus 1. ipsum comparare repudium cum morte, ita ut quemadmodum iuxta eius principium montanicum nemo potest se iungere etiam post mortem alteri coniugi, sic neque potest post repudium; 2. matrimonium per Christum revocatum ad pristinam fuisse institutionem coniunctionis perpetuae unius cum altera, ita ut numquam liceat novas instaurare nuptias sive mortua sive repudiata propter adulterium fuerit uxor; 3. Christum hac ipsa de causa abolevisse libellum repudii ob cordis duritiam a Moyse hebraeis permissum; 4. denique conceptis verbis pluries inculcare nobis christianis neque in casu dimissionis propter adulterium licere, vivente adhuc alterutro coniuge, aliam ducere, vel alteri nubere. Adeoque nihil optari luculentius potest ad veram Tertulliani mentem hac super re assequendum.

Iam vero ex his quae perspicua sunt, primum est lucem mutuari ad ea Tertulliani testimonia intelligenda, quae difficultatem facessunt, quibusque permoti indissolubilitatis adversarii omnes eum inter praecipuos sententiae suae patronos adnumerant (38).

(37) Ed. 1663. pag. 527-532.

(38) Ex protestantibus post plures alios Io. Gerhardus *Loc. theolog.* tom. XVI. Tubingae 1777. ed. Frid. Cotta §. 79. Inter catholicos, si tamen catholicus putandus est, Launoius in saepe cit. op. *De regia in matrim. potest.* part. III. art. 1. cap. 5. pag. 826. et ante istos Sixtus senensis *Biblioth. sanctae*, lib. VI. adnot. 81.

Praecipuum testimonium cui hi omnes innituntur illud est, quod occurrit lib. IV. contr. Marcion. cap. XXXIV. Cum enim Marcion contenderet eundem non esse veteris ac novi Testamenti auctorem, inter cetera argumenta ad suum commentum evincendum urgebat hinc quidem concessionem repudii per Moysen factam, inde vero eiusdem abolitionem per Christum. Allato siquidem textu Deuteron. XXIV. et Christi Luc. XVI. concludebat ovans: «Vides diversitatem Legis et Evangelii, Moysis et Christi?» Cui respondit Tertullianus: «Plane. Non enim recepisti illud quoque Evangelium eiusdem veritatis, et eiusdem Christi, in quo prohibens divortium, propriam quaestionem eius absolvit: *Moyses propter duritiam cordis vestri, praecepit libellum repudii dare; a primordio autem non fuit sic, quia scilicet qui marem et foeminam fecerat, erunt duo, dixerat, in carne una; quod Deus itaque iunxit, homo disiunxerit?* Hoc enim responso et Moysi constitutionem protexit, ut sui, et Creatoris institutionem direxit, ut Christus ipsius. Sed quatenus ex his revincendus es, quae recepisti, sic tibi occurram, ac si meus Christus. Nonne et ipse prohibens divortium, et patrem tamen gestans eum, qui marem et foeminam iunxit, excusaverit potius, quam destruxerit Moysi constitutionem? Sed ecce tuus sit iste Christus contrarium docens Moysi et Creatori, ut si non contrarium ostendere, meus sit. Dico enim illum *conditionaliter* nunc fecisse divortii prohibitionem, si ideo quis dimittat uxorem, ut aliam ducat: *qui dimiserit, inquit, uxorem, et aliam duxerit, adulterium committit, et qui a marito dimissam duxerit, adulterium commisit, et qui a marito dimissam duxerit, aequè adulter est; ex eadem utique causa, qua non licet dimitti, ut alia ducatur: illicite enim dimissam pro indimissa ducens, adulter est. Manet enim matrimonium,*

ed. Neapol. 1742. tom. II. pag. 779 seq. Deinde vero Braun op. cit. Solutioni saltem favere Tertullianum censent ex recentioribus Brunquell; Frane. Ant. Jäger, Werkmeister ut alios praeteream.

quod non rite diremptum est. Manente matrimonio nubere, adulterium est. Ita si conditionaliter prohibuit dimittere uxorem, non in totum prohibuit, et quod non prohibuit in totum, permisit alias, ubi causa cessat ob quam prohibuit. Et iam non contrarium Moysi docet, cuius praeceptum alicubi conservat: nondum dico confirmat. Aut si omnino negas permitti divortium a Christo, quomodo tu nuptias dirimis? Nec coniungens marem et foeminam, nec alibi coniunctos ad sacramentum baptismatis et eucharistiae admittens, nisi inter se coniuraverint adversus fructum nuptiarum, ut adversus ipsum Creatorem? Certe quid facit apud te maritus, si uxor eius commiserit adulterium? Habebitne illam? Sed nec tuum Apostolum sinere scis coniungi prostitute membra Christi. Habet itaque et Christum assertorem iustitia divortii. Iam hinc confirmatur ab illo Moyses, ex eodem titulo prohibens repudium, quo et Christus, si inventum fuerit in muliere negotium impudicum. Nam et in evangelio Matthaei: *Qui dimiserit, inquit, uxorem suam praeter causam adulterii: facit eam adulterari, atque ita adulter censetur et ille, qui dimissam a viro duxerit.* Ceterum, praeter ex causa adulterii, nec Creator disiungit, quod ipse scilicet coniunxit; eodem alibi Moyse constituente eum qui ex compressione matrimonium fecerat, non posse dimittere uxorem in omne tempus. Quod si ex violentia coactum matrimonium stabit, quanto magis ex convenientia voluntarium? Sicut et prophetiae auctoritate, *Uxorem iuventutis tuae non dimittes.* Habes itaque Christum ultro vestigia ubique Creatoris ineuntem *tam in permittendo repudio, quam in prohibendo.* Habes etiam nuptiarum quoquo velis latere prospectorem, quas nec separari vult, prohibendo repudium, nec cum macula haberi, tunc permittendo divortium. Erubescere non coniungens, quos tuus quoque Christus coniunxit. Erubescere etiam disiungens *sine eo merito, quo disiungi voluit et tuus Christus (39).*»

Iam vero prolixi totius textus analysi diligenti instituta, patebit Tertullianum non alia ratione componere inter se Moysem et Christum ut obiectam a Marcione contradictionem sive oppositionem amoliat; quam adstruendo Christum non omnino prohibuisse divortium, sed istud concedere in casu adulterii, quin tamen umquam vel insinuet quidem ex Christo liberum esse parti innocenti post dimissionem adulterae, aliam ducere uxorem. Imo id aperte negat legitime fieri posse; in hoc tamen totus vertitur controversiae nostrae cardo.

Sane ex accurata verborum Tertulliani inspectione habemus ipsum docuisse 1. Moysem ob duritiam cordis hebraeorum indulsisse libellum repudii; 2. Christum aliquo cum temperamento seu prudenti oeconomia se gessisse, dum ex una parte permisit divortium fieri, nempe interveniente adulterio, ex altera vero negavit posse alteram duci; 3. hoc vero probare tum ex eo quod Christus revocaverit matrimonium ad primordiale suam institutionem, scilicet ad perfectam perpetuamque individuitatem, tum ex eo quod idem Christus absolute pronunciaverit illum fore moechum, qui dimissam quacumque ex causa duxerit. Ex quo 4. concludit iugiter matrimonium permanere, perinde ac si mulier fuerit indimissa, illudque *illicite* pro *illegitime* sumpsisse, ut phrasaeologia tunc temporis recepta obtinebat; 5. adeoque Tertullianum hoc in loco sibi prorsus constantem esse patet, dum non aliud ab eo quod in libro de Monogamia statuerat, docet, nimirum in causa adulterii solvi quidem coniugium quoad torum victumque, nulla vero ratione quoad vinculum, quod etiam hoc in casu perseverat (40).

(40) Atque hic castiganda est temeritas simul et incitia Caroli Calvi professoris emeriti in academia ticinensi propugnatoris divortiorum, dum in op. *Ricerche sul divorzio fra christiani*. Pavia 1790. scribere non dubitavit: «Che Tertulliano in questa testimonianza (lib. IV. *Contr. Marc.* c. 34.) ammetta l'adulterio come la sola ed unica eccezione della legge vietante il divorzio, non è possibile il

Ex his animadversionibus facile nunc est sensum assequi illorum verborum, quibus adversarii omnes innituntur, ut Tertullianum ad suas partes pertrahant, scilicet: *Dico illum (Christum) conditionaliter nunc fecisse divortii prohibitionem*, perinde ac si Tertullianus illud *conditionaliter* usurpasset ad significandum *sub conditione* adulterii Christum divortium permisisse; ast illa *conditio* ad solam dimissionem referri debet, non autem ad facultatem ducendi aliam uxorem, ut patet ex textu, quem immediate profert sine ulla clausula; sic etiam intelligimus quo sensu ipse dixerit, *illicite dimissam pro indimissa ducens, adulter est; nempe illegitime*, non modo, prout iam innuimus, ratione usus loquendi, qui tunc temporis obtinebat, sed insuper ex contextu; siquidem subdit Tertullianus: *manet enim matrimonium, quod non rite diremptum est*; atque, ut loquitur in libro *De monogamia: Nobis, etsi repudiemus, ne nubere quidem licebit*. Sic ex dictis patet immerito adversarios urgere adducta verba: *Manet enim matrimonium, quod non rite diremptum est*, ex quibus ipsi inferri velent ex Tertulliano *non manere matrimonium quod rite fuerit diremptum; rite* autem tunc seu *legitime* dirimi ob adulterium. Immerito, inquam, haec urgentur, et contra aper-

dubitarne (ita ipse ex tripode). Non è però men vero, che egli abbia cangiato opinione dopo di aver cangiato religione. Ciò apparisce dal libro da lui scritto *sulla monogamia*. Ma dappoichè egli stesso dichiara in quest'opera di non proporre, nè di sostenere altra dottrina fuorchè quella del suo seduttore Montano, *io non capisco con qual coraggio l'editore Pamelio e la maggior parte de' nostri teologi contendano eludere l'autorità di Tertulliano cattolico, opponendo la contraria di Tertulliano eretico.*» Ast *eruditus* vir ignoravit libros contra Marcionem a Tertulliano exaratos fuisse cum iam montanista esset effectus. En verba ipsius Tertulliani quae habentur lib. I. *Contr. Marc.* cap. XXIX. quibus se et montanistam et Montani doctrinae propugnatorem profitetur: «Sed et si nubendi iam modus ponitur, quem quidem *apud nos* (montanistas) *spiritualis ratio, Paracleto auctore, defendit, unum in fide matrimonio praescribens.*»

Sed quod magis mireris est, eius antesignanum hac in sententia Launonium, in op. cit. *De regia etc.* loc. cit. inniti Tertulliani auctoritati ex libro *De monogamia* ad suam sententiam de dissolubilitate vinculi coniugalis ob adulterium tuendam. Quam praeclare eiusmodi auctores inter se conveniunt!

tam Tertulliani mentem, qui hoc in loco de exceptione adulterii, de qua apud Matthaeum necdum mentionem iniecerat, sed adhuc instabat textui Lucae, ut ostenderet adulterium patrari ab eo, qui *illicite dimissam pro indimissa ducens, adulter est*, quibus immediate subdit: *manet enim matrimonium, quod non rite diremptum est*, seu quod solutum tantummodo est quoad torum et habitationem; hoc vero confirmatur ex insequentibus eius verbis: *manente matrimonio, nubere adulterium est*.

Si itaque Tertullianus quoties de matrimonio locutus est, toties illud insolubile, seu ut ipse ait, *individuum* praedicat; si unicam dimissionis causam assignat, nimirum adulterium, propter quod dimissione etiam secuta, inculcat permanere coniugium: si insuper, cum haec scriberet, iam erat montanista effectus, adeoque contendit neque post mortem posse iterari nuptias, mirum profecto est velle contra apertissimam eius mentem et doctrinam Tertullianum proferre tamquam approbantem matrimonium quod post alterutrius coniugis adulterium contraheretur (41). Quapropter omnibus rite perpensis, merito nos eum inter testes et assertores locupletissimos catholicae doctrinae de indissolubilitate coniugii in lege evangelica adnumeramus.

Nunc tandem addo non solum Tertullianum, sed vel ipsum Marcionem testem esse doctrinae in ecclesia receptae, quam propugnamus. Nam si Marcion Christum Moysi contrarium effert ex eo capite, quod Christus prohibuerit

(41) Quae cum ita se habeant, mirari subest quomodo Io. Gerhardus loc. cit. §. 579. in medium allato testimonio ex lib. IV. Tertulliani contra Marcion. c. 34. a nobis discusso, scribere potuerit: « Huius dicti *tanta est evidentia*, ut Sixtus senensis lib. VI. Biblioth. adnot. 81. pag. 465. Tertullianum referat in classem eorum, qui *certa et indubitata adsertione utriusque repudii, hoc est, a contubernio et a connubio licentiam probarunt.* » Porro Sixtus senensis, non tamen ex propria sententia, quae hic afferuntur protulit, et quidem non sine magna haesitatione, ut eum legenti patebit. Non igitur *ea evidentia* permotus est, quam ei Gerhardus affingit.

quod Moyses concesserat, scilicet perfectum repudium; ergo pro certo habuit doctrinam hanc ab ecclesia catholica teneri ac doceri; secus enim numquam potuisset inter se Christum et Moysen committere, siquidem ambo eandem facultatem Dei cultoribus dedissent, scilicet aliam post divortium ducendi uxorem, priore dimissa ob adulterii causam; imo longe magis progressus fuisset Christus, qui illo in casu permisisset divortium, in quo iuxta Moysen fuissent morte mulctandi delinquentes.

§. V.

De Clemente alexandrino.

Doctrinae catholicae assertorem pariter ac testem se praebet Clemens alex. qui sensum exponit clausulae exceptionalis apud Matthaeum, dum eam ad separationem coarctat quoad torum ob adulterii flagitium indissolubili permanente coniugii vinculo. Sic enim scribit lib. II. *Stromat.* cap. XXIII. «Quod autem consulit Scriptura uxorem ducere, et nec a coniugio *umquam permittit discedere*, legem aperte constituit: *Non dimittes uxorem praeterquam propter fornicationem* (42). Adulterium autem existimat coniungi matrimonio, vivo altero ex separatis.... Qui autem dimissam accipit uxorem moechatur, inquit: *si quis enim dimiserit uxorem, moechatur ipsam*, hoc est, cogit eam moechari. Non solum autem qui dimisit, est eius causa, sed etiam qui eam suscepit, praebens mulieri peccandi occasionem: si enim non suscipiat, revertetur ad virum. Quid vero Lex? ut reprimat ad vitia propensionem, iubet de medio tolli eam, quae adulterata, et adulterii fuerit convicta: sin autem fuerit uxor sacerdotis, iubet eam igni tradi. Obruitur autem adulter quoque lapidibus, sed

(42) Οὐκ ἀπολύσεις γυναῖκα πλὴν εἰ μὴ ἐπὶ λόγῳ πορνείας. Quibus patet Clementem allegasse Christi verba cum particula εἰ secus ac vellent nonnulli critici biblici recentiores.

non in eodem loco, ne mors quidem sit eis communis. Neque vero lex cum Evangelio pugnat, sed ei consentit: quidni enim cum sit utriusque unus suppeditator Dominus? Quae enim est fornicata, vivit quidem peccato, sed mortua est mandatis: quae autem ducta est poenitentia, ut quae sit regenerata per vitae conversionem, habet vitae regenerationem, mortua quidem vetere fornicatrice, in vitam autem rursus ingressa ea, quae genita est per poenitentiam (43).»

Ideo vero integrum licet prolixum exscripsi testimonium, quia plura in eo sunt quae ad rem nostram apprime colligamus oportet. Ex eo enim constat 1. Scripturam, novi scilicet foederis, numquam permittere ut coniugium libere initum dissolvatur, imo id lege vetari; 2. clausulam exceptionalem de fornicatione intelligendam esse de sola separatione coniugum sine diremptione coniugii, alioquin non foret adulter quicumque dimissam duxerit, secus ac Clemens absolute affirmet; 3. adulteram dimissam ac poenitentem ad *virum* suum posse reverti, adeoque per dimissionem non solvi matrimonium, alioquin non posset amplius ille a quo dimissa est vocari *vir suus* seu maritus; 4. hoc intercedere inter Legem et Evangelium discrimen, quod per Legem morte reali deberet adultera plecti, contra vero in Evangelio utpote mitiori, solum morte spirituali ac mystica per poenitentiam, ut sic possit ad virum suum reverti, ab eoque recipi; 5. haud posse, altero ex coniugibus vivente, ad novas nuptias aditum patere.

Haec adeo perspicua sunt in allato textu, ut mirum videri debeat, quomodo Launoïus (44), eiusque asseclae potuerint Clementem alex. inter assertores dissolubilitatis connubii propter adulterium afferre. Unica ratio, quae eos

(43) Ed. Paris. 1641. pag. 424 seq.

(44) Op. cit. *De regia etc.* pag. 826.

movit ad ita se gerendum, est, quod ipse alleget textum Matthaei, pro certo assumentes Christum fuisse ibidem de plena dissolutione locutum, quod tamen falso ab iis assumi ostendimus.

Possem alia eiusdem Clementis testimonia urgere, quae in idem conspirant, verum his praetermissis, satis mihi erit, ea quae in insequente lib. III. Stromat. cap. VI. habet in medium asferre, ubi scilicet scribit: «Hic ipse Dominus dicit: *Quod Deus coniunxit homo non separet...* Illud autem: *Non omnes capiunt verbum hoc; et sunt eunuchi, qui sic nati sunt; et sunt eunuchi, qui castrati sunt ab hominibus: et sunt eunuchi, qui se ipsos castraverunt propter regnum coelorum. Qui potest capere capiat: nesciunt quod postquam de divortio esset locutus, cum quidam rogassent, si sic sit causa uxoris, non expedit homini uxorem ducere, tunc dixit Dominus: Non omnes capiunt verbum hoc, sed quibus datum est. Hoc autem qui rogabant, volebant ex eo scire, an uxore damnata et eiecta propter fornicationem, concedat aliam ducere. Aiunt autem athletas quoque non paucos abstinere a venere, propter exercitationem corporis continentem. Quare nec castitas est bonum et ex virtute, nisi fiat propter dilectionem in Deum...* Idem autem (apostolus Paulus) illa quoque scribit: *Al ligatus es uxori, ne quaeras solutionem. Solutus es ab uxore, ne quaeras uxorem* (45).»

Animadvertendum porro est, Clementem heic totum esse in vindicanda nuptiarum honestate et sanctitate adversus haereticos illius aetatis illas uti turpes traducentes, non ideo propterea dixisse Christum sciscitantibus: *an uxore damnata et eiecta propter fornicationem concedat aliam ducere*; id concedere; sed potius exinde laudandi vitam continentem occasionem sumit, contrarium omnino supponens, et hac de causa adducit Christi oraculum: *Quod*

(45) Ed. cit. pag. 446. 447. et in ed. Oxoniens. tom. I. pag. 534.

Deus coniunxit homo non separet, et verba Apostoli « *Alligatus es uxori etc.*; ac illustrat exemplo eorum, qui variis de causis continentiam professi sunt, ut hac ratione insinuet separatos coniuges haud debere gravate ferre continentiae institutum ac necessitatem, quando tot alii ipsum servant, non quidem ex Dei dilectione, sed ex motivis humanis.

Quum vero qui sibi vindicant Clementem alex. nil aliud afferant ex eo nisi textum, in quo Matthaei clausula continetur, nec nisi timide cunctanterque, argumento est non dubio auctorem hunc inter praeclariores doctrinae catholicae testes et assertores esse recensendum. (46).

§. VI.

De Origene.

Eandem quam Clemens eiusdem discipulus Origenes consecutus est doctrinam circa absolutam coniugii christiani indissolubilitatem, etiam interveniente adulterii flagitio. Nam prius ipse dispescit, quae spectant ad dimissionem uxoris quacumque ex causa, deinde exponit quae attingunt libellum repudii. De prima quaestione affirmat non licere nisi ex causa fornicationis uxorem dimittere ad mentem Salvatoris, de altera, quae propius attingit rem nostram ita disserit, ut nihil desiderari sinat circa catholicam doctrinam

Sic enim scribit tom. XIV. in Matth. « Propter Scripturae verba, haec quoque insuper dicenda sunt, latas fuisse quasdam leges, non quasi praestantia aliqua et excellentia praeditas, sed quasi ad eorum, qui subditi sunt, infirmitatem accommodatas et compositas; nam aliquid eiusmodi his verbis significatur: *Moyses ad duritiam cordis*

(46) Sane nec Sixtus senensis, nec Moshemius, nec Calvi quidpiam mussitant circa Clementem alex. cuius auctoritatem praetermittunt.

vestri permisit vobis dimittere uxores vestras; praecipua autem legis propter duritiam cordis latae, et praestantissima pars in istis proponitur: Ab initio autem non fuit sic. Et in novo quidem testamento quaedam horum instar sancita sunt: Quoniam Moyses ad duritiam cordis vestri permisit vobis dimittere uxores vestras; nam quasi pro cordis eorum duritie id infirmitatis gratia scriptum est: Propter fornicationem autem unusquisque suam uxorem habeat, et unaquaeque suum virum habeat: et illud: Uxori vir debitum reddat; similiter autem et uxor viro. His itaque subiungitur: Hoc autem dico secundum indulgentiam, non secundum imperium. Quin et illud: Mulier alligata est, quanto tempore vir eius vivit: quod si dormierit vir eius, liberata est, cui vult nubat, tantum in Domino, pro duritie cordis et infirmitate apud Paulum nobis potiora dona sectari, et beatiores effici nolentibus dictum est. Iam vero contra Scripturae legem, mulieri vivente viro nubere quidam ecclesiae rectores permiserunt, agentes contra id quod scriptum est, in quo sic habetur: Mulier alligata est, quanto tempore vir eius vivit, et contra illud: Igitur vivente viro mulier vocabitur adultera, si fuerit cum alio viro; non omnino tamen sine ratione, haec enim contra legem initio latam et scriptam, ad vitanda peiora, alieno arbitrio morem gerentes eos permisisse verisimile est.»

«Dicet vero fortasse iudaicus quispiam vir, ex iis qui Sospitatoris nostri doctrinae refragari audent, Iesum ipsum cum dixit: *Omnis qui dimiserit uxorem suam, excepta fornicationis causa, facit eam moechari*, repudiandae uxoris potestatem fecisse haud secus ac Moysen, quem pro duritie cordis populi legem tulisse dixit: et illud: *Quia foeditatem in ea invenit*, idem esse dicet ac fornicationis causam, propter quam iure mulier a viro repudiari possit: verum huic respondendum est, etiamsi ex legis mandato mulier adulterii rea lapidibus necanda sit, non ita foeditatem esse

intelligendam ; nec enim propter adulterium , vel similem aliquam turpitudinem libellus repudii scribendus est , et coniugi in manus tradendus ; sed quodlibet forsitan peccatum , foeditatem nuncupasse Moysen , quod si a viro deprehensum erit in uxore , quae gratiam coram viro non inveniatur , libellus repudii scribitur , et e viri domo emittitur ; *Ab initio autem non fuit sic.* Tum vero deinde Servator noster haudquaquam connubii solvendi propter ullum aliud flagitium facultatem concedens , quam solam fornicationem in uxore deprehensam , sic ait : *Omnis qui dimiserit uxorem suam , excepta fornicationis causa , facit eam moechari.* Quaeri autem potest an uxorem repudiare non liceat , nisi in adulterio deprehensa sit , verbi gratia , propter veneficium , vel quod infantem ab utroque genitum , viro peregre profecto , interfecerit , vel ob aliam quamlibet caedem : quin et si adulterii quidem insons viri domum clam diripuisse et expilasse animadversa sit , rogaverit aliquis an eiusmodi uxorem ex aequo et bono repudiabit , utpote vetante Servatore , ne quis excepta fornicationis causa , uxorem suam repudiet ; utrobique enim aliquod apparet absurdum , quod an revera absurdum sit ignoro ; tanta enim pati et tolerare flagitia , quae adulterio et scortatione peiora censeriqueant , plane a ratione videbitur esse alienum ; rursus contra Servatoris praecepta agere , nemo est quin impium esse confiteatur. Ac proinde in animo meo id disputo , curnam non dixit : *Nemo uxorem , excepta fornicationis causa , repudiet ;* at ait : *Qui dimiserit uxorem , excepta fornicationis causa , facit eam moechari ;* qui enim uxorem adulterii minime ream repudiat , quantum in se est , ansam ei adulterandi praeberet , nullus est qui inficias eat ; nam *si vivente viro vocabitur adultera , si fuerit cum alio viro ,* et repudiata ea occasionem illi dat iterum nubendi , per id efficit sane ut adultera sit ; at quae in veneficio oppressa est , vel caedem

patravit, dimittere, utrum excusationem habeat necne, ipse disquires: nam praeter repudium alias etiam multas adulterandi causas uxori vir potest praebere, maiorem puta quam par sit, ei licentiam concedens quaecumque vult agendi, et cum quibus libitum fuerit viris amicitiam contrahendi; nam virorum simplicitas uxores saepe numero in huiusmodi peccata inducit: at utrum talibus viris in eiusmodi casibus sit necne sui excusandi locus, id super quaestionibus hoc loco propositis diligenter a te investigatum declarabis. Is quoque, qui uxore abstinet, efficit saepe ut adulterium committat, cum eius libidinem non explet, etiamsi maioris sanctimoniae, vel castitatis specie ductus id faciat: et is fortasse maiori reprehensione dignus est, qui, quantum penes se est, efficit ut moechetur libidinem eius non explens, quam qui sine causa stupri, sed propter veneficium, vel caedem, aut gravius aliquid facinus eam repudiavit. Quemadmodum autem adultera est uxor, etiamsi viro alteri nupta videatur, priore etiamnum vivo; ita et virum repudiatam duxisse visum, non tam ipsius maritum, quam adulterum esse dicendum, a Servatore nostro demonstratum est (47).»

Nunc vero integrum hunc tractum analytice expendent, ex eo deprehendimus, quod Origenes 1. ex praestituta paulo ante perpetua coniugii christiani indissolubilitate Salvatoris verbis: *Quod Deus coniunxit, homo non separet*, pergat occurrere illi exceptioni, quae petitur ex Moysis constitutione de libello repudii, quam imperfectam esse decernit, neque datam nisi ob duritiam cordis, seu infirmitatem, prout et in novo Testamento nonnulla pariter ob idem motivum indulta sunt, quaeque enumerat; 2. hoc semoto obstaculo, illos reprehendit arguitque episcopos, qui *contra Scripturae legem, mulieri, vivente viro, nubere permiserint*, adductis ad id Pauli sententiis: *Mu-*

(47) Opp. ed. De la Rue tom. III. pag. 646-649. n. 23. et 24.

lier alligata est, quanto tempore vir eius vivit; et, vivente viro, mulier vocabitur adultera, si fuerit cum alio viro, idque indefinite, nempe utique quacumque ex causa, adeoque etiam ob fornicationem dimissa; 3. iudaizantem quemdam inducit, qui clausulam exceptionalem, nisi fornicationis causa obiiciat, perinde ac si idem ea significetur, quod Moyses in lege dixit foeditatem, qua permittebatur repudium; solvit vero obiectionem ostendens Moysen voce illa minime adulterium designasse, sed aliud quodcumque vitium, quo mulier non invenerit gratiam penes virum suum; 4. cum vero ab initio sic non fuerit, Christus ad unam fornicationis causam legitimam dimittendae uxoris facultatem coarctavit; 5. post haec, varios casus problematice proponit, ob quos videretur posse iure dimitti uxorem, et in quibus praeberet vir uxori ansam adulterandi: 6. concludit, quaecumque demum sint aut esse credantur causae iustae, ob quas vir possit dimittere uxorem suam, etiam adulterio graviores, fore semper adulteram mulierem illam, quae cum dimissa fuerit, alteri viro nupserit, vivo adhuc priore, a quo dimissa est.

Ex his patet Origenem ceu thesin firmam inconcusamque constituisse indissolubile prorsus esse in lege christiana matrimonii vinculum, ita ut si uxor quacumque demum de causa dimissa cum alio se copulaverit, ream se adulterii constituat. Ex hoc principio incipit, eoque pariter universam suam disceptationem concludit. Ac proinde, quod consequens est, neque per alias causas quascumque, neque per fornicationem dissolvi quoad vinculum coniugium, sed solum quoad torum et cohabitationem seiungi coniuges posse Origenes constituit. Quocirca merito Origenem inter assertores ac testes locupletissimos pariter adnumeramus catholicae doctrinae in hac quaestione.

Quid ad haec adversarii? Iamdiu Erasmus contendit

Origenem eos solos damnasse, qui, iudaeorum more, alias ob causas quamvis leves, dimitterent uxorem suam ad aliam ducendam praeter unicam fornicationis causam a Christo assignatam (48). Tournelyus anceps haeret, ac iuxta ipsum Origenes videtur tria adstruere 1. Licere in nova lege propter adulterium dimittere uxorem, prout licebat in lege mosaica propter foeditatem, adeoque per plenam coniugii dissolutionem; 2. ambigere num ob veneficium aliaque flagitia possit in nova lege uxor dimitti; quod quidem dubium nullum habuisset locum, si ipse de sola dimissione quoad torum et habitationem locutus esset; 3. docere, eum qui praeter adulterium uxorem dimittit, illam coniciere in occasionem peccandi, atque idcirco supponere uxorem ob adulterium dimissam posse alteri nubere (49). Alii censent Origenem nomine *legis* significasse *consilium*, illosque episcopos reprehendisse, quod alias ob causas, quam ob adulterium, permiserint repudiatis uxoribus iterum nubere (50); quod alii, paucis mutatis verbis, repetunt (51).

Ast perperam; si enim Origenes, ut contendit Erasmus, ea sola de causa reprehendisset episcopos illos, quod ob alias causas praeter adulterium dimissis mulieribus permiserint alia inire coniugia, non protulisset verba Apostoli adversus illos utpote agentes *contra Scripturae legem*, qua alligata viro mulier est *quanto tempore vir eius vivit*, ac adultera denunciatur quae *vivente viro fuerit cum alio viro*. Nec obest, quod Origenes iudaico viro obiicienti idem Christum permisisse, quod permiserat Moyses, responderit Christum ob solam fornicationem, Moysen vero ob quod-

(48) In annot. ad I. Epist. Corinth. cap. VII. Opp. ed. cit. tom. VI. p. 693. Neque ab Erasmo abludit Calvi, qui eandem exceptionem adoptat.

(49) *Praelect. theolog. De matrim.* cap. V. sect. 4. Concl. arg. II.

(50) Ita auct. op. germ. *Harmonia legum civilium bavaricar. indulgentium divortia cum sac. Scriptura et tradit.* Bamberg. 1819. pag. 18 seqq.

(51) Uti Secher in op. germ. *De divortio in regnis catholicis.* Landshut 1811. pag. 123-136.

cumque aliud flagitium praeter adulterium concessisse libellum repudii; quasi nempe ex mente Origenis Christus solutionem coniugii quoad vinculum permiserit ad eum modum, quo Moyses illam concesserat ob alios sive phisicos sive morales defectus. Nam cum praemiserit sola viri morte mulierem liberam effici ad alias ineundas nuptias adducens testimonium Apostoli; cumque episcopos dixerit egisse contra Scripturae legem ex eo quod permiserint vivente adhuc viro mulieribus nubere alteri viro; cum denique ingeminaverit Christi effatum *ab initio non fuit sic*, fieri nequit ut Origenes comparaverit, seu potius aequaverit facultatem a Christo datam dimittendi uxorem in *causa fornicationis* cum facultate concessa a Moyse ob *foeditatem* dissolvendi coniugium quoad vinculum. Restat igitur ut comparaverit tantum quoad dimissionem, seu divortium a toro et cohabitatione, alioquin sibi haud constitisset. Hinc dicamus necesse est Origenem parallelismum haud instituisse circa *effectus divortii* concessi a Moyse et a Christo, sed solum inter *causas divortii*, quae *plures* constitutae a Moyse fuerant, *unica* vero a Christo Domino. Sic omnia componuntur ac optime cohaerent.

Atque hac ratione iam solutum pariter est dubium primum, quo anceps factus est Tournelyus.

Ad alterum vero dubium petatum ex eo quod Origenes ancipitem se praebuerit quoad alias causas faciendi divortium, cuiusmodi sunt veneficium aliaque flagitia, quod, aiunt, locum habere non posset, si ipse de sola dimissione quoad torum et habitationem locutus fuisset, respondeo exinde magis patefieri Origenem non assignasse fornicationem sive adulterium uti causam solutionis vinculi coniugalis. Siquidem, si ita sensisset Origenes, facile ipsi fuisset sine ulla dubitatione in casibus sibi propositis licitam ostendere dimissionem ac separationem quoad vinculum, simulque notare discrimen quod interponitur

inter solutionem a Christo concessam propter fornicationem, quae in hypothese foret quoad vinculum, et separationem tantum quoad torum et habitationem, quam causae illae veneficii atque infanticidii expostulare videntur. Attamen Origenes, cum pro certo sumat non aliam a Christo assignari causam separationis quoad torum praeter solum casum fornicationis, ideo anceps animo haesit quoad alias causas.

Circa tertium dubium, quod nempe videatur Origenes animo pendens, num docuerit Christus, quod si quispiam praeter adulterium uxorem dimiserit, eam coniiciat in occasionem adulterii, responsio in promptu est: ideo Christus docuit ex Origene illum, qui dimittit uxorem praeter adulterii casum eam coniicere in adulterii occasionem perinde ac per alias causas, quas vidimus ab eo commemoratas, quae se tenent potissimum ex parte viri, quia ipse iniuste illam ac sine causa dimitteret; sed si vir dimittat ob adulterium ab uxore patratum, non viro eam eiicienti, sed solius uxoris ita dimissae malitiae illa adulteria adscribenda forent, eo ipso quod vivente adhuc marito suo, a quo eiecta est, alteri nupserit; hoc enim in casu vir ex doctrina Christi immunis erit a flagitiis uxoris. Talem vero admittendam esse doctrinae Origenis interpretationem non obscure fatetur Tournelyus ipse, qui concludit quod Origenes «Aliunde agnoscat et fateatur legem Christi esse, ut mulier vivente viro alteri non nubat, nisi velit esse adultera.»

Porro asserere, ut aliqui faciunt, Origenem per *legem* Scripturarum *consilium* significasse, est violentiam inferre textui, ac immutare Origenis sententiam. Nec aliter se gerunt qui autumant Origenem illos perstrinxisse episcopos, eo quod ob alias causas, quam propter adulterium mulieribus secundas nuptias permiserint. Nam ideo eos suggillat, quod fecerint contra expressam Apostoli doctri-

nam, iuxta quam mulier adultera est, quae vivente viro, cui alligata est usque ad eius obitum, fuerit cum alio viro, nulla exceptione facta (52).

Atque ut iam absolvam, quae ad Origenem spectant, dico ipsum quidem affirmare ob solam fornicationem licere uxorem, et quidem in perpetuum, dimittere; numquam vero asserere uxori dimissae ob fornicationem licere alteri nubere, immo contrarium constanter adstruere iuxta catholicam doctrinam, cuius se assertorem et testem exhibuit (53).

§. VII.

De s. Cypriano.

De s. Cypriani mente non est quod ambigamus; etenim praeter quam quod nusquam affirmavit licere aliquando viro ita dimittere uxorem suam, ut possit alteram ducere, aperte quaecumque dissolubilitatis coniugalis vinculi causam excludit.

Et quidem in libro *Testimoniorum ad Quirinum*, in quo profitetur se praecepta et sententias Scripturarum collegisse, cum pervenit ad exponendam Christi doctrinam circa matrimonium, eam paucis his verbis complexus est. «Uxorem a viro non recedere, aut si recesserit, innuptam manere; Paulus ad Corinthios: iis autem, qui nupserunt, praecipio non ego sed Dominus, uxorem a viro non separari, si autem recesserit, manere innuptam, aut re-

(52) Apposite Nat. Alexand. *Theol. dogm.* lib. II. *De matr.* prop. 2. ad haec quae sibi obiecit Origenis verba, resp. «Verum Origenes priscos illos episcopos contra Scripturam permisisse ait, *dimissis coniugibus adulteris*, aliis nubere; vel permiserunt, id est impunitum reliquerunt, ob graviora mala vitanda, sed tamen non approbarunt.»

(53) Hac forte de causa Io. Gerhardus inter patronos divortiorum Origenem non recensuit. Insuper ex dictis elucet quam falso affirmet Launoius «quod Origenes matrimonium propter adulterii crimen dirimi putet iuxta Scripturam.» Nam Origenes oppositum praecise docet.

conciliari viro, et virum uxorem non dimittere (54).» Quibus ostendit omnem excludi solutionis vinculi causam, ac proinde ne meminit quidem clausulae exceptionalis de fornicatione, de qua apud Matthaëum.

Et haec ex Cypriano in rem nostram attulisse sufficiat, cum aliud quod ex ipso afferri solet testimonium depromptum ex libro *De disciplina et bono pudicitiae*, sit adscriptitium; hic enim liber ex operibus genuinis s. martyris in criticis editionibus illius operum penitus eliminatur (55).

Ceterum quod attulimus ad institutum nostrum satis est, ut eum inter doctrinae catholicae adsertores et testes accenseamus, eo vel magis, quod adversarii ipsi aut pro causa sua omittant, aut vix quidem de s. Cypriani mente disceptent (56).

§. 8.

De Lactantio.

Prolixior necessario erit disceptatio de Lactantio, quem adversarii omnes ad causam suam fulciendam adducunt; catholici vero circa eius mentem ancipites sunt, aliis ultro fatentibus ipsum dissolutionis coniugalis vinculi propter adulterium assertorem fuisse, aliis vero refragantibus. Promam candide quae ex utraque parte proferuntur; quid deinde verisimilius censendum sit exponam.

Itaque prius praemittamus necesse est quae scripsit *Divinarum institutionum* lib. VI. c. 23. «Haec sunt, inquit, quae ad continentiam praecipiuntur a Deo; sed tamen ne quis divina praecepta circumscribere se putet posse, adduntur illa, ut omnis calumnia et occasio fraudis remo-

(54) Lib. III. n. XC. ed. Maur. Paris. 1726. pag. 326.

(55) Cf. ed. Maur. pag. II.

(56) Reipsa neque Gerhardus, neque Calvi aut Launoius eius mentionem iniiciunt. In pagellis vero theologicis ulmiensibus 1811. recursus habetur ad vetus Caletani inventum, quod s. Cyprianus loquatur *in regula*.

veatur: adulterum esse, qui a marito eiectam duxerit, et eum, qui *praeter crimen adulterii uxorem dimiserit, ut alteram ducat*. Dissociari enim corpus et distrahi Deus noluit (57); » sic in *Epitome divin. institut.* cap. LXVI. rursum scribit: « Sed sicut foemina castitatis vinculis obligata est, ne aliud concupiscat: ita vir eadem lege teneatur, quod Deus ex viro uxorem unius corporis compage solidavit. Ideo praecepit, non dimitti uxorem, nisi crimine adulterii revictam, ut numquam coniugalis foederis vinculum, *nisi quod perfidia ruperit, resolvatur* (58). »

Haec quidem hoc de argumento Lactantius, ex quibus, ut innuimus, plerique contendunt, eum vere exceptionem, quae occurrit apud Matthaeum de vinculi coniugalis diremptione, accipere. Siquidem in priori textu aperte loquitur de uxoris dimissione in ordine ad aliam ducendam; ait enim, *qui dimiserit ut alteram ducat*, eum vero qui hac ratione se gerit, interveniente adulterii crimine, rite id facere Lactantius pronunciat. Id magis confirmatur ex eo quod paulo ante illa sola divortia damnaverit, quae ex causa intemperantiae et libidinis fierent (59). Nec aliter dicendum de posteriori adducto textu, ubi idem auctor affirmat numquam licere coniugalis foederis *vinculum* resolvi, nisi quod perfidia, seu fidei coniugalis laesio iam ruperit.

Hi proinde fatentur hac in sententia Lactantium fuisse, ast non magni faciendam esse eiusdem auctoritatem, utpote illius quem pronunciauit s. Hieronymus in superstitionibus gentilium refellendis solidiorem fuisse, quam in religionis christianae dogmatibus confirmandis (60).

(57) Opp. ed. Rom. 1757. pag. 278 seq.

(58) Eiusdem ed. 1758. pag. 302 seq.

(59) In eod. capite, segm. 15 seq.

(60) Sic enim scribit s. Doctor de Lactantio « Lactantius quasi quidam fluvius eloquentiae Tullianae, utinam tam nostra affirmare potuisset, quam facile aliena destruxit. » Epist. LVII. ad Paulinum n. 10. Opp. ed. Vallars. tom. I. col. 324.

Qui vero Lactantium a ceteris catholicae doctrinae adsertoribus minime discrepare contendunt, diversimode id efficiunt. Nam sunt, qui censent Lactantium ita scripsisse respectu habito ad leges civiles, quae aetate illa contra ius naturale et divinum alias nuptias viro dimittenti uxorem suam ob fornicationem concedebant (61). At ex contextu contrarium apparet; siquidem ipse potius civilibus legibus opponit legem divinam. Alii autem forte probabilius arbitrantur non aliud Lactantium adductis verbis significasse, quam quod Christus Matth. XIX. docuit, nempe non licere praeter fornicationem uxorem dimittere, quin tamen concesserit, uxore hac de causa dimissa, aliam ducere (62).

Nec desunt argumenta indirecta et directa, quae id suadere videantur. Indirecta quidem petuntur tum ex eo, quod numquam Lactantius in suis operibus vel insinuet aliquando licere propter adulterium ita dissolvi coniugium, ut fas sit aliam ducere uxorem; tum ex eo quod idem disserens de civilibus legibus comparatis cum lege divina omnimodam coniugii adstruat firmitatem, scribens: « Non enim, sicut iuris publici ratio est (63), sola mulier adultera est, quae habet alium: maritus autem, etiamsi plures habeat, a crimine adulterii solutus est. Sed divina lex ita duos in matrimonium, quod est in corpus unum, pari iure coniungit, ut adulter habeatur quisquis compagem corporis in diversa distraxerit (64). »

(61) Ita Iacobi in resp. ad Braun in op. cit. *Indissolubilitas vinculi matrimonial.* Sect. II. cap. I. §. 6. pag. 76.

(62) Ita Nourry in *Apparatu ad biblioth. maxim. patrum*, tom. II. disert. III. in Lactant. cap. 27. art. 5.

(63) Alludit ad *leg. Iuliam de adult.*, qua mulieri non permittitur in publico iudicio accusandi facultas, etiamsi propriam iniuriam adversus coniugem expostularet. Quod non solum Lactantius heic improbrasse videtur, sed etiam pseudo-Athanas. in *Quaest. ad Antioch. duccem* ad calcem opp. s. Athanas. ed. Maur. tom. II. pag. 268. item Gregorius nanzianz., Ambrosius aliique apud Cuiacium eod. tit.

(64) Ibid. lib. VI. *Divin. institut.* cap. XXIII. n. 24. ed. cit. pag. 274 seq.

Directa autem desumuntur ex verbis ipsis Lactantii, quae si attentius inspiciantur duo significant, 1. nempe *adulterum esse, qui a marito eiectam duxerit*; 2. *adulterum pariter esse eum, qui praeter adulterii crimen uxorem dimiserit, ut alteram ducat*, quibus posterioribus verbis implicate significare voluit Lactantius eum fore reum adulterii, qui fornicationis causa, ita dimittat uxorem, ut ducat alteram, eum vero innoxium, qui hoc in casu fornicariam uxorem tantummodo dimittat, quin aliam ducat. Quibus veluti digito indicat Matthaei testimonium XIX. 9. Sane hanc, nec aliam esse Lactantii mentem in obiecto loco colligunt ex pericope, qua concludit quod antea dixerat: *Dissociari enim corpus et distrahi Deus noluit*. Quae conclusio praepostera ac falsa esset, si ut contendunt adversarii, Lactantius reipsa dissolvi quoad vinculum coniugium asseruisset ob adulterii flagitium. Congruit praeterea sententia Lactantii de sola dimissione quoad torum ob adulterium cum verbis, quae ex eo descriptissimus: «Divina lex ita duos in matrimonium, quod est in corpus unum, pari iure coniunxit, ut adulter habeatur, quisquis compagem corporis in diversa distraxerit.» Haec enim cum generalia sint, nullam exceptionem admittunt, seu verius exceptionem omnem excludunt. Siquidem reipsa corporis compago in diversa distraheretur, data facultate ob adulterium alterius coniugis, alium aut aliam ducendi. Et haec quoad primum textum ex lib. VI. c. 23. *Divin. institutionum*.

Quoad alterum vero allegatum ex *Epitome* cap. LXVI. animadvertunt eruditi 1. verbum *resolvi* quo utitur Lactantius in sensu christianae antiquitatis haud posse accipi ad significandam veram quoad vinculum diremptionem coniugii, sed solum ad dissociationem designandam quoad habitationem et torum. Cuius rei exemplum proferunt ex conc. foroiuliensi, quod iisdem pene verbis utitur ad solam dissociationem quoad torum significandam. Ait enim can. X.

« Item placuit ut, *resoluto fornicationis causa iugali vinculo*, non liceat viro, quamdiu adultera vivit, aliam uxorem ducere, licet sit illa adultera (65).» Animadvertunt 2. in editione florentina an. 1515. huius operis sic efferri obiectum textum: « Praecipit Deus non dimitti uxorem, nisi crimine adulterii devictam, et numquam coniugalis foederis vinculum, *etsi perfidia ruperit*, resolvatur (66).»

Quae quidem si ad invicem conferantur, patet longe verisimiliorem illorum sententiam esse, qui contendunt Lactantium de sola dissolutione quoad torum et cohabitationem esse locutum, in quorum sententiam et nos concedimus utpote qui firmioribus argumentis fulti videantur. Quin etiam arbitramur levius nimis nonnullos Lactantium inter contrariae doctrinae patronos recensere, eumque hac de causa deserere (67), cum nihil eos ad hoc cogat, quin potius plura suadeant eum inter assertores catholicae doctrinae adnumerare. Hinc Natalis alex., vir in antiquitate enucleanda solertissimus, Lactantii auctoritate utitur ad adstruendam catholicam veritatem (68).

§. IX.

De concilio illiberitano.

Quatuor in hoc vetustissimo concilio (69) editi sunt de matrimonio canones; sunt autem VIII. « Item foeminae,

(65) An. 791. celebrat. apud Harduin. *Acta concil.* tom. IV. col. 859.

(66) In ed. vero Basileae an. 1532. alia habetur lectio, scilicet: « Et numquam coniugalis foederis vinculum, *nisi ruperit*, resolvatur;» ubi deest *perfidia*. Cf. fol. 138. tergo.

(67) Inter quos sunt Collet in *Tract. de matrim.* cap. V. n. 297. Liebermann, Zenger aliique ex recentioribus apud Roskovány §. 125.

(68) *Theolog. dogm.* lib. II. *De matrim.* prop. II. Cf. etiam Martorelli op. cit. pag. 319 seq. adversus Calvi. Nec non Fred. De Mendoza qui in can. IX. conc. illiberit. late de Lactantio disserit, eumque strenue defendit. Cf. card. De Aguirre in *Collect. max. conc. hisp.* tom. I. pag. 392 seq.

(69) Anno iuxta card. De Aguirre 305. Nempe XIX. imp. Diocletiani, urgente adhuc persecutione. Cf. dissertat. *De tempore celebrati* huius concilii.

quae nulla praecedente causa, reliquerint viros suos et se copulaverint alteris, nec in fine accipiant communionem.» IX. «Item fidelis foemina, quae adulterum maritum reliquerit fidelem, et alterum ducit, prohibeatur ne ducat; si autem duxerit, non prius accipiat communionem, nisi quem reliquerit, prius de seculo exierit; nisi forte necessitas infirmitatis dare compulerit (70).» X. «Si ea, quam catechumenus reliquit, duxerit maritum, potest ad fontem lavacri admitti. Hoc et circa foeminas catechumenas erit observandum. Quod si fuerit fidelis, quae ducitur, ab eo qui uxorem inculpatam reliquit, et cum scierit illum habere uxorem, quam sine causa reliquit; placuit huic nec in finem dandam esse communionem.» LXXII. «Si qua vidua fuerit moechata, et eundem postea habuerit maritum; post quinquennii tempus, acta legitima poenitentia, placuit eam communioni reconciliari; si alium duxerit, relicto illo, nec in fine dandam esse communionem: vel si fuerit ille fidelis, quem accepit, communionem non accipiat, nisi post decem annos, acta legitima poenitentia, nisi infirmitas coegerit velocius dare communionem (71).»

Ex his canonibus deprehendimus patres illiberitanos adversus leges romanas, quae divortia passim permittebant (72), constituisse inter christianos eiusmodi vinculi dissolutionem nullo umquam in casu locum habere posse.

(70) Paulo aliter hunc canonem refert card. De Aguirre, scilicet: «Item fidelis foemina quae adulterum maritum reliquerit fidelem, et alterum duxerit, non prius accipiat communionem, quam is quem reliquit, de seculo exierit, nisi necessitas infirmitatis dare compulerit.» Omissis etiam verbis: *prohibeatur ne ducat*, et *si autem*, nec non particula *forte*.

(71) Apud Harduin. *Acta concil.* tom. I. col. 251. et 258.

(72) Cf. hoc de argumento Carol. Sigonius lib. I. *De antiquo iure romano* cap. 9. Plutarch. in *Comparat. Romuli et Thesei*, atque in *Problem. rom.* cap. 13. Item late de divortiis ex iure rom. agunt p. Gregor. lib. IX. *Syntagm.* cap. 15. Hieronym. Magius lib. II. *Miscell.* 22. Cuiaccius ad tit. C. de *Repub.* et in *Novell.* 22. ut alios praeteream. Sane adhuc extant L. *Si quis mihi* 12. *De ritu nuptiar.* L. *Nuptias* 30. in princip. I. penultim. §. *Uxor* ff. *Solut. matrim.* L. *Cum vir* 25. ff. ad Trebell. Quum vero mulier dimissa ex causa

Etenim in can. VIII. perpetuae excommunicationi eas subiecit, quae *nulla praecedente causa* reliquerint viros suos, seque alteris copulaverint. Ideo vero clausula illa interiecta est: *nulla praecedente causa*, quod agatur de mulieribus, quae virum suum, quamvis infidelem reliquissent, ut alteris se coniungerent, quum vetitum illa aetate esset ab infideli recedere. Poterant autem esse causae, ob quas licite virum infidelem mulieres christianae dimitterent, ex. gr. si nolisset infidelis pacifice cum ea vivere, ac sine contumelia Creatoris; si ipse prius discessisset, si repudium uxori fideli dedisset. His causis demptis, si mulier ab infideli se separasset ad novas ineundas nuptias, utpote adultera, hoc canone gravissima poena plectitur (73).

In canone vero IX. omnino prohibetur quominus fidelis foemina, relicto fideli marito adultero, illo adhuc vivente, alteri nubat, sub perpetuae pariter excommunicationis interminatione, utpote adulterii rea, cum quoad vinculum prius adhuc coniugium perduret (74). Exinde itidem patet patribus illiberitanis persuasum fuisse coniugia christianorum ne in casu quidem adulterii dirumpi posse.

Quod vero spectat ad can. X. omissa prima eius parte, quae agit de catechumenis, in altera parte eadem poena plectitur mulier illa christiana, quae cum catechumeno, de quo supra, postquam suam repudiarit uxorem, nuptias

adulterii, properaret secundas nuptias contrahere, ut effugeret adulterii accusationem L. *Si postulaverit* 27. ff. ad L. *Iuliam de adult.* Martial. lib. I. epigr. 17. et lib. VI. epigr. 4. Ideo legibus cautum est, etiam nubente post divortium adultera, accusari adulterii posse L. *Adulter.* 29. ff. ad L. *Iul. de adult.* L. 3. Cod. Theodos. eodem tit.

(73) Cf. Alaspinaeum in not. ad hunc can. ad calcem opp. Optati et Fandi Hermian. Lutetiae Paris. 1676. tom. II. p. 111. nec non card. De Aguirre *Collec. max. conc. hisp.* Romae 1693. tom. I. pag. 384 seqq.

(74) Notandum porro hic est, concedi a concilio mulieribus nubere viro adultero, cum quo vivente viro et legitimo marito, rem habuisset, quod nunc prohibitum est, accedente praevia promissione, ut ne quidem post mortem mariti mulier possit cum adultero suo nuptias legitimas facere, ob impedimentum dirimens ab ecclesia postea constitutum, quod *criminitis* vocatur.

fecit, et non ignoravit priorem illam mulierem sine causa eiectam fuisse (75). Porro illa canonis verba: *quam sine causa reliquit*, intelligenda videntur de muliere, quae licet converti noluerit, tamen cohabitare sine contumelia Creatoris volebat, quaeque ducitur non ab alio gentili (ut in primo huius canonis casu), sed a fideli, qui eam novit sine causa, sive inculpatam a catechumeno relictam fuisse, idcirco constituerunt patres ipsum nec in fine accipere debere communionem, tum quia contraxit matrimonium cum ea, quae adhuc legitima erat uxor catechumeni, cum eius matrimonium non dissolveretur, donec post baptismum conversus novum iniisset coniugium, tum quia cum esset fidelis nuptias contraxit cum gentili, quae converti ad fidem renuebat (76). Verum quaecumque demum admittatur difficilis huius canonis interpretatio, illud firmum fixumque est ab illiberitanis patribus constitui coniugii christiani plenam perpetuamque indissolubilitatem.

Neque ab hac doctrina deflexit concilium in can. LXXII. in quo agitur de uxore, quae adulterium perpetrat, et defuncto marito, cum ipso adultero matrimonium contrahit. Porro si haec ipsa mulier reliquerit maritum istum secundum, et cum alio matrimonium contraxerit, seu potius attentaverit, perpetua excommunicatione multatur. Si quidem relicto illo marito, cum quo etsi illicite, valide tamen matrimonium contraxerat, alterum coniugium, durante coniugio priori, inire praesumpsit. In postrema eiusdem canonis parte merito illi, qui quamvis illicite, valide tamen cum adultera coniugium contraxerat, poena iniungitur annorum decem, si fidelis fuerit (77). Novum igitur

(75) Cf. Albaspinaeum in not. ad hunc canon. l. c. p. 112. qui profitetur hunc canonem esse intellectu difficilem.

(76) Ita rem explicat Gonzalez in notis ad conc. illiberitan. apud card. De Aguirre l. c. p. 401. ubi alias suppeditat expositiones.

(77) Ita rursus Gonzalez, cui expositioni congruit summarium, seu titulus huic canoni praefixus, qui ita in omnibus codicibus exhibetur: *De viduis moechis, si eundem postea maritum duxerint.*

hoc ex canone argumentum eruitur de firmitate vinculi coniugalis, quam patres illiberitani adstruunt, dum neque in hoc casu de ducto criminis socio, legitime seu valide alterum coniugium, illo vivente, iniri permittunt, imo perpetua excommunicatione eam, quae eiusmodi facinus attentaverit, plectunt, etsi iuxta civiles leges illius aetatis impune ac legitime id fieri posset (78).

Quarto proinde seculo ineunte in possessione erat in ecclesia catholica doctrina de plena indissolubilitate christiani coniugii, ac germana interpretatio verborum Christi apud Matthaeum: *Nisi ob fornicationem, et excepta fornicationis causa*, quae ad solam dimissionem uxoris adulterae ea verba coarctat, quin facultas detur novas ineundi nuptias.

Cum adeo perspicui sint hac in re canones illiberitani concilii, mirum est nonnullos etiam inter catholicos ceu adversos catholicae doctrinae eos abiicere (79), alios vero conniti ut in sensum omnino alienum eos detorqueant, aut saltem ut omnem iis tollant vim ad coniugii indissolubilitatem comprobendam.

Quamvis iam fuerint praeoccupata, quae ab his in medium proferuntur, non abnuimus tamen ea ad trutinam revocare. Aiunt igitur 1. can. VIII. et IX. de mulieribus tantum, non autem de viris agere; adeoque istis permitti, ut, dimissa coniuge adultera, aliam ducant (80); 2. eosdem canones absolutae indissolubilitati repugnare, eo vel magis, quod in ecclesia adulterium usque ad sec. VI. causam

(78) Exinde ineluctabile habetur argumentum ad evincendum ab ecclesia constituta fuisse iure proprio impedimenta dirimentia, et quidem contra vigentem principum legislationem. Hoc concilium fortasse primum fuit, quod leges statuerit ad coniugia christiana adversus leges civiles tunc temporis receptas moderanda; uti animadvertit Gonzalez l. c.

(79) Inter quos recensentur Didacus Covarruvias in 4. 2. part. §. 6. n. 23. nec non Sixtus senensis *Bibl. sancta* ann. 81. errore decepti ex decreto Gratiani in cap. *Si quae mulier*. Causa XXXI. q. 1. qui tribuit conc. illiberitano canonem conc. wermeriensis.

(80) Uti Braun in cit. dissert. *Utrum matrimonii vinculum etc.* apud Iacobi opp. cit. *Indissolubilitas etc.* p. 120 seqq.

legitimam dissolvendi vinculi coniugalis praebuerit (81); 3. Addunt praeterea secundas nuptias post dimissionem contractas can. IX. illicitas quidem, ast non irritas decerni (82); 4. si haec inhaesisset patribus illiberitanis sententia de vinculi perpetuitate, iussissent profecto mulierem, de qua est sermo, ad priorem maritum reverti, quod tamen minime fecerunt.

Verum primum facile diluitur, si ratio habeatur aetatis, qua haec constituta sunt, XIX. scilicet anno imperii Diocletiani; iam vero hic imperator lege data an. 293. divortii valde favorat constituens ad divortium legitime faciendum sufficere *si libellus repudii per mulierem scriptus sit*, etiamsi nondum marito traditus, imo etiamsi ille id ignoraverit (83). Ut proinde huic legi, quae licentiae mulierum et abusibus latissimum aperiebat campum, illiberitani praesules sese opponerent hos canones statuerunt, nulla virorum iniecta mentione. Ceterum ignorare non poterant sanctissimi praesules aequale ius in coniugio tam viris quam uxoribus competere, ut constat ex Marc. X. 11. Luc. XVI. 18. ac 1. Cor. VII. 10. et quemadmodum postea scripsit s. Basilius: «Aequae viris et mulieribus convenit secundum sententiae consequutionem, quod a Domino pronuntiatum est (84).»

Sic alterum exploditur, cum contra rei veritatem assumatur quod falsum est, sive nominatim quoad canones illiberitanos, quasi nempe faveant divortio, sive generatim quoad ecclesiae disciplinam, quod nimirum adulterium usque ad saeculum sextum ecclesiae causam divortii faciendi praebuerit. Hoc cum historia pugnat.

(81) Uti *Scholiasta tuingensis* in *Trimestr. recens. theologica* 1821.

(82) *Ibid.* 821. pag. 26.

(83) Lib. V. tit. 17. *De repudiis et iudicio* etc. C. L. 6. «Licet repudii libellus non fuerit traditus, vel cognitus marito, dissolvitur matrimonium.» Dat. 18. kal. Ian. Nicomediae CC. an. 293.

(84) *Epist. CLXXXVIII. can. IX. ed. Maur. tom. III. pag. 273.*

Tertium pariter falsum deprehenditur ex tenore canonis IX. in quo dicitur, non posse mulierem alteri nubere, nisi prius quem reliquerat, de seculo exierit, et ex poena perpetuae excommunicationis.

Quartum demum, quod ab adversariis desideratur, concilium illiberitanum aequivalenter edixit, dum mulieribus interdicit, ne vivente dimisso viro, alteri nubere, iuxta illud Apostoli: *Quod si discesserit, manere innuptam, aut viro suo reconciliari.*

§. X.

De Concilio arelatensi.

Haud multo post concilium illiberitanum celebratum est in Galliis conc. arelatense, nempe an. 314. sub Constantino imperatore in causa Caeciliani. In hoc concilio reperimus eandem catholicam doctrinam can. X. his verbis adstructam: « De his, qui coniuges suas in adulterio deprehendunt, et iidem sunt adolescentes fideles, et prohibentur nubere, placuit ut in quantum possit consilium eis detur, ne viventibus uxoribus suis, licet adulteris, alias accipiant (85). »

Duas partes hic canon complectitur; altera declarat ius, altera vero modum seu rationem servandam in illius executione. Quoad ius traditur iuxta evangelicam et apostolicam doctrinam prohibitum esse aliam ducere uxorem, adultera dimissa, dum haec in vivis degit: *et prohibentur nubere.* Quoad rationem inducendi adolescentes fideles ad hanc doctrinam sancte servandam, statuunt huius concilii patres ut per *consilium*, seu per exhortationem eis suadeatur ne per novas nuptias Christi doctrinam ac prae-

(85) Apud Harduin. tom. I. col. 265.

ceptum violent obtentu legum civilium, quae divortium permittebant (86).

Hanc mentem esse concilii patet tum ex sermonis tenore, tum ex titulo seu summario eiusdem canonis: *Ut is, cuius uxor adulteravit, aliam illa vivente non accipiat* (87); tum denique ex eo quod si *consilium*, cuius hic mentio fit, acciperetur de re libera, ut contendunt adversarii, concilii praesules sibi contradicerent, dum quod *absolute prius affirmant esse prohibitum*, idem deinde *liberum* pronunciarent.

Quae cum ita sint, concidunt sua veluti sponte quaecumque excogitarunt divortiorum patroni ut huius canonis vim eluderent, immo vero et in rem suam converterent. Launoio enim antesignano, contendunt praeceptum quondam impositum esse ne secundas nuptias adolescentes neophyti inirent; ab huius autem concilii patribus in consilium versum fuisse, quod qui sequerentur bene facerent, qui vero negligerent, immunes a piaculo essent (88). Hinc extollunt prudentiam sapientia plenam, moderationemque patrum arelatensium (89), qui aetate illa ausi non sunt perspicue orthodoxam doctrinam proponere, ne in aperta lucta cum civili imperio invenirentur.

Ast istorum error in eo versatur, quod *consilium* in casu de quo agitur iunioribus dandum a patribus edicatur, referant sive ad doctrinam, sive ad rem disciplinarem. At in utroque decipiuntur. Decipiuntur dum illud referunt ad doctrinam, quae aperte statuitur illis verbis: *Et prohi-*

(86) Has leges paulo ante attulimus.

(87) Hi tituli antiquissimi sunt, et in omnibus codicibus reperiuntur. Lib. VIII. *Decreti Ivonis* c. 258. sub hoc titulo effertur canon noster: *Ut quantumvis adolescentes, viventibus uxoribus suis, alias non ducant.*

(88) Launoi. op. cit. pag. 827. et 1029. Braun diss. cit. apud Iacobi *De indissol.* p. 120. Ren. Leonard. Werkmeister, Scholiasta tubingens apud Roskovány op. cit. §. 128.

(89) Uti Nicol. München. in *Annal. philos. et theol. cathol.* Koblenz 1838. pag. 58.

bentur nubere; decipiuntur pariter dum illud referunt ad disciplinam, quasi nempe in potestate istorum esset praesulum veritatem a Christo et ab Apostolo traditam temperare in praxi et abolere. Absit. Itaque, ut diximus, refertur unice ad modum suaviter inducendi neophytos ad doctrinam evangelicam opere exequendam; eadem ratione qua Apostolus ad Titum scribebat: «Iuvenes similiter hortare, ut sobri sint (90).» Ecquis porro dicet sobrietatem rem esse liberam in iuuenibus? Ut quod contendunt adversarii evincerent, ostendere deberent, quod si adolescentes illi consilio seu adhortationi sibi datae non paruissent, a poenis in bigamos latis fuissent immunes, quod quidem numquam efficient.

Quae subtexuere auctores isti, nil aliud sunt quam gratuitae assertiones ex anticipatis eorum iudiciis deductae sine ullo prorsus fundamento; siquidem nullam probationem attulerunt. Adeoque contemni debent.

§. XI.

De s. Basilio.

Eo maiori diligentia expendenda a nobis sunt quae hoc de argumento scripsit s. Basilius, quo et maior est eius apud graecos auctoritas, et difficilior quorundam locorum interpretatio, adeo ut Basilium pro se stare contendunt tum qui pro solutione coniugii in causa adulterii pugnant, tum qui pro omnimoda indissolubilitate coniugalis vinculi decertant. Prius igitur describemus eius verba prout iacent, deinde vero in eorum sensum analytice inquiremus.

Primus locus legitur in epistola I. canonica ad Amphilochem (91), can. IX. «Aequè viris et mulieribus convenit secundum sententiae consequutionem quod a Domino

(90) Cap. II. 6.

(91) Quae in edit. Maur. est. CLXXXVIII.

pronunciatum est, non licere a matrimonio discedere, nisi ob fornicationem. Consuetudo autem non ita se habet, sed de mulieribus quidem multa accurate observari deprehendimus, cum Apostolus quidem dicat, *quod qui adhaeret meretrici, fit unum corpus*. Ieremias vero *quod si fuerit mulier cum alio viro, non revertetur ad virum suum, sed polluta polluetur*: et iterum: *Qui habet adulteram, stultus est et impius*. Consuetudo autem etiam adulteros viros et in fornicationibus versantes, iubet a mulieribus retineri. Quare quae una cum viro dimisso habitat, nescio an possit adultera appellari. Crimen enim hic attingit mulierem, quae virum dimisit; quanam de causa a coniugio discesserit. Sive enim percussa plagas non ferat, ferre satius erat, quam a coniuge separari: sive damnum in pecuniis non ferat, ne haec quidem iusta excusatio: sin autem, quoniam ipse vivit in fornicatione, non habemus hanc in ecclesiastica consuetudine observationem, imo vero ab infideli viro non iussa est mulier separari, sed propter eventum incertum remanere. *Quid enim scis mulier an virum salvum sis factura?* Quare, quae reliquit, est adultera, si ad alium virum accessit: qui autem relictus est, dignus est venia, et quae una cum eo habitat, non condemnatur. Sed si vir, qui ab uxore discessit, accessit ad aliam, est et ipse adulter, quia facit ut ipsa adulterium committat, et quae una cum ipso habitat, est adultera, quia alienum virum ad se traduxit. »

In epistola vero II. canonica (92), can. XXI. haec habet: « Si vir una cum uxore habitans, postea matrimonio non contentus, in fornicationem inciderit; fornicatorem eum iudicamus, ipsumque longius producimus in impositis poenis: sed tamen canonem non habemus, qui eum adulterii crimini subiiciat, si in solutam a matrimonio peccatum commissum sit: propterea quod *adultera quidem,*

inquit, *polluta polluetur, et ad virum suum non revertetur, et qui adulteram detinet, stultus est et impius*; sed qui fornicatus est, non excludetur quominus cum uxore habitet. Quare uxor quidem a fornicatione revertentem virum suum excipiet: vir vero pollutam e suis aedibus eiiciet. Atque horum quidem ratio non facilis, sed consuetudo sic invaluit. »

Rursum ibid. can. XLVIII. « Quae a marito, scribit, relicta est, mea quidem sententia, manere debet. Si enim Dominus dixit: *Si quis relinquat uxorem, excepta fornicationis causa, facit eam moechari*; ex eo quod eam adulteram vocet, praeculit ei coniunctionem cum alio. Quomodo enim possit vir quidem esse reus, ut adulterii causa, mulier vero inculcata, quae adultera a Domino ob coniunctionem cum alio appellata est? »

Demum, ceteris omissis, quae vel spuria aut saltem dubia sunt (93), vel directe ad rem praesentem non faciunt (94), in Regula LXXIII. scribit: « Non licet viro, uxore dimissa, aliam ducere: neque fas est repudiatam a marito, ab alio duci uxorem (95). »

Animadvertimus porro testimonium, quod ex Reg. LXXIII. attulimus esse prorsus decretorium; ibi enim s. Basilius absque haesitatione et ambage profitetur fore adulterum sive virum sive uxorem, qui, altero coniuge dimisso, alterum ducat, aut alii nubat, nulla prorsus exceptione

(93) Cuiusmodi est liber inscriptus *De vera virginitate*, quem reiecit editor maurinus, d. Garnerius, inter opera spuria adscripta s. Doctori in append. ad vol. III. pag. 589. In praemisso *Monito* concedit quidem opus istud antiquum esse, sed tum ex stylo, tum ex chronologia ostendit foetum s. Basilii non esse adversus Combesium et Dupinium. Id ipsum iam praestiterat Tillemontius *Mémoires pour servir à l'histoire ecclésiast.* tom. IX. note 90. *Sur le livre de la virginité attribué à s. Basile* pag. 685 seq. Quod fusius deinde praestitit Ceillier *Hist. génér. des auteurs ecclésiast.* tom. VI. pag. 341 seq.

(94) Prout est quod adduci solet ex homil. VII. in Hexaëmer. §. 5. ubi in genere asserit s. Pater indissolubilitatem coniugii.

(95) Opp. ed. cit. tom. II. pag. 308.

apposita. Has vero regulas digessit s. Basilius ante suum episcopatum.

Difficultas igitur excutienda remanet, quae oritur ex can. IX., atque ex can. XXI. in quo eadem ferme repetit s. Doctor quae constituerat in can. IX. qui ambo de eodem sunt argumento,

Ut quae constituit s. Basilius rectius intelligamus, praemittimus s. Doctorem agnoscere 1. in lege evangelica parius esse tum viris tum uxoribus, idque tamquam principium inconcussum constituit dicens: *Aequae viris et mulieribus convenit secundum sententiae consequutionem quod a Domino pronunciatum est, non licere a matrimonio discedere, nisi ob fornicationem* (96). 2. Asserit nihilominus consuetudinem in praxi diversam obtinere, ut viri mulieribus praeferantur, quatenus viri mulieres adulteras possint dimittere, mulieres autem viros adulteros dimittere nequeant. 3. Fatetur eiusmodi consuetudinem cum evangelio minime consentire. 4. In can. XXI. constituit aliud discrimen intercedere inter virum et mulierem circa repudium, quod vir quidem in ipso matrimonio, si cum soluta et libera peccaverit, adulterii nomine non condemnetur, sed fornicationis; contra vero uxor in eodem peccato certissime adultera sit. 5. In can. XLVIII. uxorem a marito dimissam ab alterius spe coniugii excludit, ipso superstite.

Itaque hic iam quaeritur utrum s. Basilius eiusmodi consuetudinem a lege civili inductam probaverit nec ne. Natalis alex. cum aliis affirmantem sententiam amplecti visus est, scribens: « Quod autem hanc sententiam amplexus (ut mihi quidem videtur) fuerit s. Basilius eo excusatione dignus est, quod loquebatur in obscurissima

(96) Nat. alexand. agens de hac s. Basili epist. ad sec. IV. cap. VI. art. 19. §. 4. dicit: « Can. IX. agit de matrimonii indissolubilitate, et sola fornicationis causa separationem coniugum quoad forum licitam esse decernit secundum sententiae dominicae consequentiam. »

quaestione, quae tunc temporis nondum erat liquido dissectata (97).» Alii vero id inficiantur, atque ut nobis videtur, longe verisimilius.

In hanc autem sententiam adducimur 1. ex eo quod non videatur probabile eum, qui clare adeo in eodem orationis contextu professus est aequalia iura inesse viris et mulieribus in matrimonio iuxta evangelium seu Christi ipsius verba, deinde probare voluisse consuetudinem, quam ab evangelio discrepare, imo et cum ipso pugnare fatetur; 2. ex eo quod aperte contrariam pariter doctrinam s. Pater professus fuerit in Reg. LXXXIII., nempe fore adulteros, qui, dimisso alterutro coniuge, eoque vivente, ad alias nuptias transirent, nullo interposito plane discrimine inter virum et mulierem; incredibile porro videtur ipsum ab hoc principio recedere voluisse, ut consuetudini faveret; 3. ex eo quod non loquatur s. Basilius de consuetudine *ecclesiastica*, sed de *usu forensi*, iuxta leges editas a Constantino M., quibus licet hic imperator ius romanum hac in re non parum emendarit, attamen in causa divortii adhuc plus favit viris quam mulieribus (98). Iam vero s. Basilius leges eiusmodi humanas adversantes legi divinae minime probasse exploratum est. Quod si visus est quadantenus huic consuetudini favere, veniaque dignos censere viros, qui ab uxore relictis novas ineunt nuptias, repeti id debet ex rationibus congruentiae, quibus cohonestare aliquo modo nisus est consuetudinem per leges civiles inductam. Sane gravior est in pari casu culpa mu-

(97) Loc. cit.

(98) Ed. Maurinus in nota ad can. IX. haec habet: «Sequitur in hoc canone Basilius romanas leges, quas tamen fatetur cum evangelio minus consentire. Lex Constantini iubet *in repudio mittendo a foemina haec sola crimina inquiri, si homicidam, vel medicamentarium, vel sepulchrorum dissolutorem maritum suum esse probaverit*. At eadem lege viris conceditur, ut adulteras uxores dimittant.» Sane nuptiam constat eiusmodi consuetudinem, de qua hic est sermo, in ecclesia viguisse. Nullum documentum illius aetatis de eiusmodi consuetudine suppetit.

lieris fornicantis quam viri, tum quia reddit incertum patrem, tum quia haerodem extraneum cum legitimis patris filiis commiscet, tum quia ita receptum est in communi aestimatione: 4. ex eo quod in can. XLVI. contrarium constituat dicens: « Quae viro ad tempus ab uxore derelicto insciens nupsit, ac deinde dimissa est, quod prior ad ipsum reversa sit, fornicata quidem est, sed imprudens. A matrimonio ergo non arcebitur, sed melius est, si sic permaneat (99). » In quae verba scribit Zonaras: « Quod prius coniugium solutum minime fuerit, alteram ducendo fornicatur (100). » Censuit igitur s. Basilius virum ab uxore derelictum, si aliam ducat, moechari, et secundam mulierem ex ignorantia adulteram esse, secus ac statuerit canone IX. in quo venia dignum dixerat virum, qui derelictus ab uxore aliam duxerit. Componi autem hi canones hac ratione possunt, si dicatur s. Doctorem illam consuetudinem non probasse (101).

(99) Ep. cit. ex ed. Maur. CXCIX. p. 296. quem etiam can. refert Arcudius op. cit. cap. XXI. *De matr.* pag. 503.

(100) In hunc can.

(101) Haud ignoro Balsamonem, Zonaram et Aristenum, prout adnotat editor Maurinus ad hunc can. XLVI. aliter rem componere; aiunt enim hoc in canone s. Basilium loqui de derelictione *ad tempus*; quod si penitus vir ille dimissus et repudiatus fuisset ab uxore, mulierem illam s. Doctor non condemnasset; sic enim statuit can. IX. Sed cum matrimonium minime dissolutum censeret, quia prima uxor *ad tempus* tantum discesserat; secundam uxorem in fornicationis peccatum inscientem imprudentemque incidisse pronunciat.

Ast ex hac expositione plura sequerentur incommoda; ac 1. videretur essentiam coniugii in eo reponi, quod uxor non se *in perpetuum* separet a marito, ita ut dimissio ad tempus vinculum non dirimat, dirimat autem dimissio perpetua; quasi nempe communi consensu non possent votum castitatis emittere, quin solvatur coniugium; 2. videretur separationem eiusmodi perpetuam haud posse scindere vinculum coniugale nisi ex parte solius viri, cum dicat in can. IX: *Quare quae reliquit virum est adultera, si ad alium accessit virum.* At vero intelligi nequit, quomodo perduret vinculum in muliere, solutus autem ab eo sit vir, ut alia praeteream. Cf. Martorelli op. cit. pag. 309. seu potius Arcudium *De matr.* lib. VII. cap. 21. ex quo Martorelli suas mutuatus est animadversiones, qui lale hoc argumentum versat, ostenditque non pauca absurda, ex Zonarae ceterorumque qui eum secuti sunt, interpretatione dinare; pag. 523 seqq.

Ne igitur iniurii simus s. Basilio, nec secum eundem committamus, fateamur oportet s. Doctorem consuetudinem illam ex lege civili inductam minime probasse, adeoque, prout legitime sequitur, ipsum iuxta legem evangelicam reipsa censuisse nullatenus sive per adulterium viri, sive per adulterium uxoris solvi coniugii vinculum, ac utrumque fore adulterum, si post dimissionem ob eiusmodi flagitium novas inierit nuptias.

Et haec quidem ex communi interpretatione. Eusebius autem Amort novam praebet; assumendo enim quod s. Basilius disserat de *consuetudine ecclesiastica*, ita enarrat canonem IX., quo s. Pater respondet interrogationi sibi ab Amphilochio propositae: *An mulier se quoad torum non separans a viro adultero, eo ipso fiat adultera, eo quod fiat unum corpus cum adultero, sicque videatur ab eo participare denominationem adulterae?* Hoc dubium non fuisse prorsus imprudens ex eo colligit, quod a pluribus ex patribus fuerit propositum, saltem circa viros, si uxores adulteras non dimitterent. Respondet ergo Basilius: spectata praecise sententia et mente Christi, mulierem quoad ius divortii in pari conditione cum viro iudicandam esse, quamvis consuetudo mulieri separationem a viro adultero non permittat. Ceterum quod ipsum dubium quaestionis directe attinet, contestatur, se non videre, quomodo mulier viro suo ob suum adulterium venia donato cohabitans possit propterea adultera vocari: nam culpa non cohabitantem viro, sed se ab illo separantem stringit, iuxta diversam videlicet causam, ex qua se separat, v. gr. si se a viro separet ob solam castigationem, vel ob solum damnum bonorum. Si vero separet se a viro adultero, non equidem dico eam peccare; attamen id in ecclesia fieri non consuevit; immo adeo non favet ecclesia eiusdem separationi, ut etiam non permittat talem separationem in casu longe urgentiore; dum mulier ne quidem ab infideli separari per-

mittitur, idque ob incertam spem illum convertendi. Dicendum itaque: mulierem in casu adulterii mariti, non fieri adulteram, si se separet, sed tunc primum, si alteri nubit: virum autem adulterum dignum esse ut mulier innocens illi condonet culpam, et ei reconcilietur; et si sic donata adultero venia, iterum illi cohabitet, non est culpanda; nec tamquam adultera habenda. Si vero vir uxorem deserat, et ad aliam accedat, cum par sit conditionis cum uxore ex sententia Christi, et ipse adulter est, quia facit eam alteram secum moechari, et ea altera quoque erit adultera, quae alienum virum ad se traducit.

Hanc paraphrasim, prōsequitur hic auctor, non approbantem, sed reprobantem secundas causa adulterii separatorum coniugum nuptias, menti d. Basili conformem esse ostendo ex ipso integro textu fideliter traducto, qui sic habet: «*Domini sententia, saltem ob paritatem rationis, aequae convenit viris ac foeminis, nempe non licere matrimonialem separationem, nisi ob causam fornicationis. Veruntamen consuetudo non sic habet, nam de mulieribus multam sententiarum exactitudinem invenimus, dicente Apostolo: qui adhaeserit mulieri, fit unum corpus: et Ieremia: Si fuerit mulier cum alio viro, non revertetur ad virum suum, sed polluta polluetur; et rursus: Qui habet adulteram stultus est et impius. E contra consuetudo etiam viros adulteros et in fornicatione existentes iubet a mulieribus retineri. Itaque (ut respondeam ad quaesitum) non video quomodo mulier viro (suo) dimisso (causa adulterii, eidemque reconciliata denuo,) cohabitans possit adultera reputari: nam eatenus crimen (adulterii) mulierem se a viro separantem solum attingit, quatenus se habet causa, ob quam se separat a coniugio: nam si ideo, quod percutiatur, et plagas non ferat (se separet, fit adultera), perferre magis oportuit, quam separari a coniuge. Quod si non ferat detrimentum bonorum (quae maritus dilapi-*

dat), nec sic quidem excusatione dignus est hic praetextus. Si vero (ideo se separet) quia (maritus) vivit in fornicatione, non habemus hoc in consuetudine ecclesiastica; immo etiam a viro infideli discedere prohibetur uxor, sed iubetur permanere ob incertam spem eventus (iuxta illud Apostoli) *Quid enim scis mulier an virum salvum sic facias?* Itaque derelinquens (in tali casu maritum, solum tunc) est adultera, si ad alium virum accedat. Vir autem (adulter) derelictus dignus est, cui uxor ignoscat, nec si illi (reconciliato) cohabitaret, condemnatur (tamquam adultera). Quod si vir ab uxore (adultera) discedat, et ad aliam accedat, etiam ipse (aeque ac uxor a viro adultero discedens ac alteri viro adhaerens) est adulter, quia facit eam moechari, et mulier illi cohabitans est adultera, quia alienum virum ad se traducit (102).»

Si haec admittatur expositio, certe difficultas omnis e radice convellitur, ac doctrina Basilii, nedum ulla ratione faveat divortiorum patronis, adversatur ipsis maxime, et consona efficitur non solum canoni XLVIII. sed praeterea ecclesiae doctrinae. Nihil vero est, quod impediatur quominus admittatur, cum violenta non sit, ac offerat potius sensum planum et obvium. Utra autem seligatur expositio, nobis perinde est, quia si s. Basilius loquitur de consuetudine a legibus civilibus inducta, certe illam non approbat utpote

(102) *Demonstratio critica religionis catholicae*. Venet. 1744. part. I. quaest. XV. pag. 86 seqq. Qui ut hypothese suam reddat ceteris expositionibus probabiliorum animadvertit t. s. Basilium in hac epistola respondere ad varias interrogationes Amphilocho circa dubia, quorum nonnulla Basilii mentem antea non subierant, adeoque inexpectata. Ita enim testatur in ingressu epistolae his verbis: «Certe et nunc cum *de interrogatis tuis numquam hactenus sollicitate cogitasset*, coactus sum diligenter attendere, et si quid a senioribus audieram recordari, et cognata iis, quae didiceram, per me ipse ratiocinari.» 2. Non extare ipsas interrogationes Amphilocho, sed eas tantum ex ipsa Basilii responsione verisimiliter colligendas esse. 3. Et illud certum esse versiones canonis huius controversi hactenus editas, ne in ipsa quidem editione mauriniana exactas esse. His principiis versimiliorum illam esse putat quam ipse subicit, nosque retulimus interpretationem.

pugnantem cum Christi verbis, et cum doctrina a se iterum iterumque tradita, adeoque non favet divortio quoad vinculum ob adulterium; si vero loquitur de consuetudine ecclesiastica, tunc agit solum de separatione quoad torum, adeoque rursus nobis non adversatur; imo et ipsum habemus adsertorem et testem doctrinae evangelicae et apostolicae (103).

Quod vero spectat ad can. XXI. is directe ad rem nostram non facit, exhibetque sententiam prorsus singularem, quod vir nempe matrimonio vinctus non se polluat adulterio, si cum soluta fornicetur. Canon vero XLVIII. continet aperte doctrinam de indissolubilitate coniugii in viro et muliere, inservitque canoni IX. rite exponendo (104).

§. XII.

De s. Gregorio nazianzeno.

Brevius disseremus de s. Gregorio nazianzeno cognomento theologo s. Basilii socio et amico. Nullum dubium quin ipse doctrinam de indissolubilitate coniugalis vinculi in casu adulterii propugnaverit. Hac de causa invehitur in leges civiles, quae se se indulgentiores exhibuerint erga viros, severiores vero erga mulieres.

Sic enim loquitur oratione XXXI. «Circa hanc (quaestionem) plerosque male affectos cerno, ac legem eorum iniquam, nec sibi constantem. Quid enim causae fuit, cur mulierem coërceret, marito contra indulgeret eumque liberum relinqueret? Et mulier quidem, quae improbum

(103) Immerito igitur Bingham *Origin. ecclesiast.* lib. XXII. c. 5. §. 1. pag. 352. Launoius, Calvi, Braun etc. inter adversarios indissolubilitatis coniugalis foederis s. Basilium ovantes recensent.

(104) Cf. Arcudium, qui loc. cit. s. Basilii testimonium quaqua versus expendit, etsi interdum non satis criticum se exhibeat.

consilium adversus viri sui cubile susceperit, adulterii piaculo constringatur, acerbissimisque legum poenis excrucietur: vir autem, qui fidem uxori datam per adulterium violaverit, nulli supplicio obnoxius sit? Hanc legem haudquaquam probo, hanc *consuetudinem* (105) minime laudo. Viri erant, qui hanc legem sanxerunt, ac propterea adversus mulieres lata est; quandoquidem et filios paternae potestati subiecerunt, infirmiore sexum incultum atque incuratum reliquerunt. At Deus non sic (106).» Deinde ita prosequitur: « Enim vero Lex omnes ob causas libellum dat repudii. At Christus non ob omnes, sed ab impudica tantum et adultera uxore viro separari permittit: reliquis autem omnibus rebus animi aequitate ac patientia uti iubet. Ergo impudicam quidem, quia genus corrumpit et adulterat, expellamus: cetera omnia patienter moderate et sapienter feramus, aut, ut rectius loquar, sapienter et moderate ferte, quicumque matrimonii iugum subiistis (107).»

Haec praecipua sunt quae ex Gregorio nazianzeno ad argumentum nostrum referuntur (108): ex his vero di-

(105) Atque hic obiter adnoto eodem in sensu *consuetudinem* commemorare s. Greg. nazianzenum ac s. Basilium, scilicet forenssem seu civilem, non autem ecclesiasticam.

(106) Opp. ed. Paris 1630. tom. I. pag. 499. 500.

(107) Ibid. pag. 501.

(108) Nam quae ex epist. CCXI. et ex carm. II. *De Virginib.* afferuntur legum tantum civilium de divortio improbant sanctionem, ac in genere indissolubilitatem coniugii constituunt. Nam in epist. cit. legitur: « Equidem libentissime consilium dedissem filio meo Upriano, ut multa eorum, quae in medio interiecta sunt praetercurreret, qui divortium ratum non faceret: quod legibus nostris omnino displicet: tametsi romanorum leges aliter iudicent; » quibus videtur s. Gregorius leges ecclesiasticas quibus reprobantur divortia legibus civilibus opponere, quae illa permittunt.

In carmine autem *De Virgin.* exponens coniugii incommoda, inter cetera canit:

Foemina non parva mercatur dote maritum,
 Quodque etiam gravius, vitiosum saepe et inertem.
 Rursus emenda viro coniunx, nec moribus illa
 Praedita saepe bonis, quaesita attractaque pestis
 Pestis quam nulla liceat ratione fugare.

scimus 1. ab eo improbari leges civiles, quae divortium viris indulgebant; 2. eum affirmare quidem licite posse viros in causa adulterii uxores suas eiicere, seu se ab illis separare, sed neque hic neque alibi umquam adiicere posse, uxoribus ob fornicationem dimissis, alias ducere; 3. antithesin ab ipso institutam inter causas a lege mosaica assignatas ad divortium faciendum, et unicam a Christo constitutam, coërceri ad causas dimissionis seu separationis a toro et cohabitatione, minime vero ad diremptionem coniugalis vinculi extendi. Exinde patet Gregorium clausulam exceptionalem *nisi ob fornicationem* retulisse ad priorem partem, non autem ad posteriorem, *et alteram duxerit*.

Qui proinde, Launoio duce, s. Gregorium nazianzenum ad suas partes trahere connituntur, eius abutuntur auctoritate et incautos fallunt (109). Cum enim ipse absolutam coniugii firmitatem constanter praedicet, nec umquam post alterutrius coniugis adulteri dimissionem, vel insinuet quidem posse novum iniri coniugium, aperte contra eius mentem faciunt, qui eum ut divortii patronum vellent traducere. Praeterea addo, nonnisi praepostere ab adversariis dubium moveri, num ea antithesis inter veterem et novam legem ad causas dimissionis, an vero ad causas perfecti divortii referatur, cum notum sit potius s. Doctorem rigidum forte plus acquo se patefecisse in secundis et tertiis nuptiis successivis permittendis, ut suo loco vidimus (110). Quanto magis itaque dicendum est eum alienum omnino fuisse a permittendo alio coniugio, vivente

(109) Laun. op. et loc cit. pag. 830. Braun Dissert. cit. apud Jacobi *Indissolubilitas vinculi matr.* pag. 79. 80. *Pagellae theolog. Lincenses* Linz 1808. Contra vero maiori prudentia Sixtus senensis, Gerhardus, Calvi eum omiserunt.

(110) Ubi descripsimus eius verba ex hac ipsa oratione deprompta, cum disserens de secundo, tertio et quarto successivo coniugio ait: «Primum lex est, secundum venia et indulgentia, tertium *iniquitas*. Qui autem hunc numerum excedit *porcinus* plane est, utpote ne multa quidem vitii exempla habeat.»

adhuc altero coniuge (111)? Cum autem adversarii hic timide agant, neque aliud ad affirmandam Gregorii theologi sententiam urgeant argumentum, ideo non est quod praeterea adiiciamus.

§. XIII.

De S. Ambrosio.

Priusquam s. Doctoris proferamus sententiam, sedulo verum Ambrosium ab ementito Ambrosio, seu Hilario diacono luciferiano, qui sub Ambrosii nomine commentaria edidit in Pauli epistolas, secernamus oportet. Qua ratione alter hic auctor exponi debeat, postea dicemus; interim quae de re nostra verus docuit Ambrosius iam subiicimus.

In *Exposit. in Lucam* lib. VIII. his verbis mentem suam aperit: « *Omnis qui dimittit uxorem suam, et ducit alteram, moechatur: et qui dimissam a viro ducit, moechatur.* Prius dicendum arbitror de lege coniugii, ut postea de prohibendo divortio disputemus. » Exposita autem priori parte de coniugiis infidelium, ac fidelium cum infidelibus, quae a Deo non esse ait, adeoque posse aliquando dissolvi, pergit ad alteram partem dicens: « Ergo ubi nuptiae, harmonia: ubi harmonia, Deus iungit. Ubi harmonia non est, pugna atque dissensio est: quae non est a Deo, quia *Deus charitas est.* Noli ergo uxorem dimittere, ne Deum tuae copulae diffitearis auctorem. Etenim si alienos, multo magis uxoris debes tolerare et emendare mores. Audi quid dixerit Dominus: *Qui dimittit mulierem, facit eam moechari.* Etenim cui non licet vivente viro, mutare coniugium, potest obrepere libido peccandi. Itaque qui auctor er-

(111) Cf. Arcudium loc. cit. nec non Nat. Alex. qui loc. cit. refert s. Gregorium inter propugnatores indissolubilitatis; idque merito; nam explorata eius sententia est.

roris, etiam reus culpae est. . . . Dimittis ergo uxorem quasi iure, sine crimine, et putas id tibi licere, quia lex humana non prohibet: sed divina prohibet. Qui hominibus obsequeris, Deum verere. Audi legem Domini, cui obsequuntur etiam qui leges ferunt: *Quae Deus coniunxit homo non separet*. Sed non solum hîc caeleste praeceptum, sed quoddam etiam opus Dei solvitur. Paterisne, oro, liberos tuos, vivente te, esse sub vitrico; aut incolumi matre, degere sub noverca? Pone, si repudiata non nubat. Et haec viro tibi debuit displicere, cui adultero fidem servat? Pone, si nubat. Necessitatis illius tuum crimen est: et coniugium quod putas, adulterium est. Quid enim refert, utrum id aperta criminis confessione, an mariti specie adulter admittas; nisi quod gravius est legem criminis fecisse, quam furtum? Sed fortasse dicet aliquis: *Quomodo Moyses mandavit dari librum repudii, et dimittere uxorem?* Qui hoc dicit, iudaeus est. Qui hoc dicit, christianus non est. Et ideo, quia hoc obiicit, quod obiectum est Domino, respondeat ei Dominus: *Ad durtiam, inquit, cordis vestri permisit vobis Moyses dare librum repudii, et dimittere uxores: ab initio non fuit sic*. Moyses permisit, inquit, non Deus iussit: ab initio autem Dei lex est. Quae est lex Dei? *Relinquet homo patrem et matrem, et adhaerebit uxori suae, et erunt ambo in carne una*. Ergo qui dimittit uxorem carnem suam scindit, dividit corpus... Tamen quia supra proposuit regnum Dei evangelizare, et cum dixisset de lege unum apicem non posse cadere, subiecit: *Omnis qui dimittit uxorem suam, et ducit alteram, moechatur (112)*. Recte admonet Apostolus dicens: *Sacramentum hoc magnum esse de Christo et ecclesia (113)*.»

(112) Ex his Ambrosii verbis illustratur, quod superius animadvertimus, in Evangelio Lucae hanc sententiam cum praecedentibus quae habentur verbis Christi Domini connecti.

(113) Op. ed. Maur. tom. I. col. 1470-1472. a n 2. ad 9.

Et iterum lib. I. *De Abraham* c. IV. « Sed et vos monéo, viri, maxime qui ad gratiam Domini tenditis, non commisceri adulterino corpori (qui enim se iungit meretrici unum corpus est), nec dare hanc occasionem divortii mulieribus. Nemo sibi blandiatur de legibus hominum. Omne stuprum adulterium est, nec viro licet, quod mulieri non licet. Eadem a viro, quae ab uxore debetur castimonia. Quidquid in eam, quae non sit legitima uxor, commissum fuerit, adulterii damnatur crimine (114).» Alia omitto, quae in eundem sensum ibidem scribit cap. VII. ubi expresse inquit: « Nulli licet scire mulierem praeter uxorem. Ideoque coniugii tibi datum est ius, ne in laqueum incidas, et cum aliena muliere delinquas. Vinc tus es uxori, noli quaerere solutionem; quia non licet tibi, uxore vivente, uxorem ducere. Nam et aliam quaerere, cum habeas tuam, crimen est adulterii, hoc gravius, quod putas peccato tuo auctoritatem lege quaerendam. Tolerabilior est, si lateat culpa, quam si culpae usurpetur auctoritas. Nec hoc solum est adulterium, cum aliena peccare coniuge, sed omne quod non habet potestatem coniugii (115).»

Haec quidem s. Ambrosius, unde discimus 1. Eum loqui non de sola dimissione quoad torum, verum etiam de solutione quoad vinculum, quam quidem damnat eo quod adversetur Deo auctori coniugii 2. insuper ex Christi verbis inferre eum qui sic propriam uxorem dimittit, reum esse criminis adulterii uxoris dimissae, si haec novas contrahat nuptias, 3. leges civiles quae viris divortium permittunt opponere legi divinae, quae illud prohibet, idque in utraque hypothesisi sive dimissa uxor nubat, sive non nubat alteri; 4. solvere difficultatem ex permissione Moy sis petita dandi libellum repudii, quam abolitam in lege

(114) Ibid. col. 291. n. 25.

(115) Ibid. col. 301. 302. n. 59.

evangelica docet per revocationem coniugii ad primordiam Dei legem de indissolubilitate coniugii; 5. idque demum confirmare tum absoluta Christi apud Lucam sententia, tum Apostoli effato de significatione quam praesertit coniugium unionis Christi cum ecclesia, quae est prorsus indissolubilis. In libro vero de Abraham eandem confirmat s. Pater doctrinam, ubi insolubile in omni casu declarat coniugium, statuitque contra humanas seu civiles leges, paria iura sive in viro sive in muliere. Eius proinde mens non poterat clarioribus verbis exponi. Hinc patet quam improvide Erasmus, Launojus, ceterique divortii assertores pro causa sua Ambrosium laudent.

Verum quid dicendum de Hilario Diacono luciferiano, qui Ambrosianus nuncupatur (116)? Eius verba in comment. in 1. ad Cor. VII. haec sunt: « Postquam innuptis et viduis loquutus est (Apostolus), hos alloquitur, qui matrimonio iuncti sunt, ore dominico: *Uxorem a viro non discedere; quod si discesserit, manere innuptam.* Hoc Apostoli consilium est, ut si discesserit propter malam conversationem viri, iam innupta maneat. *Aut viro suo reconciliari.* Quod si continere se, inquit, non potest, quia pugnare non vult contra carnem, viro reconcilietur; non enim permittitur mulieri, ut nubat, si virum suum causa fornicationis dimiserit, aut apostasiae, aut si illicita impellente lascivia, usum quaerat uxoris; quia inferior non omnino hac lege utitur qua potior. Si tamen apostataverit vir, aut usum quaerat uxoris invertere, nec alii potest nubere mulier,

(116) Mirum est Erasmus alioquin sagacem et hypercriticum potuisse ad firmandam doctrinam suam ad hunc auctorem, quasi ad s. Ambrosium appellare in suis adnotatt. in cap. VII. ep. I. ad Cor. pag. 690. cit. ed. scribens: « Divus Ambrosius, sine controversia vir, non orthodoxus modo, verum etiam probatae sanctimoniae, tribuit viro ius ducendi alteram uxorem, ubi priorem ob culpam admissam repudiavit. Neque dubium est, quin is episcopus exercuerit in suis, quod recte iureque fieri scripsit. » Ac silentio pressit quae verus Ambrosius in evang. s. Lucae contrarium omnino edixit.

nec reverti ad illum. *Et virum uxorem non dimittere*. Subauditur autem *excepta fornicationis causa*. Et ideo non subiecit dicens, sicut de muliere: quod si discesserit, manere sic: quia viro licet ducere uxorem, si dimiserit uxorem peccantem: quia non ita lege constringitur vir, sicut mulier; caput enim mulieris vir est (117).»

Vix solliciti esse deberemus de huius pseudo-Ambrosii sententia, qui in pluribus aliis lapsus est (118). Verum cum agatur de Auctore antiquo (119), cuius auctoritate non pauci veteres ad rem suam usi sunt (120), praestat in eius germanam mentem inquirere, dum affirmat: «Viro licet ducere uxorem, si dimiserit uxorem peccantem.» Sunt, qui verba haec velint intelligenda esse de sola dimissione quoad torum; ast hunc sensum contextus excludit. Longe verisimilior illorum videtur interpretatio, qui illum loqui aiunt de eo quod permittebant tunc temporis civiles leges, ad quas etiam interdum patres alludunt, quin tamen eas approbet, prout nec patres approbarunt, imo illis constanter legem divinam opposuerunt.

Verisimiliorem hanc reddunt expositionem verba ipsius sive praecedentia sive subsequenta, ait enim: «Non permittitur mulieri, ut nubat, si virum suum causa fornicationis dimiserit... quia inferior non omnino hac lege utitur qua potior» scilicet vir, tum ex insequentibus: «Quia non ita lege constringitur vir, sicut mulier, caput enim

(117) Op. cit. ed. tom. II. in append. col. 133.

(118) Cf. *Admonitionem* ab editorib. Maurin. praefixam his commentariis.

(119) Vixit enim sub Damaso rom. pontifice, ut ipsemet profiteretur in cap. III. epist. I. ad Timoth. dicens: «Cuius hodie rector est Damasus.» Porro Damasus vita functus est an. 384.

(120) Jam a sec. IX. Hincmarus, ecclesia lugdunensis, concilium aquisgranense III., Amalarius, Prudentius, Haymo, alique passim ad haec commentaria provocaverunt. Eadem s. Ambrosio tribuerunt Gratianus, Petrus Lombardus, Ivo carnotensis, s. Thomas ibid. Ita etiam Sixtus senensis op. cit. loc. cit. qui propterea eum una cum Tertulliano inter auctores recenset, qui *certa et indubitata ratione* utriusque repudii, convictus scilicet et vinculi, licentiam probarunt.

mulieris vir est.» Iam vero quaenam lex extitit praeter civilem, quae non permetteret mulieri quod viris permittebat (121)? Profecto Christus Marc. X. in pari conditione constituit tum virum tum mulierem, prout aequalia iura utrique tribuit in coniugio Apostolus 1. Cor. VII. 3. 4. Hanc interpretationem pluribus adstruit eruditus vir Ferdinandus de Mendoza (122). Qua posita, omnis evanescit difficultas.

§. XIV.

De s. Epiphanio.

Dum oppugnatores catholicae doctrinae de s. Epiphaniū auctoritate exultant, quod tandem aliquando assertorem suae sententiae nacti fuerint, non pauci catholici scriptores aut fatentur aperte eum hac in re a veritatis tramite declinasse, aut saltem corruptum esse textum, qui ex eo affertur. Verum nec habent illi de quo exultent sibi que blandiantur, nec isti quo s. Patrem debeant adversariis cedere, aut corruptum esse textum causari. Quod ut evincamus, prius iuxta methodum quam hactenus tenuimus, integrum eius textum promemus, deinde analysin eiusdem instituemus, ut sinceram eius doctrinam cum evangelica et apostolica omnino consentire ostendamus.

(121) Talis erat lex *Iulia*, quae ius accusandi uxores adulteras, easque dimittendi maritis concessit, uxoribus vero accusandi maritos adulteros ius negavit, ut imperatores Severus et Antoninus rescripserunt ad Cassianum (in h. l. c. ad legem Iuliam *De adult.*) « Publico iudicio, inquit, non habere mulieres adulterii accusationes, quamvis de matrimonio suo violato quaeri velint, lex Iulia declarat, quae cum masculis iure mariti accusandi facultatem detulisset, non idem foeminis privilegium detulit. »

(122) *De concilio illiberitano confirmando ad Clementem VIII.* libri tres. lib. II. ad can. IX. cap. XX. in *Collect. max. conc. hispan.* card. De Aguirre tom. I. pag. 389 seqq.

Necesse proinde non est ut cum Gratiano, Petro Lombardo, Bellarmino aliisque recurramus ad huius textus depravationem. Ipsi enim pro genuino s. Ambrosii foetu hos commentarios habuerunt.

Haec itaque sunt s. Epiphanii verba Haeres. LIX. « Ita profecto sese res habet, ut post Christi in orbem terrarum adventum eos omnes qui post priores nuptias mortua uxore alteris se nuptiis illigarint sanctissima Dei disciplina reiiciat... In populo, propter eius imbecillitatem tolerari istud potest, ut qui uxore prima contenti esse non possunt, ea mortua, secundam sibi copulent. Quamquam qui unam dumtaxat habuit, maiori ecclesiae iudicio honore dignus est. Sed cui mortua una non sufficit, cum occasione aliqua stupri adulteriique, aut alterius flagitii, cum ea divortium fecerit, is si alteram uxorem duxerit, aut alteri viro mulier nupserit, sacrarum Litterarum auctoritas ab omni culpa illos absolvit; neque ab ecclesia aut aeterna vita reiicit, sed propter imbecillitatem tolerandos existimat. Non ita tamen, duas ut altera superstite uxores simul habeat, sed ut ab una separatus, alteram sibi legitime, si lubet, adiungat. Quamobrem erga eiusmodi hominem tam divinus sermo, quam ecclesia Dei misericordiam adhibet; praesertim si caeteris in rebus religiosus ille sit, et ad divinae legis praescriptum vitae suae rationes accommodet. Quod nisi ita esset, numquam viduis Apostolus dixisset: *Nubant, filios procreent, familiis praesint*. Sed neque de homine illo, qui patris uxorem duxerat, ob idque *satanae in interitum carnis traditus fuerat*, ita loqueretur; *Ut spiritus salvus sit in die Domini*. Neque illud usurparet... *Cui aliquid donastis, et ego: Quoniam si quid donavi, propter vos donavi in facie Christi, ne circumveniamur a satana, neque enim illius astutias ignoramus*. Vides ut poenitentiae locum etiam post delicta concedat (123)? » Deinde paulo post subdit: « Illud quidem constat: nemini fraudi esse poenitentiam: neque quem peccatorum omnium poenitet, reiici aut excludi.

(123) Ed. Pefav. cap. IV. pag. 496 seq.

Quanto ergo magis idem ei tribuendum est, qui cum altera uxore legitimis sese nuptiis illigarit? Nam ut prima uxor a Deo constituta est, ita imbecillitati hominum posterior indulta. Quod si alteram praeterea sibi copulet, huius hac in parte toleratur infirmitas. Scriptum est enim: *Mulier alligata est nuptiis, quanto tempore vivit vir eius: sin autem mortuus fuerit vir; libera est: cui vult nubere.* Quo quidem declarat, post viri obitum ab omni illam peccato liberam esse; adeo ut contradicere nemo possit. Quod hoc addito significavit, *in Domino*, quasi minime a Domino sit aliena, quae post viri obitum alteri se viro coniunxerit: ut nec illum vicissim, qui uxore mortua se ad secundam applicarit. *Tantum in Domino*, ait Apostolus. Addit tamen: *Beatior autem est si sic manserit.* Illud autem *in Domino*, idem est ac non in stupro, aut adulterio, violationeque matrimoniorum: sed in fiducia, et honestis nuptiis persistere (124).»

Ut pateat adversariis nulla ratione eiusmodi textum favere, satis est animadvertere ad scopum, quem s. Epiphanius sibi proposuit. Agit adversus catharos seu novatianos, qui tum poenitentiam denegabant lapsis in graviora peccata post baptismum, tum secundas nuptias post obitum alterius coniugis damnabant. Totus proinde est s. Epiphanius in utroque errore refellendo. Praeterea, cum iam obtineret in aliquibus occidentis ecclesiis, et propagaretur pedetentim apud orientales rigidior disciplina, qua poenitentiam solemnem obeuntibus facultas denegabatur novas nuptias ineundi, quamdiu haec perduraret, aut etiam in perpetuum, si perpetuae poenitentiae fuissent addicti (125);

(124) Ibid. cap. VI. pag. 498 seq.

(125) Cf. Morinum *De poenitentia* lib. V. c. 18. 19. 20. 21. ubi fuse ostendit iam a sec. IV. poenitentibus nuptias fuisse prohibitas, praesertim in ecclesia latina, non tamen in ecclesia graeca. Ceteris praetermissis conc. Arelatense II. cap. 21. statuit: «Poenitentes, quae defuncto viro, alii nubere praesumpserint,

hinc s. Epiphanius ostendit laicis hominibus indiscriminatim omnibus, post prioris coniugis mortem interdictas non esse secundas nuptias, ne iis quidem exceptis maritis, qui ob propriam sive adulterii sive alterius flagitii culpam a sua priori coniuge separati fuissent, aut stadium publicae poenitentiae percurrerent.

His notionibus praemissis, ex allato testimonio comperimus s. Epiphanium docere 1. Solis presbyteris et diaconis interdictas fuisse secundas nuptias post prioris uxoris obitum; 2. has vero, spectata communi fragilitate, hominibus laicis indultas esse; 3. et hoc etiamsi alteruter coniux adulterio aut alio crimine se commaculaverit, ac divortium ab altero fecerit, poenitentiaeque fuerit addictus, post mortem alterius coniugis; 4. ast altero adhuc superstite novas iungere nuptias nefas esse; 5. atque haec evincere auctoritate Apostoli, qui viduis permittit novum coniugium, et incesto Corinthio veniam ac poenitentiam post delicta indulget; 6. confirmat demum hanc doctrinam et praxim ecclesiae orientalis praesertim, aliis argumentis, quibus ostendit ita fieri ex quadam erga humanam infirmitatem indulgentia, ne in stupra ac adulteria ex novatianorum duritie quis incideret, adeoque ita explicare illud *in Domino* eiusdem Apostoli.

Ex his patet verba illa, quae prima fronte difficultatem facessere videntur: *Cum occasione aliqua stupri adulteriique, aut alterius flagitii cum ea divortium fecerit etc.* intelligi debere de divortio antea facto cum coniuge, quae dein est defuncta, ut declarant quae immediate praecedunt: *Si cui mortua una non sufficit*: sic pariter alia verba:

cum eodem ab ecclesiae liminibus arceantur. Hoc etiam de viro in poenitentia posito placuit observari.» Celebratum porro est hoc concilium an. 330. adeoque ante Epiphanium. Itaque facile potuit Epiphanius, qui in ecclesia graeca florebat, et in qua eiusmodi disciplina non obtinebat, ad hunc ecclesiae occidentalis rigorem alludere, eumque in adducto loco arcere ab ecclesia graeca.

sed ut ab una separatus, alteram sibi legitime, si lubet, adiungat, intelligenda esse, altero defuncto, cum expresse praemiserit: *Non ita tamen duas ut altera superstite uxores simul habeat*. Hinc sensus exurgit: *Ubi ab una separatus (per mortem) alteram sibi legitime, si lubet, adiungat*. Ita omnia plana sunt, congruit scopus, orationis series, ac testimonia biblica ab ipso allegata (126).

Id agnoverunt vel ipsi doctrinae catholicae adversarii, cuiusmodi sunt Io. Gerhardus celebris lutheranus, qui cum exposuisset s. Epiphanium de solutione coniugii propter adulterium, adiecit: « Neque tamen huic Epiphanii loco admodum confidimus (127); » et Fridericus Liebetrut, qui Ludovico Gieseler e loco Epiphanii pro praxi ecclesiae lutheranae dirimendi coniugia argumentum depromenti, calculum suum non adiecit (128).

Quapropter, ut innuimus, necesse non est, ut cum Petavio confugiamus ad corruptionem textus, aut ad eius emendationem, qua contra s. Patris mentem potius statueretur coniugii dissolubilitas, quam ab eo eruditus vir reipsa eum doceri censuit (129). Cuius animadversionis praetextu

(126) Cf. Amort Op. cit. pag. 87.

(127). Op. et loc cit. pag. 148. Ubi etiam notandum hunc auctorem, ut ad suam sententiam Epiphanium pertraheret, praemisisse locum prout iacet esse corruptum, eiusque verba non *coniunctim* sed *divisim* accipi debere, « Quod licitum sit, ut ipse loquitur, secundum matrimonium, si *vel morte, vel propter* adulterium matrimonium fuerit solutum; alias verba illa: ἔνεκεν πορνείας χωρισμοῦ γενομένου, continerent limitationem, quasi tum demum post mortem uxoris licitum sit matrimonium, si ob fornicationem facta fuisset separatio. »

(128) In op. germ. *Matrimonium iuxta naturam suam, et historic. explicat.* Berolin. 1831. p. 203. apud Roskovány op. cit. pag. 238.

(129) Sic enim scribit vir doctus tom. II. pag. 254. in animadv. ad hunc loc. Haeres. LIX. « Depravatus sine dubio iste locus est. Nam quae proxime sequuntur, evidenter demonstrant id Epiphanium velle: licere non modo post coniugis mortem; sed eo quoque superstite, si causa legitima quaequam intercesserit, alteras inire nuptias. Nam si de secundis duntaxat post mortem ageret, quorsum haec adieceret: *ob aliquam stupri, adulterii, vel alterius flagitii causam?* Quocirca non dubito quin ita corrigendum sit: τελευτησάσῃ ἢ ἔνεκεν

Io. Batz cum nonnullis aliis concludit, Petavium corrigendo Epiphaniï locum, eundem pro divortiis classicum effecisse (130). Alii emendatione quidem hunc ipsum Epiphaniï textum egere fassi sunt, sed diverso prorsus sensu, nempe ad declinandam difficultatem, quam ipsius s. Patris verba praesferre videntur contra sanam ecclesiae doctrinam (131). Verum his non indigemus, cum ex dictis, s. Epiphanius nullatenus ab evangelica et apostolica doctrina discrepet, eiusque mens satis aperta sit; eo vel magis quod in adversariorum sententia non solum a scopo ipse aberrasset, sed agens adversus novatianos nova nec necessaria aliarum nuptiarum libertate, vivente adhuc altero coniuge, illos insectatus fuisset, qui ab hac libertate adeo abhorrebant, ut nolent quidem, post mortem alterius coniugis, superstiti secundum coniugium permittere.

τινος etc. Ut duo sint digamiae genera: primum uxore mortua: secundum post divortium, altera sibi copulata. » Ast evidens potius contrarium esse deprehenditur. Ratio vero quare s. Pater adiecerit *ob aliquam stupri, adulterii vel alterius flagitii causam*, a nobis assignata est. Alioquin nimis probaret Epiphaniï textus, quam vellent adversarii, nimirum praeter adulterii crimen alias causas fore ob quas dirimi coniugii vinculum posset.

(130) Batz op. cit.

(131) Marcellinus Malckenbuhr existimat solam parenthesim fuisse interpolatam. Henricus Klee censet interpolationem provenisse ex nota marginali, quae in textum irrepserit. Ibid. p. 285.

Arcudius op. et loc cit. pag. 615. non admodum a nostra expositione abludit; etenim s. Epiphaniï textum ita enarrat ut sensus sit: qui non sat habuit unam duxisse uxorem, quae iam sit mortua, ob aliquam scortationem, aut adulterium, id est, quod timeat ne fiat adulter, si a novo coniugio abstinuerit, iste poterit cum secunda coniungi, neque divina scriptura eum in hac re accusat, vel reprehendit.

Nourryus in *Apparatu ad Biblioth. ss. Patr.* Dissert. IV. art. 24. etsi fateatur difficultatem in loco Epiphaniï contineri, tamen verisimilius esse censet Epiphanium de nuptiis post coniugis mortem disputare. Tom. I. pag. 67.

§. XV.

De s. Ioanne Chrysostomo.

Accurate expendenti doctrinam, quam constanter s. Io. Chrysostomus tuetur de plena ac perpetua coniugalis vinculi firmitate, atque indissolubilitate omnimoda, illico apparebit, eum merito accensendum inter praecipuos catholicae, quam adstruimus, doctrinae propugnatores et assertores. Quamvis enim adversarii maxime vellent eum facultatem ineundi novas nuptias post dimissionem adulterii causa concedere, nusquam tamen ac numquam id in eius scriptis reperire potuerunt, nobisque obiicere. Quin potius invenimus s. Doctorem ea principia constituere, ut oppositam doctrinam de dissolubilitate excludant.

Praecipui eius textus hac in re sunt qui sequuntur: 1. ex Homil. XVII. in Matth. ubi scribit: « Perpende autem illum (Christum) semper ad virum sermonem referre. *Qui dimittit, inquit, uxorem suam, facit eam moechari; et qui dimissam ducit, moechatur.* Ille enim etsi alteram non duxerit, hoc ipso se criminis reum constituit, quod eam adulteram faciat: hic vero, quod alienam ducat, moechus et ipse fit. Ne mihi enim dicas, ille eiecit. Nam eiecta adhuc manet eiicientis uxor. Deinde ne totum coniiiciens in eiicientem, arrogantior faceret uxorem, ipsam accipere volenti ianuam claudit dicens: *Qui dimissam duxerit, moechatur*, uxorem vel invitam pudicam reddens, et ad alium virum aditum ipsi claudens, nec permittens simultatis ansam praebere... Non hoc vero tantum, sed alio quoque modo legem fecit levem. Nam relinquit ei unum repudii modum, dicens; *excepta causa fornicationis.* Siquidem in eadem perstat decori ratione. Si enim iussisset cum pluribus mixtam retinere, rursus in adulterium res convertebatur (132). »

2. Homil. LXII. in Matth. « Tu vero, inquit, mihi consideres velim interrogationis malignitatem. Non enim dixerunt ei: iussisti uxorem non dimittere; iam enim de hac lege disseruerat... Quomodo ergo illis respondet? *Non legistis, quia qui fecit hominem, masculum et foeminam fecit eos? et dixit: Propterea relinquet homo patrem suum et matrem suam, et adhaerebit uxori suae, et erunt duo in carne una. Itaque iam non sunt duo, sed una caro: Quod ergo Deus coniunxit, homo non separet.* Vide sapientiam Magistri: interrogatus enim, *si licet*, non statim dicit, non licet, ne perturbarentur. Sed antequam sententiam diceret, per apparatus illum id liquido statuit, ostendens Patris sui esse praeceptum, nec Moysi adversantem se hoc praecepisse... Sicut ergo carnem secare scelestum est, ita et uxorem dirimere iniquum. Neque hic stetit, sed Deum quoque attulit dicens: *Quod ergo Deus coniunxit, homo non separet*, ostendens illud et contra naturam et contra legem esse; contra naturam, quia una caro dissecatur; contra legem, quia cum Deus coniunxerit, et iusserit non separare, vos id facere tentatis (133). »

3. Sumitur testimonium ex serm. de libello repudii: « Igitur quaenam est lex illa, quam nobis Paulus posuit? *Mulier*, inquit, *alligata est legi*: oportet igitur ut minime separetur, vivente viro, neque alium superinducat maritum, neque secundas nuptias adeat. Et vide quanta cum diligentia verborum usus sit proprietate. Non enim dixit, cohabitet viro, quoad vixerit; sed, *mulier alligata est legi, quanto tempore vixerit vir illius*: atque adeo etiamsi libellum repudii det, etiamsi domum relinquat, etiamsi ad alium abeat, legi adstricta adulteraque est... Nam quemadmodum servi fugitivi, etiamsi domum herilem relin-

quant, catenam secum trahunt: ita et mulieres etiamsi viros relinquunt, legem habent pro catena, se persequentem et adulterii accusantem, accusantem etiam eum, qui duxerit, ac dicentem: adhuc superest maritus, et facinus hoc adulterium est. *Mulier enim adstricta est legi, quoad vixerit maritus illius. Et omnis qui dimissam duxerit, moechatur.* Quando igitur licebit illi secundas nuptias contrahere? Quando? Tunc ubi a catena liberata fuerit, quando vir morietur... Quae autem serva est, ac subdita legi, etiamsi millies libellum repudii accipiat, adulterii tenebitur lege... Ne mihi leges ab exteris conditas legas, praecipientes dari libellum repudii et divelli. Neque enim iuxta illas iudicaturus est te Deus in die illa, sed secundum eas, quas ipse statuit.» Ad legem deinde Moysis accedens de libello repudii, subdit: « Quapropter et Christus iudaeis rogantibus, et dicentibus: *Quomodo igitur Moyses permisit dare libellum repudii?* Ostendens quod non contrariam suae legem ferens ita scripserit, dixit; *Moyses iuxta duritiam cordis vestri loquutus est, ab initio autem non erat sic; sed qui fecit ab initio, masculum et foeminam fecit illos.* Si hoc bonum fuisset, inquit, non unum virum et unam mulierem fecisset, sed uno Adam condito duas fecisset mulieres, si quidem voluisset unam quidem eiici, alteram vero induci. Nunc vero ipso formationis modo legem induxit, quam ego nunc scribo. Et quatenam est illa? Haec utique. Eam sibi quisque uxorem servet semper, quam initio sortitus est. Haec lex antiquior, quam illa de libello repudii, et tanto quanto Adam ipso Mose... Nam et qui dimiserit absque causa stupri, et qui eiectam vivente viro duxerit, cum eiecta illa punientur. Propter quod oro, obsecro et supplico, ne viri mulieres eiiciant, neque mulieres viros relinquunt, sed audiant Paulum dicentem: « *Mulier adstricta est legi, quanto tempore vixerit vir eius. Si autem dormierit vir, liberata erit cui volet*

nubere, tantum in Domino. Qualem enim habebunt veniam, qui Paulo etiam secundas permittente nuptias post mortem coniugis, et tantam concedente copiam, ante mortem audent talia facere (134)? » Caetera his similia mitto (135).

Interim ex his colligo s. Io. Chrysostomum 1. identidem affirmare licitum esse in casu adulterii dimittere uxorem, ita tamen, ut numquam asserat post eiusmodi dimissionem posse quempiam, altero adhuc vivente, iterum nubere (136). 2. Quinimo absolute statuere mulierem a viro dimissam semper uxorem permanere illius a quo dimissa est; 3. Virum illum fore adulterum, qui mulierem ab alio dimissam ac in vivis adhuc agentem duxerit; 4. illum insuper qui uxorem alia quam adulterii de causa dimiserit, reum se adulterii constituere, quod mulier ab alio ducta patraret; 5. tunc solum maritum participem adulterii uxoris suae non esse, cum haec flagitiosa vita sua causam dederit dimissioni, ac ultro se alieno viro tradiderit: 6. affirmare mulierem, licet ob adulterium dimis-

(134) Opp. cit. ed. tom. III. n. 1. et 2. pag. 203-206.

(135) Ut in lib. *De virginit.* In 1. Cor. VII. et alibi passim.

(136) Ne iis quidem exceptis locis, quos affert Launoius pro causa sua *De regia* etc. p. 871. ex Hom. XXVI. in Genes. « Audi ipsum Christum dicentem discipulis: *Dico enim vobis, omnis qui dimiserit uxorem suam, excepta causa stupri, facit eam adulterari.* Quam excellens benignitas! Etiam si infidelis fuerit, vel pagana retine: si autem in te peccaverit, et foederum obliviscatur, et magis aliorum praetulerit communionem, licet tibi eicere et expellere.» Deinde in cap. III. Isaiae « Ei vero qui habeat fornicariam uxorem permisit a se repellere; ei vero qui gentilem coniugem haberet, non item concessit, etiamsi peccatum perfidiae gentilis in ipsum redundet, illud vero resiliat in hominem.» Denique ex Homil. XVII. in Matth. « Siquidem reliquit viro unum expulsionis modum, dicendo, excepta causa fornicationis, alioquin in eandem rursus turpitudinem remearet.» Quibus prolatis veluti ovans concludit: « Haec tria Doctoris tanti loca funiculum triplicem efficiunt, qui ne a magistris nodum in scirpo quaerentibus facile obrumpetur.» At tantum abest ut eiusmodi triplicem funiculum tria haec loca efficiant, ut ne attingant quidem quod sibi doctor hic Sorbonicus probandum proposuit! Nos tertii loci integrum textum attulimus, ex quo perspicue patet s. Io. Chrysostomum indissolubilitatem vinculi coniugalis adstruere. Idem dic de aliis locis in contextu persensis.

sam, nefas esse novum matrimonium contrahere, quoad vivat vir eius, et Dominum ideo hanc legem posuisse, ut sic obviaret mulierum lasciviae, quia etsi ob eiusmodi crimen dimissae fuerint, tamen nequeant alii viro nubere, quo fit, ut ipsae adhuc teneantur maritum, a quo dimissae sunt, amare, cum *eiectae licet, maneat eiicientium uxores.*

Verum, quod caput est, in eo insistit vehementer s. Doctor, quod abolitus sit a Christo libellus repudii. Porro certum est, per libellum repudii dirimi consuevisse coniugium, ac ita dirimi, ut posset dimissa alteri se iungere foedere coniugali; si igitur iuxta s. Chrysostomum haec uxorem dimittendi, seu clarius adhuc, haec ita dirimendi coniugia facultas per Christum abolita est, aperte consequitur matrimonii christiani vinculum iugiter, etiam interveniente adulterio, perseverare. Hoc argumentum validius adhuc est adversus eos, qui contendunt a Moyse per *foeditatem* adulterii flagitium fuisse significatum.

Nec obstat Chrysostomum de viris tantum fuisse locutum; siquidem certum est, ipsum quoad ius matrimoniale parem utrumque coniugem agnovisse, ut inter cetera patefaciunt quae scribit Hom. XIX. in I. Cor VII. « Alibi certe magnam dat marito praerogativam et in novo, et in veteri Testamento dicens: *Ad virum tuum conversio tua, et ipse tibi dominabitur.* Paulus vero sic dividens et scribens: *Viri, diligite uxores, uxor autem timeat virum.* Hic vero non ultra maius aut minus ponit; sed unam potestatem. Quare? Quia de castitate sermo ipsi erat In aliis quidem praerogativam, inquit, habeat maritus, ubi autem de continentia agitur: non item. *Vir potestatem sui corporis non habet, neque uxor.* Multa est aequalitas, et nulla praerogativa (137).»

Multo vero minus adversarii s. Io. Chrysostomum sibi favere arbitrari possunt, quod in cit. serm. *De libello repudii* scripserit: « Nam si is qui mortui coniugis, cuius uxorem accepit, imaginem recubentem viderit, afficitur aliquo modo, et graviter fert; ac si viventem maritum videat eius quae sibi cohabitavit (138), qualem vitam aget? Quo pacto ingredietur domum? Quo animo, quibus oculis videbit illius uxorem suam? Imo neque illius, neque suam iuste quis talem appellet: *adultera enim nullius est uxor* (139).» Ex quibus postremis verbis concludant iuxta s. Doctorem, reum quidem illum fieri, qui uxorem praeter causam fornicationis dimiserit; contra vero si hac de causa eam repudiaverit, immunem esse prorsus a crimine, etsi aliam duxerit, quia id Dominus fieri posse hoc in casu edixit. Verum si expendamus orationis seriem, patebit ideo s. Ioannem Chrysostom. mulierem adulteram nullius uxorem dixisse, quod nec prioris proprie sit uxor, qui eam dimisit, nec alterius, qui post illam dimissionem adulterii causa, eandem duxerit. Non prioris, quia eam a se repulit, neque amplius uti uxorem agnoscit, aut cum ea cohabitare sustinet; non alterius, quia iuxta christianam legem, qui dimissam, vivente adhuc dimittente, duxerit, moechatur. Atque ita fit, ut neutrius sit uxor, non unius *de facto*, non alterius *de iure*.

Quin potius ex his verbis novum exurgit argumentum pro genuina s. Chrysostomi sententia de absoluta indissolubilitate coniugii etiam in casu adulterii. Si enim ipse arbitratus esset propter adulterium vinculum coniugale

(138) Ad clariorem huius loci intelligentiam, animadvertendum est, quod ea quae hic dicit s. Io. Chrysostomus de defuncti viri imagine, allata sint similitudinis gratia; ut animi sensa exprimat illius, qui viderit mulierem a se dimissam ob adulterium, in alterius potestatem venisse.

(139) Loc. cit. ex tom. III. n. 3. pag. 207.

re ipsa dirimi, numquam dixisset mulierem adulteram a priore dimissam non esse alterius legitimam uxorem; soluto quippe matrimonio, mulier libera est, et qui eam ducit, legitime ducit. At hoc inficiatur s. Chrysostomus; imo docet eam esse *adulteram* et *adulterum* illum, qui eam duxerit. Censuit itaque et in hoc casu vinculum coniugale integrum permanere. Quapropter concludebat post obiecta verba: « Fefellit pacta quae cum illo habuit, *et ad te cum honestis legibus non venit.*»

§. XVI.

De Theodoretō.

Nec dissentit a Io. Chrysostomō Theodoretus in omni moda vinculi coniugalis asserenda firmitate etiam interveniente adulterio, quamvis adversarii eum pro causa sua adducere non vereantur. Sane tria a Launoio ex eo proferuntur, quibus suadeat episcopum cyrensem, quem merito doctum atque in scripturis exercitatissimum vocat, suae sententiae adstipulari: sunt autem:

I. Ex lib. V. *Haeretic. fabular. c. XVI.* ubi haec leguntur: « Antiqua (lex) eum, qui uxorem odio habebat, dimittere illam iussit; nova autem adulterium appellat *repudium* citra fornicationem. *Qui enim, inquit, uxorem suam dimittit, excepta fornicationis causa, moechari eam facit, et qui dimissam duxerit, moechatur* (140).

II. Ex eiusdem libri cap. XXVI. *De matrimonio*: « Ipse autem Dominus non solum non prohibuit matrimonium, sed et in nuptiis convivatus est, et vinum sine cultura productum nuptiis donum dedit. Legem porro matrimonii adeo confirmavit, ut eum, qui, excepta fornicationis causa,

matrimonium solvere velit, alia lege inhibeat: *Quicumque, inquit, uxorem suam dimittit, nisi ob fornicationem, facit eam moechari* (141).»

III. Ex serm. IX. *De legibus*: « At naturae opifex, quia humanam creans naturam, unum principio virum, et foeminam unam formavit, etiam solvi matrimonium vetat, unicamque huius dirimendi causam adsignavit eam, quae maritalem copulam vere divellit. *Omnis enim, ait, qui dimittit uxorem suam, excepta fornicationis causa, facit eam moechari, et qui dimissam duxerit, adulterat.* Quibus verbis cetera uxoris vitia ferri iubet, seu loquax sit illa, seu temulenta, seu convitiosa: sin vero nuptiarum leges transiliat, in aliumque procax intendat, tunc denique copulam solvi iubet (142).»

Quibus Braun alium textum adiecit ex comment. in I. ad Cor. VII. ubi scribit: « Statuit hoc loco tantum separationis legem, quam qui alia, quam fornicationis causa discesserunt, coniuges servare debeant (143).»

Haec quidem ipsi. Verumtamen si recte ea dispiciantur, non modo divortii perfecti causae haud favere, sed eidem potius adversari, quae tanto apparatu iactantur Theodreti testimonia ex illorum analysi sobrius quisquam sibi persuadebit.

Etenim 1. Nihil de suo statuens Theodoretus, se refert ad Matth. V. 32. et XIX. 9. textus: adeoque tota resolvitur controversia ad intelligentiam textuum Matthaei. Iam vero suo loco nos critice et exegetice ostendimus illos haud intelligi posse de solutione coniugii quoad vinculum, ita ut fas sit post uxoris adulterae eiectionem aliam ducere. Idem proinde dicendum de Theodreti sententia.

(141) Ibid. cap. XXV. pag. 308. non autem cap. XXVI. ut allegat Launoius.

(142) Ibid. pag. 619 seq.

(143) Ita in cit. Dissert. *De matrim.* qui non verba, sed sensum Theodreti, ut ipse autumat se retulisse profitetur. Alibi autem prout iacent, retulit Launoius.

2. Quamvis in allegatis testimoniis Theodoretus aperte loquatur de *repudio*, de *solutione* matrimonii, de *divulsione copulae coniugalis*, de *diremptione*, quae voces, ut notum est, in usu loquendi patrum aequè intelligi possunt de dissolutione perfecta ac de imperfecta; numquam tamen docet posse virum, citra adulterium, aliam ducere uxorem post eiusmodi repudium, solutionem, divulsionem aut diremptionem. Quod tamen necesse foret, ut is suffragari adversariorum thesi dici deberet.

His animadversis, ad textus Theodoreti expendendos iam accedimus.

Itaque ad primum quod attinet, Theodoretus affirmat novam legem vocare *adulterium* (144), repudium citra fornicationem, quatenus adulter efficitur tum qui citra fornicationis causam uxorem dimittit, tum qui quacumque de causa dimissam ducit, ut patet ex verbis evangelicis ab ipso adductis: *et qui dimissam duxerit, moechatur*, quae postrema verba Launoius omisit; aut quatenus in causa est vir quod uxor citra fornicationem dimissa, adulteret. Nec tamen exinde sequitur non fore adulterum ex mente Theodoreti, qui in casu fornicationis, adultera dimissa, aliam duxerit, aut qui hac de causa dimissam mulierem duceret. Hoc porro esset ostendendum, quod tamen ex verbis Theodoreti adversarii non efficiunt.

Nec alium sensum praeseferre alterum textum liquet ex orationis serie, et ex iis quae postea subiicit. Etenim immediate post allegata verba, ita prosequitur cyrensis praesul: « Deinde, cum dixissent pharisaei veterem legem iussisse dari libellum repudii, interpretatus est (Christus) illis scopum legis. Dixit enim: *Ob duritiam cordis vestri legem hanc scripsit vobis: ab initio autem creationis, masculum et foeminam fecit illos Deus. Propter hoc dimittet*

(144) Graece enim est *μοιχεύειαν*.

homo patrem et matrem, et adhaerebit uxori suae, et erunt duo illi caro una. Ita cum primam legisset legem, quam ipse dederat, subiunxit: Itaque iam non sunt duo. Quod ergo Deus coniunxit, homo non separet. » Sub finem vero eiusdem capituli prolata Apostoli sententia: *Is autem, qui matrimonio iuncti sunt etc.* pergit dicens: « Tantum abest, ut prohibeat matrimonium, ut etiam eum qui *dissolvit* (145), dominicis legibus cohibeat. Non enim, ego, inquit, hanc legem scribo, sed Dominus Deus, qui in evangeliiis divinis adiecit, et eam quae separata fuerit, innuptam manere iussit, hac ratione cogens redire ad virum (146). » Quibus verbis quamcumque coniugalis vinculi solutionem absolute excludit.

In tertio textu, cum afferat integra Salvatoris verba: *Et qui dimissam duxerit, adulterat;* satis ostendit, se non admittere vinculi solutionem; dum vero profert verba illa: ob fornicationem *solvi copulam iubet*, aperte innuit se loqui de unica causa intrinseca separationis quoad torum; quod apertius constat ex voce *iubet*, quae indicat obligationem, qua vir tenetur ad dimittendam uxorem, quae maneat in adulterio, ne eius delicti se participem faciat iuxta illud Prov. *Qui tenet adulteram stultus est et impius*, ab antiquis saepe laudatum.

(145) Hac occasione adnoto quamnam potestatem voces *dissolvere*, *dirimere* etc. habeant penes antiquos. Certum enim est hic a Theodoro verbum *dissolvere*, accipi in sensu separationis partialis, seu quoad torum et habitationem. Quod quidem confirmatur alio exemplo, quo sensu veteres quandoque vocem *dissolvere* accipiant, non ad significandam plenam coniugii dissolutionem, sed ad partialem tantum, nimirum ex patribus concilii gangrensis qui in Synodica epist. sua aiunt iuxta veterem versionem: « Unde factum est, ut multae mulieres eos (Eustathianos) secutae, relictis propriis viris, et viri, uxoribus destitutis, *vinculum coniugale dissolverent*, continentiam profitentes, quam cum retinere non possent, *adulterium* commiserunt. » Iam vero quam ratione adulterium perpetrare potuissent, si prioris coniugii solutum erat vinculum? Celebratum est autem hoc concilium circa an. 324. in Paphlagonia. In collect. ampliss. concil. Venet. 1753. tom. II. col. 1097.

(146) Ed. cit. pag. 309.

Quod demum omne depellit dubium est textus, quem Braun veritus est integrum adducere, contentus sensum eius evertere, ut illum ad rem suam accommodaret. Itaque in comment. in 1. ad Cor. VII. 10. 11. in ea verba: *His autem qui matrimonio iuncti sunt etc.* Theodoretus haec scripsit: « Evangelicam legem revocat in memoriam. Dominus enim in sanctis evangeliiis dixit: *Quicumque dimittit uxorem praeter quam causa fornicationis, facit eam moechari.* Propterea adiecit, *Non ego, sed Dominus.* Hoc autem, *maneant innupta, vel viro reconcilietur,* non est contrarium illi: *Nolite fraudare invicem nisi forte ex consensu.* Illa enim dicta sunt iis, qui non propter aliam causam, sed propter solam continentiam separantur: hic autem iis legem statuit, qui de aliis rebus contendunt. Et conatur quidem infractum servare matrimonii vinculum: condescendens autem imbecillitati, ei qui separatur continentiam praecipit, hac etiam ratione prohibens matrimonii disiunctionem. Cum enim alteri coniungi prohibet, utramque partem ad prius matrimonium redire compellit (147). » Haec quisque intelligit Theodoretum non modo verba Pauli, verum etiam ipsius Christi de perfecta indissolubilitate exposuisse, ita ut de fornicationis causa ne mentionem quidem iniecerit.

Ut igitur paucis perstringamus quae de Theodoro hac super re diximus, ex eo habemus numquam ipsum locutum esse de facultate alterius ducendae uxoris, priore etiam propter adulterium dimissa, in quo tamen consistit controversiae cardo; habemus insuper ipsum ubique summam praedicare coniugalis vinculi firmitatem, atque exinde occasionem cepisse commendandi prae mosaico instituto legem evangelicam (148).

(147) Op. ed. cit. tom III. pag. 150.

(148) Nimis proinde facilem se praebuit Tournelyus, dum Theodoretum, non secus ac Asterium, de quo mox dicturi sumus, adversariis dimisit. Ast

§. XVII.

De Asterio Amaseno.

Asterius Amasae in Ponto episcopus, qui floruit sub finem quarti, aut sub initium sec. V. (149), in *Homil. in locum evangelii secundum Matth. An liceat homini dimittere uxorem suam*, scribit: « Hoc ratum ac omnino persuasum habete, exceptis morte ac adulterio, nulla ex causa matrimonium dirimi (150). »

Haec porro verba persuadere videntur s. Asterium in ea fuisse sententia, quod coniugium adulterio non secus ac morte quoad vinculum dirimatur. Alloquitur enim eos qui tunc temporis summa facilitate uxoribus nuncium remittebant. Siquidem haec ait: « Qui autem nexu tam arcto iuncti sunt, jam non sunt duo, sed una caro: quod ergo Deus coniunxit homo non separet. Sane quidem haec pharisaeis tunc dicta fuere: verum nunc quoque vos horum institores audite; qui ceu vestes, subinde uxores mutatis; qui thalamos tam saepe ac facile, atque nundinarum tabernulas, struitis; qui dotem ac bona ducitis, coniugesque ad quaestum ac negotiationem habetis; qui levi statim offensione, repudii libellum conscribitis; qui in vivis hactenus agentes, viduas plures relinquitis (151). »

Colletus in *Continuatione Tournelyi* in tract. *De matrim.* cap. V. n. 197. et 198. utrumque vindicavit, et quidem iure meritoque.

(149) Bellarminus *De script. eccles.* hunc auctorem retulit ad an. 400. Eadem assensit Labbeus in *dissert. historica* ad hunc Bellarmini locum. Huius Asterii quinque homilias omnium primus reperit vulgavitque Rubenus S. I. Antwerpiae 1607. Quibus deinde alia eiusdem opera adiecit et vulgavit Cotelierius in op. *Veterum monument.* Paris 1681. tom. II. p. 1 seqq. In quinque illas homil. priores Cf. notas Frontonis Ducaei; in posteriores vero notas eiusdem Cotelierii pag. 516. ubi plena invenitur Asterii notitia.

(150) In *Bibl. max.* PP. Lugd. 1677. tom V. pag. 818.

(151) Ibid. Ex his verbis non absurde nonnulli colligunt s. Asterium non solos catholicos alloqui penes quos numquam vixit, illa praesertim aetate, tanta facilitas in uxoribus commutandis, sed promiscuam alloqui multitudi-

Attamen non desunt, qui Asterium de sola quoad torum et habitationem dissolutione exponant. Quod quidem suadere posse videtur 1. ex eo quod nunquam in toto hoc sermone affirmet licitum esse post coniugii dissolutionem aliam ducere uxorem; 2. ex eo quod arguat eos qui romanis legibus confisi libellum repudii scribebant, quibus leges divinas opponit dicens: « Si autem romanis auscultantes legibus permissam esse scortationem (viris), ac crimine vacare existimant, gravem sane errorem errant, ignorantque leges divinas ab humanis nimium quantum distare doctrinis ac placitis 3. quod de eiusmodi eiectione a domo disserat: « Laudabo eum, inquit, qui fugerit insidiatricem; qui abruperit vinculum, quod eum aspidi, quod viperæ copulavit. Huic enim primus indulget ipse universorum Auctor, tamquam iusto dolore percito, meritoque domus pestem ac exitium domo exigenti (152).» 4. Demum ex eius exhortatione ad castitatem, qua suum sermonem claudit, et ex eo quod pares viros foeminis facit, quibus certe a legibus indultum non erat propter adulterium divortium (153).

§. XVIII.

De s. Hilario pictaviensi.

Huius s. patris pro causa sua in medium protulit testimonium Launois tamquam peremptorium (154). Ast si

nem, quae constabat etiam paganis et haereticis, praesertim arianis. Animadverti etiam debet in sensu, ut aiunt, accommo pro diversa substrata materia intelligi posse obiecta verba: *Exceptis morte et adulterio*, adeo ut priora referantur ad dissolutionem perfectam, posteriora ad dissolutionem imperfectam seu quoad separationem a toro et cohabitatione. Cf. Martorelli op. cit. p. 312.

(152) Ibid. pag. 820.

(153) Cf. Amort. Op. cit. pag. 87.

(154) Scribit enim op. cit. pag. 828. « Periodus tota quid Hilarius sentiat, facile ostendit. Scripturam intelligit quomodo illa intelligendam se praebet, licere videlicet marito, dimissa propter adulterium uxore, aliam ducere.»

accurate Hilarii verba expendamus, patebit ipsum contrariam omnino tenuisse sententiam.

En eius verba ex cap. IV. in s. Matth. n. 22. «*Dictum est autem: Quicumque dimiserit uxorem suam, det illi repudium etc.* Aequitatem in omnes concilians, manere eam maxime in coniugiorum pace praecepit: legi addens plura, nihil demens. Nec sane profectus argui potest. Nam cum lex libertatem dandi repudii ex libelli auctoritate tribuisset, nunc marito fides evangelica non solum voluntatem pacis indixit, verum etiam reatum coactae in adulterium uxoris imposuit, si alii ex discessionis necessitate nubenda sit: nullam aliam causam desinendi a coniugio praescribens, quam quae virum prostitutae uxoris societate pollueret (155).»

Quae verba hunc fundunt sensum: Christus, prout pollicitus erat, hoc documento non solvit legem, sed adimplevit eam perficiens, quatenus libellum repudii abolevit, ac merito pacem cum uxore sua indixit, praecipiens cum ea iugiter permanere. Ita vero eiusmodi cum uxore perseverantiam indixit, ut si quacumque de causa eam repudiaret, se reum constituat adulterii, in quod ob eius derelictionem ipsa incideret, si alteri nuberet. Unicam assignavit causam iustae dimissionis, nempe uxoris fornicationem seu prostitutionem, et quidem dimissionis a toro et cohabitatione. Siquidem hoc in casu iustae dimissionis, si uxor dimissa alteri se copulaverit, sibi soli imputare debet adulterii reatum, in quem ipsa inciderit, a quo maritus dimittens immunis est.

Iam vero concors haec est, ut vidimus, patrum doctrina, a qua profecto Hilarius nulla ratione dissentit, quin potius eam confirmat. Hinc merito editores maurini in nota ad hunc Hilarii locum scripserunt «Qui ex hoc loco volunt Hilarium non modo uxorem adulterii ream

dimittendi, sed et alteram ducendi licentiam tribuere, aliud ei attribuunt, quam quod dicit aut sentit, cum maritum uxoris adulterae ab illius societate dumtaxat absolvat.»

§. XIX.

De Chromatio aquileiensi.

Quae de hoc argumento scripsit s. Chromatius episcopus aquileiensis (156) habentur Tractatu IX. in cap. V. s. Matthaei, ubi praemissis verbis Salvatoris: *Ad duritiam cordis vestri* etc. in hunc modum prosequitur: « Unde nunc non immerito Dominus ac Salvator noster, sublata illa licentia, antiquae constitutionis suae praecepta restaurat. Iubet namque matrimonii castum coniugium indissolubili lege servari, ostendens coniugii legem a se esse primitus institutam. Ipse enim ait: *Quod ergo Deus coniunxit in unum, homo non separet.* Quo dicto et passivam Iudaeorum licentiam, et stultam ac miserabilem manichaeorum praesumptionem, qui negant a Deo esse coniugia, huius sententiae pronuntiatione damnavit, dicens: *excepta causa fornicationis* uxorem non licere dimitti: aperte demonstrans eum contra Dei agere voluntatem, qui matrimonium a Deo iunctum illicita divortii separatione temerare praesumpserit. Unde non ignorent, quam grave apud Deum damnationis crimen incurrant, qui per effrenatam libidinis voluptatem (absque fornicationis causa), dimissis uxoribus, in alia volunt transire coniugia. Quod idcirco se credunt impune committere, quia humanis et saeculi legibus id videtur permissum, nescientes, in hoc se gravius ac magis delinquere, quia humanas leges divinis praeferant; ut quod

(156) De huius sancti antistitis gestis et scriptis cf. Iustum Fontaninum episcop. coreyrensem in *Historia litteraria aquileiensi*. Romae 1744. libri tres cap. 3. et 4. Nec non Bernard. Mariam De Rubeis *De monumentis ecclesiae aquileiensi commentario illustratis*. Argentinae (seu Venetiis) 1740. cap. 10 seqq.

illicitum Deus esse constituit, ideo licitum credant, quia ab homine sit libere permissum. Sed sicuti uxorem caste ac pure viventem dimittere fas non est; ita quoque adulteram dimittere permissum est, quia ipsa mariti consortio fecit se indignam, quae in corpus suum peccando, Dei templum ausa est violare (157).» Hactenus ille.

Ex hac postrema periodo nonnulli contenderunt Chromatium ita de divortio loqui, ac si novum matrimonium, dimissa uxore adultera, contrahi posse existimarit, uti Dupinius (158). Ast Tillemontius ei refragatur dicens s. Chromantium verbis uti evangelicis, quin aliquid praeterea de suo adiiciat, cum forte neque prae oculis eiusmodi quaestionem habuerit (159); refragatur pariter Ceillierius (160), nec non Sixtus senensis (161), aliique passim adversus neotericos, qui id ipsum inficiantur (162).

Sane ut constat ex istius tractatus lectione, s. Chromatius eum in duas partes dispescit; in priori unice proponit textum Matthaei V. 32. quin ei quidpiam adiiciat. Adeoque de hac parte nihil attinet dicere. In posteriori eos arguit, qui romanarum legum obtentu divinam constitutionem de coniugii religione solvebant; quique inde etiam crimen suum augebant, quod leges humanas divinis sanctionibus anteferrent. Iam vero affirmat quidem

(157) *Sancti Chromatii episcopi aquileiensis scripta sive opuscula*. Utini 1823. pag. 49. 50.

(158) *Nouvelle bibliothèque des auteurs ecclésiast.* Paris 1690. tom. III. *Des auteurs du cinquième siècle*, première partie pag. 269. ubi scribit: « En expliquant ce qui est dit dans l'Évangile du divorce, il parle comme s'il croyait que l'on pût épouser une autre femme après avoir fait divorce pour l'adultère. Mais il condamne ceux, qui quittent leur femme pour d'autres causes, et ensuite se remarient, quoiqu'il avoue que les loix humaines le permettent. »

(159) *Mémoires etc.* tom. XI. note II. *Sur saint Chromace* pag. 647.

(160) *Hist. générale des auteurs sacrés*, tom. XIII. pag. 86.

(161) *Biblioth. sanct.* lib. VI. annot. LXXXI. ed. Neap. 1747. una cum Milante tom. II. pag. 782.

(162) Cf. Iustum Fontaninium op. et loc. cit. cap. IV. n. IV. et editores. Opp. 3. Chromatii utinens. in praef. pag. XLI seqq.

Chromatius sub finem huius tractatus posse viros adulteras, quae fidem coniugalem violarunt, depellere, non tamen adiecit, illis dimissis, novum posse inire coniugium. Hoc porro necesse foret, ut adversariorum sententiae eum adstipulari diceremus.

§. XX.

De s. Hieronymo.

Doctrina Hieronymi adeo aperta est, ut mirum videri possit Chemnitium aliosque ausos esse eum inter divortii patronos recensere.

Occasionem hi nacti sunt ex iis, quae s. Doctor in epistola ad Oceanum adiecit extenuandi causa gravitatem culpae, quam Fabiola repudiando adulterum maritum, seque cum alio iungendo, admiserat. Ast perperam; ita enim prosequitur s. Hieronymus: «Igitur et Fabiola, quia persuaserat sibi, et putabat a se virum iure dimissum; *nec Evangelii vigorem noverat, in quo nubendi universa cautio, viventibus viris, foeminis amputatur*, dum multa diaboli vitat vulnera, unum incauta vulnus accepit. Sed quid ego in abolitis et antiquis moror, quaerens excusare culpam, cuius poenitentiam ipsa confessa est?» Refert deinde acerbam ac publicam Fabiolae poenitentiam (163).

Nec minus perspicua sunt, quae scribit in epist. ad Amandum presbyterum: «Reperi iunctam epistolae et commentariolo tuo brevem chartulam, in qua haec indita ferebantur: Quaerendum ab eo, id est a me, utrum mulier, relicto viro adultero, et sodomita, et alio per vim accepto, possit absque poenitentia communicare ecclesiae, vivente adhuc eo, quem prius reliquerat... Responde itaque sorori, quae a nobis super suo statu quaerit, non nostram, sed Apostoli sententiam: *An ignoratis fratres... Ergo vivente viro, adultera erit, si duxerit alterum virum*, et in

alio loco: *Mulier alligata est* etc. Omnes igitur causationes Apostolus amputans, apertissime definivit, vivente viro adulteram esse mulierem, si alteri nupserit. Nolo mihi proferas raptoris violentiam, matris persuasionem, patris auctoritatem, propinquorum catervam, servorum insidias atque contemptum, damna rei familiaris. Quamdiu vivit vir, licet adulter sit, licet sodomita, licet flagitiis omnibus coopertus, et ab uxore propter haec scelera derelictus, maritus eius reputatur, cui alterum virum accipere non licet. Nec Apostolus haec propria auctoritate decernit, sed Christo in se loquente, Christi verba sequutus est, qui ait in Evangelio: *Qui dimittit uxorem suam, excepta causa fornicationis, facit eam moechari; et qui dimissam acceperit, adulter est*: Animadvertite quid dicat: *qui dimissam acceperit, adulter est*. Sive ipsa dimiserit virum, sive a viro dimissa sit, adulter est qui eam acceperit.... Ergo et ista soror, quae, ut dicit, vim passa est, ut alteri iungeretur, si vult corpus Christi accipere, et non adultera reputari, agat poenitentiam: ita dumtaxat, ut secundo viro, qui non appellatur vir, sed adulter, a tempore poenitentiae non copuletur (164).»

Haec adeo decretoria sunt, ut supervacaneum censeam alia eiusdem s. Doctoris adferre testimonia, in quibus eandem de omnimoda indissolubilitate matrimonii orthodoxam doctrinam inculcat.

Operae potius pretium est, subdolas atque contortas Launoii ceterorumque eius asseclarum evasiones praeccludere. Iuxta Launoium « Hieronymi sententia est, ut patet, viri et uxoris conditionem parem non esse, in eo, quod attinet adulterium; ac viro liceat, dimissa propter solum adulterium uxore, aliam ducere; sed uxor, viro propter adulterium dimisso, non potest alteri, quamdiu dimissus vivit, nubere. Atque istud quod observatione summa dignum est,

ecclesiarum magistrum dixisse *nusquam*, maritum illum, qui, dimissa propter fornicationem uxore, aliam ducit, adulterum esse, cum toties dixerit, uxorem, quae, dimisso ob fornicationem marito, alteri nupserit, adulteram esse (165). » Ergo si fidem iungamus Launoio *nusquam* s. Hieronymus dixit *maritum illum, qui, dimissa propter fornicationem uxore, aliam ducit, adulterum esse*; si illa esset Hieronymo mens, quorsum dixisset in descripto ex epistola ad Amandum testimonio: « Animadvertite quid dicat (Christus), *qui dimissam acceperit, adulter est; sive ipsa dimiserit virum, sive a viro dimissa sit, adulter est qui eam acceperit?* Quibus verbis eandem significat esse tum viri tum uxoris dimittentis conditionem, ita ut uterque adulter evadat hoc in casu, sive vir sive mulier. In epist. vero ad Oceanum « Quidquid viris iubetur, inquit, hoc consequenter redundat in foeminas. Neque enim adultera uxor dimittenda est, et vir moechus tenendus. » Ex quibus patet s. Hieronymum non modo aequivalentibus verbis de viris affirmare quod de foeminis adstruit, sed praeterea ex virorum potius conditione arguere conditionem uxorum quae ob adulterium dimissae sunt, adeoque legem evangelicam immediate viros afficere, et cum par sit utriusque coniugis hac in re conditio, afficere etiam mulierem. Talis est magistri ecclesiarum doctrina, non autem commentum, quod Launoius excogitavit ad eius eludendam auctoritatem.

Idem est ferendum iudicium alterius effugii ab aliquibus in eundem finem quaesiti, dum aiunt s. Hieronymum distinxisse inter adulterium probatum et adulterium praesumptum; atque in adulterii quidem praesumpti, sed non probati casu denegasse facultatem novas ineundi nuptias, eam vero concessisse adulterio probato, viris praesertim. Hoc vero paradoxum evincere adnituntur illis ver-

bis, quae leguntur in eius Commentar. super Matth. XIX. 9. «Sola fornicatio est, quae uxoris vincat affectum: immo cum illa unam carnem in aliam diviserit, et se fornicatione separaverit a marito, non debet teneri; ne virum quoque sub maledicto faciat, dicente Scriptura: *Qui adulteram tenet, stultus et impius est.* Ubi cumque est igitur fornicatio et fornicationis suspicio, libere uxor dimittitur. Et quia poterat accidere, ut aliquis calumniam faceret innocenti, et ob secundam copulam nuptiarum, veteri crimen impingeret, sic priorem dimittere iubetur uxorem, ut secundam, prima vivente, non habeat (166).» Verum ecquis in adductis verbis deprehendet a s. Doctore distinctionem fieri inter adulterium probatum et non probatum? Insuper concedi viris dissolutionem quoad vinculum, cum expresse affirmet ita iuberi dimittere uxorem fornicantem, ut *secundam prima vivente non habeat*? Aut etiam disparitatem inter virum ac mulierem hoc in casu significari, cum aperte contrarium doceat illis verbis: «Apud nos, quod non licet foeminis, aequè non licet viris: *et eadem servitus pari conditione censetur* (167)?»

Eodem in pretio habenda sunt, quae alii autumarunt, nimirum s. Hieronymum perinde ac s. Io. Chrysostomum veram suam studio celasse sententiam (168); aut non satis sibi constitisse aut delectatum esse nimium ideis monasticis (169). Haec enim omnia, hisque similia patefaciunt huiusmodi scriptores, qui talia commiscuntur, haud sibi sincero animo proposuisse veritatem persequi, sed iuxta anticipatam sententiam velle vel invitos ad se pertrahere, oblectarique iis qui contrarium docent. Haec perpetua est istorum ars, ut si quaedam obscure dicta videantur, ea

(166) Ita Braun cit. Dissert. pag. 35 seq.

(167) *Epist. LXXVII. ad Ocean.* n. 3. col. 455. ed. cit. tom. I.

(168) Ita auct. op. german. *Tentamen theolog. statist.* nota 683. pag. 188.

(169) Uti Ios. Batz in op. germ. *Harmonia novissim. legum Bavariae circa divortium etc.* pag. 13.

illico arripiant ac pro se adducant, ea vero quae clara sunt, secus ac ipsi optarent, tenebris offundere nitantur.

§. XXI.

De s. Augustino.

Hipponensem praesulem sibi adversari divortiorum patroni sentiunt, ac ultro fatentur; quinimo ipsum veluti primum huius doctrinae assertorem de indissolubilitate coniugalis vinculi, etiam interveniente adulterio, traducunt. Sane Chemnitius audacter asserit quaestionem hanc post Augustini tempora coepisse *horridius disputari*, patres vero eodem Augustino antiquiores: *non adeo*, inquit, *fuere asperi, duri, horridi et immanes*, ut coniugi innocenti alterum ineundi connubium facultatem denegaverint, *sed docuerunt rectius, praestantius et perfectius esse, si etiam ille, qui ab adultera separatus est, vel maneat sine coniugio, vel reconciliatam uxorem rursus recipiat* (170). Verum quid senserint patres Augustino antiquiores ab aetate apostolica ad s. Augustinum usque, ex allatis ipsorum testimoniis abunde liquet. Ideo vero s. Doctorem primum huius doctrinae auctorem faciunt, quod data opera quaestionem hanc omni sub aspectu discussit in duobus praesertim *De coniugiis adulterinis* ad Pollentium libris.

Hic quippe s. Augustinum hac de quaestione consulerat, ac se in eam sententiam propensum patefecerat, nimirum posse coniugem innocentem, dimisso adultero coniuge, alteri se copulare: quo sensu se intelligere Apostoli textum I. Cor. VII. professus est.

S. Augustinus a cap. I. ad VIII. eiusmodi interpretationem refellit; deinde cap. IX. ita aggreditur praecipuum Pollentii argumentum, quod pariter est Achilles omnium adversariorum evangelicae et apostolicae doctrinae, atque ita dissolvit: «Cur ergo, inquis, interposuit Dominus cau-

sam fornicationis, et non potius generatim ait: *Quicumque dimiserit uxorem suam, et aliam duxerit, moechatur, si et ille moechus est, qui, dimissa fornicante muliere, alteram ducit?* Credo, quia illud quod maius est, hoc Dominus commemorare voluit. Maius enim adulterium esse quis negat, uxore non fornicante dimissa, alteram ducere, quam si fornicantem quisque dimiserit, et tunc alteram duxerit? Non quia et hoc adulterium non est; sed quia minus est, ubi fornicante dimissa altera ducitur... Quemadmodum igitur si dixerimus: *Quicumque mulierem a marito praeter causam fornicationis dimissam duxerit, moechatur, procul dubio verum dicimus; nec tamen ideo illum, qui propter causam fornicationis dimissam duxerit, ab hoc crimine absolvimus, sed utrosque moechos esse minime dubitamus: ita eum, qui praeter causam fornicationis uxorem dimiserit et aliam duxerit, moechum pronunciamus; nec ideo tamen eum qui propter causam fornicationis dimiserit et alteram duxerit, ab huius peccati labe defendimus. Ambos enim, licet alterum altero gravius, moechos tamen esse cognoscimus... Sed si hoc evangelista Matthaeus, quia expressa una specie alteram tacuit, facit ad intelligendum difficile; numquid non alii generaliter id ipsum ita complexi sunt, ut de utroque posset intelligi?» Adductis porro Marci et Lucae textibus parallelis, ita prosequitur: « Qui ergo nos sumus, ut dicamus, est qui moechatur, uxore sua dimissa alteram ducens, et est qui hoc faciens non moechatur? Cum Evangelium dicat omnem moechari qui hoc facit (171)? » Et cap. XII. « Nam et illud quod etiam secundum Lucam sequitur, *Qui dimissam a viro ducit, moechatur, quomodo est verum? Quomodo moechatur, nisi quia illa quam duxit, eo vivente, a quo dimissa est, adhuc uxor aliena est? Si enim iam suae, non alienae miscetur uxori, utique**

(171) Ed. Maur. Opp. tom. VI. cap. IX. col. 391-393.

non moechatur: moechatur autem: aliena est ergo, cui miscetur. Porro si aliena est, hoc est, eius a qua dimissa est; *etiamsi propter fornicationis causam* dimissa est, nondum emittentis uxor esse cessavit. Si autem illius esse cessavit, iam huius est cui alteri nupsit; et si huius est, non moechus iudicandus est, sed maritus. Sed quia non eum maritum dicit Scriptura, sed moechum; adhuc illa illius est, a quo etiam *causa fornicationis* abiecta est. Et ideo quamcumque etiam ipse illa dimissa ducit uxorem, quia cum alieno marito concumbit, adultera est (172).»

Lib. II. excludit s. Doctor difficultates a Pollentio propositas, ut ostenderet adulterium morti esse equiparandum, quo sensu exponebat illud Apostoli: *Mulier alligata est legi, quanto tempore vir eius vivit* etc.; cumque absurdam mentique Apostoli contrariam eiusmodi interpretationem patefecisset, concludit s. Augustinus: «Haec verba Apostoli totiens repetita, totiens inculcata, vera sunt, viva sunt, sana sunt, plana sunt. Nullius viri posterioris mulier uxor esse incipit, nisi prioris esse desiverit. Esse autem desinet uxor prioris, si moriatur vir eius, non si fornicetur. Licite itaque dimittitur coniunx ob causam fornicationis; sed manet vinculum prioris, propter quod fit reus adulterii, qui dimissam duxerit etiam ob causam fornicationis (173).»

Cum nequeant adversarii haec adeo perspicua Augustini testimonia cludere, indirecte saltem moliuntur eius auctoritatem hac in re imminuere. Aiunt itaque 1. Augustinum ipsum in sua sententia dubium ac ancipitem fuisse, eo quod in hoc ipso de coniugiis adulterinis opere scripserit: «His ita pro meo modulo pertractatis atque discussis, quaestionem tamen de coniugiis obscurissimam et implicatissimam esse non nescio. Nec audeo profiteri omnes

(172) Ibid. cap. XII. n. 13. col. 394.

(173) Ibid. lib. II. cap. IV. col. 406.

sinus eius, vel in hoc opere, vel in alio me adhuc explicasse, vel iam posse, si urgear, explicare (174).» Quo pariter referunt quae s. Pater scripsit in libro *De fide et operibus*: «Et in ipsis divinis sententiis ita obscurum est, utrum et iste, cui quidem sine dubio adulteram licet dimittere, adulter tamen habeatur, si alteram duxerit, ut, quantum existimo, venialiter ibi quisque fallatur (175).» Aiunt 2. alibi contrarium docuisse, licere videlicet plenum divortium in adulterii casu, ad quod persuadendum proferunt quod s. Augustinus scripsit in lib. *De bono coniugali*: «Qui enim dimittit uxorem suam excepta causa fornicationis, facit eam moechari. Usque adeo foedus illud initum nuptiale cuiusdam sacramenti res est, ut nec ipsa separatione irritum fiat; quandoquidem vivente viro, et a quo relicta est, moechatur, si alteri nupserit, et ille huius mali causa est, qui reliquit. Miror autem, si quemadmodum licet dimittere adulteram uxorem, ita liceat ea dimissa alteram ducere. Facit enim de hac re s. Scriptura difficilem nodum, dicente Apostolo, *ex praecepto Domini mulierem a viro non debere discedere, quod si discesserit, manere innuptam aut viro suo reconciliari*: cum recedere utique et manere innupta, nisi ab adultero viro non debeat, ne recedendo ab eo qui adulter non est, faciat eum moechari. Reconciliari autem viro vel tolerando, si se ipsa continere non potest, vel correcto, forsitan iuste potest. Quomodo autem viro possit esse licentia ducendae alterius, si adulteram reliquerit, cum mulieri non sit nubendi alteri, si adulterum reliquerit, non video... Quod nequaquam puto tantum valere potuisse, nisi alicuius rei maioris ex hac infirma mortalitate hominum quoddam sacramentum adhiberetur, quod deserentibus hominibus atque id dissolvere cupientibus, inconcussum illis maneret

(174) Ibid. lib. I. cap. XXV. n. 32. col. 403.

(175) Cap. XIX. n. 35. col. 185.

ad poenam. Siquidem interveniente divortio, non aboletur illa confoederatio nuptialis, ita ut sibi coniuges sint, etiam separati; cum illis autem adulterium committant, quibus fuerint etiam post suum repudium copulati, vel illa viro vel ille mulieri. Nec tamen nisi in civitate Dei nostri, in monte sancto eius, talis est causa cum uxore. Ceterum aliter se habere iura gentilium, quis ignorat, ubi interposito repudio sine reatu aliquo ultionis humanae, et illa cui voluerit nubit, et ille quam voluerit, ducit. Cui consuetudini simile aliquid, propter israelitarum duritiam, videtur permisisse Moyses de libello repudii. Qua in re exprobatio quam approbatio, divortii magis apparet (176).» Item quod ait *Tract. IX. in Io*: «In qua responsione, si meministis, hoc ait (Christus): *Quod Deus coniunxit, homo non separet*. Et qui bene eruditi sunt in fide catholica, noverunt quod Deus fecerit nuptias, et sicut coniunctio a Deo, ita divortium a diabolo sit. Sed propterea in causa fornicationis licet uxorem dimittere, quia ipsa esse uxor prior noluit, quae fidem conjugalem marito non servavit (177).»

Verum neque ancipitem se in hac doctrina s. Doctor aut dubium exhibuit in obiectis locis, multo vero minus sibi-metipsi contrarium.

Etenim adversarii in priori textu ex lib. *De adulter. coniugis*, pro certo assumunt s. Augustinum nominatim ad quaestionem de solutione conjugalis vinculi propter adulterium alluisse; attamen, uti patet ex recitatis eius verbis, ipse illa protulit generatim de quaestione conjugii universa, quam nemo negaverit umquam talibus obnoxiam esse difficultatibus, quae non nisi aegre solvuntur, nec hactenus forte solutae sunt. Materia enim matrimonialis difficilis est iuris utriusque peritis, difficilis moralis disciplinae institutoribus, difficilis Bibliorum expositoribus, dif-

(176) Cap. VII. et VIII. loc. cit. pag. 523 seqq.

(177) Opp. tom. III. n. 2. col. 360 seq.

facilis theologis, difficilis iuris naturalis interpretibus, ut patefaciunt innumera prope volumina hac de re exarata, et quaestiones theoreticae ac practicae, quae in dies excitantur. Ad hos igitur nodos alludit s. Augustinus, praesertim cum Pollentius non hanc solam qua de agimus quaestionem Augustino solvendam proposuerit, sed alias plures; num matrimonium inter christianos et infideles licitum sit? Num liceat fidei dimittere mulierem infidelem? Num idem dicendum sit de nuptiis in infidelitate initis, ac de iungendis inter fidelem et infidelem ob adulterium coniugis infidelis? Quid si haec promittat christianam religionem amplecti? aliasque eiusmodi (178). De quibus cum fuse egerit, profitetur, se haud certum esse, num rite nodos hos omnes expedierit. Contra vero quod attinet ad praesentem quaestionem, omni sub respectu illam agit, et tuto ac fidenter solvit, ut vidimus, nihil haesitans.

Ad alterum vero textum qui obiicitur ex libro *De fide et bonis operib.*, animadvertendum est hunc librum scriptum ab Augustino fuisse ante libros *De coniugiis adulterinis* (179). Fieri utique potuit, ut s. Doctor hac super re tunc animo haeserit, quam cum postea data opera expendisset, dubium omne excussit, ac ita sentiendum esse luculenter ostendit.

Numquam vero s. Augustinus contrarium docuit, vel in ipsis libris, quos ante opus *De coniugiis adulterinis* scripsit. Sane tantum abest, ut in libro *De bono coniugali* (180) dissolubile in causa adulterii praedicet matrimonium, ut potius firmiter indissolubilitatem stabiliat, eamque in Christi ecclesia unice consistere affirmet ob

(178) Lib. I. capp. I. XIII. XV. XVI. XVII. etc.

(179) Sane uti ostendunt editores Maur. in *Admonitione* praevia, hic liber editus est ab Augustino an. 413.; libri vero ad Pollentium *De coniugiis adulterinis* exarati sunt an. 419. adeoque sex fere post annos.

(180) Hunc librum vulgavit s. Augustinus an. 401.

sacramenti significationem, quam in se christianae nuptiae praeserunt. Quod si insinuare videtur dissolubilitatem matrimonii non omnino adversari naturae iuri, accipi id debet de naturae iure primario, quod et nos concedimus; alioquin Deus in veteri lege divortium minime permisisset. Nos vero agimus de eo iure, quod obtinet ex lege divina Christi.

Quid autem habet s. Doctor in tract. IX. in Evangel. s. Ioannis (181) quod faveat adversariis? Nihil prorsus; quia quamvis dicat in causa fornicationis licitum esse dimittere uxorem, quod centies alias docuit, et nos cum illo profitemur, immo et contendimus; attamen numquam docuit posse virum, dimissa uxore fornicationis causa, aliam, ea vivente, uxorem ducere, quod tamen necesse foret, ut adversariorum causae eum patrocinari dicere deberemus.

Nec refert quod Augustinus agat contra Pollentium non tamquam haesiarcham, sed tamquam agonisten, ut scribit Erasmus (182); nobis satis est quod tueatur doctrinam evangelicam et apostolicam. Quis autem contendit quaestionem hanc tunc temporis iam definitam ab ecclesia fuisse solemniter, ut Pollentius contrarium sentiens, seu verius dubia proponens, tamquam haereticus traduci potuerit?

§. XXII.

De s. Innocentio I.

Neque ab Augustino dissentit summus pontifex Innocentius I. ipsi coaevus. Quamvis enim difficultatem aliquam praeserere videantur, quae ipse scripsit in epist. ad Probum (183), et hac de causa illum pro se adversarii indissolubilitatis allegent; certum tamen est, summum

(181) Hi tractatus anno plus minus 415. aut 416. habiti sunt.

(182) In annot. in I. ad Cor. VII. Opp. cit. ed. tom. VI. col. 694.

(183) Epist. XXXVI. apud Constant col. 909.

hunc pontificem pro omnimoda coniugii firmitate stetisse. Quod ut evincamus, praemittimus quae in cit. epistola ad Probum scripsit; tum ea expendemus, quae adversariis favere videntur ex collatione eorum, quae idem pontifex hac super re decrevit: eadem denique directe explicabimus.

Sic porro in epist. ad Probum scribit: «Conturbatio procellae barbaricae facultati legum intulit casum. Nam bene constituto matrimonio inter Fortunium et Ursam captivitatis incursus fecerat naevum, nisi sancta religionis statuta providerent. Cum enim in captivitate praedicta Ursa mulier teneretur; aliud coniugium cum Restituta Fortunius memoratus iniisse cognoscitur. Sed favore Domini reversa Ursa nos adiit, et nullo diffitente, uxorem se memorati perdocuit. Quare, domine fili merito illustris, statuimus, fide catholica suffragante, illud esse coniugium, quod erat primitus gratia divina fundatum; conventumque secundae mulieris, priore superstite, *nec divortio eiecta*, nullo pacto posse esse legitimum.» Ex clausula illa: *Nec divortio eiecta*, inferunt adversarii; ergo, Innocentio auctore, non solum morte, verum etiam divortio dirimi vinculum coniugale potest.

Verumtamen si haec conferantur cum iis, quae ipse respondit Exsuperio tolosano episcopo, qui eum hac de re interrogaverat, omnis de eius mente dubitatio evanescit: «De his etiam, inquit, requisivit dilectio tua, qui, interveniente repudio, alii se matrimonio copularunt. Quos in utraque parte adulteros esse manifestum est. Qui vero vel uxore vivente, quamvis dissociatum videatur esse coniugium, ad aliam copulam festinarunt, neque possunt adulteri non videri, in tantum, ut etiam hae personae, quibus tales coniunctae sunt, etiam ipsae adulterium commisisse videantur, secundum illud quod legimus in Evangelio: *Qui dimiserit uxorem suam, et duxerit aliam, moechatur, similiter et qui dimissam duxerit, moechatur. Et ideo*

omnes a communione fidelium abstinendos (184).» Iterum in epist. ad Victricium rotomagensem, cum praemississet: «Item quae Christo spiritaliter nupserunt, et velari a sacerdote meruerunt, si postea vel publice nupserint, vel se clanculo corruerint, non eas admittendas esse ad agenda poenitentiam, nisi is, cui se iunxerant, de seculo recesserit,» eiusmodi instituit Innocentius argumentum: «Si enim de omnibus haec ratio custoditur, ut quaecumque vivente viro alteri nupserit, habeatur adultera, nec ei agenda poenitentiae licentia concedatur, nisi unus ex eis defunctus fuerit; quanto magis de illa tenenda est, quae ante immortali se sponso coniunxerat, et postea ad humanas nuptias transmigravit (185)?»

Ex his duabus epistolis duo habemus ineluctabilia documenta ad rem nostram. Siquidem Innocentius in epist. ad Exsuperium, qui eum interrogaverat directe hac super re, respondit absque ulla exceptione adulterum eum esse habendum, qui, vivente adhuc priori uxore, alteram duxerit, loquitur autem tamquam de re compertissima ac indubia dicens: *manifestum est*. Iam vero si casum de repudio propter adulterium voluisset excipere, id expresse significare debuisset: atque eo magis ea responsio generalis dicenda est excludere etiam causam adulterii, quod de hoc solum casu moveri potuerit dubium. Cum enim in religione christiana exploratum esset, excepta adulterii causa, nullam prorsus dari legitimam dimissionis causam cum facultate aliam uxorem ducendi, si quod dubium excitari poterat, id erat tantum de causa fornicationis ob clausulam, quae apud s. Matthaeum occurrit, ac proinde de hoc solum eum potuit Exsuperius interrogare pontificem. Cum vero hic absolute quemvis casum excluserit, pronunciaritque esse reum adulterii, qui, vivente adhuc uxore, aliam

(184) Ibid. Epist. VI. n. 12. col. 794 seq.

(185) Ibid. Epist. II. n. 15. col. 754 seq.

duxerit, hoc ipso exclusit ipsam etiam causam fornicationis. Huc accedit Innocentium saepius dicere foeminam alteri nubentem fore adulteram, *etsi repudium acceperit a vero marito, etsi dissociatum sit coniugium*, et similia. Ex quibus multo magis patet, si dimissionem propter adulterium excipiendam iudicasset, necesse omnino fuisse, eius mentionem facere. Haec erant a nobis animadvertenda ad Launoii tergiversationes preoccupandas, qui cum senserit se Innocentii auctoritate premi, omnem se in partem vertit, ut eam eludat; quem alii etiam secuti sunt, sed perperam (186).

His non contentus Innocentius clarius adhuc mentem suam declarat in epist. ad Victricium, in qua unicam causam solutionis coniugii ad ceterarum omnium exclusionem, nempe mortem assignat. Decretoria siquidem sunt eius verba: *Ut quaecumque vivente viro alteri nupserit, habeatur adultera, nec ei agenda poenitentiae licentia concedatur, nisi unus ex eis defunctus fuerit*. Hinc factum est, ut Launoius hoc testimonium dissimulaverit, ac reliqui pariter cum ipso silentio illud premant, eo quod nullam illius vis eludendae viam invenerint.

Quae cum ita se habeant, reliquum est, ut inquiremus quid sibi voluerit Innocentius per verba illa incidentia in epist. ad Probum: *nec divortio eiecta*. Auctores in illorum interpretatione in diversas abierunt sententias. Eruditus Gonzalez censet ea « referenda esse ad casum, quo

(186) Etenim Launoius op. cit. part. III. cap. V. pag. 821. concludit Innocentium subintellexisse clausulam Matth. *excepta fornicationis causa*, quia alioquin vim eidem intulisset; quia insuper *novitati* alioquin studuisset; quia respondit Exsuperio ipsum interroganti de repudio ob alias causas, quam propter adulterium dato; quasi nempe ignoraverit Exsuperius quod omni legenti Evangelium et epistolas Pauli notissimum erat, ob solam causam adulterii posse dimitti uxorem.

Calvi adiecit Innocentium respondisse Exsuperio sciscitanti de causis repudii concessis a legibus romanis. Verum si ita esset, cum leges romanae inter has causas recensuerint adulterium, debuisset Innocentius respondere causas ad faciendum divortium a rom. legibus assignatas omnes illicitas esse praeter *casum adulterii*. Tales sunt sapientes ecclesiae doctrinae impugnatores!

matrimonium nullum declaretur, quia celebratum fuit in gradu consanguinitatis aut affinitatis, seu cum alio impedimento irritante; nam cum matrimonium nullum declaretur, recte possunt coniuges ad aliud transire; tunc autem late id per divortium dicitur fieri, cum vere matrimonium non extiterit (187). Dr. Moy eadem verba intelligi debere existimat hoc sensu: Quod coniugium secundae mulieris, superstite priore, *nec divortio eiecta*, id est, ne tum quidem locum habeat, quam prior coniux ob adulterium dimissa sit (188). Qui sensus eo verisimilior videtur, quod ei faveat orationis series, faveantque principia eiusdem pontificis aperte alias constituta, alioquin deberet secum ipse pugnare. Adeo verum est haud contempsisse Innocentium citatis verbis aliqua ratione divortio favere, ut ad eius auctoritatem ne Launoius quidem confugerit, quod certe facere non omisisset, si causae suae esse patrocinatorem eum fuisset suspicatus (189).

§. XXIII.

De Concilio milevitano II.

Sanctis Augustino et Innocentio addimus postremo loco auctoritatem concilii milevitani, ut sic praeoccupemus technas quas invexit Launoius, ut aliquo modo, si fieri posset, eius vim enervaret. Siquidem hoc concilium cui interfuit s. Augustinus, canonem edidit, qui tribuitur etiam concilio africano IV., carthaginiensi XI., legiturque totidem

(187) Emman. Gonzalez Tellez *Commentaria perpetua in singulos textus Decret. Gregorii IX.* Francofur. ad Moenum 1690. tom. IV. cap. I. in tit. XIV. *De divortiiis* n. 13. allegatque pro sua interpretatione Glossam verbo *eiecta*; eandemque amplexus est Turriscremata. Cf. etiam Martorelli op. cit. pag. 325.

(188) In op. cit.

(189) Sed neque ad Innocentium recurrerunt sive Chemnitius, sive Io. Gerhardus, neque cum sibi obiecit Sixtus senensis.

verbis in codice africano (190). Hic canon qui est XVII. concilii milevitani II. sic effertur: « Placuit, ut secundum evangelicam et apostolicam disciplinam, neque dimissus ab uxore, neque dimissa a marito, alteri coniungantur: sed ita maneant, aut sibimet reconcilientur. Quod si contempserint, ad poenitentiam redigantur. In qua causa legem imperialem petendam promulgari (191). »

Celebris hic canon, qui nobis exhibet sententiam totius ecclesiae africanae circa perfectam matrimonii indissolubilitatem eo pluris faciendus est, quod hanc doctrinam repetat ex *disciplina evangelica et apostolica*, ac proinde nobis suppeditat genuinam tum evangelii Matthaei, tum apostoli Pauli intelligentiam, ac sensum praeterea traditionalem, et ecclesiae praxim. Mirum proinde non est, si machinas omnes admoveant adversarii, ut nobis eripiant tam perspicuum orthodoxae doctrinae documentum.

Ac primo miratur Launoius patres milevitanos petiisse legem imperialem, cum nondum annus centesimus esset expletus, ex quo legem Constantinus imperator hac de re tulerat (192); miratur quod iidem patres eandem legem non viderint, aut si viderint, eiusdem recordati non fuerint. Negat praeterea patres milevitanos novis sive auctoritatibus sive rationibus canone citato communivisse, et ab omni *impetitione* indissolubilitatem absolutam coniugii defendisse. Invehitur demum in Bellarminum eo quod asseruerit canones milevitani concilii Augustino praecipue auctore, compositos editosque fuisse; qua in re Bellarminus, iuxta ipsum, prodit se ne torvis quidem oculis illos Augustini commentarios aspexisse, ex quibus testimonia

(190) Cf. adnotat. Mansi in *Collect. max. concilior.* Florentiae seu potius Venet. 1760. tom. IV. col. 315. et col. 331.

(191) Apud Harduin. *Acta conc.* tom. I. col. 1220. celebratum est autem hoc concilium an. 418.

(192) Op. cit. *De regia* etc. pag. 835.

sat multa, inquit, in medium adduximus (193). Alii optaverunt, ut canon adulterii speciatim mentionem fecisset, quo probandi vi gauderet. Nonnulli interpretati sunt postulationem concilii de lege imperiali, ut ea illicitum divortium, vivente altero coniuge, declararetur aliis praeter adulterium causis factum, ad abusus praecavendos (194).

Ast ex his ipsis, quae obiiciunt adversarii magis confirmatur vis documenti quod pro catholica doctrina exhibet concilium milevitanum.

Etenim tantum abest, ut imperator Constantinus hac de re centum plus minus ante annos legem tulerit, ut potius praeter¹ adulterii crimen plures alias causas faciendis divortiis assignaverit (195). Lex vero, quam Launoius a Constantino datam commemorat, est de alio argumento, nimirum de gradibus consanguinitatis et affinitatis (196), adeoque nihil commune habet cum eo, quod constituerunt patres milevitani can. XVII., et nedum ipse mirari possit de his patribus, quod legem hanc non viderint, aut eius recordati non fuerint, mirari potius nos possumus

(193) Ibid. pag. 836. ubi contendit s. Augustinum suam doctrinam quam adstruxerat in libris ad Pollentium aut retractasse aut saltem emollivisse. Nos contrarium ostendimus, neque profecto eiusmodi retractationem evincant verba a Launoio quae hic ex Augustini lib. I. et II. *Retract.* a Launoio adducuntur: *Licere propter fornicationem, quae in stupris continetur, dimittere uxorem, nulla quaestio est. Certe de hoc nulla quaestio est; ast quaestio est de facultate ducendi alteram uxorem post prioris dimissionem; quod constanter negavit s. Augustinus.*

(194) Ita Batz et Brunquell apud Roskovány p. 300.

(195) En legem quam Constantinus sanxit an. 331. qua certas ob causas liceat libellus repudii: « In repudio mittendo a foemina haec sola crimina inquiri, si homicidam, vel medicamentarium, vel sepulchrorum dissolutorem maritum suum esse probaverit, ut ita demum laudata omnem suam dotem recipiat ... In masculis etiam si repudium mittant, haec tria crimina inquiri convenit, si *maecham*, vel medicamentariam, vel conciliatricem repudiare voluerit.» In eod. Theodos. lib. III. tit. XVI. *De repudiis* cum comment. I. Gothofred. Lugduni 1665. tom. I. pag. 310.

(196) Sane Launoius hanc legem retulerat in I. part. sui tractatus *De regia etc.* art. III. cap. 3. pag. 731. Quod si legem etiam Constantini *De divortiis* retulit part. III. pag. 828. in alium finem id praestitit.

Launoium ipsum recordatum non esse, legem a se laudatam de alia omnino re latam fuisse. Certe patres milevitani illam legem nec viderunt, neque eius recordati sunt, eo quod numquam extiterit, aut si qua extitit, contraria prorsus erat ei, quam ipsi expetebant.

Quod vero negat, concilium milevitanum communivisse ac defendisse absolutam coniugii indissolubilitatem etiam exclusa adulterii causa, pro arbitrio suo et immerito negat ut ostendimus.

Sic certe Bellarminus Augustini commentarios, ex quibus Launoius tot eruit testimonia, ne torvis quidem oculis aspexit, oculis scilicet ac mente Launoii, ad illorum sensum intorquendum (197).

Ad illud quod alii se optare professi sunt, ut nempe patres milevitani specialem mentionem adulterii fecissent, quo vim probandi haberet ipsorum canon, facile est respondere, nullam fuisse causam, ob quam nominatim de adulterio mentionem iniicerent, cum, ut alias animadvertimus, exploratum esset apud omnes in lege evangelica nullam certe divortii seu repudii causam admissam esse, praeter adulterium. Satis enim erat ad hoc cognoscendum evangelia et epistolas Pauli legisse. Igitur cum unice ex adulterii causa ob Matthaei incisum, quispiam potuisset aliquam dubitandi rationem ingerere, patres milevitani ad unicam hanc excludendam causam divortii suum canonem ediderunt. Quod etiam magis confirmatur ex eo quod, Augustino maxime auctore, hic canon editus sit, qui energice

(197) Reipsa plura ex Augustino Launoius testimonia adducit ex libris partim ante, partim post celebrationem concilii milevitani conscriptis. Illa omnia singillatim expendi, ac ne unum quidem reperi quod faciat pro causa sua imo quod ipsi non sit contrarium; etenim constanter in iis sermo est de licita uxoris dimissione propter adulterium, quod nemo umquam catholicorum inficiatus est; sed aliud est dimittere uxorem adulteram, aliud vero post dimissionem, eaque vivente, ducere aliam; et hoc est quod numquam docuit Augustinus, immo quod expresse fieri posse semper negavit.

adeo in duobus suis ad Pollentium libris contrariam sententiam convellerat.

Absonum demum est asserere postulationem concilii de lege imperiali eo spectasse, ut lege declararetur illicitum esse divortium, coniuge adhuc vivente; quasi nempe ab actis imperatorum penderet bonae aut malae actionis natura, atque ab imperiali declaratione res aliqua licita aut illicita decernenda foret. Porro hoc in mentem venire non poterat praesulibus milevitanis, qui iuxta *evangelicam et apostolicam disciplinam* sanxerunt neque dimissum ab uxore, neque dimissam a marito alteri coniungi posse, sed ita manere, aut sibimet reconciliare debere. Quibus verbis alludunt ad 1. Cor. VII. 11. Itaque unica et vera causa quare patres legem illam efflagitarunt, petieruntque, fuit ad comuniendum sanctione imperiali quod a concilio iuxta evangelicam et apostolicam disciplinam constitutum fuerat, adeoque ad eiusdem conciliaris sanctionis executionem.

§. XXIV.

Documentorum e primis quinque ecclesiae seculis de indissolubilitate coniugii in causa adulterii, et difficultatum quae opponuntur epicrisis.

Percurrimus hactenus maiori qua per nos fieri potuit diligentia quinque priorum seculorum patrum et conciliorum testimonia, singulorumque analysim instituimus ut genuinam ipsorum mentem assequeremur. Nunc praestat in unum colligere ea omnia, quae praemissa sunt, atque critica lance librare, ut inde verus traditionalis ecclesiae sensus in hac adeo agitata quaestione appareat. Quod eo libentius praestamus, quod aetate hac nostra liberior sentiendi agendique ratio circa matrimonii dissolutionem longe lateque ex protestantium praesertim prava hac in re doctrina et exemplo, diffundatur et invalescat. Adeo ut nec

defuerint olim, neque hodie adhuc desint inter ipsos catholicos, qui, non obstante concilii tridentini sanctione, veriti non sint propugnare contrariam doctrinam.

Ideo vero in quinto seculo consistimus, quia, ut vidimus, Chemnitius aliique cum eo fassi sunt post s. Augustinum *horridius* disputari *hac de re coepisse*, quasi nempe hipponensis praesul omnium primus, sin minus novam in ecclesiam de indissolubilitate coniugalis vinculi intulerit doctrinam, saltem hactenus ancipitem ac dubiam, veluti certam adstruxerit. Si proinde semel constiterit Augustinum et cum eo concilium milevitanum non proposuisse nisi doctrinam seculis antea ubique theoretice ac practice propagatam ac traditam, pronum erit inferre tum Augustinum, tum milevitanos patres filium traditionis fuisse insecutos, adeoque iure concilium tridentinum sanxisse, ecclesiam non errasse, dum docuit ac docet iuxta evangelicam et apostolicam doctrinam, matrimonium ob adulterium alterius coniugis non posse dissolvi.

Ceterum quod attinet ad monumenta posteriorum seculorum, ne longior quam par sit, nostra elucubratio evadat, ea veluti in compendium mox redigemus, potissimum vero quae a veritatis tramite deflectere visa sunt, exegeticis et criticis animadversionibus expendemus.

Ut igitur nunc in documentis priorum quinque consistamus seculorum, hinc patrum doctrinam, inde vero adversariorum exceptiones perpendemus. Alii itaque ex patribus aperte et absque ambage docent in nullo casu, atque idcirco ne interveniente quidem adulterio, dissolvi coniugium posse, ita ut, vivente adhuc altero coniuge, absque adulterii facinore, nemini fas sit alteri se copulare.

Tales porro sunt, ut vidimus, Hermas vir apostolicus ac Romae degens, Athenagoras, Iustinus, Tertullianus, Clemens alex., Origenes, Cyprianus, quibus addere possumus ex tertio seculo auctorem canonum, qui vulgo apo-

stolici vocantur (198). Siquidem in can. XLVIII., vel iuxta recensionem ac versionem Dionysii exigui can. XL. absolute, seu absque exceptione ulla statuitur: « Si quis laicus uxore sua eiecta, aliam acceperit, vel ab alio dimissam, segregetur. » Quo quidem canone vera verborum Christi et eorum communis ea aetate intelligentia exhibetur ecclesiaeque praxis. Nil proinde mirum, si allegati patres docuerint unanimi consensu non licere dimissam propter adulterium duci, cum omnes, uno Herma excepto, post editos canones illos floruerint (199). Item inter apertos plenae indissolubilitatis assertores recensentur patres illiberitani, nec non patres arelatenses, s. Ambrosius, s. Epiphanius, s. Gregorius nazianzenus, s. Io. Chrysostomus, s. Hieronymus, s. Augustinus, s. Innocentius I., concilium milevitanum II.

Alii vero docent quidem posse coniugem innocentem adulterum vel adulteram dimittere, quandoque etiam debere; sed numquam docent post dimissionem licitum esse alterum ducere, aut alteri nubere.

Tales sunt s. Hilarius pictaviensis, Theodoretus, s. Chromatius aquileiensis, s. Asterius amasenus, s. Basilus.

Adeoque, quod singulari animadversione dignum est, ex quinque prioribus seculis, quamplures reperiuntur patres, qui directe, conceptisque verbis tradiderint nefas omnino esse dirimere propter adulterium coniugium, ac si fiat, in crimen adulterii, qui id auderent, ex Domini et Apostoli sententia cadere. Plures item reperiuntur, qui etsi copulam coniugalem per adulterium divelli, dirimi, seiungi

(198) De auctoritate et antiquitate horum canonum cf. Guil. Beveregium: *Iudicium de canonibus apostolicis* n. X. ubi scribit: « Quamquam eos vel ab ipsis Apostolis conscriptos esse, vel Clementi tamquam amanuensi dictatos affirmare non ausim, nec cum Damasceno eos inter canonicos sac. Scripturarum libros recensendos indicarim; nullus tamen dubito, quin a viris apostolicis, hoc est, secundo labente et ineunte tertio a Christi nativitate seculo constituti passim deinceps innotuerint. »

(199) Cf. Beveregium loc. cit.

affirmarint, tamen nusquam dicunt posse quempiam post dimissionem adulteri vel adulterae absque piaculo cum altero coniugium inire, vivente adhuc priore coniuge. At ne unus quidem reperitur in tota antiquitate ex iis omnibus, quorum scripta ad nos pervenerunt, quem divortiorum patroni ut suae sententiae certo faventem commemorare possint. Dixi *ex iis quorum scripta ad nos pervenerunt*; nam, ut suo loco vidimus, pro istorum placito steterunt episcopi illi, quos ut ignavos ac divinae ignaros legis acriter obiurgat Origenes, quique proinde eos erroris ob hanc sententiam et praxim arguit. Item Pollentius ad quem suos libros de adulterinis coniugiis direxit s. Augustinus; quamquam nec is proprie iisdem favere dicendus sit, cum non nisi problematica ratione, atque, ut aiunt, academico more dubia sua proposuerit, quae discutit ac plane diluit hipponensis doctor (200).

Equidem haud ignoro nonnullos interdum etiam catholicae veritatis assertores aliquot ex patribus atque ecclesiasticis scriptoribus contrariae parti dimisisse, perinde ac si reipsa adstruxerint novas ineundi nuptias facultatem post adulterae eiectionem. Id sane vidimus de Sixto senensi, de Tournelyo, de Colleto, de Druinio, aliisque. Verum id factum esse puto ob apparentem difficultatem quam textus a suo contextu avulsi, ac per se spectati, sine respectu ad scopum et finem auctoris, totiusque orationis seriem praeseferebant. Quod si intimius eosdem textus una cum relatione ad integram orationem, atque adiuncta omnia spectassent, profecto ex ea persuasionem recessissent.

Verum quidquid de hoc sit, certe aut falluntur aut fallere volunt doctrinae catholicae adversarii dum fidenter adeo affirmant *plures* numero patres pro perfecto divortio

(200) Immerito igitur Io. Gerhardus op. et loc. cit. intulit ex dubiis peculiaribus Pollentii, saltem dubiam tunc temporis in ecclesia fuisse doctrinam quam propugnamus.

in casu saltem fornicationis, quam pro indissolubilitate sententiam dixisse (201); aut cum asserunt testimonia patrum et conciliorum sec. III. et IV. nihil ad probandum valere, spectatis huius doctrinae, ut ipsi loquuntur, *monumentis practicis*, sed ad traditionem evincendam primos patres, atque scriptores ecclesiasticos proferri debere, cuiusmodi sunt Clemens romanus, Ignatius, Polycarpus, Papias, qui tamen hac de re alte silent. Quasi nempe Hermas vir non fuerit apostolicus, ceterique debuerint, non oblata ipsis occasione aut necessitate, de omnibus scribere. Quodnam fidei dogma firmum consisteret, si hac regula uteremur (202)?

Alii gravi supercilio parum valere autumant patrum testimonia, eo quod ad instar peculiarium opinionum aut sententiarum haberi debeant, quae comparatae atque exactae ad normam recentioris philosophiae, historiae, philologiae, et criticae sublimioris cedere debeant sanioribus doctrinarum principiis (203). Nimirum ex istorum sensu veteres omnes pygmei sunt, si novis hisce gigantibus comparentur, qui ecclesiae doctrinae adversantur. Alii vero patribus hac in re detrahunt, quod monastico spiritu imbuti, nimis asceticis ideis indulgerent (204). Alii demum non verentur adstruere parum fidendum testimoniis vete-

(201) Ut auctor *Epistolar. de indissolubilitate matrimonii*.

(202) Notum est Augustinum adversus pelagianos *undecim* patres laudasse; synodum vero oecumenicam ephesinam *duodecim* attulisse, eosque citimos adversus Nestorium, quos sufficere ad reddendum testimonium fidei ecclesiae existimarunt. Cf. Petavium *De incarnat.* lib. XIV. c. XV. n. 2 seqq. ubi ostendit luculentissime consuevisse concilia et patres non ab *antiquissimis*, sed ab *citimis* potius, et recentis memoriae doctoribus probationes et testimonia afferre. Quod adductis oecumenicarum ephesinae, chalcedonensis, quintae et sextae synodorum exemplis, nec non Augustini, Theodoreti, Cyrilli alex., Gelasii pontificis in dogmatum propugnatione adversus haereticos evincit.

(203) Ita auct. op. germ. *Legalit. divortii civilis in Bavaria*. Monachii 1810. pag. 24 seqq.

(204) Ut Bernard. Sauer in *Dissert. circa quaest.: Est ne solum vinculum coniug. ob adulterium iuridice definitum?* Manheim 1830. pag. 22 seqq.

rum, sive quod universalia et conformia non sint; sive quod loquantur *in regula*, nulla facta exceptionis mentione; sive quod cunctanter animum suum aperiant, sive quod quatuor priorum seculorum vacillet traditio documentis inter se decertantibus (205).

Ast haec commemorasse ac refellisse unum est, nec aliud ea evincunt, quam spiritum systematis, ut vocant, eorum qui destinata opera contendunt quavis ope propria adstruere. Siquidem ex adductis, alia non sunt nisi merae assertiones omni destitutae fundamento, alia iniuriosa sunt universae antiquitati quam despiciunt utpote sibi adversam, produntque intolerabilem tumorem quo se super veteres omnes extollunt, praeferuntque; alia ex dictis sunt aperte falsa. Falsum enim est patres in diversas abiisse hac in re sententias, adeo ut se invicem collidant; siquidem ne unus quidem est, qui aperte permittat alteri coniugium dum adhuc in vivis est pars ob adulterium dimissa. Falsum item est cunctanter ac animo quasi pendentes patres fuisse locutos; falsum insuper vacillare veterem traditionem ob documenta inter se decertantia, uti ex singulorum analysi ostendimus.

Nunc vero addimus ad pleniorum istorum confutationem, ne unum quidem suppetere ex integra quinque priorum seculorum periodo exemplum alterius matrimonii impune contracti post prioris coniugis ob adulterium dimissionem. Omissis enim illis, qui annuentibus nonnullis ignavis episcopis, ita se gesserunt, qui propterea ab Origene graviter vapulant, non habemus nisi factum Fabiolae

(205) Uti Carol. Lassaulx in op. germ. *Concordia leg. civil. gallican. de divortio cum verbo Dei scripto et tradito*. Koblenz et Hadamar. 1816. pag. 98 seqq. Item Maurus Hagel in op. germ. *Demonstratio relig. christiano-cathol.* tom. II. August. Vindel. 1832. pag. 210.; nec non Thom. Dolliner canonista austriacus in op. germ. *Illustratio ration. capitis II. codic. Univers. civilis* a §. 3. ad 122. seu *Processus matrimon. II. part.* Vindob. 1835. pag. 6. apud Roskovány op. cit. pag. 190-191.

relatum a s. Hieronymo in epistola ad Oceanum. Ast eam poenituit adeo facinoris sui, ut non dubitaverit se ream inclamare in ingressu basilicae lateranensis, universo clero populoque romano spectante. Ex quo facto deprehendimus quam inveterata ac firma fuerit in ecclesia romana de omnimoda indissolubilitate coniugalis vinculi, etiam interveniente adulterio, doctrina ac traditio.

His igitur dimissis, ut incoeptum resumamus iter, recolenda nobis supersunt documenta, quae a seculo VI. et deinceps afferuntur sive pro absoluta coniugii firmitate, sive contra eamdem.

ARTICULUS II.

De sensu traditionali circa indissolubilitatem christiani matrimonii
in causa adulterii a seculo VI. et deinceps.

Haud diffitemur salebrosam et scopulis obsitam nos ingredi viam dum documenta ecclesiastica de proposita quaestione expendere aggredimur. Certum siquidem est pleraque testimonia, quae de hoc argumento a sexto ecclesiae seculo et deinceps sese exhibent, aperte pro avita doctrina decertare: verum nec desunt documenta, quae aut gravem facessunt difficultatem contra indissolubilitatis doctrinam, aut etiam illi penitus adversari videntur. Ea qua par est sedulitate singula ad trutinam revocabimus. Perspicuitati studentes in duas veluti classes documenta haec partiemur, nempe in certa et in dubia. Sed prius ea afferemus, quae certo pro antiqua stant sententia, tum vero ea sive dubiae auctoritatis, sive dubiae interpretationis, quae ideo nos minime contraria, sed potius dubia appellamus.

§. I.

De documentis certis pro indissolubilitate vinculi coniugalis
a seculo VI. et deinceps.

Agmen istorum ducat ven. Beda. Is in commen. in 1. Cor. VII. exponens illud Apostoli: *His qui matrimonio iuncti sunt* etc. ita scribit: « Potest fieri ut (uxor) discedat ea causa qua Dominus permisit. . . . quod causa fornicationis permittitur, maneat sine uxore, aut reconcilietur uxori? . . . Quia et qui dicit, non licet dimittere uxorem nisi causa fornicationis, cogit retinere uxorem si causa fornicationis non fuerit. Si autem fuerit, non cogit dimittere, sed permittit, sicut dicitur. Non liceat mulieri nubere alteri, nisi viro mortuo. Si ante viri mortem nupserit, rea est. Si post viri mortem nupserit, non est rea. Non enim iussa est nubere, sed permissa. Dominus ergo ad illud confirmandum, ut non facile uxor dimittatur, solam causam fornicationis excepit, ceteras vero universas molestias, si quae forte extiterint, iubet pro fide coniugali, et pro castitate fortiter sustineri, et moechum dicit etiam virum, qui eam duxerit quae soluta est a viro. Cuius rei Paulus apostolus terminum ostendit. Quia tamdiu observandum dicit: quamdiu vir eius vivit. Illo autem mortuo, dat nubendi licentiam. Hanc enim etiam regulam ipse tenuit, et in ea non suum consilium, sicut in nonnullis monitis, sed praeceptum Domini iubentis ostendit, cum ait: *Eis autem quae nuptae sunt praecipio non ego, sed Dominus, mulierem a viro non discedere; quod si discesserit, manere innuptam, aut viro suo reconciliari, et vir uxorem non dimittat.* Credo simili forma, ut si dimiserit, non ducat aliam, aut reconcilietur uxori. Fieri enim potest ut dimittat uxorem causa fornicationis, quam Dominus exceptam esse voluit. Iam vero si nec illi nubere conce-

ditur vivo viro a quo recessit, neque huic alteram ducere viva uxore quam dimisit, multo minus fas est, illicita cum cum quibuslibet stupra committere (206). » Ex his habemus tum ipsius Bedae sententiam, tum interpretationem textuum Matthaei et Apostoli de perfecta indissolubilitate, non obstante coniugis alterutrius fornicationis flagitio.

Huic adnectimus quod a concilio herufordensi in Anglia sub Theodoro archiepiscopo cantuariensi an. 673 celebrato cap. X. constitutum est, atque a Beda ipso refertur: « Nullus coniugem propriam, nisi ut sanctum evangelium docet, fornicationis causa relinquat. Quod si quisquam propriam expulerit coniugem legitimo sibi matrimonio coniunctam, *si christianus esse recte voluerit*, nulli alteri copuletur: sed ita permaneat aut propriae reconcilietur coniugi (207). » Quo indicatur non de re mere disciplinari hoc in canone agi, sed de eo quod ex religionis christianae professione tenendum omnino agendumque sit.

Concilium item parisiense VI. quod ex quatuor provinciis remensi, senonensi, turonica ac rotomagensi collectum est an. 829., quod proinde nobis exhibet quatuor Galliae provinciarum doctrinam lib. III. cap. II. ita loquitur: « Quod hi, qui causa fornicationis dimissis uxoribus suis, alias ducunt, Domini sententia adulteri esse notentur (208). »

Sic pariter conc. namnetense coactum an. 895. singularem canonem hunc XII. edidit: « Si cuius uxor adulterium perpetravit, et hoc a viro deprehensum fuerit et publicatum, dimittat uxorem, si voluerit, propter fornicationem: illa vero septem annis publice poeniteat. Vir vero eius illa vivente nullatenus aliam accipiat. Quod si voluerit

(206) Opp. ed. Basileae tom. VI. col. 418.

(207) *Hist. ecclesiast. gentis Anglor.* lib. IV. cap. V. cit. ed. tom. III. col. 123.

(208) Apud Harduin. *Acta concil.* tom. IV. col. 1353.

adulteram sibi reconciliare, licentiam habeat; ita tamen, ut pariter cum illa poenitentiam agat; et exacta poenitentia, post septem annos ad communionem uterque accedat. Similis forma et in muliere servabitur, si eam vir eius adulteravit (209); » hoc est adulterio polluit.

Accedit concilium foroiulense sub s. Paulino aquileiensi an. 791. celebratum quod cap. X. ita quaestionem hanc dirimit: «Item placuit ut, resoluta fornicationis causa iugali vinculo, non liceat viro, quamdiu adultera vivit, aliam uxorem ducere, licet sit illa adultera; sed nec adulterae, quae poenas gravissimas vel poenitentiae tormentum luere debet, alium accipere virum, nec vivente, nec mortuo, quem non erubuit defraudare, marito. Nam etsi legatur in sacris evangelicis paginis, sola fornicationis causa dixisse Dominum, dimittere virum uxorem suam; non tamen legitur concessisse aliam, vivente illa, in coniugio sibi sociare: prohibuisse quidem modis omnibus non ambigitur. Ait enim: *Quicumque dimiserit uxorem suam, nisi ob fornicationem, et aliam duxerit, moechatur: et qui dimissam duxerit, moechatur.* Qua de re ita diffinire prospeximus, ut iuxta Domini mellifluam vocem, nemo haec interdicta violator inculcare praesumat. Sed quoniam in medio ambiguus interponitur sermo, idest, *nisi ob fornicationem*; quaeri nimirum potest, utrum ad solam licentiam dimittendi uxorem, *qui dimiserit uxorem nisi ob fornicationem*, an etiam ad utrumque dictum refertur, hoc est, ad aliam,

(209) Ibid. Tom. VI. Par. I. col. 460. seq. Hic canon extat etiam lib. VII. Capitularium cap. 298: et in canonibus Isaaci Lingonensis tit. 3. cap. 2. In hunc canonem rite observat Cotelierius in nota ad Mandatum IV. lib. II. Hermae Pastoris: «In praedicto conone namnetensi praecipitur, ut coniux insons pariter cum sonte agat paenitentiam; non insolito olim ecclesasticae disciplinae vigore, cuius rationes esse videntur hae: metus ne immunis a flagitio, causa aliquatenus vel occasio extiterit adufterii; suspicio incontinentiae in reposcente coniugem, et comprobatio verae reconciliationis.» Quibus aliae adici facile possent. Interim his frangitur audacia Launoi, qui censura perstrinxit huius concilii patres, quia sibi adversantur.

vivente illa, accipiendam, quasi dixerit: Qui dimiserit uxorem suam, et aliam, nisi ob fornicationem, duxerit, moechatur. Et idcirco peritissimi viri beati Hieronymi libellum commentariorum recenseri nobis studiose mandavimus, anxie utique cognoscere festinantes, qualiter idem sanctissimus doctor haec sacrata dominica verba, iuxta capacioris ingenii sui subtilitatem, sensisse monstraretur. Cuius nimirum sensum sagaciter explorantes, in promptu nihilominus patuit, ad solam dimittendi uxorem licentiam pertinere. Nam cum more suo vir sanctus huius capituli summatim seriem exponendam transcurreret, inter cetera et post pauca sic ait: Et quia poterat, inquit, accidere, ut aliquis calumniam faceret innocenti, et ob secundam copulam nuptiarum veteri crimen impingeret, sic priorem dimittere iubetur uxorem, ut secundam, prima vivente, non habeat. Non enim debet imitari malum adulterae uxoris, et si illa duo, immo unam carnem, per scissuras fornicationum divisit in tres, dividat in quatuor. Unde patenter datur intelligi: quamdiu vivit adultera, non licet viro, nec potest impune secundas contrahere nuptias (210).» Hoc vero capitulum nonnullis canonibus exponendis inserviet.

Inter capitula selecta canonum hibernensium lib. XLIV. legitur canon s. Patricio adscriptus his verbis expressus: « Si alicuius uxor fornicata fuerit cum alio viro, non ducat aliam uxorem quamdiu viva fuerit uxor prima. Si forte conversa fuerit, et agat poenitentiam; et suscipiet eam, et serviet ei quamdiu viva fuerit in vicem ancillae, et annum integrum in pane et aqua per mensuram poeniteat, nec in uno lecto permaneant (211). »

(210) Apud Harduin. *Acta concil.* Tom. IV. col. 859 seq.

(211) Apud Luc. D' Acherium: *Veterum aliquot scriptorum spicilegium* Paris. 1669. tom. IX. cap. XXXIII. pag. 43. nec non apud Wilkins *Concilia magnae Britanniae et Hiberniae*. Londini 1737. pag. 6. sub hoc titulo: *Canones s. Patricio adscripti ex opusculis s. Patricii per Iacobum Weraeum* pag. 39.

Pariter concilium triburiense in Germania an. 895. habitum, can. XLVI. decrevit: « Maritus, quamdiu ipsa (adultera) vivit, nullo modo alteram ducat (212).

Eadem constituta leguntur in capitulo LXXXVII. libri VI. Capitularis Caroli M. et Ludovici Pii, ubi canon X. concilii herufordiensis repetitur (213). In capitulo autem CXCI. eiusdem libri constituitur: « Adnuntiet unusquisque presbyterorum publice plebi ab illicitis connubiis abstinere, et secundum Domini mandatum, legitimum coniugium nequaquam posse ulla occasione separari, excepta causa fornicationis, nisi consensu amborum, et hoc propter servitatem Dei (214), » quibus firmitas omnimoda coniugalis vinculi adstruitur; siquidem separatio permittitur causa fornicationis eadem ratione, qua mutuo permittitur amborum consensu pietatis causa; iam vero per mutuum consensum profecto vinculum non dirimitur, adeoque neque propter fornicationis causam.

Sic etiam lib. VII. cap. LXXIII. dicitur: « Qui, interveniente repudio, alio se matrimonio copularunt, quos in utraque parte adulteros esse manifestum est. Qui vero vel uxore vivente, quamvis dissociatum videatur esse coniugium, ad aliam copulam festinarunt, nec possunt adulteri non videri, in tantum ut etiam hae personae, quibus coniuncti sunt, adulteri esse monstrentur (215). »

Id ipsum apud graecos ipsos aliquando obtinuisse haud obscure patefacit documentum quod suppeditat ius graeco-

(212) Apud Harduin. *Acta concil.* tomi VI. par. I. col. 454.

(213) Cf. *Capitularia regum francor.* ed. Stephani Baluzii. Paris. 1677. tom. I. col. 936.

(214) Ibid. col. 955-956.

(215) Ibid. col. 1041. Hoc autem capitulum desumptum est ex Innocentio I. Cf. de hac capitularium collectione eruditam praefationem Stephani Baluzii, in qua ipse ostendit eam conflari maxima ex parte ex decretis rom. pontificum et conciliorum sive generalium sive particularium. Hi libri numero septem collecti et editi sunt ab Ansegiso abbate an. 827. sub imperio Ludovici I. eiusque filii, ut constat ex praefatione ad librum I. Ibid. pag. 697.

romanum in responsionibus Nicetae metropolitani Heraclae ad Constantinum episcopum. In *interrogatione secunda*. « An puellam oporteat accipere alium virum, cum vir eius est in extraneam regionem profectus, ibique concubinam nactus: et ipsa viri reditum tribus annis expectavit. Resp. Hic quidem a concubina discedet, nec ab uxore separabitur: sed nec ipsa ad alias festinabit nuptias. Libera enim est, (ut inquit Apostolus) viro mortuo, non autem eo vivente. » *Interrog.* 3. « Puella quaedam virum accepit, et sponsaliorum facta est precatio et benedictio: cum carnalis non intervenisset copula, vir in suam socrum prolapsus est, gravidam fecit, quid faciendum est? Resp. De hac specie et prius respondimus: nunc autem quod suppetit, respondebimus: licere viro suam uxorem habere: sed procul a socru removendum esse, ob malam consuetudinem, ne amplius ab ea pelliciat (216). » In utroque proposito casu tum de adulterii, tum etiam de incesti flagitio agitur alterius coniugis; negatur tamen sive nocentem partem sive innocentem posse alias inire nuptias, atque aperte quoque nuptiae excluduntur, vivente adhuc altero coniuge, ex auctoritate Apostoli.

Huc pariter spectat epistola LXIV. Ioannis papae VIII. ad Ederedum archiep. anglorum, in qua scribit: « His autem, quos asseris uxores proprias contra praeceptum Domini relinquere, praecipimus, neque virum ab uxore, neque uxorem a viro, nisi causa fornicationis, discedere: quod si *ob hoc* discesserit, manere innuptum, vel innuptam, aut sibi mutuo reconciliari: quoniam dicente Domino, *Quod Deus coniunxit, homo non separet*; et ideo cum priorem legitimo sibi matrimonio iunctam quisque deserere nequeat, *nulla ratione illi prorsus* conceditur aliam vivente priore, conducere: quod si fecerit, et non emendare sub satis-

(216) *Iuris graeco romani tam canonici quam civilis*. Io. Leunclavii. Francofurt. 1596. tom. I. lib. V. p. 310.

factione studuerit, ab ecclesiae consortio maneat separatus (217). »

§. II.

De documentis dubiis circa indissolubilitatem vinculi coniugalis
a sec. V. VI. et deinceps.

Inter dubia documenta refero canonem concilii hibernensis II. quod sub s. Patricio celebratum perhibetur, qui est numero XXVI. atque ita legitur: « Audi Dominum dicentem: *Qui adhaeret meretrici, unum corpus efficitur. Item, adultera lapidetur: id est, huic vitio moriatur, ut desinat crescere, quae non desinit moechari. Item, si adulterata fuerit mulier, numquid revertitur ad virum suum priorem? Item, non licet viro dimittere uxorem, nisi ob causam fornicationis, ac si dicat ob hanc causam: unde si ducat alteram velut post mortem prioris, non ventant (218). »*

Canonem hunc inter documenta dubia retuli, non quod eius verba satis aperta non sint quoad facultatem, quae viro praebetur post adulterae dimissionem alteram ducendi, sed ideo quia incertae auctoritatis est documentum. Etenim, uti rite animadvertit Amort, non potest hoc vocari concilium, cum nullam concilii praeferat formam, sed compilationem quamdam verius vocaveris ab imperito consarcinate confectam, qui varias collegit sententias forte traditione spuria s. Patricio attributas. Imperitia praeterea huius consarcinatoris se prodit ex sola huius canonis inspectione. Nam in primis haec verba: *Qui adhaeret me-*

(217) Apud Labb. tom. IX. pag. 52. et in *collect. maxima concil. Mansi. Venet. 1772. Tom. XVII. col. 55.* Hic est famosus textus quem Launoius ut traheret ad rem suam foede corrupit, substituens ad illud *ob hoc, ob aliud*, deinde delens illa verba: *nulla ratione prorsus.* Tales sunt catholicae doctrinae impugnatores!

(218) Apud Harduin. *Acta etc.* tom I. col. 1796.

retrici unum corpus efficitur, non sunt verba Christi Domini, sed Apostoli; secundo haec verba: *adultera lapidetur*, praeterquam quod biblica non sunt, non habent hunc sensum: *vitio moriatur*. Tertio non cohaerent cum *morte vitiorum* sequentia: *ut desinat crescere, quae non desinit moechari*. Si enim loquitur de ea, quae vitiis moritur, quomodo componuntur haec cum ea, quae non desinit moechari? Quarto nullum inter se nexum habent quinque allati biblici textus, qui tamen coniunguntur per illud *item* (219). Accedit nullam synodi formam, ut innuimus, eiusmodi collectionem exhibere, praesertim si cum synodo praecedente comparetur; mendosissimum insuper esse unicum exemplar quod omnium primus reperit Sirmondus (220). Demum addo quod in vera s. Patricii synodo contrarium potius constitui videatur can. XIX. qui ita effertur: «Mulier christiana, quae acceperit virum honestis nuptiis, et postmodum discesserit a primo, et iunxerit se adultero; quae haec fecit, excommunicationis sit (221).» Et clarius adhuc lib. XLIV. cap. XXXIII. decrevit synodus: «Ut mulier iuncta alii viro causa adulterii excommunicata fiat definimus, donec poenitentiam agat; et post poenitentiam reconcilietur viro suo (222);» in quo doctrina traditur superiori plane contraria.

(219) Cf. Amort. op. cit. *Demonst. critica* pag. 88.

(220) Hinc apud Wilkins, *Concilia magnae Britanniae et Hiberniae*, Londini 1737. vol. I. pag. 4. haec nota legitur ad hanc synodum, quae s. Patricii nuncupatur: «Quae synodus alia s. Patricii dicitur, non tam synodus videtur, quam responsio ad quaesita aliqua. Quare ipso initio: *De eo quod mandasti*, quod et in ceteris capitulis subintelligitur. Corruptissima sunt pleraque omnia, quae non nisi melioris codicis ope possunt emendari: pauca per coniecturam paulo tolerabiliora facere conati sumus. Secundam hanc s. Patricii synodum ex andegavensi bibliotheca transcriptam D. Hothaeo communicavit aliquando Iacobus Sirmondus, quorum ille eam ad reverendissimum patrem D. Iacobum Armachanum archiepiscopum primatem Hiberniae misit, et eandem mihi praesul idem conditione et pietate spectatissimus 1. aprilis 1628. De tempore autem quo sit habita neuter meminit, nec e synodo deprehenditur. Haec Spelmannus.»

(221) Apud Wilkins *Concilia* etc. tom. I. pag. 3.

(222) In *Spicileg.* D'Achery edit. Nov. Paris. 1723. tom. I. p. 504. Cf. Moy

Dubius quoad significationem in re nostra est canon LXXXVII. concilii trullani an. 692. « Quae maritum reliquit, est adultera, si venerit ad alium, ut vult sacer et divinus Basilius, qui ex Ieremia propheta hoc optime collegit: *quod si alii viro uxor fuerit, ad maritum suum non convertetur, sed polluta polluetur. Et rursus: qui autem detinet adulteram est insipiens et impius.* Si ergo praeter rationem a marito recessisse visa sit, ille quidem venia dignus est, haec vero poena. Illi autem venia dabitur, ut ecclesiae communicet. Sed ei, qui legitime sibi datam uxorem relinquit, et aliam ducit, e Domini sententia est adulterii iudicio obnoxius. A patribus enim nostris statutum est, ut qui sunt eiusmodi, annum defleant, biennio audiant, triennio substernantur, et septimo cum fidelibus consistent, et sic oblatione digni habeantur (223). » Hic non agitur expresse de facultate aliam ducendi post adulterae dimissionem; attamen videtur insinuari, quod peracta poenitentia possit vir consistere cum ea quam illegitime duxit. Res plane incerta est; adeoque pro neutra sententia adduci hic canon potest, et si cui parti favet, profecto favere videtur absolutae indissolubilitati (224).

Eodem in censu habeo can. IX. concilii svectionensis ann. 744 celebrati, in quo dicitur: « Similiter constituimus, ut nullus laicus homo Deo sacramentum foeminam ad mulierem habeat: nec marito vivente suam mulierem alius accipiat, nec mulier vivente suo viro alium accipiat: quia maritus mulierem suam non debet dimittere, excepto causa forni-

op. cit. *Ius matrimoniale christianor.* pag. 307. seq. ubi alii eiusmodi canones proferuntur ex eadem synodo.

(223) Apud Harduin. tom. III. col. 1692.

(224) Cf. in hunc can. Scholion Christ. Lupi opp. ed. Venet. 1724. tom. III. pag. 153 seq. Iuxta Lupum conc. trullanum hoc canone leges novellas faventes divortii partim abiicit, partim confirmat. Et virum nempe et mulierem, irrationabile repudium attentantem, damnat de adulterio, arceatque perpetuo a novis nuptiis, quas tamen viro inique dimisso, de muliere eandem iniuriam passa tacens, permittit. Ita quidem ipse; ast res non est satis aperta.

cationis deprehensa (225). » Prima fronte videretur posse canon intelligi de sola dimissione quoad lectum victumque; ast difficultatem creant ea quae hic statuuntur de non du-cenda altera, vel de alteri non nubendo, excepta forni-cationis causa (226); nisi velis appositam clausulam ad solam dimissionem coarctare, prout non pauci contendunt.

Idem esto iudicium de can. XVIII. concilii vermeriensis in Galliis habiti an. 742. his verbis proposito: « Qui cum consobrina uxoris suae manet, sua careat, et nullam aliam habeat: illa mulier quam habuit, faciat quod vult. Hoc ecclesia non recipit. » Nam videntur postrema haec verba irrepsisse ex margine in textum; manifeste enim a quo-piam annotatore in margine posita esse videntur (227). Eo vero lubentius in hanc inducor coniecturam, quod videam eiusmodi concilium facile, immo etiam proclive fuisse in his facultatibus concedendis. Sic can. II. constituitur: « Si aliquis cum filiastra sua manet, nec matrem nec filiam ipsius potest habere; nec ille, nec alia se poterunt coniungere ullo umquam tempore. Attamen uxor eius, si ita voluerit, si se continere non potest, si posteaquam cognovit quod cum filia sua vir eius fuit in adulteriis, carnale commercium cum eo non habet, nisi voluntate ab-stinet, potest alio nubere; » et can. V. « Si qua mulier mortem viri sui cum aliis hominibus consiliavit, et ipse vir ipsius hominem se defendendo occiderit, et hoc probare potest; ille vir potest ipsam uxorem dimittere, et si voluerit, aliam accipiat (228); » ut alios omittam.

(225) Apud Harduin. loc. cit. col. 1934.

(226) Sane Colletus n. 226. hunc canonem inter eos refert, quibus ad-struitur indissolubilitas, prout pariter eadem ratione refert Cotelerius in notis ad Mandat. IV. Hermæ. Non habeo positive quod repugnem. Nolui tamen inter documenta certa hunc canonem recensere ob praefatam difficultatem. Ceterum rite potest haec clausula intelligi iuxta sensum textus evangelici, quo per-mittitur quidem dimissio coniugis infidelis ob adulterium, quin concedatur facultas transeundi ad novas nuptias.

(227) Idipsum suspicatus est Cotelerius loc. cit.

(228) Apud Harduin. *Acta* etc. tom. III. col. 1990-1992. Cf. in hunc canon.

Huc etiam solet a plerisque adduci responsio Gregorii II. ad s. Bonifacium germanorum apostolum data an. 726. (229) sic igitur se habet: «Quod proposuisti, quod si mulier infirmitate correpta non valuerit debitum viro reddere, quid eius faciat iugalis? Bonum esset, si sic permaneret, ut abstinentiae vacaret. Sed quia hoc magnorum est, ille qui se non poterit continere, nubat magis: non tamen subsidii opem subtrahat ab illa, quam infirmitas praepedit, et non detestabilis culpa excludit (230).» Verum, ut patet, ad praesentem quaestionem eiusmodi responsio non refertur; nec enim agitur de coniugii dissolutione, interveniente adulterio, deque facultate aliam ducendi uxorem post adulterae dimissionem. Sed unice agitur de concessione alteram ducendi ob prioris uxoris infirmitatem. Omittimus propterea quaestiones criticas virorum eruditorum tum circa hanc epistolam (231), tum circa sensum eiusdem responsionis, num scilicet rom. pontifex egerit de casu uxoris perpetua naturali impotentia laborantis, ut plures contendunt (232); aut de impoten-

notas et commentarium Gonzalez Tellez *comment. in decret. Gregorii IX.* tom. IV. tit. XIX. *De divortiiis.* cap. I. p. 256 seqq. Petrus Collet. *De matr.* c. V. *De indissolub.* hos canones admittit exponere benigne.

(229) Deprehendimus ex anno 726. quo data haec epistola est, perperam a Gratiano, Hincmaro, Ivone, Bellarmino, Bossueto, Nat. alex. aliisque hanc epistolam Gregorio III. *Iuniori* nuncupato adscriptam fuisse. Nam Gregorius III. nonnisi an. 731. eVectus fuit ad pontificatum.

(230) Apud Harduin. tom. III. col. 1858. et apud Mansi *Nova et ampliss. collect.* tom. XII. pag. 245. Item apud Gratianum in *Decreto* causa XXXII. q. 7. cap. 18. et in operibus s. Bonifacii omnibus edit. Giles. Londini 1844. tom. I. p. 64. atque describitur a Philippo Zaffé in *Registro pontif. Roman.* ad an. 726. sub die 22. Nov. tamquam authentica.

(231) Binterim in historia conciliorum Germanicorum edita Mogunt. 1852. vol. III. p. 154. refert se pluribus de causis, maxime quod hae decretales litterae in Othonis collectione desiderarentur, in opere quod de matrimonio eiusque solutione scripserat, earumdem authenticitatem in dubium revocasse; nunc vero huiusmodi dubium deposuisse, eo quod Zacharias papa in concilio romano an. 743. et Riculphus archiep. Moguntin. in concilio Wormatiensi an. 803, nec non Hincmarus illius mentionem fecerint.

(232) Uti Ant. Augustinus, Gonzalez Tellez, Bellarminus, Amort, alii- que passim.

tia ex morbo contracta paulo ante celebrationem coniugii, ut alii volunt (233); num vero de dissolutione coniugii veri quidem, sed non rati utpote in infidelitate contracti, ut alii arbitrantur (234); num potius de peculiari aliquo conscientiae casu pontifici proposito, ut nonnullis placuit (235). Idem die de genuina istius textus lectione (236).

Quidquid porro de his sit, certum est Gregorium II. aperte mentem suam circa perfectam matrimonii indissolubilitatem patefecisse in *Instructione matrimoniorum* data an. 722. his verbis: « Ut ita nubentibus vel nupturis ordinem ex apostolica auctoritate detis, ut nec continentiae causa iudicetur damnabilis copula nuptialis, nec per licentiam nubendi praesumatur occasio fornicandi. Sed sicut masculum et foeminam Deus in ipso exordio mundi praecepit coniungi, ut sint duo in carne una; ita, iuxta doctrinam apostolicam, *Unusquisque vir suam uxorem habeat*, et non liceat in invicem fraudare, nisi ex consensu ad tempus, ut vacent orationi, dicente de hoc ipso Apostolus: *Alligatus es uxori; noli quaerere solutionem*, id est, superstitie coniuge, ad alterius foeminae concubitum non velle transire, quia eodem doctore gentium adstruente: *qui fornicatur, in corpus suum peccat*, hoc est, cui fraudando per amplexus illicitos, semetipsum sub peccati reatu obstringit. Unde nec reputandum est recte coniugium, quod

(233) Uti Binterim, qui op.cit. nota 2. p.155. textum hunc explicat de impotentia antecedente, quae non quidem ex naturali quodam corporis habitu, sed ex morbo ante matrimonium contracto orta est. Verba quidem impotentiam consequentem indicare dicit, at in octavi seculi scriptoribus verborum vim non nimis urgendam esse.

(234) Uti Berardus: *Gratiani canones genuini*. Taurini 1755. tom. II. part. II. pag. 301 seqq: et Frid. de Kerz *Hist. eccles. comitis a Stolberg* continuator.

(235) Quae est opinio Roskovàny op. cit. p. 309.

(236) In nova ed. a Ludov. Richter Lipsiae 1839. adornata habetur alia lectio; nam pro *correpta* legitur *corrupta* ex ed. *Decreti* Argent. 1471. et Basileae 1481.

duorum excesserit numerum, quia, nisi in duobus non geritur iugum (237). »

Huc potius spectat quod sub Zachariae nomine proferitur decretum: «Concubuisti cum sorore uxoris tuae? Si fecisti, neutram habeas: et si illa, quae uxor tua fuerit, conscia sceleris non fuit, si se continere non vult, nubat in Domino, cui velit. Tu autem et adultera sine spe coniugii permaneatis: et quamdiu vixeritis, iuxta praeceptum sacerdotis poenitentiam agite (238). » Circa cuius decreti intelligentiam in varias sententias viri docti abierunt. Sixtus senensis recenset hac de causa Zachariam inter eos «qui huiusmodi repudia permiserunt, et interdum iusserunt, promulgatis super haec sanctionibus et decretis, non quidem generalibus et perpetuis, sed ad tempus; idque certis nationibus ac gentibus, et in incestibus tantum; atque aliis quibusdam atrocibus flagitiis, ne longe peiora, turpioraque perpetrarentur ab his, qui tam foeda coniugia tolerare non poterant (239). » Bellarminus exponit verba Zachariae perinde ac canonem IV. concilii triburiensis de coniugio, quod parti innocenti conceditur post mortem coniugis prioris (240). Huic autem expositioni alii repugnant, eo quod componi haud posse videatur cum postremis decreti verbis: *tu autem et adultera sine spe coniugii permaneatis*, quae supponunt, uxori, adhuc vivente adultero viro, si continere se non possit, alias nuptias inire permissum fuisse (241). Quapropter verior illorum responsio

(237) Apud Mansi tom. XII. pag. 259.

(238) Apud Gratianum causa XXXI. q. 7. c. 23.

(239) *Biblioth. sancta* lib. VI. annot. LXXXI. Verum hunc auctorem parum criticum se praestitisse alias observavimus; et sane pro dissolubilitate recenset sive concilia, sive auctores, qui longe abfuerunt ab hac sententia. Hac de causa Lutheranus Gerhardus in loco mox citando eidem gratias agit.

(240) *De matrim.* cap. XVII. in resp. ad obiect. XII. eodem modo quo interpretatus est Petrus Lombardus D. 32. perinde ac Hugo a s. Victore in *Summa sententiar.* tract. VII.

(241) Ita Gerhardus *Loci theol.* pag. 180. cit. ed. scribens: « Ipsa decreti

videtur, qui eiusmodi decretum falso Zachariae pontifici adscriptum censent (242). Ac merito quidem, nam quid revera senserit hac super re verus Zacharias pontifex apparet ex eius epistola ad Pipinum et episcopos Francorum data, in qua ad quaestionem. « Quid cum laico coniugem suam pellente agendum sit? » Respondet verbis can. apostolici XLVIII. « De laico pellente suam coniugem ex canone sanctorum apostolorum, capitulo XLVIII. Si quis laicus uxorem propriam pellens, alteram vel ab alio dimissam duxerit, communione privetur; » et cap. XII. ita scribit: « De his qui uxores aut viros dimittunt, ut sic maneant, ex concilio suprascripto africano cap. LXIX. ita continetur: Placuit ut secundum evangelicam et apostolicam disciplinam, neque dimissus ab uxore, neque dimissa a marito, alteri coniungantur; sed sic maneant, aut sibi invicem reconcilientur. Quod si contempserint, ad poenitentiam redigantur (243). »

Ad haec praeterea dubia documenta refero capitulum XXI. libri V. Capitularium Caroli M. quod ita sonat: « Si quis homo habens mulierem legitimam, si frater eius adulteraverit cum ea, ille frater vel illa foemina qui adulterium perpetraverunt, interim quoad vivunt, numquam habeant amplius coniugium. Ille vero cuius uxor fuit, si vult, potestatem habet uxorem accipere aliam (244). » Si-

verba Bellarmini exceptionem excludunt. Quomodo enim de coniugio post mortem adulteri repetendo intelligi potest, quod conceditur parti innocenti nubere in Domino, dum adulter incestuosus manet sine spe coniugii? »

(242) Uti Baluzius in notis ad Gratianum scribens: « Unde vero ista acceperit Gratianus, non video. Burchardus enim lib. XIX. c. 5. citat ex Poenitentiali romano, quod magis placet. Nam et stylus ipse non est epistolaris, et praeterea non convenit dignitati pontificiae. » Sic etiam Van Espen *Comment.* in 2. Part. *Decreti Gratian.* Brunquell, ac novissime Binterim apud Roskovány op. cit. *de matr.* tom. II. *De indissolubil.* p. 330. Cf. etiam Sebast. Berardi *Canones Gratiani genuini* partis II. tomus secundus. cap. LXIX. *De decretis aliquot Zachariae tributis.* Taur. 1752. pag. 211. seq.

(243) Apud Harduin. *Acta concil.* tom. III. col. 1902. cap. VII. et col. 1903. cap. XII.

(244) *Capitularia reg. Franc.* ex recensione Baluzii. tom. I. col. 829.

quidem non dicitur hanc facultatem aliam ducendi uxorem parti innocenti concedi, vivente adhuc adultera, adeoque commode exponi potest, tali illum facultate uti posse post adulterae mortem, quae facultas delinquentibus denegatur, etiam post alterutrius coniugis obitum. Hoc vero non absque fundamento affirmari, patet ex iisdem capitularibus, quibus constat plenam coniugii firmitatem adstrui.

Praeter superius adducta, huic ipsi capitulo lucem affundit capitulum CCCLXXXI. libri VII. eorumdem Capitularium, quod ita legitur: « Mulier quae duobus fratribus nupserit, abiici debet usque ad diem mortis. Sed propter humanitatem in extremis suis sacramentis reconciliari oportet; ita tamen ut prius solvatur coniugium, et maneat inupta, et vir eius absque uxore simili poenitentiae sit subditus. Quod si duo fratres cum una foemina fornicati fuerint, nescientes alter alterius fornicationem, statim ut cognoverint adulterium, qui eam habet uxorem, dimittat. Et ille quidem post actam poenitentiam, *si uxor defuncta fuerit*, potest alteri sociari; *illa vivente nequaquam*. Illa vero *numquam ulterius poterit in coniugium assumi*, et iugi poenitentiae submissa, ad exitum vitae communionis gratiam percipiat (245). »

Sic etiam inter haec commemoramus canonem XXV. concilii agathensis an. 506. celebrati, qui ita statuit: « Hi vero seculares, qui coniugale consortium culpa graviore dimittunt, vel etiam dimiserunt; et nullas causas discidii probabiliter proponentes, propterea sua matrimonia dimittunt, ut aut illicita, aut aliena praesumant; si antequam apud episcopos comprovinciales discidii causas dixerint, et prius uxores, quam iudicio damnentur, abiecerint, a communione ecclesiae et sancto populi coetu, pro eo quod fidem et coniugia maculant, excludantur (246). » Nec enim

(245) Ibid. col. 1106.

(246) Apud Harduin. tom. II. col. 1001.

hic mentio de adulterio iniicitur, neque affirmatur post dimissionem episcoporum iudicio factam, novum posse iniri coniugium; sed id solum canon prohibet, ne sine causa in iudicio episcoporum discussa coniuges invicem separentur.

Eodem in censu habemus can. II. concilii venetici an. 461. «Eos quoque, qui relictis uxoribus suis, sicut in evangelio dicitur, excepta causa fornicationis, sine adulterii probatione: alias duxerint, statuimus a communione similiter arcendos: ne per indulgentiam nostram praetermissa peccata, alios ad licentiam erroris invitent (247).» Idem enim de hoc dici potest, ac de canone synodi agathensis, nisi quod hoc in canone expressa adulterii fit mentio; adeoque statuitur quidem poenae excommunicationis, et quidem statim eos esse subiiciendos, qui sine iudiciali probatione proprias uxores dimittunt ut alias ducant, minime vero adstruitur post legalem dimissionem *licitam* esse novum celebrare coniugium, quamvis utique hoc innui videatur.

Idem esto iudicium de Alcimi Aviti viennensis episcopi effato in epist. XLIX. ad Ansenmundum, ubi loquens de adulterio: «Propter quod solum, inquit, Deus separari virum permittit a coniuge (248).» Nam si verba prout iacent spectentur, non aliud significant, quam fornicationem sive adulterium solam esse causam a Christo assignatam pro legitima coniugum separatione; quod nemo umquam inficiatus est christianorum; non autem tributam esse facultatem novum celebrandi coniugium uxore adultera, vel viro adultero supersite. Neque ex toto contextu Aviti colligi potest, ipsum significare voluisse vinculi solutionem, de qua nihil habetur in tota epistola (249).

(247) Ibid. col. 797.

(248) In *Biblioth. max. patr.* Lugdun. 1677. tom. IX. pag. 582. col. 2.

(249) Hinc admitti nequit quod in notis ad hunc Aviti epistolae locum vir doctus Iac. Sirmondus scripsit: «Hinc patet, persuasum adhuc illis temporibus

Omitto quod ex decretali *Laudabilem* Clementis III. qui an. 1118. pontificatum gessit, afferri solet, tum quia in ea agitur de separatione propter haeresim, de qua hic non instituitur quaestio; tum quia incertum est num genuina sit eiusmodi decretalis, quam alii Clementi III. alii Caelestino III. adscribunt, quin tamen reperiatur in alterutrius pontificis epistolis, neque corpori iuris sit inserta; ex incerta autem traditione eam Robertus Corseon adoptavit (250).

Maiorem difficultatem prima fronte praeseferunt canones concilii, seu potius conventus compediensis habiti an. 756. Proferam hos canones prout eos Iac. Sirmondus ex ms. cod. s. Vincentii metensis vulgavit. IV. «Si quis francam filiastram suam contra voluntatem ipsius, et matris, et parentum, dederit viro ingenuo, aut servo, vel ecclesiastico, et illa noluerit habere ipsum, et reliquerit eum; potestatem habent parentes ipsius dare ei alium maritum: et si ipsa alium habet, quem postea accepit, non separentur.» VII. «Si quis uxore accepta invenit eam a fratre suo contaminatam, ipsam dimittens accepit aliam, ipsamque contaminatam invenit, uxor illius legitima est, propterea quia nec ipse virgo fuit illo tempore. Quod si tertiam postea acceperit, revertat ad medianam; et ipsa posterior potestatem habeat alio viro se coniugere.» VIII. «Si quis homo habet mulierem legitimam, et frater eius adulteravit cum ea, ille frater, vel illa foemina, qui adulterium perpetraverunt, interim quo vivunt, numquam habeant coniugium. Ille cuius uxor fuit, si vult, potestatem habet accipere aliam.» X. «Si pater sponsam filii sui oppresserit,

in Gallia fuisse, propter fornicationem separari virum ab uxore, et aliam ducere Christi permissu licuisse. Quod ex concilio Venetico can. II. manifestum est.» Opp. Sirmondi Paris. 1696. tom. II. col. 97. Nam nihil nos cogit ad hoc admittendum.

(250) Cf. apud Mansi in *Collect. maxima concil.* Venet. 1788. tom. XXII. col. 638. seqq. ubi Decret. *Laudabilem* adscribitur Caelestino III. qui ad pontificatum evectus est an. 1191.

et postea filius ipsam acceperit, pater eius postea non habeat uxorem, et ipsa foemina non habeat virum, quia non dixit, quod pater eius cum ipsa mansisset: filius vero eius, qui nesciens fecit, accipiat mulierem legitimam.» XIII. « Si quis vir mulierem suam dimiserit, et dederit commeatum pro religionis causa infra monasterium deservire; aut foras monasterium dederit licentiam velare, sicut diximus, propter Deum; vir illius accipiat mulierem legitimam: similiter et mulier faciat.» XIV. « Si vir quis cum matre et filia in adulterio mansit, nesciente matre quod cum filia sua mansisset, similiter et filia nescivit, quod cum matre sua esset; postea ille vir, si acceperit mulierem, dimittat: usque in diem mortis suae non habeat uxorem: et illa mulier, quam reliquerit, accipiat virum; et illa matre et filia, cum quibus in adulterio mansit, ambabus nescientibus quod cum matre et filia mansisset, habeant viros. Nam si in notitiam illarum venerit hoc scelus, dimittant maritos, et agant poenitentiam: et illarum mariti posteriores accipiant mulieres.» XV. « Similiter et de duabus sororibus, qui cum una in adulterio mansit, et alteram in publico accepit, non habeat mulierem usque in diem mortis; et illae duae sorores, si nescierunt, habeant maritos: et si in notitiam eis venit, superiorem formam servant.» XVI. « Si vir leprosus mulierem habeat sanam, si vult ei donare commeatum, ut accipiat virum, ipsa foemina, si vult accipiat, similiter et vir (251).»

Iam vero si canones istos rite expendamus, patebit nihil illos commune habere cum quaestione quam agitamus, sed ex alio omnino titulo quam adulterii novas nuptias permittere.

Ac 1. seponere debemus can. IV. in quo nullum discernitur coniugium absque mulieris consensu initum, adeo-

(251) Apud Harduin. tom. III. col. 2005 seq. et apud Sirmondum *Concilia antiqua Galliae*. Tom. II. pag. 42 seqq.

que recte statui potuit, ut ea potestatem haberet alium accipiendi maritum.

2. Seponere debemus can. VII., quo nullum pariter declaratur primum matrimonium in primo affinitatis gradu contractum: adeoque uti legitimum secundum coniugium habetur; ideo vero nullum declaratur tertium, quia impedimentum intercesserat ligaminis.

3. Can. VIII. potest intelligi de facultate quae innocenti tribuitur aliam ducendi uxorem post adulterae mortem; quae facultas negatur adulteris ambobus, quamdiu vivunt. Id eruitur ex antithesi inter adulteros et innocentem, et ex aliis per id temporis constitutionibus, praecipue vero concilii foroiuliensis, quam paulo ante attulimus.

4. Can. X. agit de dissolutione coniugii, quod nullum extitit ob impedimentum affinitatis in primo gradu; hinc merito data est libertas filio aliam ducendi uxorem.

5. Can. XIII. non agit de coniugii dissolutione ob adulterii flagitium, de qua hic sermonem unice habemus. Quamnam vero ratione canon iste intelligi debeat definiendum relinquimus iuris canonici peritis (252).

6. Can. XIV. tum respectu viri incestuoso commercio polluti, tum respectu illarum, quae consciae huius criminis fuerint, et incestuoso commercio consenserint, impedimentum dirimens seu potius inhabilitas ad ineundum coniugium toto vitae tempore statui videtur. Hinc enim declaratur irritum esse connubium ab eo incestuoso initum, adeoque eum teneri ad separationem a ducta muliere, quae libera est, ac alii viro nubere potest. Quoad matrem autem ac filiam decernitur eas, quamdiu insciae fuerint incestuosi commercii, posse bona fide in initis nuptiis permanere;

(252) Huic canonico cohaeret responsio Ioannis Cattensis ad interrogationem 3. Constantini Cabasilae, in iure graeco-latino lib. V. pag. 324., quae declarat posse uxorem sive sacerdotis sive diaconi sive lectoris, qui vitam monasticam professi fuerint, alteri nubere. His etiam consentit Fulbertus in epist. 51.

detecto autem crimine incestus, adeoque comperta nullitate coniugii, ipsas etiam teneri viros a se perperam nuptos deserere; hi autem utpote liberi poterunt alias ducere uxores. Talis est istius canonis sensus; porro si res ita se habet, patet nullatenus concilium istud sive conventum praesente canone decrevisse coniugium propter adulterium quoad vinculum dirimi.

7. Can. XV. declarat nullum matrimonium, quod cum affini in primo gradu contractum fuerit ob impedimentum dirimens, in quo nihil novi ingeritur. Illud potius peculiare est, quod auctores incestuosae coniunctionis inhabiles in perpetuum reddat ad ineundum coniugium.

8. Demum can. XVI., ut patet, ad rem nostram non pertinet. Nonnulli existimant in eo sermonem esse de morbo, unde impotentia perpetua exurgit; in hac hypothesis concilium compediense decernit non esse veros coniuges, qui sic coniuncti sunt, atque idcirco liberos esse (253).

Nunc ad pleniorum dictorum confirmationem circa huius concilii mentem in obiectis canonibus adiciamus omnimodam coniugalis vinculi firmitatem ab eo sancitam potius fuisse can. XVIII. qui ita legitur: « Si qui propter *fuidam* (nempe inimicitiam aut vindictae timorem) fugiunt in aliam patriam et dimittunt uxores suas, nec illi viri, nec illae foeminae accipiant coniugium.» Et haec de hoc concilio.

Longe magis implicata est quaestio orta ex *Poenitentiali* Theodori archiepiscopi cantuariensis collato cum aliis poenitentialibus per eam aetatem vulgatis. Nos ut claritati inserviamus in hac difficili quaestione 1. afferemus canones qui in illo poenitentiali inveniuntur quique dissolubi-

(253) Huc referuntur aliquot antiqui canones, qui concedere videntur novas nuptias ob diuturnam alterutrius coniugis absentiam. Sic Manuel patriarcha lib. III. cit. *Iuris graeco-romani* pag. 289. Idem statuitur in ita nuncupato *Poenitentiali Theodori*, cap. CXIII. in Spicilegio Dom. Lucae Acherii tom. IX. pag. 62. de quo Poenitentiali mox agemus. Interim haec reprobanda sunt.

litem coniugii praeseferunt aut propter adulterium, aut propter absentiam alterutrius coniugis, aut alias causas, idque pro materiae affinitate, una cum canonibus aliorum librorum poenitentialium illius aetatis; 2. attingemus quaestionem criticam eiusmodi poenitentialium; 3. veram Theodori sententiam investigabimus; 4. originem demum inquiremus sententiae, quae irrepsit circa coniugiorum dissolutionem.

I. Itaque hi efferuntur canones seu potius capitula selecta ex ita dicto Poenitentiali Theodori: cap. XXXI. «Cui uxorem hostis abstulerit, et non potest repetere eam, licet ei aliam accipere: melius est quam fornicari. Nam si postea redeat uxor, non debet recipere eam, si aliam habeat. Ipsa accipiet alterum virum, si unum ante habuit (254).»

Cap. CXL. «Mulier si in captivitatem per vim ducta est, post annum aliam accipere potest (255).»

Ibid. Cap. CXL. «Laicus a quo recessit mulier, cum consensu episcopi, post duos annos aliam accipiat (256).»

Cap. CXLIII. «Cuius uxor fornicata, licet eam dimittere, et aliam accipere (257).»

(254) In ed. Dacheriana *Spicileg.* Paris. 1723. tom. I. pag. 487. *Capitula Theodori archiep. cantuar.* Huic capitulo consentiunt, seu potius hoc ipsum repetunt paucis mutatis verbis Theod. Poenit. II. 12. §. 23. et 24. Nam in Theodori *Poenitent.* II. 12. §. 23. sic legitur «Si cuius uxorem hostis abstulerit et ipse eam iterum adipisci non potest, licet aliam tollere, melius est sic facere quam fornicari.» §. 24. «Si iterum post haec uxor illa venerit ad eum, non debet recipi ab eo, si aliam habet, sed illa tollat alium virum sibi si unum antea habuit. Eadem sententia stat de servis transmarinis.» Sic etiam in canon. Gregorii c. 72. Ita etiam in *Poenitent. Merseburg.* c. 94. nec non in *Iudicio Clementis* c. 19.

(255) In *Theod. Poenitent.* §. 20. «Si in captivitatem per vim ductam redimere non potest, post annum alteram accipiat.» §. 21. «Item si in captivitatem ducta fuerit, vir eius V. annos expectet, similiter autem et mulier, si viro talia contigerint.» §. 22. «Si igitur vir alteram duxit uxorem; priorem de captivitate reversam accipiat, posteriorem dimittat; similiter autem et illa, sicut superius diximus, si viro talia contigerint, faciat.»

(256) *Theod. Poenit.* c. 19. «Si mulier discesserit a viro suo dispiciens eum, nolens revertere et reconciliari viro, post V. annos cum consensu episcopi aliam accipere licebit uxorem.» *Can. Gregor.* c. 70. «Si mulier... cum illo viro suo etc.

(257) Cf. c. 104. «Si polluta fuerit mulier; vir eius habet potestatem, utrum

Ibid. Cap. CXLIII. « Mulieri non licet fornicantem alium accipere » ubi aperte desunt verba : *dimittere et* ; ita ut sensus integer sit : « Mulieri vero non licet fornicantem dimittere et alium accipere (258). »

Cap. XCIII. « Maritus si seipsum servum fecerit in furto , aut in fornicatione , mulier habet potestatem accipere virum (259). »

Atque haec sunt capitula Theodoro adscripta , cum quibus , saltem quoad substantiam , conveniunt quae in Theodori Poenitentiali habentur , quaeque potissime ad rem nostram faciunt. Siquidem alia praetermisi , quae minus huic quaestioni congruunt. Item conveniunt cum aliis poenitentialibus sive Gregorii , sive Merseburgi , ut ex eorum collatione unicuique patebit.

II. Nunc iam praestat critice inquirere quid de eiusmodi poenitentialibus sentiendum sit. Iam vero , licet universim a pluribus saeculis tributum fuerit Poenitentiale Theodoro , ac sub eius nomine passim allegetur , attamen certum videtur Theodorum numquam eiusmodi opus exarasse. Nam nulli sive coaevi sive suppreses scriptores Theo-

vult nubere cum ea an dimittere.» *Theod. Poenitent. II. 2. §. 5.* « Si cuius uxor fornicarit , licet dimittere eam et aliam accipere , hoc est , si vir dimiserit uxorem suam propter fornicationem , si prima fuerit , licitum est , ut aliam accipiat uxorem , illa vero si voluerit poenitere peccata sua , post V. annos alium virum accipiat.» *Can. Gregorii c. 66.* « Si cuius uxor fornicata fuerit : licet dimittere eam et aliam *non* accipere.» (ubi advertendum est particulam *non* , deesse in cod. Paris. 2133. n. IX.) . c. 82. « Si vir dimiserit uxorem propter fornicationem , si prima fuerit , licitum est , ut aliam accipiat uxorem ; illa vero si voluerit poenitere peccata sua , post quique annos alium virum accipiat.»

(258) *Theod. Poenitent. II. 12. §. 6.* « Mulieri non licet virum dimittere licet sit fornicator , nisi forte pro monasterio. Basilius hoc iudicavit (Basil. ad Amph. c. 9. 21.). » *Can. Gregor. c. 67.* « Mulieri non est licitum virum suum dimittere , licet fornicetur , nisi forte per monasterium ; Basilius iudicavit.»

(259) *Theod. Poenitent. c. 8.* « Maritus si seipsum in furto aut fornicatione servum facit , aut quocumque peccato , mulier si prius non habuit coniugium , habet potestatem post annum alterum accipere virum ; digamo autem non licet.» *Can. Gregor. c. 175.* « Maritus si seipsum in furtu aut fornicatione servum fecerit , mulier habet potestatem alterum accipere virum.»

dorum Poenitentiale effecisse memoriae tradiderunt; nec Beda ipse, qui in *Historia ecclesiastica gentis Anglorum* licet accurate, quae ad Theodorum spectant, scripserit, nullam eiusmodi Poenientialis mentionem iniecit; quidquid dicatur in *Monito* praefixo collectioni Dacherianae (260). Hactenus tria opera Theodoro tributa novimus 1. Collectionem cuiusdam codicis cantuariensis, cuius Spelmannus titulos capitulorum vulgaverat, cum ei datum non fuerit a custode bibliothecae cantabrigiensis integrum hoc opus exscribere. Postea vero hic ipse codex typis datus est (261). Hic putabatur verum praeseferre ac originale Poenitentiale Theodori; ast Wasserschleben falsum id esse ostendit. 2. *Capitula dacheriana*, quae pariter etiam scientificè spectata patet haud esse opus Theodori, aut eius Poenitentiale; 3. Poenitentiale a Petito vulgatum, verum et hoc tribui nequit Theodoro, ut idem patefecit ineluctabilibus argumentis.

In quodam parisiensi codice, ac duobus viennensibus repertum est opus in duos libros dispartitum cui titulus: *Poenitentiale Theodori seu Canon Theodori de ratione poenitentiae et diversis quaestionibus*. Prior liber reipsa quoddam continet Poenitentiale, in quo quindecim capitibus assignantur poenitentiae pro delictis ecclesiasticorum et laicorum. Posterior continet quatuordecim capita iam a Petito vulgata. Eiusmodi collectio spectari potest veluti fons omnium illorum excerptorum, quae in collectionibus subsequentibus Theodoro tributa sunt.

(260) In hoc *monito* praefixo capitulis Theodori ed. Paris. 1723. tom. I. *Spicilegii Dacherii* pag. 486. legitur: « Idem (Theodorus) ut Beda monet lib. 4. *Hist. Angl.* et lib. 5. cap. 8. librum poenitentialem composuerat.» At vero ego contuli Bedam in allegatis locis et nil tale reperi; quin imo ex lib. V. cap. VIII. contrarium potius eruitur. Siquidem agens de synodo Herudford. a Theodoro celebrata scribit: « Theodorus protulit librum Canonum (ex patribus collectum) et ex eodem decem capitula etc.» Ergo eiusmodi liber canonum anterior fuit ipso Theodoro.

(261) An. 1840. sub tit. *Ancient Laws and Instituts of England*.

Ex praefatione patet hanc collectionem adornatam fuisse a quodam sacerdote, qui *Discipulus Umbrensi* nuncupatur, quique affirmat maximam huius operis partem confectam esse ex responsionibus, quas iuxta veridicam famam, Theodorus dederat presbytero Eoda (262). Quoad alteram vero partem, eam refert accepisse ex responsis Theodori, quae idem Eoda mutuatus fuerat ex *libello Scottorum* a quodam sacerdote confecto.

Certum proinde videtur ex hactenus expositis Theodorum auctorem non fuisse *Poenitentialis* quod ipsi adscribitur, ea sola de causa, quod exhibeat eius responsa data quaestionibus, quae illi propositae fuerant; multo vero minus esse auctorem illarum omnium collectionum plus minusve pleniorum, quae sub eiusdem nomine Theodori vulgatae sunt (263). Istae omnes collectiones nullam umquam auctoritatem publicam nactae sunt, sed fuerunt collectiones privatae, nec umquam sancitae, quin etiam non semel contrariae canonibus publica auctoritate constitutis.

III. Quae cum ita sint, inquirendum tertio superest de vera Theodori sententia circa dissolubilitatem aut in-

(262) En praefationis verba: « Horum igitur maximam partem fertur fame veriloquo beatae memoriae Eoda presbyter cognomento Christianus a venerabili antistite Theodoro sciscitans accepisse.»

(263) Tales sunt: *Capitula Dacheriana* spectantia ad ita dictas *regularum digestiones*. Omnia capitula Dacheriana, si sex excipias, reperiuntur in *Poenitentiali Theodori*. Alia insuper collectio omnino a Dacheriana independens invenitur in codice monacensi et parisiensi, quaeque constat 149. capp. quae omnia reperiuntur in dicto *Poenitentiali*. In codicibus memoratis haec capitula inscribuntur: *Canones Gregorii papae urbis Romae*, atque in codicibus posterioribus: *Responsiones Gregorii M. quaestionibus Augustini*. Item *Poenitentialis* quod exhibet codex merseburgensis, nec non collectio quae habetur in codice Cotton; quae vulgatae sunt a Wasserscheleben tom. II. 1. e 3. et II. 1. et 4. Hae collectiones perinde ac capitula dacheriana et canones Gregorii anteriores sunt *Poenitentiali Theodori*; inordinatae sunt et confusae, quae confusio effecit, ut nova compilatio seu collectio systematica et plena conficeretur, quae sub nomine *Poenitentialis Theodori* generatim adoptata est. Ex his collectionibus inter se comparatis extracti sunt textus, quos in medium attuli. Cf. D. F. W. H. Wasserscheleben prof. Iuris in universit. Hallens. in op. germ. *Ordines poenitentiales ecclesiae occidentalis in introduct. historico-critica*. Hallae 1852. pag. 14 seqq.

dissolubilitatem matrimonii in casu adulterii. Haud pauci in falsa hypothesisi de veritate Poenitentialis theodoriani autumarunt nil mirum esse, si ipse dissolutionem coniugii interveniente adulterio statuerit, utpote homo graecus, quique in ecclesiam Anglo-Saxonicam graecorum disciplinam, in qua enutritus erat, detulerit. Ast perperam; nam numquam ipse eiusmodi sententiam professus est, multo vero minus ipsam proposuit ecclesiae anglicae; quinimo contrariam prorsus tenuit statuitque.

Sane nos in paragrapho praecedenti descripsimus capit. X. constitutum in concilio herudfordiensi, quod primum fuit in Anglia sub Theodoro cantuariensi coactum, cuique ipse praefuit. Iam vero in hac synodo expresse omnimoda indissolubilitas sancita est etiam in casu adulterii sub obtestatione professionis christianae. Idem Theodorus auctor fuit episcopis congregatis ut decem capitula extracta ex libro canonum probarent. « Interrogavi, inquit Theodorus in concilio, unumquemque eorum (episcoporum) per ordinem, si consentirent, *ea quae a patribus canonice sunt antiquitus decreta, custodire* (264). » Ergo Theodorus ad normam antiquorum canonum perfectam coniugii indissolubilitatem sancivit, ac proinde falsum est ipsum pro dissolutione stetisse in causa adulterii, prout in allatis paulo ante canonibus sub eius nomine vulgatis adstruitur.

Sed falsum praeterea est, Theodorum utpote graecum intulisse in ecclesiam anglo-saxonicam ecclesiae graecae disciplinam seu potius corruptelam. Etenim praeterquam quod Theodorus antequam ad episcopatum eveheretur per aliquot annos Romae commoratus erat, adeoque perspectam optime haberet ecclesiae romanae doctrinam de indissolubilitate absoluta coniugii etiam in casu adulterii quoad vinculum, romanus pontifex antequam Theodorum ad re-

(264) Beda *Hist. eccles. gent. Angl.* lib. IV. cap. V. Opp. ed. Basil. tom. III. pag. 122.

gendam ecclesiam cantuariensem miserit magna usus cautela est. Refert siquidem Beda quod cum Hadrianus vir doctissimus obtulisset Theodorum « Pontifici (Vitaliano), ut episcopus ordinaretur, obtinuit; his tamen conditionibus interpositis, ut ipse eum perduceret in Britanniam....Et ut ei doctrinae cooperator existens, diligenter attenderet, *ne quid ille contrarium veritati fidei, graecorum more, in ecclesiam cui praeesset, introduceret* (265).» Deinde vero a pontifice Agathone Ioannes missus in Angliam est, qui « in mandatis ab apostolico Papa acceperat, ut cuius esset fidei anglorum ecclesia diligenter edisceret, Romamque rediens, referret (266).» Adeoque fieri non potuit, ut Theodorus abusum illum in Oriente a Iustiniano imp. iam inductum, in ecclesiam sibi commissam introduceret, multo vero minus sanciret; nec enim viri illi Roma in Angliam missi, id ulla ratione tolerassent (267).

IV. Superest ut originem detegamus ex qua in allatas collectiones contraria doctrina irrepsit. Siquidem ex una parte exploratum est in ecclesia britannica, et in ecclesia hibernica ante Theodori in Angliam adventum obtinuisse doctrinam et praxim de absoluta coniugalis vinculi indissolubilitate, ut constat ex indubiis ac publicis documentis; ex altera vero parte, certum est prout nuper innuimus collectiones canonum aut capitulorum, quae sub Theodori nomine prodierunt, fuisse collectiones privatas, quae numquam ullam obtinuerunt sanctionem.

Et reipsa in Anglia et in Hibernia doctrinam obtinuisse de absoluta indissolubilitate coniugii etiam in causa adulterii praeter ea, quae attulimus in paragrapho praecedente, alia suppetunt documenta quae id evincunt. Sic in *Poenitentiali Vinnian.* §. 42. hoc decretum habetur: «Uxorem a viro

(265) Lib. IV. cap. I. pag. 115.

(266) Ibid. cap. XVII. pag. 137.

(267) Cf. Carol. Schroedl prof. Licaei passaviens. *Primum saeculum ecclesiae Angliae etc.* Passaviae 1840. pag. 251 seqq.

non discedere dicimus. Sed si discesserit manere inuuptam, aut viro suo reconciliari secundum Apostolum (268), » ubi nulla exceptio apponitur. Paulo ante attulimus canonem V. *De recipienda adultera post poenitentiam ex canonibus s. Patricio adscriptis*. Huic nunc alterum addimus, nempe XXXIII. lib. XLIV. ex antiqua collectione canonum hibernensium, huius tenoris: « Synodus: Ut mulier iuncta alii viro causa adulterii, excommunicata fiat definimus, donec poenitentiam agat; *et post poenitentiam reconcilietur viro suo* (269). » Idipsum constitutum comperimus in canonibus Addamnari, vel Addominari: « Sic et mulier, si dimissa fuerit ex viro suo, non oportet alii viro copulari, quamdiu fuerit vir eius in corpore prior; sed expectabit eum inuupta in omni poenitentia et castitate, si forte det Deus poenitentiam in corde viri eius (270) » ut alia omittamus.

Igitur certum est obtinuisse tam in Anglia quam in Hibernia doctrinam de vinculi coniugalis indissolubilitate etiam in casu adulterii tum ante Theodori aetatem, tum sub eodem Theodoro. Quâ igitur factum est, ut contraria doctrina irrepserit in adductos canones? Id contigisse arbitramur ex legibus civilibus, quae illam dissolutionem sanxerunt; qui proinde illas collectiones temporis tractu adornarunt, ut aliqua ratione se se illis accommodarent, et aliquo modo indulgerent saxonibus adhuc in fide infirmis valdeque addictis consuetudini patriae graecam disciplinam introduxerunt in ecclesiam anglo-saxonicam.

Et reipsa l. 7. cod. Iustin. tit. *De repudiis* Novella 22. c. 7. illa dissolutio sancitur. Id ipsum confirmatur ex coll. lib. II. cap. 12. §. 7. 10. 12. 21. 24. 32. Quod dictum

(268) Apud Wasserschleben op. cit. *Ordines poenitentiales etc.*

(269) Haec collectio facta est sec. VIII. a quodam Arbedoc. Post allegata verba synodi referuntur ea quae attulimus ex s. Patricio: « Si alicuius uxor fornicata fuerit etc. Cf. apud Dacherium in *Spicilegio* ed. Paris. 1723. tom. I. pag. 492. et 504.

(270) Apud Wasserschleben op. cit. §. 45.

est de legibus romanis, dici pariter debet de legibus saxonis. Siquidem in Ethelberti legibus adhuc habetur l. 32. «Si liber homo cum liberi hominis uxore concubuerit *werrigeldo* suo redimat, et aliam mulierem propria sua pecunia emat, et illi alteri ad domicilium adducat (271).»

Verisimile praeterea est Theodorum secum in Angliam haud paucos libros sive graecos sive latinos detulisse, praecipue vero graecorum canonum collectiones, ex quibus sequioris aevi canonum paenitentialium compilatores illos canones excerpterunt, quae conferrent ad morum corruptelam cohonestandam, illisque quae tum a Theodoro, tum ab Egberto archiepiscopo eboracensi circa omnimodam indissolubilitatem constituta fuerant interseruerunt. Exinde apparet eorundem canonum contradictio. Nam in eisdem collectionibus, quae tum Theodoro tum Egberto tribuuntur, tum canones habentur, quae solutionem vinculi admittunt; tum canones qui aperte matrimonii indissolubilitatem, etiam pro casu adulterii agnoscunt, cum alias nuptias prohibeant, et tantum separationem permittant (272).

Opera tamen et constantia rom. pontificum pedetentim eiusmodi abusus ex romana civili potissimum legislatione provenientes sublatis sunt ex universa praesertim occidentali ecclesia, atque ad pristinam integritatem doctrina evangelica et apostolica de vinculi omnimoda indissolubilitate

(271) Apud Schroedl op. cit. qui apposite pag. 52. de legibus regis Ethelberti disserens haec habet; «Leges circa matrimonium spiritui ecclesiae non omnino respondent, quod mirum non est. Multa enim apud Germanos, maxime quoad matrimoniorum solutionem in usu erant, quae severis christianae religionis legibus contraria, tamen propter longam et ab antiquis temporibus receptam consuetudinem, nec non propter intimum nexum cum aliis eorundem populorum legibus et usibus nonnisi post aliquod tempus per eandem religionem corrigi, mutarique potuerunt.»

(272) Cf. Schroedl op. cit. p. 151 seqq. Theodorum vero plures secum asportasse graecos et latinos libros testatur Iohn Johnson in vol. I. Legum *ecclesiast.* et canonum anglie conscriptorum, qui diligentissime res Theodori persecutus est, scribens: «He (Theodore) brought over with him many Greek and Latin books.» Apud Wilkins *Concilia etc.* tom. 1. pag. 42.

etiam in causa adulterii revocata est, firmiter ac solide constituta (273). Et haec de Theodori poenitentiali.

Quae expendenda adhuc supersunt nullo negotio explanantur. Atque in primis se se offert Poenitientiale romanum editum ab Antonio Augustino archiepiscopo tarraconensi. In hoc enim legitur. «Contigit tibi, ut uxor tua, te conscio et hortante, cum alio viro, illa autem nolente, adulterium perpetraret: si fecisti, quadraginta dies in pane et aqua poeniteas, et septem annos, unum ex his in pane et aqua; et numquam sis sine poenitentia. Si autem uxor tua hoc probare potuerit, quod tua culpa, et tuo iussu se renuente, et luctante adulterata sit; *si se continere non potest, nubat cui voluerit*, tantum in Domino. Tu autem sine uxoria spe in perpetuo maneat. Illa autem, si consentiens fuerat, eadem ieiunet, quae tibi proposita sunt, et sine spe coniugii maneat (274).» Ast praeterquam quod eiusmodi Poenitientiale sequioris est aevi, quando nempe, ipso Richtero protestante fatente, iam firma ac universalis in occidente coniugii indissolubilitas etiam in casu adulterii constituta erat (275), incertum adhuc est, num vere fuerit

(273) Quod fassus est Richter auctor protestans in suo opere: *Manuale iuris ecclesiastici cathol. et protest.* ed. IV. Lips. 1853. inter cetera scribens hoc de argumento. «Non desunt documenta, quibus probatur, concilia non potuisse abrogare usum per leges romanas inductum, ideoque monuisse tantum fideles novas ne inirent nuptias. Imo multo tardius etiam tum in francorum regno (cap. Vermer. 752. c. 5. 9. 10. 11. Comp. 757. c. 6. 8. 13. 16. Cap. Reg. franc. V. 21.), tum in Anglia contrariae sibi invicem extabant leges (allegat autem superius a nobis allatas), ita ut nonnisi seculo nono mitior illa sententia qua innocenti coniugi separato tum propter adulterium, tum propter malitiosam alterius coniugis desertionem prioribus nuptiis, ad alia vota transire permisit, romanorum pontificum maxime constantia eliminaretur. Ex illo tempore, iure communi statutum est valide matrimonia nisi morte dissolvi.» Cf. etiam Moy op. cit. *Ius matrimoniale* pag. 317 seqq.

(274) *Canones poenitentiales.* Venet. 1584. *Poenitent. rom.* tit. 3. *De fornicat.* c. 20. pag. 27.

(275) Nam afferuntur in eo sententiae Gregorii VII. Urbani II. Calixti et Innocenti III. imo et quaedam ex Gratiano excerptae; nimirum sec. XI. XII. et XIII.

romanum (276). In allegata autem clausula: *Si se continere non potest; nubat cui voluerit*, quae difficultatem facessit, sermo nullatenus est de facultate nubendi, viventē viro, sed tantum post eius obitum, iuxta receptam tunc temporis disciplinam, qua adulteris facultas denegabatur alias nuptias inire post alterius coniugis obitum (277).

Ceterum in genuino vetustissimoque Poenitentiali romano, quod in usu per plura secula Romae fuit, quodque ex codice petaviano (278), litteris uncialibus scripto circa tempora Gregorii M. edidit Morinus nil tale reperitur. Illa enim disciplina, ad quam alludit Ant. Augustini poenitentialia nonnisi serius inducta est, ut suo loco vidimus.

Quandoquidem autem de poenitentiali romano verba fecimus, non abs re erit heic adiicere decreta duarum synodorum romanarum, quas omnium primus ex mss. codicibus edidit card. Franciscus Barberinus, quaeque aliquam difficultatem praesefere videntur. Altera celebrata est sub Eugenio II. an. 826. duodecim scilicet an. post mortem Caroli M. In cuius cap. 36. statuitur: « Nulli licet excepta causa fornicationis, adhibitam uxorem relinquere et aliam copulare, alioqui transgressorem priori convenit sociari coniugio.» In altera vero sub Leone IV. an. 853. coacta cap. 36. idem repetitur: « Nulli liceat excepta causa fornicationis adhibitam uxorem relinquere, et deinde aliam copulare: alioqui transgressorem convenit priori sociari

(276) Refert enim ipse Ant. Augustinus se illud reperisse sine scriptoris aut libri inscriptione *Romanumque* appellasse, quod ex ea urbe, inquit, ad nostras manus venerit. Cf. eius praefat. op. cit.

(277) Sane Ant. Augustinus in nota ad hoc capitulum scribit: *Post mortem viri, addi debuit*. Ib. pag. 84.

(278) Codex Petavianus nuncupatus est ex eius professore D. Petavio parlamenti senatore, uti testatur Morinus. Codex est omnium antiquissimus, nongentorum ad minus annorum, atque erutus ex archivis romanis. Cf. Morinum in Appendice ad opus *De poenitentia*, ed. Antverp. 1682. pag. 52. Cf. insuper eiusdem auctoris *De poenit.* lib. IV. cap. XVIII. nec non lib. IX. cap. XXX. Quum vero vetus hoc Poenitentialia *Gelasianum* nuncupetur, centum plus minus annis ante s. Gregorii M. aetatem confectum fuisse dicendum est.

coniugio (279).» Hoc revera constitutum fuisse a Leone IV. confirmat Luitprandus in eius vita n. XXXVI. (280).

Ast si intimius duarum synodorum sensum perscrutemur, nullum alium esse deprehendemus, nisi quod nemo, excepta causa fornicationis, possit uxorem suam relinquere; quod si fecerit, et sine causa fornicationis uxorem suam quispiam dimiserit, aliamque insuper duxerit, *priori sit restituendus coniugio*. De casu autem, quo causa adulterii uxor dimissa fuerit, nil decernitur. Si quidpiam enim fuisset dispositum, exceptio fornicationis effecisset, ut iuberetur quidem separari a coniuge secunda, non tamen iuberetur sociari priori coniugio, sicut ille, qui sine fornicationis causa aliam duxit (281).

Cum vero de doctrina et praxi ecclesiae romanae hic disseramus, iuverit responsa Stephani II. referre, quae haud paucis hic discussis non minimam lucem affundunt. Hic igitur pontifex, qui floruit an. 754. cap. II. statuit: «Si quis se in coniugio copulaverit, et uni eorum contigerit, ut debitum reddere non possit; non liceat eos separare: nec pro alia infirmitate, excepto si daemonii infirmitas, aut leprae macula supervenerit. Ceterum si ab his duabus infirmitatibus liberi fuerint invicem coniuncti, unus alteri servitium exhibeat.»

Cap. V. «Si uxor a viro repudiata fuerit, utrum liceat viro, illa vivente, aliam ducere, in epistola domni Innocentii papae directa ad Exsuperium tolosanum episcopum continetur. Qui interveniente repudio, alii se matrimonio copularunt, quos in utraque parte adulteros esse manifestum est; qui vero vel uxore vivente, quamvis dissociati videantur esse a coniugio, ad aliam copulam festi-

(279) Romae 1662.

(280) Luitprandi ticinensis diaconi *Opusculum de vitis rom. pontificum*. Moguntiae 1602. pag. 113. ubi ad litteram, ut aiunt, idem refert decretum. Si tamen opus istud vere Luitprandi est, cuius nomen gerit.

(281) Cf. Amort op. cit. pag. 88.

narunt, neque possunt adulteri non videri: in tantum ut etiam eae personae, quibus tales coniuncti sunt, etiam ipsae adulterium commisisse videantur, secundum illud quod legimus in Evangelio: *qui dimiserit uxorem suam, et aliam duxerit, moechatur. Et ideo omnes a communione abstinendos.*»

Cap. III. « Si quis in aliena patria ancillam duxerit in consortium, postea in propriam reversus, ingenuam acceperit; et iterum contigerit, ut ad ipsam qua inantea fuerat patriam revertatur, et illa ancilla quam prius habuit, alii viro sociata fuerat; hic talis potest aliam accipere (scilicet propter impedimentum conditionis); tamen non illa vivente ingenua, quam in patria propria habuit.»

Cap. XIX. « De separata a marito, si vir eius in aliena provincia vivere putabatur, in epistola B. Leonis papae directa ad Nicetam aquileiensem episcopum, ita continetur: Cum ergo per bellicam cladem, et per gravissimos hostilitatis incursus, ita quaedam dicatis divisa esse coniugia, ut abductis in captivitatem viris foeminae eorum remanserint destitutae, quae viros proprios, aut interemptos putarint, aut numquam a dominatione crediderint liberandos, et ad aliorum coniugium solitudine cogente transierint. Cumque nunc statu rerum, auxiliante Domino, in meliora converso, nonnulli eorum, qui putabantur periisse remeaverint: merito caritas tua videtur ambigere, quid de mulieribus, quae aliis iunctae sunt viris, a nobis debeat ordinari. Sed quia novimus scriptum, quod a Deo iungitur mulier viro: et iterum praeceptum agnovimus, ut quod Deus iunxit, homo non separet: necesse est ut legitimarum foedera nuptiarum redintegrandam credamus; et remotis malis, quae hostilitas intulit, unicuique id quod legitime habuit, reformetur: omnique studio procurandum est, ut recipiat unusquisque quod proprium est. Nec tamen culpabilis iudicetur, et tamquam alieni iuris pervava-

sor habeatur, qui personam eius mariti, qui iam non esse existimabatur, assumpsit. Sic enim multa, quae ad eos qui in captivitatem ducti sunt pertinebant, in ius alienum transire potuerunt: et tamen plenum iustitiae est, ut iisdem reversis, propria reformentur. Quod si in mancipiis, vel in agris, aut etiam in domibus ac possessionibus rite servatur: quanto magis in coniugiorum redintegratione faciendum est, ut quod bellica necessitate turbatum est, pacis remedio reformetur? Et ideo si viri post longam captivitatem reversi, ita in dilectione suarum coniugum perseverant, ut eas cupiant in suum redire consortium, omittendum est; et inculpabile iudicandum quod necessitas intulit, et restituendum est quod fides poscit. Si autem aliquae mulieres ita posteriorum virorum amore sunt captae, ut malint his cohaerere, quam ad legitimum redire consortium, merito sunt notandae: ita ut etiam ecclesiastica communione priventur, quae de re excusabili contaminationem criminis elegerint; ostendentes sibimet pro sua incontinentia placuisse, quod iusta remissio potuit expiare. Redeant ergo ad suum statum voluntaria redintegratione coniugia: neque ullò modo ad opprobrium malae voluntatis trahant, quod conditio necessitatis extorsit: quia sicut hae mulieres, quae reverti ad viros suos nolunt, impiae sunt habendae; ita illae quae in affectum ex Deo initum redeunt, merito sunt laudabiles iudicandae (282).»

Ex his Stephani II. responsis medio octavo seculo datis in Galliis biennio post concilii vermeriensis celebrationem, discimus eandem indissolubilitatis servatam fuisse doctrinam circa firmitatem connubii, quae ab Innocentio et Leone Magno hic commemoratis tradita fuerat. Coniicere exinde

(282) *Acta con.* Hard. tom. III. col. 1985 seqq. et ed. Ballerin. *Opp.* s. Leonis ep. CLIX. cap. I-IV. col. 1130-1132. aliquae occurrunt inter utrumque textum variantes lectiones nullius fere momenti.

forte possumus qua ratione nonnullorum conciliorum, quae per id temporis celebrata sunt atque ab his sensibus declinare videntur, sint intelligenda, quin cogamur ea tamquam a communi per id temporis ac recepta doctrina discordantia abiicere.

§. III.

Documentorum medii Aevi circa indissolubilitatem coniugii
in casu adulterii et difficultatum quae contra eam
opponuntur epicrisis.

Sin minus omnia, quod fieri vix potest, praecipua saltem ex ecclesiasticis auctoribus, romanis pontificibus atque conciliis documenta, quae huc referuntur attulimus, atque discussimus. Iuverit nunc ea inter se comparare, ut fructum exinde colligamus.

Iam vero quae recensuimus in secundi huius articuli §. I. patefaciunt a saeculo ecclesiae VI. et deinceps traditione perpetua servatam sancte fuisse evangelicam et apostolicam doctrinam de absoluta coniugii christiani, etiam interveniente adulterio, firmitate. Constat enim ex adductis documentis hanc semper et doctrinam et praxim viguisse nulli viro seu mulieri post factam fornicationis causa separationem fas aliquando fuisse, altero vivente coniuge, alium sive maritum sive uxorem aliam superinducere; doctrinam vero hanc et praxim pariter constat innixam iugiter fuisse tum Evangelii tum Apostoli auctoritati. Ad hanc enim perpetuo appellant, qui omnimodam indissolubilitatem proclamaverunt. Levis eorumdem inspectio cordatum quemvis lectorem certiore faciet.

Quoad dubia documenta, quae in paragrapho insequenti exposita sunt sedulo est animadvertendum, aliquot ex illis, in quibus adversa doctrina traditur dubiae omnino esse auctoritatis utpote edita ab imperitis auctoribus, ac falso aliis adscripta, cuiusmodi sunt can. XXVI. Synodi sub nomine s. Patricii hibernensium apostoli vulgatae; quae

nulla prorsus auctoritate fruitur; item decretum Zachariae rom. pontifici adscriptum, cuius praeterea sensus anceps est; nec non decretum *Laudabilem*, quod vulgo sub nomine Clementis III. allegari consuevit; idem dic de Poenitentiali Theodori archiepiscopi cantuariensis, utpote referente doctrinam e diametro oppositam doctrinae, quam doctus hic archipraesul professus est et promulgavit ad tramitem antiquorum patrum in provinciali concilio, omnibus assentientibus episcopis, qui concilio illi interfuerant. Nec aliud ferendum iudicium de omnibus illis privatis collectionibus, quae circumferabantur sub eiusdem Theodori nomine, nec tamen quidpiam commune habebant cum Theodoro, quaeque etiam secum ipsis pugnabant (283). Ex quibus luculentius deprehenditur falso canones illos fuisse Theodoro adscriptos, sed a posteriori manu veteri etiam Poenitentiali adiectos (284). Quod dictum est de Poenitentiali Theodori eadem plane ratione convenit alteri Poenitentiali, nimirum romano ab Ant. Augustino primum vulgato, cuius praeterquam quod aequivocus est sensus, certum est fuisse interpolatum utpote omnino adversans genuino et antiquo Poenitentiali, quod in ecclesia romana obtinebat; quod proinde ad probandum est omnino inefficax.

His igitur sepositis, remanent alia, quae vere dubia in se vocaveris eo quod de ipsorum sensu satis liquide haud constet. Sunt autem can. LXXXVII. concilii trullani quo

(283) Sic ex. gr. in can. XIV. aperte indissolubilitas matrimonii quoad vinculum asseritur his verbis: «Qui dimiserit uxorem suam alteri se coniungens, septem annis poeniteat» et can. CLXIV. «De meretrice coniuge sic idem interrogatus est: quia meretrix erit decusso proprii mariti iugo, et secundi mariti iuncta vel tertii (*sic*). Cuius maritus *illa vivente alteram non suscipiet.*»

(284) Etenim hic posterior canon in praeced. nota allatus seu CLXIV. a Dacherio inter capit. Theodori editus est; habetur nempe in cod. parisiensi 3182. et sangermanensi 124. immediate post capitula Theodori cum aliis quae in codice sangerm. expresse canones Adommani inscribuntur; adeoque falso Theodoro tribuitur. Cf. etiam hac de re Bolland. in vita s. Theodori cantuar. in Dissert. praef. limin.

corriguntur leges Iustiniani, quibus laxabantur habenae repudiis non solum ob adulterii causam, verum etiam ob alias, quae admitti nullatenus poterant; at in eo de facultate novam ducendi uxorem ob adulterii crimen sermo aperte non habetur. Canon IX. concilii svectionensis, de quo valde incertum est, utrum eo detur facultas novas post adulterae dimissionem celebrandi nuptias; imo longe probabilius est eam nulla ratione concedi; capitulum item Caroli Magni XXI. libri V. ob eandem rationem, praesertim quum capitulo CCCLXXXI. libri septimi expresse interdicitur conubium *uxore vivente* ei, qui dimittere mulierem incesto adulterio maculatam coactus est; canones praeterea XXV. concilii agathensis et II. concilii venetici, qui potius negative se habent, quum de facultate alias ducendi uxores post *iudicalem* separationem ab uxoribus adulteris nihil decernant. Denique effatum Aviti episcopi viennensis, quod ad solutionem vinculi, saltem certo, non refertur.

Seponere praeterea debemus documenta, quae afferri quidem solent ab adversariis, sed quae ad rem nostram non faciunt, cuiusmodi sunt rescriptum Gregorii II. ad Bonifacium, nec non canones concilii seu conventus compediensis.

Remanent igitur ex universa antiquitate canones concilii vermeriensis, qui satis aperte videntur admittere coniugale vinculum dissolvi per adulterium, et quidem non per simplex adulterium, ut vocant, sed cum additis peculiaribus adiunctis incestae coniunctionis vel attentati homicidii, aliisque eiusmodi. Nec desunt, ut inuimus, qui eos exponere conitantur de facultate iterum nubendi post legitimae uxoris mortem, quod quidem coniiciunt ex aliis eiusdem concilii canonibus, in quibus ne post mortem quidem alterius coniugis matrimonium contrahere permittitur (285).

Verum etsi daremus provinciale hoc paucorum episcoporum concilium modum excessisse, quid inde? Ergo ne catholica veritas nutare debeat ex unius alteriusve concilii provincialis peculiari doctrina, quae adversari evidenter deprehenditur universae ecclesiasticae traditioni? Eo vel magis quod hoc ipsum concilium can. IX. aperte a veritate abludat, dum statuit: «Si quis necessitate inevitabili cogente in alium ducatum seu provinciam fugerit, aut seniore (dominum) suum cui fidem mentiri non poterat, secutus fuerit; et uxor eius, cum valet et potest, amore parentum aut rerum suarum, eum sequi noluerit: ipsa omni tempore, quamdiu vir eius, quem sequuta non fuit, vivit, semper innumpta permaneat. Nam ille vir eius, qui necessitate cogente in alium locum fugit, si se abstinere non potest, *aliam uxorem cum poenitentia potest accipere* (286).» Porro quis hoc ferat, cum aperte Apostoli doctrinae adversetur, iuxta quam quamdiu vir aut uxor in vivis sunt, coniugii vinculo obstricti manent, quod non solvitur nisi per alterutrius mortem? Itaque quemadmodum in hoc, ita in alio doctrinae capite a vero abludere potuit haec synodus, neque ratio eius ulla habenda est.

Quod de hac diximus, idem de alia particulari synodo, si qua sit quae contrarium doceat, dici debet; praesertim quum ea aetate ob barbarorum incursiones vix ecclesiastica documenta reperiri possent, ac leges romanae ac barbaricae divortio nimis faventes longe lateque dominarentur.

Interim ex iis, quae in duobus praecedentibus articulis de ecclesiae traditionali sensu disseruimus, primum est colligere adversus Launoium eiusque exscriptores et assecras tantum abesse ut ecclesiae doctrina et praxis sententiae de vinculi coniugalis dissolutione ob adulterium

(286) *Acta conc.* Harduin. tom. III. col. 1991. Nec non *Conc. antiqua Galliae* Iac. Sirmundi tom. II. pag. 3.

faveat, ut potius longa seculorum serie ab aetate apostolica perpetuis documentis constet ecclesiae doctrinam et praxim esse illi sententiae prorsus contrariam.

His documentis, uti ex instituta critica eorum discussione patet, non aliud adversarii opponere potuerunt quam sophisticas cavillationes, atque etiam, ut vidimus, violentas interdum et absurdas interpretationes, quae a communi sensu abhorrent. Ex medio autem aevo collegerunt huc illucque quotquot potuerunt documenta ut fucum imperitis facerent; sed quae rite perpensa deprehenduntur aut falsa, aut critice dubia; atque exegetice examinata sensum fundunt, qui cum catholica veritate apprime cohaeret, quaeque id quod adversarii contendunt de facultate iterum nubendi post dimissam adulteram aut dimissum adulterum, nullatenus probant.

Ac re sane vera, si talis fuisset sensus tum textuum Matthaei, tum apostoli Pauli, qualem isti contendunt; si talis exstitisset traditio a patribus accepta, et per manus decurrens, in re quae adeo hominum cupiditati ac libertati favet, et in quam adeo proclives in tot rerum adiunctis plurimi reperiuntur; in re cui leges civiles seu politicae, ut saepius innuimus immo et patefecimus, haud parum favebant, quâ fieri potuisset, ut non haberemus potius contrariam sententiam et praxim pleno, ut ita dicam, atque exundanti alveo per secula singula ad nos usque decurrentem? Si non alia doctrinae catholicae suppetere documenta, vel ipsum solum factum nobis praerberet eius ineluctabile argumentum.

Vix enim inter seculi XVI. novatores doctrina haec obtinuerat, ut illico praxis dissolutionis ob adulterium coniugiorum longe lateque penes ipsos diffusa sit: in tribunalibus sive ecclesiasticis sive civilibus a iudicibus quotannis innumerae prope de divortiis hac de causa pronunciantur sententiae. Idem dic de graecis, penes quos ab aliquot

seculis eadem invaluit doctrina seu potius corruptela. Porro idipsum profecto contigisset seculis anteaetis; si quidem eadem doctrina in ecclesia obtinuisset catholica. Iam vero tantum abest, ut praxis eiusmodi in catholica introduci ecclesia potuerit, ut cum potentissimi principes, reges ac imperatores divortium quandoque pertentaverint, statim illis romani pontifices et concilia obstiterunt, uti inter cetera Lotharii exempla, Philippi Augusti, aliorumque magno numero demonstrant (287). Huc colliduntur quaecumque Launoius cum asseclis suis tanto labore congressit.

CAPUT IV.

DE GRAECORUM PRAXI DEQUE CANONE TRIDENTINO CIRCA INDISSOLUBILITATEM CHRISTIANI MATRIMONII IN CAUSA ADULTERII.

ARTICULUS I.

De natura et origine erroneae praexeos graecorum dissolvendi
ob adulterium coniugii, deque ecclesiae romanae
hac in re erga graecos oeconomia.

Cum de graecorum more ac praxi circa dissolubilitatem coniugiorum propter adulterium disserimus, non modo graecos ab ecclesiae catholicae unitate dissociatos, verum etiam graecos in ea unitate consistentes complectimur. Exploratum enim est eos a pluribus seculis consuevisse in adulterii casu ita dirimere coniugia, ut cum aliis respective viris aut foeminis se novis nuptiis copulent. Haec

(287) Huius exempla oppositionis sunt Stephani IV. et Caroli M., Nicolai I. et Lotharii, Gregorii V. et Roberti, Alexandri III. et Henrici III. Urbani II. et Philippi I. cetera recale apud Berti *De Theologic. discipl.* tom. IV. ab an. 540. ad an. 1639. etsi fateamur non omnia eiusmodi divortia sub obtentu adulterii pertentata fuisse.

porro agendi ratio non minimam creare potest difficultatem iis, qui rem penitus non perpendunt, ex eo etiam capite, quod hac de causa nullum excitatum umquam fuerit inter utramque ecclesiam latinam et graecam dissidium, neque diversa haec agendi ratio impedimento fuerit utriusque ecclesiae unioni, quae identidem tentata, immo etiam ad tempus saltem redintegrata est.

Exinde siquidem non pauci catholicae doctrinae adversarii recte inferre sibi visi sunt hac in re non de dogmatica veritate, sed de libera disciplina agi; adeo ut in potestate ecclesiae sit eam temperare ac mutare pro temporum, personarum rerumque adiunctis. Alii autem qui disciplinae moderandae potestatem secularibus principibus ultro demandant, veriti non sunt politico regimini auctoritatem deferre fidelium matrimonia ob adulterii flagitium dissolvendi, prout reipsa in protestantium ditionibus fieri consuevit, et a nonnullis principibus catholicis aliquando sancitum est (1).

Ut igitur huiuscemodi amoveamus obstaculum, ostendemus 1. non de *doctrina* proprie ac directe quaestionem esse cum ecclesia graeca circa hunc articulum, sed potius de diversa graecorum *praxi*, seu verius abusu, qui apud eos obtinuit, atque etiamnum obtinet; 2. originem eiusdem praxeos seu abusus, qui apud illos invaluit, patefaciemus; 3. ecclesiam latinam denique ostendemus, quoties se se obtulit occasio, toties adversus eiusmodi abusum reclamasse.

I. Porro ad primum quod attinet, dum dicimus dissidium graecos inter latinosque non de doctrina esse, sed de praxi, haud significare intendimus illos ad praxim hanc suam cohonestandam minime quaerere praesidium sive in sacris litteris, sive in sanctorum veterum scriptis; hoc

(1) Hos adversarios paulo post commemorabimus, cum scilicet afferemus singulorum argumenta quibus adnisi sunt eiusmodi fulcire commenta.

siquidem factis manifestis refelleretur, cum constet ipsos confugere et ad textus Matthæi, et ad graecos patres, quorum testimonia ipsi urgent, haud secus atque protestantes (2). Ac re ipsa fieri non poterat, quin graeci niterentur praxim adeo contrariam doctrinae et praxi ecclesiae romanae opportunis auctoritatibus et argumentis ex Bibliis ipsis et ex patribus arte depromptis fulcire. Dum igitur asserimus graecos practice potius quam theoretice dissentire ab ecclesia latina, contendimus, eos non ita sententiam suam tueri, ut erroris incusent latinos ob contrariam doctrinam et praxim, perinde ac si ea recedat ab evangelica et apostolica disciplina, dum indissolubilitatem tuetur coniugii, interveniente adulterio, adeo ut hoc unum ex capitibus constituat divisionis inter utramque ecclesiam.

Eo etiam ex capite dici potest graecos practice potius quam theoretice ab ecclesia latina dissentire, quod praxis aliunde quam ex dogmatico errore profluxerit; imo error quicumque is est, ex praxi potius provexit, quum graeci praxim suam aliunde ortam cohonestare tentaverint erronea doctrina: quae profecto cohaerens non est cum doctrina de indissolubilitate christiani matrimonii, quam alioquin graeci ipsi formaliter profitentur. Hinc iterum apparet practicum verius quam theoreticum esse dissensum, vel certe talem fuisse, saltem usque ad definitionem tridentinam contra quam modo graeci dirimere matrimonia ob adulte-

(2) Haec omnia profert et expendit Arcudius in suo opere *De concordia occident. et orient. ecclesiae* lib. VII. *De matrimonio* a cap. VII. ad XXVII. Cf. praeterea Mansi *Collect. concil.* tom. XX. col. 147. ubi affert acta conc. Barenfis. Allatium *Graecia orthodoxa* Romae 1652. tom. II. p. 370. Anselmum Havelbergensem op. *Dialog. adversus graec.* lib. III. apud D' Acherium *Spicileg.* tom. XIII. pag. 88. seqq. necnon Samuel. Klein de Gzàd dioecesis. Fogarasiensis in Transilvania presb. et in semin. gener. Caesareo-regio graeco-catholicorum Vindobonens. ad s. Barbaram stud. praefect. in *Dissertat. canonica de matrimonio iuxta disciplinam graecae orient. ecclesiae.* Vindob. 1781. De quo identidem agemus.

rium non possunt, quin simul notam erroneae praxeos simul et doctrinae incurrant, ut fusius postea videbimus.

Hisce explanatis, pronum nunc est nostram adfirmationem adstruere; ac primo id efficitur positive, quatenus ecclesia graeca adoptavit ut suos canones ecclesiae africanae, adeoque concilii milevitani, quod, ut vidimus can. XVII. constituit, ut secundum evangelicam et apostolicam disciplinam neque dimissus ab uxore, neque dimissa a marito alteri coniungantur; sed ita maneant aut sibimet reconcilientur. Quem canonem renovavit conc. africanum plenarium cap. LXXVI. et rursus in codice canonum ecclesiae africanae insertus est can. CII. ac in canone ecclesiae graecae reperitur (3).

Praeterea Michaël Palaeologus in symbolo fidei seu fidei professione quam an. 1274. obtulit rom. pont. Gregorio X. in concilio Lugdun. II. indissolubilitatem absolutam matrimonii professus est his verbis: « De matrimonio vero tenet (romana ecclesia) quod nec unus vir plures uxores simul, nec una mulier permittitur habere plures viros. Soluta vero legitimo matrimonio *per mortem coniugum alterius*, secundas et tertias deinde nuptias successive licitas esse dicit: si impedimentum canonicum aliud ex causa aliqua non obsistat (4). »

Rursus cum saec. XVI. reformatores, ut sese appellent, seu emendatores sacrorum, nempe haeretici, ad fulciendas novas doctrinas suas adversus ecclesiam praesidium quaesivissent penes graecos, Ieremias patriarcha constantinopolitanus nomine ecclesiae suae hanc de sacramento matrimonii eiusque indissolubilitate professionem edidit: « Matrimonium in primis ab ipso Deo omnium rerum omnipotente auctore ab initio constitutum, sancitumque est, tum,

(3) Cf. *Acta Conc.* Harduini tom. I. in monito ad hunc canon. col. 861. 862. et iterum col. 923. ubi exhibentur hi canones graece et latine.

(4) In *Collect. max. conc.* Mansi Venet. 1780. tom. XXIV. col. 71.

cum in paradiso Adamum cum Eva coniunxit. Post vero, ubi mundo salus apparuit, ab ipso Christo Iesu confirmatum, partim dum primo miraculo conversae aquae in vinum honestatur, partim dum mosaica lex, quae dato libro repudii, uxorem dimittere permittebat, in ea parte clare perficitur, illudque docetur, a principio sic non fuisse, sed propter duritiam cordis eorum, qui legem acceperunt, id concessum esse. Et illis item verbis; *Quos Deus coniunxit*, hominem separare non debere (5).» Sic etiam in *Orthodoxa confessione* idem constituitur principium de perpetua et indissolubili coniugii firmitate dum dicitur quod sponsi «iunctis dextris fidem dent, quod alter alteri fidem, honorem, amoremque coniugalem, ad finem usque vitae, quocumque rerum discrimine, constanter servaturus; nec alter alterum deserturus sit (6).» Verum quidem est in his professionibus nullam de peculiari adulterii casu fieri mentionem, attamen hoc ipso quod proprietas vinculi coniugalis absque ulla exceptione adstruitur, patet graecos cum latinis circa principium theoreticum et dogmaticum convenire, nec ullam posse movere litem contra ecclesiam latinam, quae docet insolubilitatem christiani connubii adulterio etiam interveniente.

Id ipsum efficimus negative. Siquidem numquam graeci inter dissidii causas ab ecclesia latina doctrinam et praxim de indissolubilitate matrimonii etiam in casu adulterii recensuerunt (7). Quoties praeterea post funestum schisma

(5) *Censura orient. eccles. per Ieremiam patriarcharum*. Coloniae 1583. c. VII. *De matrim. et natur. sacrament.* pag. 116. et ed. Paris. 1584. fol. 44.

(6) *Orthodoxa confessio catholicae atque apostolicae ecclesiae Orientalis*, interprete Laur. Norimanno Lips. 1695. quaest. CXV. Hinc Thomas Smith anglicanus in op. *De graecae ecclesiae hodierno statu*. Traiecti ad Rhen. 1698. pag. 130. refert graecos statuere: «Neminem cuiuscumque periculi praetextu per totum vitae terminum ab alicuius matrimonio dimittendum, idemque (matrimonium) esse *totius vitae inseparabile consortium.*»

(7) Has causas ex epistolis Photii et Michaëlis Caerularii expendit Biner in *Apparatu eruditionis* part. III. cap. 2. art. 8. num. 14. nec non cap. 3.

quo scissa est ecclesia graeca a latina, actum est de unione inter utramque ecclesiam redintegrandam, numquam inter articulos discutiendos propositus est articulus de dissolubilitate aut indissolubilitate coniugii in causa adulterii (8).

Firmamentum haec omnia accipiunt ex agendi ratione quam constanter tenuerunt non solum graeci uniti, verum etiam schismatici respectu tot decretorum et sanctionum rom. pontificum, quibus dissolutio coniugiorum ob adulterium improbata atque damnata est. Siquidem nemo adversus has pontificias sanctiones insurrexit, quasi desciverint ab evangelica et apostolica doctrina aut a veteri patrum traditione; quod quidem argumentum prope evidens est nullum dogmaticum revera hac in re dissidium viguisse aut vigere inter ecclesias orientalem et occidentalem.

Restat igitur ut practicus dici debeat usus, seu potius abusus, qui penes graecos inolevit scindendi vinculum coniugale ob adulterii flagitium, cuius nec ipsi rationem reddere potuerunt, cum haec quaestio iis esset proposita. Sane absoluto concilio florentino, atque unione perfecta, cum latini silentio praeterire noluerint contrariam graecorum praxim circa coniugii dissolutionem, sciscitati ab iis sunt, quare ipsi coniugia dissolverent, et aqua eis

art. 6. n. 8. et 9. Item Prosper ab Aquitania *Diction. theologic.* tom. I. pag. 108. Ant. Possevini in *Apparatu sacro* ad vocem *Graeci*.

(8) Satis est percurrere Acta concilii Lugdun. II. et Florentini in quibus de unione actum est, ut quisque intelligat de quatuor potissimum doctrinae capitibus controversias agitatas fuisse, scilicet de consecratione etiam in pane azymo, de existentia purgatorii, de primatu sedis romanae, deque processione Spiritus S. etiam a Filio. Cf. Christoph. Peichich, *Speculum veritatis inter orientalem et occidentalem ecclesias*. Venet. 1725. cap. X. p. 116. necnon Io. Plusiadeni *Dissertationem pro concilio florentino* apud Allatum *Graccia Orthodoxa* tom. I. p. 625. ubi quinque dissentionum capita inter utramque ecclesiam distincte numerantur, et ne verbum quidem de matrimonio. Demum Iac. G. Pitzipios in op. *L' Eglise orientale* 1. Part. Rome 1855. capp. VIII. IX. et X. recensens praecipuas differentias, seu controversias quae inter orientalem et occidentalem ecclesiam vigent, eas coarctat ad tria capita; deinde vero persequens controversias minores ad septem revocat, nusquam vero quidpiam de matrimonio, eiusque ob adulterium dissolutione aut indissolubilitate meminit.

haesit, prout habetur in historia actorum illius concilii a Binio edita: post subscriptionem, ibi legitur « Absoluta Missa et gratiarum actione, unusquisque recepit se domum. Post haec latini quaesiere a nobis (graecis) haec... Et quare coniugium dirimitis, dicente Domino: *Quos Deus coniunxit, homo non separet?* Haec a latinis obiecta mitylenensis (archiepiscopus) canonicè omnia legitimeque dissolvit, praeter quam duo, de quibus Papa significavit imperatori. Cur scilicet matrimonia dirimantur... Latinis contradicentibus, legem (civilem) nihil valere adversus Domini vocem: *Quos Deus coniunxit, homo non separet...* Petivit ergo per nuncios Papa ab imperatore, ut ex metropolitans peritos aliquot ad se mitteret; ille vero misit imperitos. Proposuitque Papa duas hasce obiectiones, de separatione coniugiorum, et promotione patriarchae. Illi vero, nullam se dixerunt habere facultatem respondendi, nec respondere; sed ea relaturos imperatori, qui responderet... Papa orientales omnes praesules ad se convocavit: et cum aliquot ex iis profecti essent, talem habuit secreto cum illis sermonem... Propono vobis aliqua ut fratribus, ut membris, ut ecclesiarum doctoribus. Et primo dico, omnes conqueri de separatione matrimoniorum; idque correctione indiget... Praesules ita responderunt; aequissima et sapientissima sunt, quae Beatitudo tua dixit: sed nos ad haec dare perfectam responsionem non possumus; sunt enim et alii praesules, et imperator noster: perfecte igitur respondebimus cum illorum consensu, privatim vero ex nobis respondemus ac dicimus: non esse haec praesentis temporis, licet iusta et necessaria sint; nam matrimonia dirimimus non sine iustis causis (9).» Nec ulterius res progressa est.

(9) *Concilia gener. et prov.* tom. IV. p. 1. Colon. Agrip. 1618. pag. 609 seq. quibus patet audacia *Annalistarum Ulmensium*, dum asserere non dubitarunt, ecclesiam graecam in capite de matrimonio verius et sac. Scripturae conformius sensisse, quam ecclesiam latinam, cum illa semper eruditiores ac doctiores

Interim ex hoc documento novimus, non de doctrina sed de praxi rom. pontificem cum graecis esse conquestum; istos insuper ad se tuendos neque ad Scripturam neque ad patres confugisse, sed ad consuetudinem iamdiu apud illos inolitam, adeoque tacite saltem significarunt ex corruptela potius et abusu eiusmodi consuetudinem pedetentim invaluisse. Discimus praeterea non ob solam fornicationis seu adulterii causam, verum etiam ob alias etiam leviores causas consuevisse graecos coniugia dissolvere. Nam generatim summus pontifex Eugenius dixit, *omnes conqueri de separatione coniugiorum*. Et sane notum est passim apud graecos schismaticos ob leves causas matrimonia dirimi, prout testantur, qui de praesenti ecclesiae graecae statu disseruerunt (10). Quapropter eadem ratione qua alii abusus irrepserunt penes graecos dissolvendi coniugia levibus de causis, ita et hic irrepserit abusus eadem solvendi propter adulterium. Immo vero cum hic vetustior sit, primus veluti gradus extitit ex quo facile illis fuit in alios descendere.

patres et scriptores in suo gremio quam haec numeraverit, ac proinde ecclesiam graecam melius quam latinam sententias Scripturarum intellexisse. *Annales pro theolog. et iure can.* Ulmae 1812. tom. III. p. 309. Assumunt hi protestantes annalistae uti certum graecos patres et scriptores propugnasse dissolutionem matrimonii interveniente adulterio; quod esse omnino falsum suo loco ostendimus. Si protestantes graecis deferunt circa solutionem coniugii, quare iisdem non deferunt cum agitur de dogmatibus in quibus ipsi cum latinis consentiunt?

(10) Hinc Thomas Smith op. cit. *De graecae ecclesiae hodierno statu* post verba paulo ante descripta subdit: «Nescio utrum magis mirer an doleam tot repudiis *leviusculis* quidem *de causis ἐκτὸς τῆς πορνείας* extra casum adulterii indultum esse, quasi vinculum istud quod alias fatentur ἀβήηκτον pro vaga cuiuspiam libidine et arbitrio adeo facile solvi potuisset. Huic malo reverendorum antistitum pietatem tandem aliquando occursuram spero, quos tantum abest, ut levitatis aut avaritiae incusem, ut genti in vindictam, aut odium, aut in novos amores, ubi fastidium irrepserit, effusissimae et quam maxime effraeni non aliter satisfieri posse credam, nisi hac iniqua indulgentia» p. 130.

Et D. De la Croix in op. *État présent des nations et des Églises* Greque, Arménienne et Maronite en Turquie. Paris 1693. pariter scribit pag. 75. «Malgré toutes ces régularités, le mariage qui se contracte avec tant de difficulté, se dissout aisément sur les moindres causes, et pour de l'argent on prononce la dissolution.»

II. Iam inquirenda nobis istius praxeos origo est, quam facile in legibus civilibus, quae divortia permittebant, et in indole graecae gentis reperimus. Exploratum penes eruditos est legibus imperatorum ethnicorum viris praesertim indultam fuisse divortia faciendi facultatem. Imperatores christiani huic malo occurrere quidem sategerunt; attamen cum magna adhuc parte imperium romanum ethnicis constaret, nonnisi per gradus quosdam antiquas leges emendare potuerunt. Quum vero deinceps emendare possent ac deberent, potius divortiis magis faverunt. Quocirca imp. Constantinus M. legem tulit, qua causas divortii ad tres coarctavit in foemina, nempe: «Si homicidam, vel medicamentarium, vel sepulchrorum dissolutorem maritum suum esse probaverit» in viris pariter: «Si *moecham*, vel medicamentariam, vel conciliatricem repudiare voluerit (11).» Hanc eandem legem confirmarunt et extenderunt imperatores Honorius, Theodosius et Constantinus *De poenis iniusti repudii, iusti contra praemiis* (12). Plures aliae leges eadem de re sancitae sunt ab imperatoribus subsequenti- bus, quaeque referuntur in codice Iustiniani, quibus et alias ipse Iustinianus adiecit (13). Nam ipse Anastasium imitatus in legibus novellis ad Ioannem et Theodotum praetorio praefectos laxavit mali habenas repudiorum causas extendens, et de irrationabili repudio solam puniens mulierem quinquennali abstinentia a novis nuptiis (14).

(11) Imp. Constantinus A. ad Ablavium *De repudiis* tit. XVI. lib. III. cod. Theodosiani cum comment. Io. Gothofredi. Lugduni 1665. tom. I. p. 310.

(12) Ibid. pag. 316.

(13) *Codicis sacratissimi imperat. Iustiniani pp. Augusti libri XII. Accurtii commentar, ac Coantii et Dionysii, Gothofredi etc. lucubrationibus illustrati*. Lugd. 1612. Cod. lib. V. tit. XVII. *De repudiis* p. 1238. seqq.

(14) Leg. XXII. c. 117. Hinc Blastares in *Syntagm. alphabetic. litt. G.* c. 13. scribit: de causis divortii leges civiles multis in locis tractare, plenius tamen in Novella imp. Iustiniani (117.) in qua causae recensentur e quibus solis matrimonium dissolvere liceat, et quidem sequentes. — Pro marito —

Maritum repudium uxori mittere posse. 1. Si coniurationis contra imperium conscia, viro suo non revelet.

Licentiam adhuc amplificarunt Leo sapiens ac Nicephorus Botaniates Augusti graecorum, quos propterea ita merito arguit anonymus auctor tractatus, qui Constantinopoli reperi- tus est: « Quod viri et mulieres sacramentum coniugii pro nihilo reputent. Nam quoties alter displicet, vel alteri, coram praetore urbano voluntatibus eorum expositis, instrumentis et singulis praecisis, sine contradictione viri uxores, et mulieres viros pro lubitu accipiunt, contra mandatum quod dicit: *Quod Deus coniunxit, homo non separet* (15).» Exinde ortae querelae de facilitate repudiorum apud graecos.

Quamdiu in ecclesia graeca severior disciplina viguit, vix ulla harum legum ratio habita est; quinimo patres legibus civilibus leges Christi opposuerunt. Verumtamen

2. Si eam *adulteram* esse accuset et probare possit.

3. Si ea vitae mariti insidiata sit, aut insidiarum ab aliis conscia marito non revelaverit.

4. Si cum extraneis nolente marito convivetur aut lavetur.

5. Si nolente marito et extra domum manserit, nisi forte apud proprios parentes.

6. Si nolente aut ignorante marito et circensibus ludis, theatris aut amphitheatris interfuerit ad spectandum.

Pro uxore. Uxorem autem marito repudium mittere posse: 1. Si maritus contra imperium conspiret, aut conspirationis aliorum conscius imperio non revelet.

2. Si vitae uxoris aut ipse insidiatus sit, aut insidiarum ab aliis conscius non revelet uxori, neque studeat secundum legem ulcisci.

3. Si uxoris castitati insidiatus sit, eamque aliis prostituendam tradere tentaverit.

4. Si eam de adulterio vir accusaverit, probare autem non potuerit.

5. Si is vel in domo sua vel extra cum alia muliere cohabitet, atque admonitus non desistat.

Reliqua inferius dabimus. Hic porro Matthaëus Blastaris monachus, qui circa an. 1335. floruit in cit. op. non canones modo, sed et leges retulit cum canonibus collatas Iustiniani, Leonis Sapientis, Constantini Porphyrogennetae, aliorumque imperatorum. Hoc opus e duobus codicibus Bodleiano et Vossiano graece ac latine in lucem protulit Beveregius in *Pandect. canon.* tom. II. part. I. pag. 1. Multa eius loca emendavit Cotelerius in *Not. ad Monum. ecclesiae graec.*, qui tamen admonet haud pauca adhuc superesse emendanda. Cf. op. et loc. cit. cap. XIII. p. 73 seq.

(15) Apud Christ. Lupum schol. ad can. LXXXVII. conc. Trullani Opp. ed. Venet. 1724. tom. III. pag. 153 seq.

illius gentis indoles, quae supremam imperialem dignitatem velut sacro quodam cultu prosequeretur, illique ea etiam deferebat, quae iuris ecclesiae sunt, effecit ut graeci assentationis spiritu ducti coeperint pedetentim a primaevo instituto desciscere, atque ex praescripto civilium legum sese gerere in hoc praesertim negotio, in quo cupiditates magnam adeo sibi partem vindicant. Ab initio quidem timide, postea vero audacius, cum consuetudo iam altas radices egisset; donec longe lateque obtinuerit, et quadantenus pessimus mos praescripserit, dissimulantibus prius, deinde vero probantibus supremis illius ecclesiae pastoribus.

Magis autem ac magis abusus eiusmodi increbuit ex quo sec. VIII. imperator Constantinus Basili filius repudiata Maria armena legitima uxore, Theodotam cubiculariam duxit; quod nefarium facinus, licet omnes severiori disciplinae studentes detestarentur, attamen a non paucis ignavis episcopis probatum fuit (16). Huius imperatoris exemplum, ut fieri solet, plurimos habuit imitatores. Maiora denique nacta est eiusmodi consuetudo seu corruptela incrementa post luctuosam schisma Photii et Michaëlis Caerularii; ex eo enim tempore, historici omnes consensu unanimi exprobrant graecis divortiorum effraenem licentiam, non solum in casu adulterii, verum etiam ob alias longe minores causas (17). Quod quidem malum dis-

(16) Cf. Baronium ad an. 795. n. XLII. seqq. cum notis Pagii, qui rem totam fuse refert, et magnas in ecclesia Constantinop. propter hoc scelus exortas discordias. Unicus ab initio restitit Constantini flagitio s. Plato monachus, qui hac ipsa de causa iram in se concitavit imperatoris, a quo una cum monachis suis in carcerem coniectus ac prope innumera hac de causa est mala perpeusus, prout refert Theodorus Studita apud eundem Baronium loc. cit. ed. Luc. tom. XIII.

(17) Etenim praeter recensitas causas cum damno partis reae, a Blastare op. et loc. cit. hae tres recensentur ad divortium faciendum:

1. Impotentia mariti intra matrimonium.
2. Amplexus vitae monasticae alterius coniugum.

simularunt graeci antistites eo etiam nomine, ne si nimis obiurgarentur qui se his repudiis foedare audebant ad mahometismum desciscerent (18).

Ast si aliqua excusatione digni videntur praesules illi qui sub islamitica ditione constituti sunt, profecto eam obtendere nequeunt ii, qui extra illam ditionem versantur, ut in Valachia, Transylvania aliisque finitimis regionibus in quibus tamen adhuc vigent non pauci ex eiusmodi abusibus ob iuris canonici quod penes ipsos receptum est auctoritatem (19). Idem dic de novo Graeciae regno, in quo eadem legislatio denuo adoptata et confirmata fuit (20).

Et haec quidem quoad ecclesias ab unitate ecclesiae catholicae separatas; nam quod attinet ad ecclesias graeco-unitas, licet nondum abusus omnes absoluti sint, recessum tamen sensim et pedetentim est a non paucis corruptelis quae prius obtinuerunt. Dixi *nondum abusus omnes*

3. Captivitas, si per quinquennium de captiva parte resciri nequeat an vivat nec ne. Cf. *ibid.* p. 74.

Causae hae recensentur etiam in Photii *Nomocanone* tit. XIII. cap. IV. et in *Corpore iuris canonici* pag. 201. 209. 212. 214. 216. 217. 219. et 222.

(18) Prout observat De la Croix op. cit. ubi post adducta verba pergit dicens: «Ce qui est un abus considerable, que tolère cette Eglise pour empêcher un plus grand mal, qui est le Mahométiisme.»

(19) Etenim in *Corpore Iuris canon. Valach.* praeter superius recensitas causas dissolutionis coniugalis vinculi hae continentur:

1. Abortus procuratio. Pag. 212. 220. ex Novel. Leonis, etiam apud Blastarem op. cit. lit. G. c. 2.

2. Congressus cum uxore contra naturam p. 214. cap. 251.

3. Defloratio et furor etc. Lepra, obsessio daemonis, perfida desertio e sententia synodi Constantinop. sub patriarcha Dositheo an. 1554.

(20) Cf. Harmenopuli *Epitomem divinorum, et sac. canon. legum* pag. 389 seq. edition. Atheniensis, quae regio decreto die 20. Febr. seu 7. Martii 1835. pro regno Graeciae approbata fuit; et Io. Hadschits *Dissert. de causis matrimonium dissociantibus iuxta disciplinam ecclesiae oriental.* Budae 1826. in 8. Hoc opus denuo recusum, ut diximus, et probatum in novo Graeciae regno, confectum est e Constant. Harmanopuli Nomophylaci et iudice Thessalonicensi an. 1380. vel 1383. uti ostendunt Seldenus in op. *De Synedr. hebraeor.* lib. I. c. 10. p. 213 seq. et Fabricius *Biblioth. graec.* tom. X. p. 276 seq. et inscriptum Ἐπιτομή τῶν θείων καὶ ἱερῶν κανόνων. Cf. Carmini Fimiani *elementa iuris canonici.* Neapoli. 1777. tom. I. pag. 86.

abolitos esse; siquidem usque ad haec ferme tempora praesertim in catholica transilvaniensi provincia matrimonia dissolvebantur ob probatum adulterium et perfidam desertionem, quae ut plurimum adulterium involvit. Idque sub obtentu quod iis a s. Sede concessum fuerit in actu unionis, quae facta est an. 1699. imperatoris Leopoldi potissimum opera. Iam vero perperam ipsi autumant hac occasione absque ulla restrictione permissum eis fuisse propriam disciplinam moderari iuxta corpus iuris canonici graeci quod digestum erat ante unionem, quodque vocant *Pravila* id est *regulam* (21). Porro praeter quam quod nullum Romae huius concessionis existit documentum, certum est quod in diplomate imperatoris Leopoldi dato die 16. febr. 1699. genti Valachae graecae et ruthenae praeter admissionem quatuor articulorum quibus dissentiebant gentes illae ab ecclesia romana (22), praemittebatur tamquam necessaria conditio unionis quod dicta natio teneretur: « Omnia ea admittere, profiteri, ac credere, quae sancta mater ecclesia romana catholica admittit, profitetur, et credit (23). » Hoc diploma publice lectum est in comitiis generalibus Transilvaniae, quin ulla fieret oppositio, die 8. sept. 1699.; cum autem inter cetera, quae admittit, profitetur et cre-

(21) De quo iure canonico seu *Pravila* scribit Walter. *Ius can.* ed. XI. §. 83. p. 143. « Vallachi qui sec. XIII. proprium ac independens regnum formarunt, an. 1652. canonum collectionem in lingua vernacula conscriptam ac typis editam obtinuerant. Constat haec collectio duabus partibus. Prima 417. capitula complectens Manuelis Malaxi *Nomocanonem* (an. 1561. conscriptum et ex Photii, Balsamonis, Blastaris et Zonara operibus excerptum) ex graeco in vernaculam linguam translatum exhibet. Altera pars, quae *Nomocanon* inscribitur, canones apostolorum, conciliorum, Basilii aliorumque patrum continet, ex recensione quam Aristenus in *Synopsi scholiis* adornavit. Graeca porro haec opera nihil omnino commune habent, atque ex errore fontium tanquam unius eiusdemque collectionis partes considerata sunt. »

(22) Nempe 1. de rom. pontifice supremo totius ecclesiae capite, 2. de consecratione eucharistiae in pane azymo sufficienti; 3. de purgatorio; 4. de processione Spiritus Sancti etiam a Filio.

(23) Huius diplomatatis adhuc existit transumptum in archiviis sac. congreg. de propaganda fide.

dit ecclesia romana sit etiam articulus de absoluta indissolubilitate matrimonii christiani etiam in casu adulterii, nec eum ignorare certe possent graeci illi qui se ecclesiae catholicae univerunt, plane consequitur haud datam eis esse libertatem sectandi hoc in articulo antiquum illud ius canonicum.

Quod si post unionem adhuc inolitus hic abusus perseveravit dissolvendi propter adulterium ac perfidam desertionem coniugium, id factum est contra ecclesiae romanae mentem. Verumtamen quinquaginta plus minus ab hinc annis firmitate ac perseverantia Fogarasiensium antistitum eiusmodi dissolutio cessavit (24).

Porro quis unquam dicet recensitos hactenus practicos abusus in errore doctrinali ac dogmatico fundari? Igitur resolutio coniugalis vinculi in causa adulterii apud graecos non est repetenda ex errore aliquo dogmatico, sed eodem in censu habenda est ac dissolutio, quae penes eosdem invaluit propter alias causas manifeste a sacris litteris, ac traditione apostolica proscriptas, quaeque non aliam habet originem quam leges imperiales tum sacris litteris tum apostolicae traditioni hac in re adversantes ab ignavis ecclesiae photianae praesulibus uti leges canonicas adoptatas.

III. Numquam destitit, quoties sese obtulit occasio, apostolica sedes ab eiusmodi abusibus improbandis. Iam retulimus quomodo se gesserit Eugenius IV. in concilio florentino, qui praeterea in suo decreto pro armenis doctrinam de indissolubilitate matrimonii his verbis complexus est: « Assignatur autem triplex bonum matrimonii. Primum est proles suscipienda et educanda ad cultum Dei. Secundum est fides, quam unus coniugum alteri servare

(24) Primus qui in gr. catholica Transilvaniensi ecclesia dissolutionem matrimonii propter adulterium et perfidam desertionem sustulerit fuit fogarasiensis episcopus Ioannes Rabb, frustra obnitentibus clero populoque; uti testatur Alexander Sterka Sulucz actualis archiepisc. et metropolita Albae-Iuliensis in scriptis datis Blasii in Transilvania die 30. novembr. 1856.

debet. Tertium indivisibilitas matrimonii, propter hoc quod significat indivisibilem coniunctionem Christi et ecclesiae. Quamvis autem ex causa fornicationis liceat tori separationem facere, non tamen aliud matrimonium contrahere fas est, cum matrimonii vinculum legitime contracti perpetuum sit (25). »

Item Clemens VIII. in instructione pro Italo-graecis, declaravit graecis quidem separationem a toro licitam esse, alterum tamen, vivente parte alia, matrimonium contrahere nullo in casu integrum esse (26). Urbanus VIII, in fidei professione emittenda ab iis, qui e schismate vellent in unionem ecclesiae catholicae redire hanc formulam praescripsit: « Item sacramenti matrimonii vinculum indissolubile esse, et quamvis propter adulterium, haeresim, aut alias causas possit inter coniuges tori et cohabitationis separatio fieri, non tamen illis aliud matrimonium contrahere fas esse (27). » Benedictus pariter XIV. in constitut. *Etsi pastoralis* die 26. mai. 1742. quoad Graecos-italos haec ordinariis locorum de dogmatibus et ritibus ab italo-graecis tenendis et servandis §. VIII. n. 2. de matrimonio edixit: « Matrimonia inter coniuges graecos dirimi, seu divortia, quoad vinculum, fieri nullo modo permittant, aut patiantur: et si qua de facto praecesserunt, nulla et irrita declarent (28). »

Hic praeterea pontifex in op. De synodo dioeciesana lib. XIII. cap. XXII. refert a sac. congreg. concilii di-

(25) *Acta concil.* Harduini tom. IX. col. 440.

(26) In Const. XXXV. Clement. VIII. in Bullario Laert. Cherubini Romae 1617, p. 48. Verba pontificis §. 5. adoptavit ac sua fecit Benedictus XIV. in Constit. mox alleganda: quaeque nos in textu retulimus, quin necesse sit ea repetere.

(27) Hanc ipsam fidei formulam emittendam orientalibus ab apostolica sede praescriptam recitat atque electo patriarchae ecclesiae antiochenae Simoni Evodio proponit edendam Benedictus XIV. in Constit. LXXVIII. *Nuper ad nos.* in eiusdem pontificis Bullario tom. I. p. 258 seqq.

(28) *Const.* LVII. in eiusdem Bullar. tom. I. pag. 179.

scussum fuisse casum cuiusdam viri graeci qui dissolutionem coniugii ob adulterium uxoris suae convictae et confessae, etiam post sententiam graecae synodi solutionem decernentis petebat : et sacrum hoc tribunal decrevisse coniugium quoad vinculum indissolubile persistere, nec ullo modo posse virum illum novas inire nuptias (29).

Ex hactenus expositis pronum est colligere 1. licet errorem graecorum practicum potius quam theoreticum de solutione coniugii propter adulterium esse dicamus, tamen quaestionem per se nulla prorsus ratione uti mere disciplinarem spectari posse, sed habendam esse vere doctrinalem atque dogmaticam; 2. utramque praeterea, orientalem scilicet et occidentalem ecclesiam, primis seculis circa eandem consensisse, nec ullam hac de re inter eas excitatam fuisse controversiam; 3. coepisse quidem temporis tractu apud graecos et orientales consuetudinem introduci solvendi coniugia in casu adulterii; verum eiusmodi consuetudinis originem repetendam esse a civilibus legibus, nec cogitasse graecos de eiusmodi praxi sive Scripturarum, sive patrum testimoniis cohonestanda nisi serius, cum hac de causa obiurgari coeperunt ab ec-

(29) Sic etiam a cong. concilii reperitur data haec resolutio in *Thesaurο resolution. Urbini 1739. sub titulo Dubium matrimonii 15. Ian. 1724.* Agebatur de quodam Georgio d'Ascoti graeco-catholico, qui matrimonium contraxerat cum muliere lutherana coram duobus testibus et praedicante lutherano in civitate Wiburgi, quae sita est in Finnania, quae pars est regni Svecivici, cumque Georgius militem agens captivus factus fuisset ab hostibus, post reditum a captivitate tres filios, se absente, a sua uxore progenitos invenisset, eam in iudicium vocavit. Cumque ipsa triplex confessa fuerit adulterium, prolata est sententia in synodo de dissolutione matrimonii quoad vinculum, et libertate Georgii ad alias nuptias transeundi iuxta graecorum praxim seu abusum, interpretationemque a graecis datam doctrinae s. Basilii, in qua polissimum synodus suae sententiae reposuit fundamentum. Cumque ad praefatae sententiae normam Georgius vellet cum alia foemina, cui suam fidem dederat, matrimonium contrahere, pater Apollinaris capuccinus missionarius in Moscovia, degens Petropoli, inducias a Georgio obtinuit, ut s. Sedis iudicium exquireret. Re ad sac. congregat. ss. inquisitionis delata; resp. *Oratorem non posse aliud matrimonium contrahere pag. 5 seqq.*

clesia latina; ceterum 4. adeo ipsis persuasum fuisse hac in re nullum se praesidium in Scripturis ac traditione habere, ut numquam ecclesiae romanae crimini verterint quod contrariam doctrinam et praxim consecraretur; numquam propterea inter tot schismatis faciendi recensitas causas interdum levissimas, hanc de indissolubilitate matrimonii adnumerarint (30); nec proinde 5. umquam cum ageretur de utriusque ecclesiae pace sive sub Stephano V. sive sub Gregorio X. sive demum sub Eugenio IV. inter articulos dissensionis istum commemoratum fuisse; 6. adeoque consuetudinem hanc esse revera habendam veluti abusum pluribus seculis inolitum, non secus ac alii abusus, qui penes graecos obtinent ob alias causas etiam, praeter adulterium, dirimendi coniugia quoad vinculum; in quos abusus vocem suam iugiter rom. pontifices extulerunt graecis opposcentes evangelicam et apostolicam doctrinam de omnimoda matrimonii indissolubilitate; neque vero umquam graeci se defendere potuerunt; multoque minus tentarunt ecclesiam romanam hac in re erroris accusare; semper tamen in sua avita consuetudine generatim perstiterunt, a qua difficile profecto est eos revocare (31).

(30) Atque hic notandus est Sam. Klein qui in cit. dissert. *De matrimonio*, dum sub tit. *de adulterio* §. CVII. profitetur se agere de dissolutione propter adulterium in ecclesia orientali tantum *historice*, patefacit tamen mentem suam proferens argumenta quae orientalem praxim communire videntur. Etenim iuxta ipsum haec praxis fundatur 1. in verbis Christi Matth. XIX. 2. in verbis s. Basilii can. IX. 3. in eorum explanatione quam dedit Zonaras; deinde subdit 4. praeter Basilium videntur eidem favere Origenes, Epiphanius, Asterius, Theodoretus et *plures alii*; 5. inter latinos adducit Erasmus, Caietanum, Catharinum; 6. addit graecos a tridentino non fuisse damnatos, et a Fleuryo, Tournelyo, Iuenino et Gazzaniga id affirmari. In quibus a vero hunc auctorem ablusisse, partim iam vidimus, partim vero ex dicendis constabit. Debuisset praeterea adnotare Erasmus, Caietanum, et Catharinum ante celebrationem sess. XXIV. conc. tridentini scripsisse; Erasmus se retractasse, Caietanum vero et Catharinum scripta sua ecclesiae subiecisse iudicio.

(31) Plus semel diximus graecorum erroneam et pravam praxim in dirimendis coniugiis ob adulterium originem unice traxisse ex legibus imperialibus. Id porro nunc luculenter etiam constat ex iis, quae egregie disse-runt D. Pitra in recensione operis nuper editi a DD. Rhalli Areopagi praeside,

Et haec de graecorum praxi circa solutionem coniugiorum praemittenda erant, tum ut ostenderetur eiusmodi practici erroris natura et origo, romanaeque ecclesiae in

et Potli, Athenis an. 1852-1856. iussu sanctae synodi ecclesiae Hellenicae, quinque volum. In hac enim recensione critica, postquam doctus vir historiam iuris graeco-orientalis texuit et praecipuorum auctorum qui collectiones canonum ediderunt et commentariis illustrarunt usque ad novos collectores et editores athenienses quorum exhibet per volumina singula partes insertas, perguit ad expendendum meritum ipsum intrinsecum iuris canonici byzantini.

Porro prius animadvertit iugem imperatorum byzantinorum tendentiam ad sibi subiiciendum ecclesiam, quae magis se patefecit in imperatore Iustiniano, qui dum ex una parte nonnisi canonum ecclesiasticorum custodem et executorem se gerere profitebatur, ex altera *Novellis* suis constituabat disciplinam, et vim canonibus tribuebat. Hic imperator auctor fuit Ioanni scholastico, ut in unum colligeret leges imperiales et canones pro obiecto disciplinam ecclesiasticam habentes. Conflictus identidem inter imperatores et patriarchas constantinop. excitatus est, et quotquot imperialis dignitatis assentatores non extiterunt, ac libertatis ecclesiasticae noluerunt se praebere perditores, persecutionem passi sunt, vel morte, vel carcere vel exilio mulctati.

Res ita steterunt donec intrusus Photius an. 883. ut firmaret suum schisma, et ecclesiam sub imperatorum ditone et servitute constitueret novum iuris canonici syntagma vulgavit, aliudque opus sub profano titulo *Nomocanonis* edidit, quo significaret eandem legibus imperialibus et canonibus ecclesiasticis vim inesse. Ac reipsa huic suo Nomocanoni novellas imperatoris Iustiniani disciplinares inseruit perinde ac si eandem vim haberent. Pedetentim primas legibus imperialibus graeci canonistae dederunt, et ita, prouti paulo ante innui, ut tota canonum ecclesiasticorum vis unice ab imperiali auctoritate penderet. Siquidem lex haec immutabilis est, ut quoties ecclesia aliqua se a legitima subtrahit auctoritate, toties sub tyrannicam laicorum principum dominationem incidat, cuius rei praeter potestantium communionem, quas vocant, ineluctabile documentum est ecclesia anglicana, quae effecta est vile mancipium laicae potestatis regis sive reginae, seu comitiorum.

Hoc vitium inhaeret iuri canonico byzantino, ac ita illud inficit, ut merito illud vocaveris potius ius civile quam canonicum, hoc enim ab illo suam mutuatur obligandi vim. Cuius rei recens adhuc monumentum est *Promptuarium* seu Epitome iuris canonici Harmenopuli, quod obtinuit legis vim duobus decretis regis Othonis an. 1830. et 1835. atque tribunalibus hellenicis inservire debet ad instar codicis civilis in quaestionibus dirimendis.

Abiecta haec ecclesiae graecae servitus effecit, ut vel ipse protestans Bonafidius pronuntiaverit: « Quae omnia si quis diligentius consideret, sane imperii romani, hoc est CP. interitum et eversionem admirari desinet . . . iusto Dei iudicio deletum est. »

Porro Rhalli collectionem suam quam inscripsit: *Syntagma divinorum et sacrorum canonum* etc. nuncupavitque ecclesiae Hellenicae seu photianae incepit ex *Nomocanone* Photii cuius elogium texuit. Cf. *Univers.* 4. 17. et 23. Novemb. 1857.

eo improbando prudens perseverantia et oeconomia, tum ut facilius assequeremur vim canonis VII. sessionis XXIV. concilii tridentini de quo dicendum superest, ut hanc quaestionem universam de indissolubilitate christiani matrimonii in causa etiam adulterii absolvamus.

ARTICULUS II.

De natura et vi canonis VII. sess. XXIV. concilii tridentini.

Canon de quo disserimus his verbis constat: «Si quis dixerit ecclesiam errare, cum docuit et docet iuxta evangelicam et apostolicam doctrinam, propter adulterium alterius coniugum matrimonii vinculum non posse dissolvi, et utrumque, vel etiam innocentem, qui causam adulterio non dedit, non posse, altero coniuge vivente, aliud matrimonium contrahere, moecharique eum, qui dimissa adultera, aliam duxerit, et eam, quae dimisso adultero, alii nupserit; anath. sit.»

Quamvis omnium manu trita sit huius canonis historia, ad clariorem eius nihilominus intelligentiam, faciliusque concilii mentem assequendam, atque ad praeposteras occupandas canonis interpretationes, cavillationesque amovendas, iuverit eam, prout refertur a card. Pallavicino heic subiicere.

«Canon quoque, scribit ipse, paratus fuerat cum anathemate, in eum qui diceret matrimonia consummata ob adulterium dissolvi. Sed oratores veneti, die undecimo Augusti, cum ipsis posterior modulus ostensus est, solem-

Iam vero tum in legibus anteriorum imperatorum, tum in *Novellis* Iustiniani constitutum est, ut coniugium propter adulterii flagitium solveretur; cum autem hae leges partem constituerint iuris canonici byzantini praesertim opera Photii, exinde factum est ut coeperit, invalueritque penes graecos consuetudo hae de causa coniugia solvendi. En veram et unicam originem istius abusus contrarii doctrinae evangelicae et apostolicae, quem vera Christi ecclesia iugiter reprobavit.

niter exposuerunt conventui, veterem rempublicam semper coniunctissimam fuisse apostolicae Sedi, et conciliis oecumenicis eius auctoritate celebratis, pioque semper studio complexam ac veneratam decreta sanctionesque inde perfecta, utpote divinam gloriam, animorum salutem, pacemque christianorum promoventia. Verum ab eo, quod septimo canone parabatur, nisi moderatione aliqua reformaretur, inferri posse non modicam offensionem orientis ecclesiae, praesertim vero venetorum insulis, Cretae, Cypro, Corcyrae, Zacyntho, Cephaleniae, et aliis multis, non solum cum publicae quietis, sed cum ecclesiae catholicae detrimento. Compertum esse patribus, tametsi graeca ecclesia a romana ex parte dissentiret, non tamen eo desperationis deventum esse, ut meliora sperari non possent; praesertim cum graeci in subiectis reipublicae locis degentes, quamvis ritu suo viverent, tamen praesulibus a rom. pontifice assumptis obtemperarent. Ea propter tum rerum convenientia, tum oratorum munere se compelli, ne ipsi eos populos percuti sinerent eiusmodi anathemate, quo ad tumultum, integramque a sede apostolica secessionem provocarentur. Satis constare, in more positum apud graecos, ut uxorem adulteram deserant, et aliam ducant, veterrimam maiorum consuetudinem, ut ipsi dicunt, secuti; nec idcirco illos damnatos, aut anathemate percussos fuisse ab ulla synodo oecumenica, etiamsi romanae et catholicae ecclesiae huiusmodi mos liquido innotuisset. Existimare igitur oratores sui esse muneris, quam efficacissime possent, postulare, ut voces illae canonis adeo moderate lenirentur, ne graecis detrimentum inferrent, praesertim intentato anathemate; quod dubium non erat confici posse, non solum nulla parta ecclesiae catholicae indignitate, sed fortasse retenta plurimorum doctorum reverentia. Posse, quantum ipsi rebantur, et obtineri quod synodus intendebat, et reipublicae satisfieri, canone eius-

modi verbis conflato : *Anathema sit, si quis dixerit, sacrosanctam romanam catholicam et apostolicam ecclesiam, quae mater et magistra aliarum est, errasse, vel errare cum docuit, et docet, propter adulterium alterius coniugum, matrimonium non posse dissolvi; nec utrumque, vel etiam innocentem coniugem, qui causam adulterio non dedit, debere novum matrimonium contrahere, moecharique eum, qui dimissa adultera aliam duxerit, et eam, quae dimisso adultero alii nupserit.* Propterea rogari patres ab oratoribus, ut vel ea, vel alia meliori ratione, pro ipsorum prudentissimo arbitrato, vellent in eo gratificari serenissimae rei publicae, quae semper sacrosanctae Sedi apostolicae obscura plene fuerat, et erat observatura. »

« Hoc exemplar ab oratoribus propositum, videbatur alicui ex ipsis, aut ex ipsorum consiliariis, notam haeresis haud inustum opinionem contrariae; sed vim dumtaxat habiturum ad infligendum anathema temerariis in eo vituperatoribus ecclesiae, quae optimis nixa fundamentis eam doctrinam, tametsi non tamquam fidei dogma, tradebat. Aliud fortasse ab aliis considerabatur; nimirum, per eam sanctionem non damnari tamquam haeticam sententiam oppositam, nisi posita ecclesiae auctoritate; et non quasi divinis litteris evidenter id repugnaret: adeoque parci... graecorum nomini, donec illis in comperto non esset, ab ecclesia oppositum doceri; et donec eius auctoritati contumaciter iidem haud refragarentur. »

« Postea cum super ea re sententiae dicerentur, Andreas Cuesta, episcopus legionensis postulatum reiecit, affirmans, ab ecclesia non usurpari eam damnandi formulam : *Si quis dixerit, ecclesiam errasse.* Hanc veritatem esse certam ac firmatam in synodo milevitana cap. 13. in sexta oecumenica, et in florentina; adduxitque ex patribus graecis Clementem alexandr. et Basilium: quod si quis ex aliis deerraverat, contrarium opinatus, complures

tamen eorum , qui adducebantur , alio sensu locutos fuisse , quod ille palam fecit eorum dictis expensis. Et sane creditum est , si Cuestae locus loquendi inter primos obtigisset , sicut inter postremos debebatur in conventu , tantum ab eo numerum asseclarum pertractum iri , quantus ad refellendam petitionem satis fuisset. Verum reipsa plura suffragia consenserant , ut oratoribus satisfaceret. »

« In quo Suavis (Paulus Sarpus) duplici laborat vitio , primo , quia describit venetos non quidem supra allatam vocum mutationem proponentes , sed quasi mutationem quamdam in genere postulantes , qua graecis consulere-tur. Hinc vero audacior , progreditur ad carpendum concilium , quasi complexum mutationem aëream , et utilitatis effectusque vacuum , dum narrat , a plerisque non discerni quid inter priorem et posteriorem formam interesset , rem tamen maiori patrum numero remissam. Sed non solum revera discrimen inerat , quamvis subtilius , sed etiamsi non inesset , convenientius fuisset reipublicae satisfacere , eam mutationem petenti , ubi per eam merus sonus , non autem significatio variaretur (32). » Hactenus historiographus.

Ex qua historia discimus tridentinorum patrum mentem prius fuisse definire *directe* indissolutionem coniugalis vinculi in casu adulterii , deinde ad oratorum venetorum expostulationem ac preces eandem rem *indirecte* patres definivisse. Satis vero pro concilii scopo veritatem de indissolubilitate vinculi interveniente adulterio definivisse. Scopus quippe concilii erat eandem adstruere adversus novatores sec. XVI. qui non solum contrarium docebant , verum etiam hac de causa impetebant ecclesiae catholicae doctrinam , eamque tyrannidis incusabant et erroris. Neque tamen pepercit concilium graecorum praxi , quae ei pro-fecto perspecta erat , sed eam veluti evangelicae et apo-

(32) *Hist. conc. trid.* lib. XXII. cap. IV. n. 27-30.

stolicae doctrinae contrariam traduxit. Ast cum graeci numquam hac de causa ecclesiam romanam erroris arguerint, propriae consuetudinis contenti, idcirco concilium eos anathemate non perculit, prout perculit novatores. Atque exinde discimus discrimen quod intercedit inter primam et secundam huius canonis formam; quod scilicet prior non solum novatores, sed graecos etiam anathemate perculisset, posterior vero novatores tantum affecit, eadem in tuto permanente ecclesiae doctrina. Mirum proinde esse debet Paulum Sarpium eiusque asseclas discrimen hoc inter utrumque canonis exemplar non vidisse.

Quae cum ita sint, patet non solum canonem hunc esse dogmaticum, quatenus infallibilitatem ecclesiae docentis adstruit, sed praeterea etiam dogmaticum esse, quatenus pro obiecto habet doctrinam evangelicam et apostolicam.

Quapropter a vero abluunt quotquot ex nova canonis forma a tridentinis patribus adoptata intulerunt aut inferunt canonem hunc VII. mere disciplinarem esse, minime vero dogmaticum ac doctrinalem. Ad hanc sententiam post Paulum Sarpium, Launoius, aliique recentiores neoterici maiori aut minori temeritate pro ratione diversa quam consecrati sunt in hoc canone expendendo, accesserunt.

Sarpium quidem cum retulisset nonnullos patres in contraria fuisse sententia, adiecit concipi prorsus non posse, quam ratione ecclesia anathema minari potuerit iis, qui ipsius doctrinam erroris insimulant, quin simul opinionem huic ecclesiae doctrinae adversam ut erroneam condemnaret; quod cum ecclesia non fecerit, sed observantiam graecorum ultro dissimulaverit, absque haesitatione tenendum concludit, canone tridentino nequaquam doctrinam enunciari (33). Apostata Courayerius historiae eiusdem Sarpium in gallicam linguam translator et postillator sub specie solutionis cuiusdam dandae ad hanc difficultatem affirma-

(33) Apud Lallav. loc. cit.

vit, per canonem tridentinum in priori forma praxim graecorum damnatam, in posteriori autem forma toleratam ab ecclesia fuisse. Cum vero fieri nequeat ut ecclesia opinionem cui innitur graecorum praxis tolerare posset, siquidem ea esset erronea, exinde concludit Courayerius totam hanc de vinculi matrimonialis indissolubilitate quaestionem inter res mere disciplinares referendam esse (34).

Sic pariter Launoius quemadmodum ceteros canones II. III. IV. et XII. sic etiam VII. hunc canonem de indissolubilitate matrimonii in casu adulterii inter disciplinares accensuit, ita ut in ecclesiae potestate sit disciplinam hoc in canone sancitam pro ratione temporis immutare (35).

Horum vestigiis inhaerens I. A. Braun, ex historia canonis satis constare ait tridentinos in animo non habuisse ceu fidei dogma proponere, quo matrimonium etiam in fornicationis casu insolubile sit, nec habuisse in animo anathemate graecos, aliosque alioquin catholicos percellere, qui contenderant matrimonium dissolvi, adveniente adulterii casu, sed lutheranos et calvinistas, qui ecclesiae doctrinae censuram inusserant, asserentes eam esse erroneam et tyrannicam. Deinde pluribus prosequitur canonem tridentinum esse disciplinarem, eo quod indissolubilitas matrimonii nequaquam sit ab ecclesia proposita, et a Deo per auctores canonicos formaliter revelata; et quod veritas haec in ecclesia non sit constanter tradita, desintque characteres dogmaticae propositionis; demum concludit: « Pro regula generali, ex qua si leges aut praxes, etiam apostolicae, aliquando cessarunt, aut etiam variarunt in variis ecclesiis, eae disciplinares sunt, canonem quoque tridentinum nonnisi disciplinarem esse (36). »

(34) *Hist. du concil. de Trente.* Amsterdam 1750. tom. III. p. 92.

(35) *Regia in matr. potest.* opp. cit. ed. tom. I. part. II. pag. 825-858.

(36) *Dissertat. utrum matrimonii vinculum et in casu adulterii alterius coniugum iure divino, an solum iure ecclesiastico insolubile sit.* Moguntiae 1787. apud Bintherim, *Collectio dissert. sing. de matrimonio.* Dus-

Anonymus vero auctor operis *De potestate ecclesiae in matrimonium et de indissolubilitate matrimonii* an. 1791. vulgati, ex historia quam retulit de mutata canonis forma concludit, mirandum non esse, quod canon, qui politicis magis, quam ecclesiasticis auspiciis natus sit, in ea forma conditus fuerit, quae cum dignitate ecclesiae parum conciliari possit, quippe quae contrariam doctrinam non damnaverit; nec superesse aliud, quam ut verba canonis: *cum docuit et docet*, conditionate supponantur hoc sensu: ecclesiam non errare, si docuerit, et actu doceat; secus patres tridentinos historicum errorem commisisse sequeretur, utpote qui existimaverint doctrinam de indissolubilitate matrimonii pro casu adulterii per canonem VII. conc. tridentini sess. XXIV. propositam iam antea ab ecclesia declaratam fuisse, cum tamen id factum haud fuerit (37). Ita nonnulli serio nugantur!

Ast neque hic stetit Io. Iosephus Batz, qui cum Lauonio tum canones reliquos nuper commemoratos, tum canonem hunc VII. disciplinares esse affirmat; sed dato etiam et non concesso, eiusmodi canonem doctrinalem esse, inquirendum adhuc esse ait, an non synodus canonem hunc condendo, limites potestatis suae excesserit? Cum, ut ipse ait, pro doctrina evangelica et apostolica ea solum veritas Scripturae sac. haberi possit, quam patres ecclesiae unanimi consensu pro tali habent: id quod de indissolubilitate matrimonii praedicari nequit (38).

Omitto Socherum, qui arbitratur totam hanc quae-

seldorfii 1807. pag. 83 seqq. adversus quem Conf. Polychronium Gossmann, *Dissertatio biblico-critica de eo quod in casu adulterii coniugis circa vinculum matrimonii ex lege divina iustum est*. Apud Bintherim loc. cit. pag. 144 seq. et Iacobi op. cit. *Indissolubilitas vinculi matrimonialis demonstrata ex iure naturali et positivo divino*. Moguntiae 1788. p. 134 seqq. Cf. Roskovány op. cit. *De matr.* tom. II. pag. 344. seq.

(37) Apud Roskovány ibid.

(38) In op. germ. *Harmonia legum civilium Bavariae divortialium cum sac. Scriptura et traditione*. Ibid. pag. 345.

stionem non fidei, sed *legislativae prudentiae* esse obiectum, et canonem tridentinum immediate nonnisi *defensivum* esse adversus calumniam protestantium, mediate autem *permissivum* relate ad graecos (39). Silentio etiam praetereo auctorem dissertationis de divortii in Bavaria, qui autumat hoc canone ecclesiam illis tantum anathema dixisse, qui matrimonium in casu adulterii *proprio motu* dissolvi posse assererent (40). Et ita porro alios praetermitto affirmantes aut ecclesiam veritatem hanc numquam posse ad dogmatis dignitatem evehere (41); aut posse graecos iuxta ac latinos in suo sensu abundare (42); aut ius solvendi matrimonia ad iura maiestatica civilis imperii esse referendum (43); aut patribus tridentinis ignotum esse non potuisse traditionem in hoc capite nimis vacillantem esse (44), aliaque id genus multa, quae vel referre taedet.

His itaque audacibus, imo et temerariis concilii tridentini censoribus et corruptoribus dimissis, qui irrito conatu adnisi sunt vim huius canonis extenuare et eludere, ut eundem praeiudicatis suis placitis accommodarent, reliquum est, ut paucis quidnam de eius natura catholico sensu censendum sit, et quaenam sint ex eo deducenda consecraria expromamus.

Itaque primo, nemo vere catholicus umquam dicet canonem VII. esse *disciplinarem*, seu habere pro obiecto meram disciplinam mutationi obnoxiam. Id enim repugnat

(39) Ibid. p. 346. seqq. qui observat vel ab ipsis protestantibus opinionem Socheri censura perstrictam fuisse: quod non semel quibusdam neotericis contingit, ut a protestantibus vapulent, qui tamen catholici, saltem nomine, audiunt.

(40) Ibid. pag. 347.

(41) Ibid. auctor libelli *De divortii* typis neustadiensibus editi 1826. p. 35.

(42) Ita post Van Espen, Eybel, Braun, Pehem sentit Bernard. Saur ibid.

(43) Ita auct. *Disquis. de indissol. matr.* Rotwilae ed. 1832. Cf. *Folia sincera de reb. theol. et eccles.* p. 349. ibid.

(44) Uti Th. Dolliner canonista austriacus in op. germ. *Diffusa explicatio secundi capituli general. cod. civilis* part. II. Vienn. 1835. pag. 5. 6.

scopo quem sibi tridentina synodus proposuit, ut ipsa praefata est, insigniores impiorum hominum *haereses et errores exterminandi* et anathematismis plectendi (45); repugnat praeterea ipsius canonis verbis, quibus anathema decernitur in eos, *qui dixerint ecclesiam errare cum docuit et docet iuxta evangelicam et apostolicam doctrinam, propter adulterium alterius coniugum matrimonium non posse dissolvi*. Si igitur de doctrina et quidem evangelica et apostolica agitur, seu de doctrina quam ecclesia accepit a Christo et ab Apostolo, et vi cuius decernit propter adulterium matrimonii vinculum non posse dissolvi, quomodo affirmari potest in eo canone agi de re disciplinari ac libera, aut saltem mutationi obnoxia, quasi nempe ecclesia doctrinam Christi et Apostoli immutare posset? Hoc dicere impium sane est. Denique repugnat ipsi historiae canonis iuxta quam constat in prima forma anathema directe inflictum fuisse in eos, qui dicerent matrimonia consummata ob adulterium posse dissolvi.

Immo dicimus canonem hunc non modo doctrinalem, verum etiam esse *dogmaticum*, qui scilicet adstruit fidei dogma ab omnibus fidelibus firmiter tenendum et profitendum; ita tamen ut obiectum directum huius dogmatis sit inerrantia ecclesiae in indissolubilitate matrimonialis vinculi in adulterii casu docenda; indirectum autem sit indissolubilitas ipsa, quam ecclesia docet iuxta evangelicam et apostolicam doctrinam. Quocirca qui ecclesiam circa hunc articulum erroris incusat est *haereticus*, atque in anathema incurrit; qui vero contrariam doctrinam tenet saltem in errore versatur haeresi proximo.

Exinde infertur, ut supra diximus, insigne quod intercedit discrimen inter priorem ac posteriorem huius canonis formam; nam iuxta priorem uno eodemque anathemate obvoluti essent tum novatores tum graeci; per posteriorem

(45) In praemissa *Doctrina de sacramento matrimonii* sess. XXIV.

autem soli novatores , qui dicunt ecclesiam hoc in articulo errare , anathemate feriuntur ; non vero graeci , qui licet contrarium sentiant , attamen cum erroris ecclesiam non arguant , ab hoc anathemate sunt immunes.

Sed si ab anathemate graeci divellentes connubium immunes evaserunt ob formae prioris mutationem , non ideo post tam solemnem concilii tridentini sanctionem immunes censi possunt a nota temeritatis et erroris in doctrina , et gravis culpae in praxi. Siquidem universam obligant ecclesiam decreta concilii oecumenici , praesertim doctrinalia et dogmatica , cuiusmodi can. VII. esse ostendimus. Quapropter etsi forte ante huius canonis promulgationem , quodammodo in sua praxi excusari posse videantur , certe postquam concilium tridentinum hanc suam definitionem emisit , qua luculenter adeo edixit indissolubilitatem vinculi coniugalis in casu adulterii affirmari iuxta doctrinam evangelicam et apostolicam , excusari non amplius possunt. Nam sicut doctrina evangelica et apostolica non potest non esse vera , ita doctrina opposita non potest non esse falsa et erronea , et qui iuxta hanc operantur , nequeunt se a gravi culpa subducere. Graviter igitur peccant graeci quoties dissolvunt coniugia , nisi ignorantia invincibili detineantur , et novum quod contrahunt matrimonium , ob impedimentum ligaminis , nullum ac irritum est. Neque eos excusat inveterata consuetudo , quae evangelicae et apostolicae doctrinae opponitur , ac proinde non est censenda nisi inveteratus abusus , quem ecclesia praesertim post conc. Tridentinum nullo modo tolerat , imo nec tolerare potest.

Idque intellectum volumus sive proprio motu , nempe privato arbitrio , sive publico etiam iudicio cognita causa a tribunali ecclesiastico aut civili ac lata sententia , matrimonium dissolvatur. Si porro agatur de graecis schismaticis , ecclesia catholica eiusmodi divortia de facto im-

pedire non potest, prout et alia, quae contra fas et ius fiunt in communione separata et acatholica, sed non ideo tamen ea probat, sed quantum in se est, improbat et condemnat. Si vero sermo sit de graecis unitis, cum ipsi profiteantur se non secus ac reliqui catholici omnes obsequi canoni tridentino atque constitutionibus pontificiis, praesertim quae pro obiecto habent fidem et mores, profecto nulla ratione a gravi culpa excusari poterunt, nisi illorum praescriptionibus se conforment.

Ex his pronum est inferre, quid sentiendum sit de praxi, quam auctor de re sacramentaria viguisse scribit inter graecos latinis etiam episcopis subiectos. Profert hic auctor in provinciis et dioecesibus ubi graeci latinis admixti sunt, et proprias habent ecclesias, a latinis episcopis quibus subiiciuntur, nihil ordinatum reperiri contra antiquam illam quam hactenus retinuerunt matrimonia propter adulterium dirimendi consuetudinem, ac in synodicis tantum constitutionibus cautum esse, ne mariti auctoritate propria, nullaque praemissa forma iudicii uxores adulterii praetextu dimitterent, et novis deinceps uxoribus iungerentur. In cuius rei confirmationem refert card. Montaltum Montis-Regalis in Sicilia archiepiscopum in synodo provinciali an. 1652. habita hoc tantum de graecorum matrimoniis decrevisse: «Tam facile dirimi inter coniuges graecos matrimonia approbare nullo modo debemus: ideoque huc usque factas separationes quoad vinculum extraiudicialiter et auctoritate propria nullas fuisse declaramus (46).» Haec ipsa ex hoc auctore refert Collet atque approbare videtur (47). At nos quamvis haec verissime ab hoc auctore historice relata existimemus, nulla ratione probare possumus.

Quominus enim nos huic praxi, hisque synodalibus

(46) Drouin lib. IX. c. I. §. 2. p. 452. ed. Venet.

(47) Tom. VIII. De sacr. matrim. c. V. art. 3. n. 317.

sanctionibus episcoporum latinorum , in quorum provinciis seu dioecesibus graeci degunt , assentiamur , plura sunt quae obstant.

Ac 1. obstat sanctio tridentina , quae definivit ac declaravit , non posse dissolvi matrimonia propter adulterium iuxta doctrinam evangelicam et apostolicam ; adeoque nisi dicere velimus ecclesiam universalem pati posse , ut contra doctrinam evangelicam et apostolicam matrimonia post legalem adulterii probationem dirimantur , et alia ineantur , profecto reiiciamus necesse est eiusmodi distinctionem inter divortia facta propria seu privata auctoritate , et divortia quae fiant post iuridicam adulterii probationem latamque a civili aut ecclesiastica auctoritate sententiam : haec enim rei substantiam nullatenus immutant. Alioquin admittere deberemus quod paulo ante citatus auctor dissertationis *De divortis* in Bavaria effutiit , ecclesiam tantum illis anathema hoc canone VII. dixisse , qui matrimonium in casu adulterii *proprio motu* dissolvi posse assererent. Hoc vero quantum a vero abludat , nemo catholicorum est , qui non videat. In iis enim quae sunt contra doctrinam evangelicam et apostolicam , seu contra veritatem divinitus revelatam nulla fieri potest transactio.

2. Obstat constitutio Clementis VIII. qui praecipit episcopis latinis , in quorum dioecesibus graeci suas habent ecclesias suosque ritus servant , ut inter coniuges graecos matrimonia dirimi , seu divortia quoad vinculum fieri *nullo modo* permittant aut patiantur , et si qua de facto praecesserint , ea nulla et irrita declarent. Porro si *nullo modo* , ergo neque proprio motu , neque legali sententia disiungi ob adulterium quoad vinculum matrimonia possunt. Si qui proinde episcopi suis synodicis sanctionibus id unum caverunt , ne mariti auctoritate propria , nullaque praemissa sententia , aut forma iudicii uxores adulterii praetextu dimitterent , et novis deinceps uxoribus iungerentur , prout

praestitit archiepiscopus monsregalensis, ab officio desciverunt, et a mente summi pontificis, qui contrarium omnino constituit. Ipse nullam omnino distinctionem inter privatam et publicam auctoritatem admisit, immo vero quamcumque distinctionem penitus exclusit dicens: *nullo modo.*

3. Obstat fidei formula ab Urbano VIII. omnibus qui ex schismate ad unitatem se recipere vellent, proposita, et a Benedicto XIV. confirmata et renovata, vi cuius graeci profitentur matrimonii *vinculum indissolubile esse*, et quamvis propter adulterium, haeresim aut alias causas possit inter coniuges tori et habitationis separatio fieri, tamen illis aliud matrimonium contrahere fas non esse. Iamvero si qui accedere cupiunt ad ecclesiae catholicae unitatem tenentur ita sentire et profiteri, adeo ut sine eiusmodi professione illis aditus ad unionem catholicam nullimode pateat, dicendum ne erit id illis posse permitti, qui iam in ecclesiae catholicae communionem et unitate reperiuntur? Quis sanus id vel cogitare potest? Praesertim cum haec eadem fidei professio identidem, nempe in actis solemnioribus a graecis unitis fieri debeat?

4. Obstat sac. congregationis concilii, et ss. inquisitionis decretum, quo negatum est posse quempiam propter adulterium uxorem iuridice criminis convictam et confesam deserere, ita ut liceat novum celebrare coniugium, quamvis graeca synodus contrariam sententiam emisit. Hic porro est casus illis identicus, in quibus card. Montaltius archiepiscopus Montis Regalis in Sicilia indulgere vinculi dissolutionem visus est.

Atque ut rem totam paucis concludamus, si graeci uniti catholici sunt, debent omnibus concilii oecumenici et romanorum pontificum sanctionibus obtemperare. Porro ut ex allatis documentis patet, non solum fidelibus quibuscumque vetitum est quoad vinculum in adulterii casu

coniugium dissolvere, sed praeterea declarantur expresse irrita ac nulla, si qua post separationem coniugia contrahantur. Qui proinde hoc attentaverint, quicumque demum illi sint sive graeci sive latini, polygamae simultaneae rei constituuntur.

Quapropter cum vulgo dicitur ecclesiam in graecis eiusmodi divortia tolerare, intelligi id debet *negative*, quatenus patitur quod impedire non potest, prout se gerit relate ad alia peccata, quibus filii eius contra ipsius voluntatem se commaculant, reosque efficiunt. Haec facinora impedire pro viribus munus est praepositorum, seu episcoporum, qui omni ratione satagere debent, ut concilii de matrimonio doctrina in praxim deducatur. Quod si ipsi negligentius agant et abusus ex eorum incuria et conniventia irrepant, eorundem oneratur conscientia. Et haec hactenus.

CAPUT V.

DE SOLUTIONE IMPERFECTA MATRIMONII CHRISTIANI SEU DE SEPARATIONE INTER CONIUGES QUOAD TORUM ET COHABITATIONEM.

ARTICULUS I.

Concilii tridentini doctrina de separatione quoad torum et cohabitationem plures ob causas, manente vinculo, exponitur et vindicatur.

Quo protestantes faciliores se praebent ad dirimenda coniugia quoad vinculum, eo difficiliores se exhibent in admittenda eorundem dissolutione quoad torum tantum et habitationem. Quae quidem agendi ratio sibi cohaeret; quid enim refert dissolvere coniugia quoad torum et cohabitationem, quando longe facilius ipsis suppetit via se

ab invisio coniuge liberandi, aliumque praeterea eligendi per diremptionem plenam ipsius vinculi? Hanc eandem viam facile adoptant quotquot increduli ab ecclesiae instituto desciscunt, ut liberius vivant (1).

Etsi promiscue usurpari consueverint voces *repudii* ac *divortii*, diversa tamen earumdem acceptio est iuris peritis atque theologis. Siquidem iurisperiti repudium vocant dimissionem sponsae, interdum etiam uxoris; divortium autem dimissionem solius uxoris post matrimonium sive quoad torum, sive quoad vinculum (2). Eadem apud canonistas iisdem verbis significatio inhaesit, qui proinde sub eodem titulo *De divortiis* agunt de dissolutione matrimonii tum quoad vinculum, tum quoad torum et cohabitationem. Penes theologos vero usus plerumque obtinuit, ut proprie solutio quoad torum dicatur divortium, repudium autem dissolutio quoad vinculum. Attamen etiam apud ipsos hae voces promiscue pro utraque separatione adhibentur.

Sic pariter passim sub una veluti formula enunciatur separatio coniugum *quoad torum et quoad cohabitationem*; magnum tamen inter duo haec interponitur discrimen. Nam separatio quoad torum privatim fieri potest propria auctoritate, mutuoque consensu, eo ipso quod res est prorsus privata; contra vero diremptio quoad habitationem passim fieri nequit, tum quod publica sit, et in omnium oculos incurrat, tum quod scandalum quoque

(1) Sic constitutum fuit in Galliis lege lata 20. septemb. 1792. quae admittebat quidem divortium, non autem separationem, vinculo permanente. In codice porro civili utrumque conceditur, ut nimirum fieri possit separatio ab iis, qui divortium putant illicitum, ut sic uniuscuiusque consentiae prospiceretur. Cf. *Rapport de jurisprudence* in art. *Séparation de corps*, tom. XVI. p. 32.

(2) Cuius significationis exempla suppetunt in L. *Inter stuprum*, et in L. *Inter divortium* ff. de verbor. Cf. *Iuris civilis indicem* tom. VI. al. VII. Lugduni 1612. ubi inter cetera ad verb. *Divortium* dicitur: « *Divortium* proprie dicitur inter coniuges, *repudium* vero inter sponso; nonnumquam tamen confunduntur, q. 2. in L. *Quod servus, de conditione causa data* etc. »

praebere soleat, non privata auctoritate, sed ecclesiae iudicio fieri debet, prout sancitum est in iure canonico cap. *Porro de divortiis* (3). Cum autem separatio quoad cohabitationem necessario includat etiam separationem quoad torum, cumque re duo haec coniungantur, et iisdem pene argumentis adstruantur, passim etiam una eademque composita formula enunciantur.

Ceterum ob varias causas eiusmodi separationem fieri licite posse sancivit conc. tridentinum adversus novatores can. VIII. «Si quis dixerit, ecclesiam errare, cum ob multas causas separationem inter coniuges quoad torum, seu quoad cohabitationem, ad certum, incertumque tempus fieri posse decernit; anathema sit.»

Concilium quidem *multas* hasce causas, ob quas divortium eiusmodi fieri potest ex ecclesiae doctrina non enumeravit, verum unanimi theologorum consensu ex ecclesiae decretis et praxi potissimum deducto variae hae causae ad duas revocari solent genericas, quae plures alias sub se complectuntur. Sunt autem consensus mutuus, et crimen; et utraque sac. Scripturarum auctoritate et traditione innititur.

Ex mutuo consensu possunt coniuges propter maiorem perfectionem et altiorem statum se ab invicem separare ad caelibatum profitendum voto perpetuo, ac professione religiosa. Quae quidem agendi ratio conformis est Christi doctrinae apud Matth. XIX. 29. «Omnis qui reliquerit domum . . . aut uxorem aut filios etc. centuplum accipiet et vitam aeternam possidebit.» Non temere

(3) Sic enim se habet hoc decretum: «Porro de comite Pontini, qui B. uxorem suam absque iudicio ecclesiae dimisit, quia eam cognatam fuisse uxoris defunctae proponit; prudentia tua cognoscat, quod si etiam parentela esset publica et notoria, absque iudicio ecclesiae ab ea separari non potuit.» Ed. Pithoei *Decret. Gregorii IX.* Paris 1687. tom. II. p. 220.

Cf. tamen Ferraris in *Biblioth. canon.* ad litt. *De divortiis* n. 20 seqq. Cf. etiam titulum *Decretal. de divortiis* ubi nonnullos casus exceptionales invenies.

aut inconsulto id fieri debere per se quisque videt. Sic illicite id fieret, quamdiu proles adhuc instituenda est, et parentum cura ac sollicitudine indiget, nec in tuto satis est posita. Numquam enim evangelica consilia homines liberant ab officiis, quibus ex lege naturali ac divina obstringuntur, neque ecclesia umquam hisce in casibus eiusmodi probaret separationem ad religiosum statum profectendum. Quod vero attinet ad simplicem separationem a toro, de qua coniuges inter se conveniunt maioris perfectionis gratia, nihil obstat, dummodo incontinentiae periculum aliud non suadeat. Utriusque separationis exempla in annalibus ecclesiasticis suppetunt; nota sunt omnibus exempla s. Pulcheriae et Marciani; s. Melaniae iunioris et Piniani; Aproniani et Avitae; s. Birgittae et Ulfonis, ut alia pene innumera eiusmodi exempla quibus iugiter splenduit ecclesia Dei, tacitus praeteream. Constans porro haec agendi ratio satis patefacit quinam sensus ecclesiae hac de re fuerit.

Sine consensu vero alterius partis, immo etiam ea repugnante, potest matrimonium quoad torum convictumque dirimi ob crimen; idque triplex, nempe ob adulterium alterius coniugis; ob apostasiam a vera religione sive per infidelitatem sive per haeresim, quae infidelitatis est species; ac ob inductionem sive seductionem ad peccatum.

Circa adulterii crimen nulla potest esse contentio, cum aperta sint Christi verba in utroque Matthaei textu, scilicet V. 32. et XIX. 9. quibus denunciat Dominus noster reum esse quicumque dimiserit uxorem suam, *excepta fornicationis causa*, aut *nisi ob fornicationem*. Igitur hac interveniente causa fornicationis sive adulterii immunis erit a crimine, qui coniugem dimiserit. Nam cum ex superius demonstratis, eiusmodi separatio fieri non possit quoad vinculum, restat proinde, ut fieri queat quoad torum et cohabitationem; atque ita semper servatum est in

ecclesia Dei, in qua, uti videbimus, plura hac de re fuerunt constituta.

Verumtamen ius istud non adest, aut etiam amittitur in nonnullis casibus. Illicitum scilicet fit divortium, si fornicatio sine crimine esse contingat, ac mere materialis sit, ut cum mulier vim passa est, aut per errorem se illi commiscuit, quem virum suum esse putavit. Nam cum divortium sit poena, si nulla praecesserit culpa, poena locum habere nequit. Illicitum praeterea fit, si uterque coniux eodem crimine teneatur, prout in iure canonico sancitum est ab Alexandro III. et Innocentio III. (4). Fit item illegitimum, si post cognitum adulterium coniugis, cum ea se copulaverit; censetur enim hoc in casu crimen fuisse condonatum. Demum si auctor fuit coniugi ut fornicaretur. Res per se patet, ac theologi omnes hac in re uno ore consentiunt (5).

Aliqua agitur quaestio circa significationem vocis *adulterii*; num scilicet ad divortium licite faciendum requiratur adulterium presse sumptum, an vero sufficiat aliud quodcumque immane facinus adversus matrimonii honestatem, quodque sub generali hac adulterii denominatione comprehendi potest; seu ut alii quaestionem proponunt; quaeritur num adulterii nomen debeat sumi *grammaticae* de commixtione viri coniugati cum muliere sive soluta sive coniugio obstricta, an vero etiam *logice* sive ampliori significatione de quovis carnali flagitio, fornicatione seu adulterio quandoque peiori.

(4) Ab Alex. III. lib. V. Decret. tit. XIX. *De divortiis* c. 2. *Quaesivit a nobis* et c. 5. *ex litteris*. Et ab Innoc. III. tit. XVI. *De adulteriis et stupro* c. 6. *Intelleximus*, et c. 7. *Tua fraternitas*, in quo posteriori capitulo haec leguntur: «Tua fraternitas requisivit, utrum aliquo deneganti uxori suae in adulterio deprehensae debitum coniugale, si postmodum ipse cum alia perpetret adulterium manifeste, cogi debeat, ut eandem maritali affectione pertractet, super quo resp. quod cum paria crimina compensatione deleantur, vir huiusmodi fornicationis obtentu suae uxoris nequit consortium declinare.»

(5) Quotquot nempe commentarios ediderunt in lib. IV. *Sentent. dist.* 31. et qui deinceps eos sunt secuti.

Controversia haec est satis antiqua, in qua ancipites se interdum veteres patres ostenderunt. Sane s. Augustinus scribit: « Sed si non omnis fornicatio etiam *moechia* dici potest, ubi sit in Decalogo prohibita illa fornicatio, quam faciunt viri, qui uxores non habent, cum foeminis, quae maritum non habent, utrum inveniri possit, ignoro. Sed si furti nomine bene intelligitur omnis illicita usurpatio rei alienae (non enim rapinam permisit, qui furtum prohibuit, sed utique a parte totum intelligi voluit quidquid rerum proximi aufertur), profecto et nomine *moechiae* omnis illicitus concubitus atque illorum membrorum non legitimus usus prohibitus debet intelligi (6). » Sic etiam s. Hieronymus scribens ad Amandum presbyterum haec habet: « Quamdiu vivit vir, licet adulter sit, licet sodomita, licet flagitiis omnibus coopertus, et ab uxore *propter haec scelera derelictus*, maritus eius reputatur, cui alterum virum accipere non licet (7). » Quibus verbis, ut patet, s. Doctor non ob solum adulterium presse sumptum, sed ob alia flagitia quoad torum mensamque ab uxore maritum deseri posse, supponere videtur, adeoque sub fornicationis seu *moechiae* nomine cetera crimina comprehendendi, quibus legitime coniugium dissolvi possit.

Non minus perspicue id ipsum s. Isidorus hispalensis tradere videtur dum ait: « Omnis immunda pollutio fornicatio dicitur, quamvis quisque diversa turpitudinis voluptate prostituatur. Ex delectatione enim fornicandi varia gignuntur flagitia, quibus et regnum Dei clauditur, et homo a Deo separatur (8). » Et alii passim.

Verum vix dubitare fas est, in substrata materia adulterii vocem rigoroso sensu esse accipiendam, non autem

(6) *Quaest. in Exod.* quaest. LXXI. n. 4.

(7) Ed. Vallars. ep. LV. al. CXLVII. n. 3.

(8) Lib. II. *Sententiar.* seu *De summo bono*, cap. XXXIX. n. 19. Opp. ed. Arevali. Romae 1802. tom. VI. p. 245.

pro qualibet turpitudine. Etenim ubi agitur de poena gravissima infligenda, qualis aestimatur separatio ab altero coniuge, lex debet esse conceptis verbis expressa; iam vero coniugis fornicatio, seu moechia tam in Scripturis, quam in ecclesiasticis legibus ad separationem inducendam ab altero coniuge, seu ad divortium faciendum expresse memoratur; non autem aliud quodlibet peccatum quod fornicatione aut moechia deterius aut deformius sit.

De Scriptura nihil attinet dicere post commemoratos Matthaei textus. Patrum vero et conciliorum profert Gratianus testimonia in Decreti p. II. causa XXXII. q. VII. cap. 12. et deinceps, in quibus recensentur turpitudines adulterio graviores; attamen non nisi adulterium uti legitima causa separationis inter coniuges memoratur (9). Exemplo sit s. Augustinus, qui lib. I. *De coniugiis adulterinis* adeo insistit ut evincat, post dimissionem uxoris ob fornicationis causam, non licere viro absque adulterii piaculo alteri adhaerere; ac proinde veluti pro certo sumere videtur ob adulterium et quidem solum posse a coniuge quoad torum convictumque legitime separari. Inter cetera describam quae habet s. Doctor cap. IX. ubi quum sibi obiecisset Pollentii difficultatem ex eo petitam, quod Dominus non generaliter dixerit reum adulterii fieri, qui uxorem dimiserit et aliam duxerit, sed interposuerit causam fornicationis, sic eidem occurrit: « Credo, quod illud quod maius est, hoc Dominus commemorare voluit. Maius enim adulterium esse quis negat, uxore non fornicante non dimissa alteram ducere, quam si fornicantem quisque dimi-

(9) Sic in cap. 12. *Offerebat sanctus Loth. c. 13. Flagitia, quae sunt contra natur.* cap. 14. *Usus naturalis.* Et in quaest. I. c. 3. allegatur s. Hieronym. qui expresse: « In coniugio, inquit, quis positus, quaecumque peccata fecerit, non propriam infuscat coniugem, sed fornicatio uxorem coinquinat: ut iam non sit viro suo licita, sed quasi adultera etc. » Verum textus hic apocryphus desumptus est ex comment. in epist. II. ad Corinth. c. 3. qui tribuuntur haeretico Pelagio. Cf. Admon. praevidiam his comment. Vallarsii in app. ad op. s. Hieronymi tom. XI.

serit, et tunc alteram duxerit? Non quia et hoc adulterium non est; sed quia minus est, ubi fornicante dimissa, altera ducitur (10). » Quod fuse deinde prosequitur.

Item s. Hieronymus in Matth. XIX. in illa verba: *Quicumque* etc. scribit: *Sola fornicatio est*, quae uxoris vincat affectum: immo cum illa unam carnem in aliam diviserit, et se fornicatione separaverit a marito, non debet teneri; ne virum quoque sub maledicto faciat, dicente Scriptura: *Qui adulteram tenet, stultus et impius est*. Ubiquumque est igitur fornicatio, et fornicationis suspicio, libere uxor dimittitur. Et quia poterat accidere, ut aliquis calumniam faceret innocenti, et ob secundam copulam nuptiarum, veteri crimen impingeret, sic priorem dimittere iubetur uxorem, ut secundam, prima vivente, non habeat (11). » Alia eiusmodi testimonia cum nota sint praetermitto.

His addenda est ecclesiae et ecclesiastici fori consuetudo; numquam enim ad obtinendam separationem ad forum ecclesiasticum accusationes deferuntur ceterorum criminum, prout deferri iugiter solent accusationes adulterii, cum vel certa argumenta vel gravissimae suspiciones et coniecturae ad evincendum fornicationis flagitium alterutrius coniugis suppetunt. Concludamus idcirco oportet adulterii nomine in re qua de agitur pressa significatione venire cuniugalis thalami violationem per congressum cum extraneo vel extranea, eamque in genere suo completam (12). Atque ex his germana mens intelligitur textuum, qui allati antea sunt ex ss. Augustino, Hieronymo et Isidoro, qui certe noluerunt adulterio paria facere recensita flagitia, uti ex adductis eorum verbis planum fit.

(10) Opp. ed. Maur. tom. VI. col. 391 seq.

(11) *Comment.* in cap. XIX. Matth. v. 9. ed. Vallars. tom. VII. col. 145 seq.

(12) Cf. Trombellium *De matr.* dissert. VI. c. X. q. I. Bonon. 1781. tom. II. pag. 45.

Verum ut redeamus ad id unde discessimus, aliud crimen ob quod separatio fieri potest inter coniuges, est apostasia a vera religione, seu a catholica ecclesia, quae contingere potest tum infidelitatis tum haeresis professione. Idque potissime locum habet cum instat perversionis periculum; quamquam separare se coniuges possint etiam ut horrorem significant adeo immanis facinoris (13). Sane non desunt in historia ecclesiastica praeclara exempla sanctarum mulierum, quae se a societate apostatarum subtraxerunt, earumque pia agendi ratio non semel salutaris maxime fuit viris ipsis, qui resipiscentes non modo ad meliorem frugem revocati sunt, verum etiam gloriosi martyres evaserunt (14). Qua de re luculentum habemus Apostoli monitum ad Titum III. 10. « Haereticum hominem post unam et secundam correptionem evita. » Quibus verbis Apostolus omnes prorsus complectitur, nulla parentum aut uxoris exceptione facta. Eodem quoque sensu intelligi debet Christi sententia Luc. XIV. 26. « Si quis venit ad me, et non odit patrem suum et matrem et uxorem... non potest meus esse discipulus. »

Tertia denique causa dissociandi coniugium est si alter coniugum alterum ad peccatum impellat; quod fieri multiplici ratione consuevit, verbis, exemplo, seductione,

(13) In his habenda est ratio temporum, locorum ac personarum. Nam nunc receptum est passim in Galliis praesertim ac in Germania et Austria, ut matrimonia mixta celebrentur, et si cum debita facultate, servatisque conditionibus id fiat, licite fit. Si igitur licite contrahi coniugium potest cum haereticis, cum iisdem licite cohabitare coniuges catholici possunt post haereseos crimen, prout revera in illis regionibus et alibi fieri consuevit nemine repugnante.

(14) Inter ceteros exemplo sit s. Iacobus Persa cognomento *Intercisus* ob crudele quod in membris singulis corporis sui martyrrium sustinuit. Hic quamvis ex christianis genitoribus progenitus, in regis, gratiam non dubitavit soli et igni cultum exhibere; qua de causa eius mater et uxor ingenti affectae moestitia ac dolore percitae se ab eius contubernio subtraxerunt eumque gravibus litteris de errore obiurgarunt; quibus ille permotus ac in se reversus ad quaelibet perferenda se regi obtulit. De quo praeter Baronium Cf. *Menologium graecum*. Urbini 1726. par. I. p. 215.

minis etc. ita ut cohabitatio proximum sit Dei offendendi periculum. Huc spectat illud Christi Domini effatum Matth. XVIII. 9. « Si oculus tuus scandalizat te, erue eum et proiice abst te. » Quae verba commentario suo illustrans s. Hieronymus docet hanc esse Domini sententiam, ut si ii, qui nobis coniunctissimi sunt et chari oculorum instar, ut parentes, filii, uxor, causa sint ruinae, ab iis recedamus. Nota pariter sunt s. Gregorii M. verba: « Ut uxorem et qui nobis carnis cognatione coniuncti sunt, et quos proximos novimus, diligamus; et quos adversarios in via Dei patimur, odiendo et fugiendo nesciamus (15). » Et sane nihil in hoc mundo est, quod cum Dei honore ac animi nostri salute possit conferri; nuncium omnibus mundanis rebus potius remittere debemus, quam animae detrimentum in negotio salutis aeternae patiamur.

Libet hoc concludere argumentum verbis Estii, quae haec sunt. Ac de crimine quidem fornicationis iam diximus... De aliis autem criminibus, cuiusmodi sunt impietas, apostasia, haeresis, latrocinium, sacrilegium et similia generaliter annotandum, non esse licitum cuiquam propter has causas dimittere a se coniugem eo modo quo dimittitur causa fornicationis, id est, perpetuum cum eo divortium facere, ac iure petendi debiti simpliciter privare; cum Christus de hac re praecipiens solam exceperit fornicationem... quia per hoc solum crimen iuxta significationem eius supra expositam, ammittitur ius potestatis coniugalis, sic ut innocenti liberum sit, facto divortio vovere Deo perpetuam continentiam, imo et ad religionem transire; quod facere ei non licet facta dimissione propter alia crimina. Verumtamen licebit dimittere coniugem haereticum, vel alias impium, aut facinorosum, aut saevum, si ab eo, vel ipsi coniugi, vel liberis immineat periculum, aliquod animae aut corporis, ut si sit periculum ne

(15) *Hom. XXXVII. in Evang.*

eius haeresi, aut impietate, aut sceleratis moribus inquinantur et ad peccatum pertrahantur, vel ne ab eo interficiantur. Sed haec separatio fit tantum iure, ac via *defensionis*, non autem *iure matrimoniali* ob violatam coniugii fidem. Unde si periculum huiusmodi non subsit, locum habere debet quod dicit Hieronymus in Matth. XIX. ad illud: *Si ita est causa hominis etc. Grave pondus uxorum est; si excepta causa fornicationis eas dimittere non licet: Quid enim si temulenta fuerit, si iracunda, si malis moribus, si luxuriosa, si gulosa, si vaga, si iurgatrix, si maledica, tenenda erit istiusmodi? Volumus, nolumus, sustinenda est. Cum enim essemus liberi, voluntarie nos subiecimus servituti* (16).

ARTICULUS II.

Doctrina concilii tridentini de separatione quoad torum et cohabitationem ob plures causas manente vinculo ab adversariorum difficultatibus vindicatur.

Iam monuimus sec. XVI. novatores, quibus nunc passim increduli ac libertini assentiuntur, abhorruisse a perpetua aut temporaria, manente vinculo, coniugum separatione, quo facilius possint ad nova vota transire. Canonem propterea VIII. concilii tridentini oppugnant ac si rem novam sanxerit, ac doctrinae evangelicae et apostolicae, imo etiam sanioris ethicae ac moralis principiis contrariam. Calumniosas omnino falsasque esse eiusmodi imputationes evincere distinctis paragraphis aggredimur.

§. I.

Doctrina canonis VIII. concilii tridentini a nota *novitatis* vindicatur.

Incognitam ecclesiasticae antiquitati separationem a toro convictuque, manente coniugali vinculo, haud pauci

(16) In IV. *Sent.* D. XXXV. §. 3.

dixerunt, ut sic inferrent toties veteres locutos esse de solutione quoad vinculum, quoties de coniugii diremptione disseruerunt, sive ob fornicationem, sive ob aliam causam quamcumque (17). Ast perperam haec excogitata esse facile est ostendere, si ratio habeatur tum intimae rei naturae, tum documentorum quae ex antiquitate universa nobis suppetunt, tum generatim sensus traditionalis catholicae ecclesiae, quibus certiores efficimur iugiter a christianae rei primordiis eam doctrinam et praxim obtinuisse. Singula perpendamus.

Primo enim intimam rei qua de agimus naturam exposcere separationem sive temporaneam sive perpetuam coniugum, incolumi matrimonii vinculo, constat 1. ex eo quod sit in coniugum arbitrio in continentia vivere; licet individuum vitae consuetudinem retineant: quo in casu habetur quidem separatio a toro, minime vero diremptio a vinculo. Ecquis porro ibit inficias in coniugum esse potestate ita se gerere, immo vero ad hanc ab usu coniugii abstinendam voto etiam se obstringere? Nemo autem dicet liberos eiusmodi coniuges esse ad novum ineundum coniugium. Itaque hac in hypothesis habetur divortium quoad torum, minime vero quoad vinculum. Ergo rei ipsius natura postulat, ut eiusmodi separatio admittatur.

2. Constat ex casu haud infrequenti gravis, diuturnae, ac vero etiam perpetuae infirmitatis alterutrius coniugis in quo ab usu coniugii cohibere se debent, et interim mutuam sibi auxilium praebere in re familiari, atque in sobolis iamdiu procreatae institutione. En iterum quomodo natura postulet separationem quoad torum vigente coniugali vinculo. Siquidem nec hi possunt novas inire nuptias altero adhuc in vivis agente.

(17) Ita omnes antiquiores haeretici saec. XVI. Lutherus in lib. *De capt. Babyl.* cap. *De matrim.* Philip. Melanchton in *Loc. theolog.* tit. *De coniugio*, Chemnitius in II. part. *Examin.* conc. trid. aliique passim.

3. Constat generatim ex aliis casibus in quibus dictante ipso naturae iure coniuges cogi nequeunt ut eodem lecto, mensa victuque utantur. Ecquis enim affirmare audeat teneri coniugem cum eo consuescere, qui phthisi laboret, quae sin minus contagiosa natura sua sit, saltem uti talis apprehenditur? cum eo qui pestifera febris sit correptus aut alio morbo qui facile tactu atque consuetudine cum aegroto contrahatur? Sane quisque cavere sibi pro viribus potest, quandoque etiam debet. Qua in re prudentia et consilio opus est, parochi et medici charitas adhibenda, ut nec aeger praesidio destituatur et pereat, nec sanus in tabem vel alium gravem morbum incurrat. In his rerum adiunctis separatio a toro, a communi mensa, et cohabitatione non ab ecclesia, sed a natura ipsa permittitur, quandoque etiam praecipitur. Idem dic de cohabitatione cum amente ac furioso, aliisque eiusmodi. Nec tamen propterea facultate hi coniuges praediti sunt aliud celebrandi matrimonium.

4. Constat ex iis omnibus, qui diu seu ad plures annos vel commercii, vel rei militaris, exilii, deportationis causa procul abesse ab altero coniuge coguntur. Hi omnes etsi vinculo coniugali illigati perseverent, in divortio tamen quoad torum victumque dura necessitatis lege tenentur.

Cum igitur ob plurimos in sociali vita rerum eventus coniuges dividi invicem debeant coganturque, quin propterea coniuges esse desinant; cum huiusmodi separatio ex ipsa rerum natura eaque necessario dimanet, ac proinde sit locorum omnium et temporum, quomodo sine aperta falsitate *nova* potest dici doctrina, qua decernitur, posse ob multas causas separationem inter coniuges quoad torum seu quoad cohabitationem in certum incertumque tempus fieri manente vinculo, prout concilium tridentinum can. VIII. definivit? Aut enim haec admitti debet, aut venia seu facultas indiscriminatim danda est solvendi vin-

culum ac foedus coniugale in singulis, quos indicavimus aliisque prope innumeris casibus, reclamante non minus ecclesia, quam aequitate ac natura. Itaque actio separationis quoad torum et cohabitationem manente vinculo absurde uti nova traducitur.

Verum secundo loco hanc novitatis notam excludit documentorum copia, quam nobis antiquitas sacra suppeditat. Praetermissis textibus biblicis, de quibus paulo post agemus, tot documenta veritatis catholicae nobis praesto sunt, quot in superioribus capitibus attulimus testimonia patrum graecorum et latinorum, qui Christi verba Matth. V. 32. et XIX. 9. exposuerunt de unica separatione a toro et cohabitatione qua pars innocens coniugem adulterii reum potest dimittere, quin umquam tribueretur eidem facultas novo cum altero se foedere iungendi; imo positive illa denegabatur. Iam vero incipiendo ab Herma viro apostolico devenimus usque ad s. Augustinum, et ad eos qui eius vestigiis inhaeserunt, ostendimusque ad unum omnes in hac sententia ac doctrina perstitisse.

Huc pariter referuntur romanorum pontificum et conciliorum statuta, quibus eadem doctrina in praxim deducta est ac sancita; exempli causa cum decreverunt, ut dirempto coniugio secundo ex errore facti inito, quod prior uxor a vita excesserit, vir etiamsi cum secunda se copulasset ad priorem rediret, nimirum quia prius illud coniugium quoad vinculum manebat, uxore adhuc vivente, licet esset quoad torum convictumque divisa; ut decrevit Innocentius I. tum in epist. ad Probum, tum in epistola ad Exsuperium, cuius verba cum alibi iam descripserim expenderimque, hic missa faciam. Idem statuit s. Leo M. in epist. ad Nicetam aquileiensem episcopum praecipiens, foeminas, quae, captis viris, nupserant aliis, regressis de captivitate viris prioribus, eisdem reddi debere, etsi profiteatur eas non fuisse culpabiles, quae deceptae falso

mariti defuncti rumore aliis nupserint; cuius verba pariter retuli.

Ab aliorum pontificum, qui huic steterunt principio, testimoniis afferendis supersedeo, ne prolixior sim. De conciliis pariter inutile censeo plura addere, quoniam in iis, quae iam recensui, eadem occurrunt circa firmitatem coniugalis vinculi, quamvis coniuges invicem separentur sive ob alterutrius absentiam, sive ob adulterii crimen, sive ob alias causas quascumque. Ex quibus omnibus exurgit evidens profecto argumentum veteres agnovisse et admississe illam quam propugnamus divortialem divisionem coniugum, vinculo persistente. Prae ceteris autem rem luculenter demonstrant concilium illiberitanum, arelatense II. concilium etiam milevitanum II. ut de posterioribus sileam.

Eadem novitatis nota demum repellitur ex sensu traditionali catholicae ecclesiae, quem non modo ex allatis patrum testimoniis, sed ex historia etiam ecclesiastica et ex iure canonico colligere possumus. Nemo enim ignorat, plures quovis tempore floruisse, qui perfectionis studio vel in ipso coniugio pari consensu continentiam servarunt, atque ad eam servandam voto se se obstrinxerunt; vel monasticam vitam communi consensu sunt amplexi, vel ita sunt disiuncti, ut uxore perpetuam Deo continentiam vovente vir sacris ordinibus initiaretur. Huiusmodi exemplis annales ecclesiastici referti sunt, nosque paulo ante specimen aliquod exhibuimus. Quae quidem agendi ratio conformis est doctrinae s. Augustini, qui disserens de coniugio B. Mariae virginis cum s. Iosepho non dubitavit generalem hanc proferre sententiam: « Hoc exemplo magnifice insinuatur fidelibus coniugatis, etiam servata pari consensu continentia, posse permanere vocarique coniugium, non permixto corporis sexu, sed custodito mentis affectu (18). » Qui praeterea alibi verba faciens tum de

(18) *De consensu evangelist.* lib.II. c.2. Opp.ed. Maur. t.III. part.II.col.27.

continentia voluntaria in coniugio, tum de necessaria extra coniugium ob divortia, subdit: « Qui post concubitum coniugum se ipsos castrant propter regnum caelorum, aut morte amittunt coniuges, aut ex consensu cum eis continentiam profitentur, aut ex necessitate divortiorum, ne vivis coniugibus se aliis copulando adulteria perpetrent, castrant se ipsos propter regnum caelorum, non ut clariores ibi esse possint, sed quod aliter ibi esse non possint: nam qui non ista necessitate se continent, sed boni appetitione melioris, possent ibi esse, etiam servata pudicitia coniugali, quamvis in praemiis minoribus, tamen intus. Qui vero propterea se continent, quia prioribus coniugibus vivis timent aliis coniugari, maiorem curam debent gerere pro salute, quam gesserunt illi a quibus continentia pro munere delecta est ampliore (19). »

Idque merito, alioquin dicendum foret matrimonii essentiam in eius usu consistere, quod abhorret non solum a communi hominum sensu, quidquid sentiant novatores, sed adversatur vulgari illi principio penes omnes iurisperitos recepto: *Nuptias non concubitus, sed consensus facit.*

Post haec supervacaneum videtur velle congerere testimonia ac decreta, quae in iure canonico huc referuntur. Satis est enim oculos conicere in decretum Gratiani par. II. caus. XXXII. qq. 6. et 7. ut certior unusquisque fiat nullo non tempore in ecclesia Dei sensum hunc viguisse a prima aetate usque ad tridentinum; et iterum in decretalium lib. IV. tit. XIX. *De divortiiis* ubi plura ad hanc rem rom. pontificum et conciliorum decreta proferuntur.

Cum igitur intima ipsa rei natura, documenta omni-gena totius christianae antiquitatis, ac generatim sensus traditionalis universae ecclesiae doctrinam a concilio tridentino sancitam can. VIII. evidenter adstruant, mirum videri potest saeculi XVI. novatores illam ausos esse veluti

(19) *De coniug. adult.* lib. II. c. 18. *ibid.* tom. VI. col. 416.

novam traducere. Attamen Chemnitius scribere non erubuit: « Definitio illa divortii (conc. trid. can. VIII.), quod sit separatio matrimonii quoad torum, manente vinculo conjugali, *nova* est, et ex verbis Pauli male intellectis perperam fabricata (20). »

De Apostoli mente paulo infra; interim ex iis omnibus quae adduximus poterit quisque iudicium ferre, num reipsa definitio, seu doctrina divortii quoad torum, manente vinculo conjugali, aliqua veri specie dici *nova* queat; annon potius eiusmodi assertio falsa omnino sit et *nova* prorsus atque antiquitati universae contraria.

§. II.

Eadem doctrina vindicatur ab altera nota *oppositionis* cum evangelica et apostolica doctrina.

Ut hanc oppositionem evincant adversarii, ostendantque nullum in sacris litteris admitti quoad torum convictumque divortium, dum integrum manet matrimonii vinculum, provocant ad contextum Apostoli 1. Cor. VII. cui tota innititur, ut ipsi aiunt, catholicorum doctrina.

Sic enim pergit Chemnitius post adducta verba, ut, quemadmodum sibi proposuerat, ostendat doctrinam catholicam de divortio *fabricatam* esse ex perperam intellectis verbis Pauli: « Scribit Apostolus, ait ipse, *praecipio non ego, sed Dominus, uxorem a viro non discedere: quod si discesserit, manere innuptam, aut viro suo reconciliari.*

(20) Ita quidem apud Bellarminum *De matrim.* cap. XIV. p. 10. qui haec verba allegat ex II. parte *Examini* pag. 1268. Verum in editione qua utor huius *Examini conc. trident.* Genève 1614. part. II. pag. 241. paulo aliter immutata ab aliena manu, ut puto, leguntur. Sic enim ibi habentur: « Haec non est *nova* definitio divortii, quod scilicet sit tantum separatio inter coniuges quoad torum et quoad cohabitationem, manente interim etiam inter separatos vinculo matrimonii. Et talis quidem separatio sumpta fuit primum ex dicto Pauli I. Cor. 7. etc. » Verum sententia sic mutata non amplius cohaeret cum iis quae sequuntur, ut paulo post videbimus

Sed Apostolus hoc loco non loquitur de iusto divortio, quod fieri potest in causa fornicationis; non enim prae-ciperet uxorem a viro non discedere, si de divortio iusto loqueretur. Ait igitur de dissidiis quibusdam levibus, quae interdum inter coniuges oriuntur, et proinde de illicito divortio, quo a se invicem discedunt, sed paulo post concilian- tur. Quare perperam ex hoc loco catholici divortium in- duxerunt, quod manente vinculo in ecclesia licite fiat (21).»

Ita quidem ipse. Verum falso supponit catholicos huic unico Apostoli testimonio inniti, dum adstruunt divortium licite fieri posse, salvo coniugii vinculo. Nos praeterea id ipsum adstruimus pluribus aliis locis tum Apostoli tum evangeliorum, ut constat ex iis, quae in capite secundo disseruimus. Falso praeterea assumit Apostolum de eadem dissensione fuisse locutum tum v. 10. cum ait: *Praecipio uxorem a viro non discedere*, tum v. 11. cum scribit: *Quod si discesserit, manere innuptam*. At vero v. 10. agit Apostolus de iniusta; v. autem II. de iusta discessione. Alioquin non potuisset in casu discessionis iniustae ob leves causas, ut supponit Chemnitius, uxoribus optionem dare, ut post separationem aut innuptae manerent, aut viris suis reconciliarentur. Nam ex Christi praecepto, non potest uxor sine iusta causa, id est praeter crimen adul- terii, a viro suo discedere ac separari; quod si conti- gerit, vi eiusdem dominici praecepti tenetur ad virum suum reverti, eique reconciliari. Contra vero Apostolus in ad- versarii hypotesi permisisset uxori, quae sine iusta causa a viro discessit, vel reconciliari, vel ita permanere seu vivere in separationis statu prout ei libuerit. Quod qui- dem nulla ratione admitti potest, siquidem aperto Domini praecepto adversatur. Ne igitur in eiusmodi absurdum adeo

(21) Ita rursum apud Bellarm. loc. cit. quae tamen in editione genevensi paulo aliter se se habent; sed quoad substantiam in idem recidunt, adeoque ea non transcribo.

Apostolo iniuriosum incidamus, fateamur necesse est ipsum illis verbis: *Quod si discesserit, manere innuptam, aut viro suo reconciliari*, locutum esse de discessione, quae iusta ex causa facta fuerit, adeo ut vers. 10. iniustam discessionem vetuerit, vers. autem 11. post iustam etiam discessionem edixerit secundas nuptias non licere, sed uxorem debere vel viro reconciliari, vel innuptam manere.

Hanc huiusce loci interpretationem, quae ipsi contextui consentanea est, atque ex eodem necessario efflorescit, praestat veterum auctoritate firmare. Sane s. Augustinus lib. I. *De coniug. adulter.* primis quatuor capitibus totus in eo est, ut Pollentii excludat expositionem, quod nempe fornicatio non modo unica sit legitima causa discessus, sed etiam talis, ut ea interveniente alter coniux a fornicante discedens, alias nuptias possit inire. S. Doctor concedit quidem, immo et contendit solam fornicationem esse legitimam discedendi causam sive viro sive mulieri; sed ita ut debeant innupti permanere; nimirum contendit adulterium esse causam divortii a solo toro et cohabitatione, non autem quoad vinculum.

Haec sunt Augustini verba: « Eum (Apostolum) velut interrogemus, et tamquam praesentem quodammodo consulamus. Cur dixisti Apostole, *quod si discesserit, manere innuptam?* Licetne discedere, an non licet? Si non licet, cur praecipis discedenti, ut maneat innupta? Si autem licet, profecto est aliqua causa qua liceat. Haec autem inquisita non invenitur, nisi quam solam Salvator excepit, id est, causa fornicationis. Ac per hoc non praecipit Apostolus mulierem si discesserit manere innuptam, nisi quae illa causa discedit a viro, qua sola ei licitum est discedere a viro. Ubi enim dicitur, *Praecipio non discedere, quod si discesserit, manere innuptam*, absit ut contra hoc praceptum faciat, quae sic discedit ut innupta permaneat. Nisi ergo illa intelligatur cui licet discedere,

(non autem licet nisi viro fornicante), quomodo iubetur innupta, si discesserit, permanere? Quis est qui dicat. Si discesserit mulier a viro non fornicante, innupta permaneat, cum ei nisi a viro fornicante discedere omnino non liceat? Sensus itaque iste tuus quantum adversetur vinculo coniugali, ubi Dominus nec continentiam voluit suscipi, nisi pari concordique consensu, puto quod iam intelligas (22). »

Ex quo textu manifeste colligimus iuxta s. Doctorem, unicam causam iusti discessus, absoluti saltem atque perpetui, esse fornicationem alterutrius coniugis, ob quam potest pars innocens nocentem dimittere ex doctrina Apostoli, et Christi ipsius. Colligimus hunc discessum sive separationem legitimam esse tantum quoad torum convictumque, non autem quoad vinculum, quod ita perseverat, ut non possit discedens aliud inire coniugium; seu quod idem est, colligimus posse fieri divortium ad certum incertumque tempus quoad solum torum et cohabitationem permanente vinculo coniugali, prout a concilio tridentino definitum est in canone VIII. Colligimus ex mente s. Augustini Apostolum vere agnovisse legitimam causam divortii illis verbis: *Quod si discesserit, manere innuptam, aut viro suo reconciliari*, secus ac cum suis contenderit Chemnitius. Quod vero praeter fornicationem iusti divortii, alias temporales saltem causas praesul hipponensis agnoverit, colligitur ex iis verbis quibus declarat posse coniuges, annuente Domino, continentiam servare, profiterique *pari concordique consensu*, ut omittam quae alibi idem s. Doctor scribit de infidelitate spirituali, apostasia nempe et haeresi, quam aequiparat adulterio propter quod divortium quoad torum fieri potest (23).

(22) Cap. III. n. 4. tom. VI. col. 389.

(23) *De sermone Domini in monte*, lib. I. cap. 26. 28. De qua tamen expositione cf. quae scripsit ipse s. Augustinus lib. I. *Retract.* c. XIX. n. 5.

Sic pariter Theodoretus eadem Apostoli verba explanans: *Quod si discesserit* etc. scribit: « Conatur quidem infractum servare matrimonii vinculum: condescendens autem imbecillitati, ei qui separatur continentiam praecipit, hac etiam ratione prohibens matrimonii disiunctionem. Cum enim alteri coniungi prohibet, utramque partem ad prius matrimonium redire compellit (24). » Nempe praeter causam fornicationis alias supponit, quibus quoad torum coniuges invicem separentur, seu admittit divortium quandoque fieri, salvo coniugali vinculo, iuxta Apostolum; interdum quidem illicite, cum ob rixas, contentiones etc. a se invicem se iunguntur coniuges, quandoque vero licite, imo etiam perfectionis causa, ad continentiam pari consensu servandam, ut ibidem adnotat idem auctor.

Pergit porro Chemnitius ecclesiam catholicam arguere, quod contra evangelicam doctrinam iustas divortii causas statuatur, atque in haec verba loquitur: « Christus Matth. V. 32. et XIX. 9. dimissionem coniugis nisi propter causam fornicationis pronuntiat esse illicitam et illegitimam. Contra hanc Christi sententiam pontificii decernunt, praeter fornicationem multas alias esse causas propter quas licita et legitima coniugum separatio fieri possit (25). »

At primo animadverti debet apud Matthaeum sermonem esse de dimissione propter *crimen*, non autem de dimissione propter *perfectionem*. Hanc esse legitimam separationis causam ex eodem evangelio discimus, in quo Christus centuplum in praesenti tempore, ac vitam aeternam iis promittit, qui perfectionis evangelicae sectandae causa uxorem dimiserint pari, ut supponitur, concordique consensu. Deinde animadverti debet quod si Christus agens de dimissione propter *crimen*, hanc ad solam fornicationis causam coarctat, non ideo id facit, quasi ob alia cri-

(24) Opp. ed. Paris. 1642. tom. III. p. 150.

(25) Loc. cit.

mina a fornicatione diversa fieri nequeant iusta divortia, sed aliis pluribus de causis, scilicet 1. Quia solum fornicationis crimen dat ius ad perpetuam separationem parti innocenti, etiamsi quae nocuit, ex animo patrati flagitii poenituerit, quod in reliquis locum non habet. 2. Quia ceterae causae non sunt matrimonii *propriae*, sed potius matrimonio et aliis omnibus confoederationibus communes; siquidem propter apostasiam, haeresim, inductionem ad peccatum aliaque eiusmodi non solum ab uxore, sed et a patre, matre, fratribus atque sororibus separatio facienda est ex Christi ipsius oraculo, ut vidimus. 3. Quia fornicatio sola est causa non modo propria, verum etiam intrinseca: per illam enim matrimonii ipsius bonum quod in fidelitate consistit, directe impetitur atque prorsus destruitur. Hinc merito adultera dimittitur iuxta illud: *Frangenti fidem, fides frangatur eidem*. Ceterae vero causae eidem coniugio sunt extrinsecae (26).

Ex his pronum est intelligere qua ratione affirmari possit Christum in obiectis verbis in sensu, ut aiunt, exclusivo memorasse solam fornicationem tamquam divortii causam; nempe quatenus haec est *causa perpetua, propria et intrinseca*, neque proinde alias causas quae sint *temporanae, extrinsecae et communes* (27), exclusisse.

Perperam igitur Chemnitius urget adversus catholicos

(26) Si ad haec omnia attendisset Samuel Klein in cit. *Dissert. canonica de matrimonio iuxta disciplinam graecae orientalis ecclesiae*, ut suis faveret minime scripsisset post adducta Christi verba Matth. XIX. «Quae verba intelligi volunt graeci-orientales, quod propter adulterium solum a Christo Domino concedatur divortium et separatio, non solum quoad torum, sed etiam quoad vinculum; enimvero si verba evangelica solum de separatione tori essent intelligenda, contra eadem facerent, quicumque *ob aliam rationem* quoad torum separant, cum ibi dicatur: *Nisi ob fornicationem*; certum autem est, quod etiam ob plures alias causas separatio quoad torum fiat. Ergo evangelica verba non de tori, sed vinculi separatione intelligenda sunt.» In quibus videtur hic auctor qui tamen catholicus est, Chemnitium secutus esse.

(27) Cf. Bellarmin. loc. cit.

illam Christi sententiam , ut inde inferat eos ab evangelica discedere doctrina , qui plures ob causas retento coniugali vinculo , docent divortia quoad torum et cohabitationem fieri posse.

Sic etiam perperam idem auctor prosequitur : « Separationem , quae 1. Cor. VII. v. 11. extra causam fornicationis describitur , Paulus non suadet nec decernit , sed docet eam pugnare cum praecepto Domini , qui praecipit non discedere : quando vero coniuges contra illam Apostoli doctrinam privata contumacia se separant , tum Paulus suadet reconciliationem , aut si hoc nolint , pronuntiat eos debere sine coniuge manere. Sed octavus hic canon dicit , ipsam ecclesiam ob multas causas , praeter fornicationem , decernere posse separationem. » Praeterea : « Christus Matth. V. dimissionem seu separationem coniugum , quae fit praeter causam fornicationis , ideo improbat , quia obiicit periculis ustionis fornicationis et adulterii. *Facit* , inquit , *illam moechari*. Sed de his periculis pontificii non sunt solliciti , libere enim decernunt separationem ad certum incertumve tempus (28). »

Verum dum primum obiicit Chemnitius in falsa versatur hypothesi , quam paulo ante refellimus ; nimirum Apostolum v. 11. disserere de iniusta separatione , quum tamen de separatione et causa iusta loquatur , propter quam ipse dat optionem coniugibus invicem separatis sive reintegrandae coniunctionis , sive manendi sine coniuge. Quae quidem agendi optio dari non potuisset ab Apostolo , si contra praeceptum Domini facta fuisset separatio. Hac vero hypothesi depulsa , cetera ex se concidunt. Nisi velis praeceptum Domini ad quod Paulus appellat intelligendum esse de praecepto non dissolvendi coniugium , excepta causa fornicationis tamquam propria , intrinseca atque perpetua ,

(28) Loc. cit.

quae ceteras non excludit extrinsecas coniugio, temporaneas atque communes, uti modo dictum est.

Quod vero attinet ad pericula, ob quae Christus dimissionem seu separationem improbavit, etiam catholici de iis sunt solliciti: adeoque ne coniuges periclitentur, possunt poenitenti ipsum fornicationis crimen condonare ac reconciliari: in aliis vero casibus non modo possunt, sed etiam debent, quum iustae ceteroquin separationis causae fuerint sublatae. Quare si istae perseverent, fac periculum perversionis, vel labendi in haeresim, tunc sibi imputare debent peccata, quorum periculo obiiciuntur ex coniugis absentia, qui pugnaciter in perversitate sua persistere malunt, quam causam tollere separationis. Adeoque ecclesia, dum praeter fornicationis casum plures alias legitimae separationis causas decernit, prospicere intendit partis innocentis saluti, etsi contra eius voluntatem qui perversi sunt, exinde ansam sumant se in ustionis, fornicationis, et adulterii barathrum iniiciendi. Falsum itaque est et calumniosum affirmare catholicos haud sollicitos esse de hisce periculis, sed inter duo mala minus eligunt, ne in peius ruant. Ecquis negaverit longe peius esse periculum amittendae fidei, quam violandae pudicitiae? Et quidem cum illud instat parti innocenti, hoc vero parti nocenti atque perversae? Idem dic de caeteris.

Demum subdit Chemnitius: « Contendunt (catholici) tunc debere esse divortium in quo vinculum matrimonii salvum maneat. Atqui pontificia illa separationem vinculum coniugii multis et variis modis solvit. Nam quid sit vinculum matrimonii docent hae sententiae: *Et adhaerebit uxori suae: Faciamus ei adiutorium quod est coram ipso: Mulier non habet potestatem sui corporis sed vir: iterum convenite ne tentet vos satanas: Non sunt duo, sed una caro, et ipsum matrimonium definitur individua vitae consuetudo.* At haec omnia vincula solvit divortium quoad torum et

cohabitationem : ergo homines separant quod Deus coniunxit (29).»

Et hic praepostera vinculi coniugalis notione deceptus est adversarius noster permiscens vinculum cum vinculi effectibus. Etenim in eo vinculum consistit, ut alligata sit mulier viro quamdiu vixerit vir eius, ut docet Apostolus Rom. VII. 2. et 1. Cor. VII. 39. ubi iisdem ferme utitur verbis dicens: «Mulier alligata est legi, quanto tempore vir eius vivit; quod si dormierit vir eius liberata est.» Cum igitur vinculum coniugale in illa potissimum obligatione consistat, qua coniuges mutuo obstringuntur toto vitae tempore, ita ut absque piaculo nec vir nec mulier possint alteri se coniungere, plane consequitur obiecta biblica loca ad rem non facere. Siquidem ea respiciunt aut naturalem finem matrimonii, aut officia coniugum, quae vinculum consequuntur; quorum tamen praxis et usus impediri potest, manente vinculo. Alioquin si discesserit iusta de causa vir a muliere sive itineris, sive negotii alicuius gratia, aut in captivitatem fuerit abductus, aut carceribus et vinculis mancipatus, sive uxor infirmitate detenta, aut in remotam fuerit regionem abducta, vinculum ipsum foret dissolutum. Quod profecto neque adversarii dicent, utpote absurdum. Quapropter si vinculum permanet in his aliisque similibus casibus, adeo ut non desinant vere coniuges esse, etiamsi simul cohabitare nequeant, etiam iusto interveniente divortio, iugiter vinculum perseverat. Falsum igitur est quod Chemnitius asserit pontificia illa separatione multis et variis modis vinculum coniugii solvi, atque homines separare quod Deus coniunxit.

Quod dictum est de biblicis textibus, idem de allata pervulgataque matrimonii definitione censeri debet. Illa enim individua vitae consuetudo naturaliter ac per se a coniugibus intenditur velut fructus et sequela initi con-

tractus et vinculi perpetui quo colligantur. Quamvis vero ex accidentalibus causis illa individua vitae consuetudo de facto impediatur, vinculum tamen quod perpetuo coniuges mutuo devincit intactum permanet.

Ex his iam intelligitur quo sensu dixerit Christus: *Quod Deus coniunxit, homo non separet*; nimirum haec verba protulit Christus de vinculo ipso; quod cum a Deo sit, nequit homo, vivente utroque coniuge, illud dirumpere aut dissolvere, non autem de cohabitatione aut tori communiione; alioquin toties homo separaret quod Deus coniunxit, quoties coniuges invicem discederent. Immo vero ex his discimus non abrumpi vinculum, quamvis divortium quoad torum sive iustum sive iniustum fieri contingat.

Non possum hic me cohibere ab opportuna animadversione, quae sua veluti sponte exinde enascitur, quam nempe labile, imo et perniciosum systema novatorum sit de spiritu privato in interpretandis Scripturis, et quo homines ducat (30).

§. III.

Doctrina de divortio quoad torum et cohabitationem, manente vinculo, a tertia nota *immoralitatis* vindicatur.

Asserta ecclesiae doctrina etiam tamquam honestati morum exitialis impetitur, eo quod ex una parte indissolubilitatem statuat vinculi coniugalis, ex altera vero divortium permittat manente vinculo. Contra vero adversarii ut vitae honestati prospiciatur solutionem vinculi vellent, quo liber aditus pateret ad alias nuptias ineundas, nolent autem divortium manente vinculo, ne dura continen-

(30) Chemnitius magnam vitae suae partem exegit in concinnando hoc suo opere *Examinis concilii tridentini*, in quo non solum nihil profecit, sed post tot exantlatos labores tandem inter angustias ac dubia vitam finivit. Cf. Doellinger *La réforme, son développement intérieur*, vers. ex Germ. Paris 1849. tom. II. pag. 505.

tiae lege inviti detinerentur, qua infelicem, ut ipsi aiunt, ac miserrimam vitam et diris tentationibus obnoxiam agere cogerentur. Quandoquidem autem duo haec arcto inter se nexu cohaerent, ut distingui potius quam dividi possint, operae pretium est uno eodemque tempore sub utroque respectu catholicae doctrinae vindicias suscipere, ne imperfecta et manca quodammodo videri posset defensio quam aggredimur. Porro adversarii in votis haberent, ut quemadmodum concilium docet multas ob causas fieri posse separationem quoad torum et cohabitationem, ita contra diceretur *multas ob causas* fieri posse vinculi ipsius solutionem. Sed in una potissimum causa insistunt, quae est fornicatio, sive adulterium (31).

Iamdiu Erasmus in prolixis suis annotationibus in 1. Cor. VII. impetiverat perpetuam matrimonii indissolubilitatem hac potissimum ratione ductus; nec veritus est Paulum ipsum nimii incusare rigoris ob clausulam illam: *manere innuptam, aut viro suo reconciliari*. Sic enim inter cetera scribit: « Quod si Paulo proposita fuisset eiusmodi causa, stultus cum stulta, puer cum puella contraxit, intercesserunt lenae, vinum, temeritas, arte in nassam inducti sunt, et huiusmodi matrimoniorum plenus est mun-

(31) Fingunt quidem se ob hanc unicam adulterii causam contendere fieri posse vinculi coniugalis solutionem; ast reipsa in latissima significatione postea huius flagitii nomen accipiunt. Nam satis est percurrere quaestiones quas hac super re instituit Io: Gerhardus ex suorum protestantium sententiis *Locor. theol.* tom. XV. ed. Tubing. 1776. Loc. XXVI. cap. X. sect. III. art. 2. memb. I. thema 1. et seq. *De adulterio, De desertione, ac De reliquis divortii causis*, ut unusquisque intelligat quam liberales ac faciles se isti reformatores exhibeant.

Certe in codice borussiano *novem* continentur tituli ob quos fieri potest divortium plenum, id est, a vinculo. Cumque, ut notum est, frequentissima fierent repudia, ministerium proposuit in comitiis mense Febr. 1857. ut ex illis quinque tituli abrogarentur, quatuor tantum retentis, nempe 1. *denegatio coniugalis debiti*; 2. *insania*; 3. *insociabilitas et querelae*; 4. *accusatio scienter falsa*.

Verumtamen proposita lex die 4. Mart. eiusdem anni pluralitate suffragiorum reiecta fuit. Vid. *Univers* 6. Mars 1857.

dus, infinita mortalium millia male tenentur illaqueata. Num coit matrimonium, si modo coitus successerit, imo si non successerit, nihil inter coniunctos convenit, tanta est morum et ingeniorum dissimilitudo: rixae iuges, odium immedicabile, timetur venenum, timetur caedes, nihil non malorum expectatur, neuter caelebs potest vivere, si cohaerent, his perit uterque: si mutetur coniugium, spes est utrumque fore incolumem: fortassis pro causae circumstantiis *aliud responderet Apostolus, et nonnihil relaxaret de rigore consilii superioris.*» Et adducto exemplo Fabiolae, quam Paulus, ut ipse putat, si ad eum confugisset, minime coegisset ad retinendum pravum adeo maritum, nec poenitentiae addixisset, cui ab episcopo addicta est, eo quod alteri nupsisset, concludit: « Miserebat me illorum, quos videbam huiusmodi vinculis inextricabilibus implicatos, quos sciebam esse plurimos (32). »

Alii ut suadeant vinculum ipsum coniugii quandoque solvi debere, confugiunt ad indolem ipsam ac spiritum religionis christianae; constituunt enim repugnare christianae religionis spiritui ac moralitati sententiam de vinculi matrimonialis omnimoda indissolubilitate; religio enim, aiunt, quum pro supremo fine beatitatem hominum habeat, eo ipso nequit talem continere doctrinam, quae homini scopum felicitatis assequi connitenti sacrificia per quam difficilia imponat. Quis sane est qui non videat ex

(32) *Annot. in I. ad Cor. VII. Opp. ed. Lugduni Batav. tom. VI. p. 701. et 702.* Atque hic est Erasmus cuius hac de re cum propositiones censura a facultate parisiensi notatae fuissent, et quidem haereses, an. 1526. « quatenus per eas praetendi videtur matrimonium per adulterium dissolvi quantum ad vinculum. Est enim, inquiunt parisienses, vinculum matrimonium iure divino indissolubile, ut ad Corinthios scribens Apostolus demonstrat etc. » ut a se eiusmodi censuram amoliretur, respondit suas propositiones intelligendas fuisse *de separatione quoad torum, non quoad vinculum.* At qui eius verba legerit, profecto numquam sibi persuadebit de sola hac quoad torum separatione ipsum fuisse locutum. Cf. Tournely *De matr. quaest. V. art. II. De firmitat. vinc. coniug.* ed. Paris. 1765. tom. XI. pag. 138 seq.

eiusmodi doctrina de indissolubilitate omnimoda coniugalitatis talem ac tantam malorum congeriem coniugibus ingruere, quibus eorum cor animusque veluti obruuntur? Quae tandem est ea ferrea doctrina, quae coniuges cogat ad vitam perpetuo ducendam inter innumera corporis animique pericula, quae ex acerbitate praesertim doloris enascuntur, quum infidelitatem coniugis alter expertus est, ac iniuriam perpessus? Intolerabile sane vitae genus, quod humana imbecillitas vix aut ne vix quidem ferre potest. Quod si coniuges quoad torum cohabitationemque invicem seiungantur ad eiusmodi mala lenienda, in alium scopulum incidere debent, profitendo continentiam ac caelibatum, cui sectando se impares sentiunt, cum talis non sit, ut aiunt, eorum vocatio, calente praesertim atque effervescente iuventa in iis maxime qui fervidioris sint ingenii.

Ecquis porro non videat hos in apertum delinquendi periculum iniici dura hac lege detentos de non iterandis nuptiis, cum sanae ethices detrimento, immo vero et iactura? Indidem enim veluti a foecunda parente oriuntur necessario scortationes, adulteria, aliaque flagitia, quae etiam scandala oblocutionesque publicae comitantur; quibus omnibus facile occurri posset honesto coniugio? Ecquis componi posse autemet ferream hanc legem cum illa iugi evangelici lenitate, ob quam Christus suave iugum et onus leve sectatoribus suis se impositurum depraedicat? In hac hypothesis iugum plane non ferendum coniugium evaderet.

Nec obest agi de temporanea tantum separatione; siquidem hoc ipsum est, quod in moralitatis, quam vocant, damnum vergit. Nam si rixae ac discordiae perseverent, in longius tempus eiusmodi protraheretur; si causae dissidii mutui subsistant, fieri nequit, ut cito animi concilientur. Quod si dissidium ex sprete thalami fide proveniat, cui honor cordi est, numquam in gratiam delinquentem

recipere pateretur. Multo vero minus sibi eam reconciliabit, quae in male suscepto itinere consistat, aut continuam de se suspicionem praebeat (33).

Itaque non alia ratione his malis occurrere potest, quam dissolutione perfecta, qua liberum sit unicuique ad nova transire vota. Neque exinde periculum imminet dissolutionibus perpetuis; ut enim rite animadverterat iamdiu Erasmus, id pertimescendum non est, «quando et apud ethnicos suos constabat honos matrimonio, apud quos mutuum erat divortii ius, at non temere tamen. Vis rara esse divortia? Cura ut non tam facile coëant coniugia. Iudicio coëant: coëant auctoritate parentum, aut eorum quorum interest: quemadmodum apud hebraeos, graecos, romanos ac barbaros olim coire solebant (34).»

Verum qui ita disserunt, rem sub unico tantum adpectu expendunt eoque debiliori, qui cupiditatibus faveat, dissimulantes quae ex dissolubilitate coniugiorum imminerent, immo certo provenirent mala tum societati connubiali, tum proli, tum reipublicae ipsi. Non perpendunt verum religionis christianae systema seu spiritum, nec virtutes quas Christi religio suadet, et ad quas cultores suos inducit. Nihili faciunt detrimenta longe peiora, quae ex illis theoreticis principiis in praxi suapte natura manarent.

Sane si auscultemus Erasmo, non solum ob adulterii crimen, verum etiam ob animorum dissensum, ob rixas, ob mutuas similtates, atque ἀντιπάθειαν licitum foret discindere coniugia. Possent praeterea dissociari connubia omnia, quae minus considerate coniuncta sint, atque animi levitate contracta. Item ea, quae fuerint conciliata leno-

(33) Ita Werkmeister, Batz, Socher alique non exiguo numero quos recensuit cl. Roskovány op. cit. *De indiss. matr.* §§. 20-29. et iterum §. 37. ubi ipsorum argumenta profert.

(34) Loc. cit. col. 701. 702.

num opera et arte; ea in quibus vitia praevalerent ingurgitationis, irae; quae temere, quae aetate immatura, quae inter stultos fuerint inita; ea etiam in quibus timor incesse- rit veneni, caedis, aliaque permulta incommoda immi- nerent. Iam si his aliisque prope innumeris de causis connubia possent seiungi, ecquis non videt vix ulla sub- sistere firma coniugia? Fatetur vel ipse Erasmus horum coniugiorum plenum mundum esse, ac infinita mortalium millia his teneri illaqueata, adeoque si eius theoria ad- mitteretur, vix ulla matrimonia forent, quae non debe- rent, vel possent dissolvi. Et hac in hypothesis quidnam fieret de societate coniugali? Quid de prole? Quid de socie- tate universa?

Si causae recensitae sufficerent ad vinculum coniugale e medio tollendum, conclamatum plane esset de vero con- iugum consortio, quod revocaretur in plerisque ad co- honestandas cupiditates, quae cum expletae essent, qui pertaesi uxoris fuerint, possent ad aliam se convertere, et ita porro. Cum deessent verae causae, fictitiae exco- gitarentur ad finem obtinendum. Cupiditates enim indo- mitae ad instar furentium equorum homines in praecipitum agerent, et in exitium ex quo se amplius recipere non possent.

Quae cum ita se habeant, profecto Apostolus tum Fabiolae tum aliis quibuscumque, qui in iisdem reperi- rentur rerum adiunctis, non aliud consilium, immo prae- ceptum daret, quam quod dedit Corinthiis, *quod si dices- serit, manere innuptam, aut viro suo reconciliari, quia praeceptum Domini est, uxorem a viro non discedere*. Non ideo vero Fabiola poenitentia multata est, seu potius sponte se ei subiecit, quod a flagitioso se marito separaverit: hoc enim nulla iura vetabant; sed quod contra Christi praeceptum alteri nupserit, vivente priori coniuge, igno- rans, ut scribit s. Hieronymus, evangelii rigorem. Nam ve-

lint nolint adversarii Christus omnimodam indissolubilitatem matrimonii constituit, ne excepto quidem adulterii casu, quemadmodum tenuit ac servavit universa antiquitas, ut suo loco ostendimus.

Haud dissimulamus, quin etiam aperte fatemur incommoda quandoque, ac si lubet, saepe quoque ex inestricabilibus coniugii nexibus oriri. Ast in eiusmodi negotiis aequa lance pensanda sunt quae utrinque ingruunt mala, tum scilicet ex plena firmitate tum ex solutione vinculi coniugalis. Porro extra omnem dubitationis aleam est, longe graviora sub quovis respectu enasci mala ex solutione, quam ex indissolubilitate. Quae enim ex solutione proveniunt incommoda intrinseca sunt, inevitabilia, nec minus coniuges, quam sobolem, cognatorum et amicorum catervam, immo et rempublicam ipsam afficiunt. Contra vero, quae ex indissolubilitate enascuntur solas plerumque cupiditates attingunt, transitoria sunt magna ex parte; et quae vinci, sin minus facile, aliqua saltem animi constantia possunt. Hac de causa Christus discipulis mirantibus quod de vinculi coniugalis firmitate ipse edixerat, atque respondentibus: *Si ita est causa hominis cum uxore, non expedit nubere*, illam adiecit sententiam: *Non omnes capiunt verbum istud*, et occasionem arripuit commendandi continentiam.

Exinde patet quinam sit verus religionis christianae spiritus relate ad coniugium. Hic eo tendit, ut vinculum matrimonii numquam dissolvatur, quin etiam id absolute vetat. Interim praesidia praebet, quae dolorem leniant ex male partis coniugiis, non solum commendando omnium virtutum, patientiae praecipue, exercitium; item tolerantiam infirmitatis et defectuum, qui humanae sunt naturae ingeniti; sed auxilia supernaturalia gratiae ad vincenda incommoda, quae vix aut ne vix quidem a tali statu separari possunt pollicetur. Quapropter naturalis contractus

ad dignitatem evectus est sacramenti, ut indidem tamquam ex inexhausto fonte coniuges hauriant subsidia ad perferenda onera adnexa coniugio.

Quod si coniuges ea media negligant, si parvipendant, si malint naturae vitiis indulgere, sibi non autem Christi religioni adscribant quae illos circumstant mala. Nam si res bene riteque perpendatur, patebit maxima saltem quae exaggerantur incommoda ex cupiditatibus non satis domitis ac repressis originem trahere. Hae vincantur, et superata erunt magna ex parte eiusmodi incommoda, aut saltem non adeo urgebunt, ut confugere debeant coniuges ad vinculi solutionem.

Ceterum hoc ipso quod christiana religio multas ob causas doceat fieri posse divortia quoad torum et cohabitationem, si res eo pervenirent, ut necesse foret coniuges ad certum incertumve tempus invicem separari, datur locus leniendi doloris, ac vias omnes pertentandi ad animorum conciliationem ac resipiscendi; quin etiam stimulus additur ut dissidiorum causae e medio tollantur.

Beatitas huius mundi semper imperfecta est, nec unquam plene obtineri potest. Illudimur vana spe quam saepissime, dum ad eam assequendam novus rerum ordo excogitatur. Hac ratione plures decipiuntur, et dum sibi quasi de adepta iam felicitate adblandiuntur, miseriores se esse experimento discunt. Itaque suprema beatitas est consecranda, quae non obtinetur nisi virtutum omnium exquisito cultu, et in Deum sincera pietate sancte servatis praeceptis quae nobis data sunt. Aliis nuptiis non semel homines infeliciores redduntur, ut patet etiam ex iis, qui, altero defuncto coniuge, thalamum repetunt. Secus deberet fieri perpetuus transitus de uno in aliud coniugium in quo spes affulgeat tranquillioris vitae obtinendae. Quis vero adeo desipiat, ut haec admittat?

Hac ratione omnes declamationes evanescent quibus

adversarii indissolubilis unionis infortunia, pericula, aliaque id genus multa exaggerant. Religio pharmaca praebet his malis omnibus aut tollendis aut leniendis, quin opus sit recurrere ad iterationem nuptiarum, quae impar est ad beatitatem afferendam.

Fateor gravissima percelli iniuria qui infidelem in matrimonio coniugem experitur. Nihilominus et huic malo religio remedium afferre consuevit, dum optionem parti innocenti tribuit aut in perpetuum se ab infideli ac nocente coniuge seiungendi, aut cum illa ad resipiscentiam revocata se conciliandi. Si velit caelibem deinceps vitam ducere, atque invita etiam coniuge statum religiosum amplecti, aut initiari sacris ordinibus, nemo est qui hoc ei deneget. Quod si hoc in casu pars derelicta in flagitia proruat, hoc sibi solum ac propriae malitiae imputare debet, non autem deserenti, seu dimittenti, qui utitur iure suo.

Quod si laesus coniux caelibem vitam nolit ducere, potest indulta venia coniugi delinquenti iterum cum ea copulari. Eo vel magis, quod interdum immunes viri omnino non sint ab omni culpa in uxorum aberrationibus, dum aut se nimis difficiles erga eas ac duros praebent, aut nimis indulgentes ac faciles, dum licentiam potius vitae, quam libertatem, et consuetudinem tolerant virorum extraneorum, atque uxores quodammodo in pericula labendi ipsi coniiciunt. Quocirca dignae interdum sunt quibus iniuria condonetur, si vere eas patrati sceleris poeniteat, statuamque de caetero in officio permanere. Quo refertur monitum illud s. Augustini, qui scribit: « Haec crimina (adulteria) in vetere Dei lege nullis sacrificiis mundabantur... et ideo tunc omni modo prohibitum est ab alio contaminatam viro recipere uxorem.... Nunc autem postea quam Christus ait adulterae: *Nec ego te damnabo, vade, deinceps noli peccare*; quis non intelligat debere ignoscere maritum, quod videt ignovisse Dominum amborum, nec

iam se debere adulteram dicere, cuius poenitentis crimen divina credit miseratione deletum (35)?» et paulo post: «Quibus consideratis atque tractatis, si communis conditio, commune malum, commune periculum, commune vulnus, communis salus, fideliter et humiliter cogitetur, non erit turpis, neque difficilis, etiam post perpetrata atque purgata adulteria reconciliatio coniugum, ubi per claves regni caelorum non dubitatur fieri remissio peccatorum (36).»

Dixi: si vere eas patrati sceleris poeniteat; nam si fucata tantummodo fuerit illarum resipiscentia; si nulla solida spes affulgeat fore ut caste vivant, eo in casu nullum superesse potest dubium, quin vir non modo non teneatur nocentem recipere, sed potius debeat eam a se repellere iuxta illud toties a patribus laudatum: «Qui tenet adulteram, stultus est et impius (37);» secus enim agens, suspicionem reae conniventiae praeberet, ac patronum veluti se ostenderet turpitudinis.

Quod de viris dictum est, idem sentiendum de uxoribus, si quos habeant maritos lascivientes ac turpibus adulterinis nexibus implicatos. Cum vero difficilius sit mulieribus virum adulterum a suo contubernio et a toro seiungere, eas his verbis compellat Augustinus, ut saltem id pertentent, ne coniuges suos negligere videantur: «Audiant me: zelent viros suos; non sibi servent vanam gloriam, qua solent a maritis impudicis matronae laudari, quia impudicitiam virorum suorum aequo animo ferunt. Nolo talem patientiam habeant christianae mulieres: prorsus zelent viros suos; non propter carnem suam, sed propter animas illorum. Omnino ego moneo, ego praecipio, ego iubeo: episcopus iubet, Christus in me iubet. Novit ille in cuius conspectu ardet cor meum. Ego, in-

(35) *De coniug. adult.* lib. II. cap. VI. n. 5.

(36) *Ibid.* Cap. IX. n. 8.

(37) *Prov.* XVIII. 22.

quam, iubeo. Nolite viros vestros permittere fornicari. Interpellate contra illos ecclesiam. Non dico, iudices publicos, non proconsulem, non vicarium, non comitem, non imperatorem; sed Christum. In caeteris omnibus ancillae estote virorum vestrorum, subditae ad obsequium. Nulla sit in vobis protervitas, nulla superbia, non contumeliosa cervix, non aliqua inobedientia: prorsus tamquam ancillae servite. Sed ubi ventum fuerit ad illud negotium, ubi vos beatus Apostolus aequavit, dicens: *Uxori vir debitum reddat, similiter et uxor viro*: subintulit: *uxor non habet potestatem corporis sui, sed vir*. Quid te extollis? Audi quod sequitur: *Similiter et vir non habet corporis sui potestatem, sed mulier*. Ubi ad hoc ventum fuerit, clamate pro re vestra. Aurum tuum vendit maritus pro necessitate sua: ferto foemina, ferto ancilla...Contemne omnia propter amorem viri tui. Sed castum opta, pro castitate litiga. Patienter pereat villa tua, non anima ipsius te patiente pereat (38).» Verum etiam hic magna opus est prudentia, ne proinde temere se gerant, exquirendum ipsis erit docti viri consilium, qui pro rerum adiunctis suggeret quid faciendum sit (39).

Quod postremo loco obiecit Erasmus, non esse timendum, ne dissolutionibus perpetuis periculum immineat, adducto exemplo ethnicorum penes quos suus constabat matrimonio honos, quamvis apud ipsos mutuum fuerit divortii ius, falsum esse tum historice tum practice patet. Falsum quidem historice, quia compertum est ex omnium gentium antiquarum, si unam forte vel alteram excipias in sua adhuc infantia degentes, documentis, ideo vel maxime corruptissimas extitisse quod repudia praeter modum frequentarent (40). Possem documenta haec

(38) Serm. CCCXCII. cap. IV. Opp. ed. Maur. tom. V. col. 1505.

(39) Cf. Trombelli *De matrim.* tom. II. diss. VII. Bononiae 1781.

(40) Satis est vel leviter percurrere, quae de facilitate divortiorum penes

ex illarum annalibus, si opus foret, facile proferre, sed cum alias attulerim aut indicaverim, haec abstineo, praesertim cum de re agatur omnibus nota. Illud potius mirari subest quam ratione Erasmus utpote vir eruditus, et cui haec erant compertissima, potuerit ad ethnicorum exemplum provocare: quo scilicet cognoscitur nil aliud nisi impotens desiderium scopum obtinendi quem sibi praefixerat vellicandi quod sancte in ecclesia quovis seculo servatum est, ab eaque toties constitutum iuxta evangelicam et apostolicam doctrinam.

Falsum praeterea id ipsum agendi ratio, quae passim viget apud protestantes, luculenter ostendit. Cum enim semel ostium apertum esset divortiiis perpetuis ob adulterii crimen, illico in praeeptis ruerunt, causasque multiplicarunt adeo, ut vix apud illos matrimonium ullum subsistat. Specimini sint quae scripsit Bucerus sub ipsis ita dictae reformationis initiis. Cum enim plures enumerasset divortii causas concludit: «Haec adferenda hic putavi ad eam explicandam quaestionem, num concedi a christianis principibus et rerumpublicarum moderatoribus possit, divortium facere, et ad alteras transire nuptias, aliis quam fornicationis et stupri de causis. Ex quibus omnibus, si omnia rite et *ex verbo Dei* panderentur, satis liquebit, neminem, nec virum nec mulierem, cui opus sit ad bene casteque vivendum coniuge, ac coniuge cohabitante, atque coniugii officia necessaria faciente, prohiberi debere, quin vir talem quaerat uxorem et habeat, et mulier talem virum, si deprehensum et evictum sit (*sic*), vel virum, cui pia mulier nupta fuit, vel mulierem, quam vir pius uxore-

ethnics nationes omnes scripsit vel ipse Io: Gerhardus op. cit. *Loc. theolog.* Loc. XXVI. cap. X. sect. III. art. 2. memb. 2. §. 597. et 598. ubi plura antiquorum reperiuntur hac de re testimonia, ex quibus luce meridiana clarius patet quo ex eiusmodi facilitate perventum fuerit. Haec testimonia exhiberem nisi essent notissima. Et tamen Erasmus ausus est scribere «Penes quos suus constabat matrimonio honos!»

rem duxit, praestare necessaria coniugii officia aut obstinate nolle; aut eiusmodi commisisse scelera, ut propter turpitudinem suam non possit: aut denique incurabili impediri impotentia, quominus per corporis vires illa valeat coniugii officia persolvere (41).» Quae deinde fuse persequitur cap. XLIII. et seqq.; ut alios praeteream, de quibus alias scripsimus.

Ne quis vero suspicetur haec theoretica potius esse quam practica, praesto sunt innumerae divortiorum sententiae, quae per annos singulos in Borussia et in aliis Germaniae regionibus, nec non in provinciis foederatis Americae ferri solent, ut vel ipsos protestantes eorum pudeat. Exinde factum est, ut haud raro ministri protestantes sategerint tot divortiis fraenum iniicere (42). Cuius rei nonnulla suo loco documenta attulimus. Haec fortasse Erasmus ne suspicabatur quidem, dum talia commentus est, sed facile praevidere potuisset, quin etiam debuisset.

Vis rara esse divortia? Concludit Erasmus, *cura ut non tam facile coëant coniugia; iudicio coëant, coëant auctoritate parentum, aut eorum quorum interest.* Bene quidem: Monitum est sane egregium. At quid si fraeni impatientes sint qui coniugia coëunt? Si illis dominantur cupiditates, quae

(41) *De regno Christi* cap. XLII. pag. 124. in collectione inscripta: *Scripta anglicana*. Basileae 1577. Quod Buceri opus vulgo appellabatur *cantus cygni*, eo quod fuerit postremum. De Bucero proinde scripsit Tapperus in explic. capit. XVIII. Lovan.: «Facilius dissolvi matrimonia, auctore Bucero, quam civiles contractus.»

(42) Recolantur quae paulo ante attulimus ex publicis documentis circa conatum coarctandi divortii titulos. His addimus quae refert periodica collectio *La Civiltà cattolica* an. VIII. n. CLXIII. tom. V. 1. Sab. Genn. 1857. pag. 127. «*La Corrispondenza prussiana*, ibi legitur, giornale del ministero, contiene due articoli... Il primo è, che vi si ammette almeno per un certo tempo, la separazione *a mensa et toro*; nel secondo si annulla una decina di ragioni, le quali eran fin qui giudicate sufficienti ad autorizzare il divorzio. E infatti la legislazione avea gran bisogno di riforma in questo punto; non essendo raro in Berlino il trovar donne con quattro o cinque mariti tutti vivi; e contandosi annualmente in Prussia circa 6900. processi per divorzio, con circa 3000. sentenze di divorzio.»

vix rationis compotes eos esse sinunt, qui illis duci se patiuntur? Si aures occludant consiliis, monitis, minis, quandoque etiam legibus ipsis? Si ex impetu agant, nec respiscant nisi postquam in nassam se ultro iniecerunt? Nonne pene innumeri ubique terrarum caeco eiusmodi amore insaniunt? Ergo ne debebunt omnia ab his inita dissolvi coniugia, ut locus detur prudentiori electioni? Accedit haud raro parentes ipsos in culpa esse, quod infelicia coniugia ineantur. Interdum enim impedire illos nexus coniugales adnituntur, qui beatum exitum haberent, ac filios aut filias suas sin minus cogant, pertrahunt saltem ad iungendas nuptias cum illis quos nollent. Verum praevalent apud parentes identidem tituli, divitiae, honores, cognationes, clientelae, aliaque id genus multa, quibus fit, ut filii velint nolint, debeant ducere non quos ipsi optarent, sed quos parentes praelegerunt. Felicia ne erunt eiusmodi connubia? Nil minus. Sed potius se eiusmodi coniuges persaepe mutuo prosequuntur odio; in rixas perpetuas et simultates erumpunt; exinde vero disrupta matrimonia, lites et quae eam sequuntur mala gravissima. Et tamen ipsi parentum auctoritati, et eorum quorum intererat consilio obsecuti sunt. Ergo ne, iterum sciscitor, debebunt omnia haec coniugia pariter dissociari?

Neque illud omittendum est interdum parentes et sponso decipi. Etenim non desunt, qui ut ad optatas perveniant nuptias, malas tum físicas tum morales qualitates ita dissimulent ac tegant, ut nulla ratione pateant, donec finem suum fuerint assecuti, ac recedendi nulla via, et pedes a laqueo retrahendi nullus detur locus. Tunc moerores, gemitus, questus. Attamen hi omnes commotionem erasmianam, quoad eius fieri potuit, executioni mandarunt, nec tamen quidquam profecerunt. Numquid et istis omnibus, qui certe pauci non sunt, via aperienda divortiis, ut feliciori foedere se coniungant? Quid si se-

cunda et tertia vice decipiantur? En quo ducant theoriae ab hominibus seu ab huius seculi sapientibus excogitatae, ut illas opponant ecclesiae catholicae doctrinae sanctisque principiis.

Itaque nulla alia via suppetit, quam ut a teneris unguiculis utriusque sexus adolescentibus sanctissimae religionis dogmata ac saluberrima praecepta instillentur, atque in eorum cordibus alte defigantur. Siquidem si his se morigeros praeberint, Deus ipse providentia sua concurret, ut foedera nuptialia optimum sortiantur effectum iuxta illa biblica oracula: « Beatus qui habitat cum muliere sensata (43). » Mulieris bonae beatus vir; numerus enim annorum illius duplex (44). » Pars bona, mulier bona, in parte timentium Deum dabitur viro pro factis bonis (45); » aliaque eiusmodi, quibus Scripturae sanctae abundant.

Quod si contingat initum coniugium optatum non sortiri exitum, sola religio his malis pharmaca salutaria praebebit, facilemque reddet longanimitatem, patientiam, lenitatemque in vitiis tolerandis quibus alteruter coniugum irretitus fuerit, donec ad saniora consilia redeat, et ad meliorem frugem se recipiat. Hac ratione plures in eiusmodi statu ad sanctitatem atque ad heroicum, ut vocant, virtutis gradum pervenerunt. Cuius rei testis est experientia in religione catholica, in qua innumeri prope sanctitatis apicem hoc modo attigerunt. Quae si admiranda potius quam imitanda videantur, suppetunt etiam vulgaria ac frequentissima exempla reconciliationum, adeo ut post temporaneum divortium in gratiam redierint, et amico foedere coniuges ad mortem usque perseverarint. Si quid vero sit patiendum, dolor mitigabitur spe melioris eventus, neque ulla necessitas cogit ad divortia perfecta fa-

(43) Eccl. XXV. 11.

(44) Ibid. XXVI. 1.

(45) Ibid. v. 3.

cienda, atque ad iterandas nuptias, quae praeterquam quod a religione damnantur, sunt fons plurium malorum, quae coniuges, sobolem, ipsamque societatem affligunt, atque pessumdant.

CAPUT VI.

DE DISSOLUTIONE MATRIMONII RATI, NON CONSUMMATI.

Notum est omnibus matrimonium in legitimum, ratum, et consummatum distingui; legitimum seu verum coniugium est, quod ab infidelibus ad normam legis naturalis contrahitur; ratum illud est quod initur a fidelibus ac sacramentum efficitur, eo ipso quod sacramentum fidei seu baptismum susceperunt, quo fit ut eorum contractus solo consensu legitime praestito evehatur ad dignitatem sacramenti utpote signum gratiae practicum et efficax, repraesentans coniunctionem Christi cum ecclesia; consummatum vero dicitur vel non consummatum, prout copula intercesserit inter coniuges vel non intercesserit. Eiusmodi distinctionis saepe fit mentio in iure canonico, et magni est momenti in quaestione quam agitamus.

Ratione enim istius distinctionis coniugium maiorem vel minorem firmitatis gradum habet. Sane, ut suo loco ostendimus, matrimonium infidelium quamvis consummatum dissolubile est, ac solvitur per conversionem coniugis ad fidem christianam, renuente altero coniuge sine contumelia Creatoris cohabitare cum parte conversa. At matrimonium fidelium consummatum esse prorsus quoad vinculum indissolubile exploratum est, quemadmodum hactenus certis argumentis ostendimus. Nec ecclesia aut rom. pontifex potest aliquando consummatum fidelium coniugium dissolvere ullo in casu (1). Inter haec medium

(1) Prout nonnulli perperam autumarunt. Cf. de hoc argum. Gibert in op. *Tradition ou histoire de l'église sur le sacrement du mariage*, tom. III. pag. 244 seqq.

tenet locum coniugium ratum et non consummatum, quod solvi posse per solemnem religionis professionem doctrina catholica est.

Hanc doctrinam adorti sunt novatores saec. XVI., seu ut ipsi se vocant, sacrorum emendatores, verius autem corruptores, qui quum ad unum omnes abhorreant a votis religiosis, utpote magna ex parte e claustris transfugae et apostatae (2), nil magis cordi habuerunt, quam ut inanitatem professionis religiosae praedicarent. Hi propterea dum faciles adeo se praebuerunt in dissolvendis coniugiis etiam consummatis fidelium, difficiles omnino in concedenda dissolutione connubii rati in gratiam vitae perfectioris sectandae semet exhibuerunt: imo etiam prorsus et absolute denegarunt eiusmodi dissolutionem fieri umquam

(2) Quorum princeps extitit Lutherus qui sacerdos et religiosus cum perdita sanctimoniali sacrilegum matrimonium celebrare est ausus. De quo non minus vere quam sagaciter scripsit Ida Hahn-Hahn in op. quod post suam ex protestantismo conversionem ad ecclesiam catholicam quodque inscripsit germanice *De Babylone ad Hierusalem* iuxta vers. gall. doct. Leonis Bessy: « Comment, inquit, se défendre de cette pensée, que Luther, en contractant son mariage en état de péché mortel, attira sur tous ses partisans une réprobation mystérieuse, précisément en ce point, qui exerce une influence si décisive sur le bonheur, ou le malheur de générations entières et sur tout l'ensemble de l'éducation sociale? Mais aussi, par là même que cette mortelle blessure faite à la morale publique se dévoile aux yeux de tous d'une manière si effrayante, et que nulle sagesse humaine n'est en état de la fermer, n'a-t-on pas le droit d'espérer que ceux qui en sont atteints ou menacés auront recours au seul remède dont ils puissent attendre la guérison, le retour à l'église mère? »

De turba vero sacerdotum et monachorum, qui votis suis insuper habitis currebant exemplo Lutheri ad novam sectam, haec iam aetate sua, seu initio sic dictae reformationis scribebat Wizel: « Nec non deturbat omnia aucupium nummularum. Nisi actutum des, curritur ad sectam. Quod si posset talibus mercenariis contingere in secta unde victitent, profecto ecclesiam equis et velis desererent, usque adeo *neminem fere non delectat carnalissimae sectae licentia, voluptas trahit.* » *Conquestio de calamit. statu.* Lipsiae 1538. C. a. apud Dölinger *La Réforme* tom. I. pag. 104. Paris, 1847.

Plura item cf. hac de re apud Audin *Hist. de la vie de Luther*, tom. deux. chap. XI *Sécularization des couvents et mariage des moines - Désordres produits par l'ouvrage du réformateur sur le célibat.* Et ita res perseveravit iugiter a nuptiis Lutheri ad nuptias Achilli, et de Sanctis, et ita porro perseverabit in futurum.

posse. Istorum audaciam fregit concilium tridentinum, ut mox videbimus.

Ianseniani, qui protestantium vestigia premere sibi proposuerunt, eandem instaurare doctrinam aggressi sunt impugnantes definitionem concilii tridentini, ac si adversaretur Scripturae et traditioni. Inter quos eminent Lericant (3), Pilé (4), iuxta quem fides circa matrimonii indissolubilitatem a seculo duodecimo obscurata est, ac irritum est habendum tridentini concilii decretum, ut cui defuerit necessaria libertas. Hos sectatus est Tabaraud, qui eos ferme exscribit, utpote iisdem principiis imbutus (5).

Nulla autem ratione ferri potest, quod scripsit Maldonatus seu potius auctor op. *De sacramentis* eius nomine vulgati (6) de hoc argumento; cum enim quinque praemisisset difficultates quibus urgetur doctrina catholica de solutione matrimonii rati et non consummati, subdit: «Haec argumenta videntur mihi habere non posse ullam responsionem, nisi aut concedamus, matrimonium ratum et nondum consummatum non esse verum matrimonium et verum sacramentum, aut certe ecclesiam ita existimasse, cum decrevit licere post matrimonium ratum, conferre se ad religionem, altero coniuge invito, et licere alteri adire alias nuptias. Quod autem hoc sensu ecclesia definierit, manifestum est ex illis omnibus canonibus quibus statuit. Nam in illis omnibus nominat *sponsum* et *sponsam* eos, qui coniuncti sunt matrimonio rato, non consummato. Nusquam autem appellat coniuges, neque maritum, neque uxorem. Adde quod in nonnullis etiam ex illis manifeste

(3) *Examen de deux questions sur le mariage*, pag. 458 seqq.

(4) *Dissert. Sur l'indissolub. absolue du lien conjugal*. 2. vol. in-12.

(5) *Principes etc.* Ed. 1. pag. XXXVIII. et pag. 233 seq. et iterum pag. 391 seq. in nova autem ed. pag. 381 seqq. Cf. ap. Carrière tom. I. n. 304.

(6) Cf. Alegambe in Biblioth. soc. Iesu.

dicat non esse verum matrimonium et coniugium, antequam sit consummatum. At certe hoc indicat ipsum nomen *consummatum*, quasi perfectum et absolutum (7).»

Quae quidem satis temere dicta esse videntur; difficultates autem, quibus responderi non posse autumat hic auctor, paulo post excutiemus iisque satis atque abunde responderi ostendemus.

Interim ex hactenus dictis patet nobis vindicandam esse ecclesiae circa hunc articulum doctrinam adversus omnes eius impugnatores. Quod vero attinet ad has vindicias, praemittere adhuc debemus illas scientifice spectatas varias esse pro sententiarum varietate, quae inter catholicos theologos viget. Siquidem alii eiusmodi dissolutionem repetunt ex iure naturali; alii ex iure ecclesiastico; alii demum ex iure divino. Unumquodque autem placitum suis peculiaribus urgetur difficultatibus, quas dissimulare nec possumus nec debemus, ut ex earum collatione quid verisimilius censendum sit colligamus. Absoluta quaestione dogmatica de solutione coniugii rati per solemnem religionis professionem, expendenda erit quaestio theologica, utrum aliis gravibus de causis coniugium ratum pontificia dispensatione atque auctoritate dissolvi possit, de qua quidem quaestione duplex doctorum sententia habetur, quarum altera eam potestatem ecclesiae seu rom. pontifici denegat, altera vero adstruit.

Ut igitur qua par est perspicuitate ac methodo incedamus, distinctis articulis de his omnibus pertractabimus, praemissa generali doctrina a concilio tridentino definita hoc canone VI. sess. XXIV. «Si quis dixerit, matrimonium ratum, non consummatum, per solemnem religionis professionem alterius coniugum non dirimi; anathema sit.»

(7) *Opera varia theologica*. Lutet. Paris. 1677. tom. II. *De matr.* par. IV. cap. VI. pag. 474 seq.

ARTICULUS I.

De veritate doctrinae catholicae circa dissolutionem vinculi coniugalis per solemnem religionis professionem alterius coniugum.

Sermo hic est de matrimonio vere ac presse sumpto, adeoque de vero et proprio sacramento, cum agatur de matrimonio inter fideles baptizatos inito. Idque ad excludendam singularem Maldonati sententiam, quod scilicet sacri canones, ac propterea et canon tridentinus, non loquantur nisi de matrimonio, quod verum proprie non sit, nec verum sacramentum. Quomodo enim concilium tridentinum potuisset appellare *matrimonium* illud quod ratum tantum est, necdum consummatum, si illud non habuisset ut verum matrimonium, verumque sacramentum, cum constanter in tota hac sessione hanc vocem iugiter in propria ac rigorosa significatione usurpaverit? Hoc vere absonum est, ac si semel admitteretur, vix non nutaret universa eiusdem concilii doctrina.

Hisce praemissis merito tridentinum definivisse dissolvi coniugium ratum fidelium per professionem religiosam patet ex sensu traditionali totius ecclesiasticae antiquitatis. Siquidem hic sensus ab immemorabili viguit in ecclesia christiana, ut maioris perfectionis sectandae gratia sive sponsalia, sive matrimonia rata dirimerentur, ut pateret aditus ad consilia evangelica profitenda. Romani pontifices filum traditionis secuti non nisi rationem determinaverunt, et conditiones, quo rite id fieret, utpote supremi in ecclesia moderatores. Fieri enim poterat, ut abusus obreperent, si res privatorum arbitrio relinqueretur. Ceterum suis sanctionibus nihil novi summi pontifices intulerunt.

Hunc vero sensum traditionalem viguisse ab antiquissima aetate, facile deprehendimus ex tot exemplis illis

seu factis, quae nobis praebet historia ecclesiastica. Non erunt ea quidem, si singillatim ac seorsum expendantur, apodictica ad rem conficiendam quam intendimus; attamen illorum collectio manifeste patefacit spiritum, qui iugiter in ecclesia viguit. Haec itaque subiiciam cum nonnullis animadversionibus criticis, quibus veritas suo lumine illustretur.

Primum exemplum habemus in s. Thecla adeo ab universa antiquitate commendata. De ea igitur s. Ambrosius scribit: «Thecla copulam fugiens nuptialem, et sponsi furore damnata, naturam etiam bestiarum virginitatis veneratione mutavit (8).» Et s. Epiphanius: «Thecla, inquit, cum in Paulum incidisset, pactas nuptias dissolvit, cum primario cuidam civitatis totius, ac longe diviti, nobilissimo, splendidissimoque desponsa iam fuisset. Verum terrena ideo sancta illa contempsit, ut caelestium compos esse posset (9).» At non diffitemur excitari dubium merito posse, utrum de sponsalibus, an de coniugio agatur, quod s. Thecla contraxerit, ut plures existimant (10).

Alterum quod afferri consuevit exemplum desumitur ex duobus illis aulicis, qui, ut scribit s. Augustinus, lectione permoti vitae s. Antonii, relicto seculo «Manserunt in casa: et ambo habebant sponsas: quae posteaquam hoc audierunt, dicaverunt etiam ipsae virginitatem Tibi (Deo) (11).» Verum dubitari et hic potest, num illae fuerint potius sponsae quam uxores. Quod autem a quibusdam dicitur incertum esse, annon, si fuerunt vere uxores, matrimonium fuerit etiam consummatum, exclu-

(8) *Lib. De virginib.* cap. VIII. n. 12. Opp. ed Maur. tom. II. col. 167.

(9) *Haeres.* LXXVIII. n. XVI. ed. Petav. tom. I. pag. 1048. Cf. quae de hac s. virg. et martyr. scripsit Tillemontius, *Mémoir etc.* tom. II. pag. 60 seqq.

(10) Cf. Baronium in notis ad Martyr. rom. die 13. Sept. nec non Bollandian. ad eamd. diem. Tom. VI. *Acta sanct.* pag. 550 seqq. ubi critice expendunt, quae ad hanc s. virginem ac martyr. referuntur.

(11) *Confess.* lib. VIII. n. 15.

ditur verbis s. Augustini, qui testatur illas Deo dicasse suam *virginitatem*.

Tertium exemplum adest in s. Alexio, qui floruit sub finem sec. IV. et initium sec. V. sub s. Innocentio (12). De quo in eius vita legitur: «Cum eum nuptialibus infulis aptum iudicassent (parentes eius), elegerunt ei puellam ex genere imperiali, et ornaverunt thalamum, et impositae sunt eis singulae coronae (13) in templo s. Bonafacii martyris per manus honoratissimorum sacerdotum, et sic cum gaudio et laetitia laetum duxerunt diem. Vespere autem facto, dixit Euphemianus filio suo: Intra, fili, in cubiculum, et visita sponsam tuam. Ut autem intravit, coepit nobilissimus iuvenis, et in Christo sapientissimus instruere sponsam suam, et plura ei sacramenta disserere; deinde tradidit ei anulum suum aureum, et rendam (14), id est caput baltei, quo cingebatur, involuta in prandeo (15), et purpureo sudario, dixitque ei: suscipe haec, et conserva usque dum Domino placuerit, et Dominus sit inter nos. Post haec... discessit ad mare (16).» Iam vero heic absque dubio agitur de vero coniugio rato non consummato ac dissoluto. Eadem leguntur in caeteris actis, praesertim vero in vita arabica a Bollandianis primum vulgata (17).

Omitto exempla Gregoriae virginis de qua s. Gregorius Magnus (18), ac de cuiusdam Catelli sorore Stephano desponsata, quaeque monasticum est institutum professa, ut idem refert s. Pontifex (19), cum certo non de matri-

(12) Qui sedere coepit in pontificatu an. 411. et desiit an. 417.

(13) Erat hic ritus nuptialis receptus non solum apud graecos, verum etiam apud latinos.

(14) Nempe *Zonam*, ut ex Cangio ad hanc vocem.

(15) Id est *velo*, ut ex Cangio.

(16) Apud Bolland. die XXI. Iulii. tom. IV. Iulii pag. 252.

(17) Ibid. p. 267.

(18) Lib. III. *Dialog.* cap. XIV. ed. Maur. tom. II. col. 301.

(19) Lib. VII. epistol. XXIII. Ibid. col. 867.¹

monio rato in his agatur, sed de sponsalibus tantum. Quartum exemplum affertur ex s. Leobardo de quo scribit s. Gregorius turonensis. « Cogentibus parentibus ut arrham puellae, quasi uxorem accepturus, daret compellitur.... Haec patre loquente, licet haberet alium filium, facile tamen tali aetatulae persuasit voluntati propriae contraire. Denique dato sponsae anulo, porrigit osculum, praebet calceamentum, celebrat sponsaliae diem festum... Deus... compunxit cor eius, ut relicto seculo manciparetur ad cultum divinum (20). » Ast et hoc exemplum referri posse videtur ad solam sponsalium dissolutionem.

Magis ad rem nostram accedere videtur quod refert ven. Beda de Edildrida scribens: « Accepit rex Ecgfridus coniugem nomine Edildridam.... cuius consortio cum uteretur duodecim annis, perpetuo tamen mansit virginitatis integritate gloriosa, sicut mihimet sciscitanti.... Valfridus episcopus referebat, dicens se testem virginitatis eius esse certissimum, adeo ut Ecgfridus promiserit se ei terras ac pecunias multas esse donaturum, si reginae posset persuadere eius uti connubio... quae multum diu regem postulans, ut seculi curas relinquere, atque in monasterio tantum vero regi Christo servire permetteretur. Quod ubi vix aliquando impetravit, intravit monasterium (21). » Certe hic agitur de matrimonio tantum rato, eoque discisso quoad vinculum; nam testante Thoma Eliensi, rex novum iniit coniugium. Scribit enim, quod cum frustra rex Edildridam, seu ut eam vocat, Etheldredam, recuperare adnitus fuisset « Eboracum redit, Ermemburgemque sibi matrimonio copulavit (22). »

Ex his aliisque eiusmodi documentis facile est colligere

(20) *Vitae patrum*, cap. XX. ed. Maur. col. 1252.

(21) *Hist. anglor.* lib. IV. c. XIX. ed. Basil. 1563. tom. III. col. 138.

(22) In *Historia Eliensi* apud Whartonum *Anglia sacra* part. I. Londini 1691. pag. 598.

quinam iugiter in ecclesia traditionalis sensus viguerit, et quinam spiritus eam informaverit. Etsi enim non omnia quae prolata sunt exempla rem conficiant, satis tamen indicant quid hac de re ecclesia senserit, donec rom. pontifices, oblata sibi occasione, decreta sua emiserunt, quibus omne sublatum est dubium de istorum matrimoniorum dissolutione.

Ac primus quidem cuius certum documentum extat, est Alexander III. qui an. 1180. hanc decretalem emisit: «Verum post consensum legitimum de praesenti, licitum est alteri, altero etiam repugnante, eligere monasterium, sicut sancti quidam de nuptiis vocati fuerunt; dummodo carnalis commixtio non intervenerit inter eos: et alteri remanenti (si commonitus continentiam servare noluerit) licitum est ad secunda vota transire: quia cum non fuissent una caro simul effecti, satis potest unus ad Deum transire, et alter in seculo remanere (23). » Et iterum: «Ceterum, quia licet a praefato viro desponsata fuit, adhuc tamen, sicut asserit, ab ipso est incognita: mandamus, quatenus si praedictus vir ipsam carnaliter non agnoverit, et eadem ad religionem transire voluerit, recepta ab ea sufficienti cautione, quod vel ad religionem transire, vel ad virum suum redire intra duorum mensium spatium debeat, ipsam a sententia, qua tenetur, absolvas; quod si ad religionem transierit uterque, restituat alteri quod ab eo noscitur accepisse. Sane quod Dominus in evangelio dicit, non licere viro, nisi ob causam fornicationis uxorem suam dimittere, intelligendum est, secundum interpretationem sacri eloquii, de his quorum matrimonium carnali copula est consummatum, sine qua consummari non potest (24). »

(23) *Decret. Gregorii IX. lib. III. tit. XXXII. De convers. coniugat. cap. Verum.*

(24) *Ibid. cap. VII. Ex publico.*

Ex quibus decretis habemus, in priori quidem constitutum generale principium de dissolutione coniugii rati necdum consummati, ac interpretationem textus evangelici: *Quod Deus coniunxit, homo non separet*, nec non alterius: *Qui dimiserit uxorem suam, excepta fornicationis causa etc.* de matrimonio consummato; cum scilicet coniuges facti sunt *una caro*; in posteriori vero magis determinatum habemus duorum mensium spatium ad definitivam deliberationem.

Alter pontifex est Innocentius III. an. 1210. qui lugdunensi archiepiscopo rescripsit: « Nos inquisitioni tuae taliter respondemus, quod etsi possit non inconsulte videri, quod ex quo matrimonium inter legitimas personas, per verba de praesenti contrahitur, illis viventibus in nullo casu possit dissolvi, ut vivente reliquo, alter ad secunda vota transmigret.... Nos tamen nolentes a praedecessorum nostrorum vestigiis declinare, qui respondere consulti, antequam matrimonium sit per carnalem copulam consummatum, licere alteri coniugum, reliquo inconsulto, ad religionem transire; ita quod reliquus, extunc legitime poterit alteri copulari: hoc ipsum tibi consulimus observandum in articulo praenotato, quamvis falsa sit causa, per quam ob susceptionem veli praedicta mulier est inducta, cum sine qualibet tali causa, idipsum religionis obtentu facere potuisset. Porro licet praedicta mulier videatur in veli susceptione religionis habitum assumpsisse, si tamen velit in domo propria remanere, quasi propositum castitatis in seculo servatura, nihilominus consummandum est matrimonium iam contractum, nisi se voto obstrinxerit ad observantiam regularem: in quo casu compelli potest, ut relicto seculo, religionis propositum exequatur (25). »

Deprehendimus porro ex hoc decreto Innocentium nihil novi constituisse, sed in eo edendo praedecessorum

(25) Ibid. cap. XIV. *Ex parte tua.*

suorum vestigiis inhaesisse, qui certe solus Alexander III. esse non potuit. Alia proinde praecessisse hanc in rem rom. pontificum decreta, quae forsitan perierunt, admittamus necesse est.

Ut igitur praesens argumentum absolvamus, ex adductis antiquitatis documentis eruimus primo in ecclesia iugiter hunc sensum viguisse de favore divinitus collato in gratiam perfectioris instituti per professionem evangelicorum consiliorum. Eruimus deinde rom. pontifices loqui de eiusmodi coniugiorum dissolutione ad profitendam religionem tamquam de re iamdiu superioribus seculis recepta, quin ulla assignari epocha possit. Exinde pronum est inferre viguisse ab initio traditionem apostolicam circa hunc articulum, quem demum solemniter concilium tridentinum suo canone sancivit. Sane nullum opponi potest ex tota antiquitate documentum quo contrarium adstruatur. Iam vero iuxta regulam s. Augustini: *Quae sunt contra fidem vel bonam vitam, (ecclesia) nec approbat nec tacet nec facit*, (26). Cum vero non modo negative, verum etiam positive constet in ecclesia ab immemorabili, licet sub diversa forma pro temporum adiunctis, eiusmodi institutum servatum fuisse, rursus altera eiusdem s. Doctoris regula adhibenda est: « Si quid horum tota per orbem frequentat ecclesia; ... quin ita faciendum sit disputare, insolentissimae insaniae est (27). »

Ad quam regulam si attendisset Maldonatus, seu auctor disputationum de septem sacramentis, ea profecto non opposuisset, quae eam omnino destruunt. Postquam enim scripsit, difficilem hanc esse quaestionem, utrum scilicet liceat matrimonium ratum dissolvere ad profitendum aliud vitae genus perfectius, nimirum religionem, *aut aliud eiusmodi, ut ministerium ecclesiasticum*; item utrum liceat

(26) Epist. LV. ad Ianuar. cap. XIX. n. 35. ed. Maur. tom. II. col. 142.

(27) Epist. LIV. ad Ianuar. cap. V. n. 6. col. 126.

illi qui relinquitur, contrahere alias nuptias, alio vivente; his, inquam, praemissis subdit: «Utrumque licere decretum est multis canonibus ecclesiasticis. Sed sunt maxima argumenta in contrariam partem.»

Haec autem argumenta quinque sunt. 1. Quod matrimonium ratum non differat essentia a matrimonio consummato; 2. quod Christus Dominus etiam de matrimonio rato dixerit: *Quod Deus coniunxit, homo non separet*; 3. quod in matrimonio rato alter alteri coniugi potestatem tradat corporis sui, nec liceat eandem alteri traditam conferre sine consensu eius cui tradita est; 4. quod matrimonium sit pactum solemne non secus ac solemne votum, adeoque non possit altero invito, qui matrimonium ratum iniit, continentiam profiteri; 5. denique, quod Augustino auctore non alia de causa coniugium christianorum prae ceteris indissolubile sit quoad vinculum, nisi quia est sacramentum. Iam vero matrimonium non consummatum vere et proprie est sacramentum, prout est consummatum (28).

Ast ipse veluti certum assumere videtur nonnisi auctoritate ecclesiastica dissolvi coniugium ratum, ut patet tum ex horum argumentorum indole et natura, tum ex eo quod dixerit *multis canonibus ecclesiasticis* id fuisse decretum. Attamen hoc non est exploratum, cum plures iique gravissimi theologi oppositam teneant sententiam, ut paulo post expendemus. Qua sola animadversione non minimum vis eorundem argumentorum infirmatur. Praeterea non animadvertit inter hos canones haberi canonem tridentinum, qui dogmaticus est, non autem mere disciplinarius. Demum falsum est quod affirmat posse dirimi coniugium ratum

(28) Auctor quicumque fuerit *De sept. sacrament.* loc. cit. nihil novi argumentis suis protulit, et quod non fuerit ab aliis oppositum praecipue a protestantibus Chemnitio *Examine* sess. XXIV. Magdeburgensibus *Centuria* I. lib. 2. c. 12. col. 637. a catholicis vero a Claudio Espenceo lib. 8. *De continentia* cap. 4. et ab Erasmo in *Annot.* ad I. Cor. VII. v. 10. Ast et illud exploratum est a catholicis illa omnia iam dissoluta *ante Maldonatum* fuisse.

ob ministerium ecclesiasticum. Numquam id docuit aut sensit ecclesia.

Porro si semel constiterit Deum ipsum ita de matrimonio rato constituisse in favorem perfectionis evangelicae, quemadmodum constituit de coniugio infidelium cum alter ad fidem convertitur, renuente altero sine contumelia Creatoris cum converso cohabitare, in favorem religionis christianae, proposita argumenta magna saltem ex parte ex se concidunt. An vero Christus ita statuisset dicendus sit, dogmaticè quidem seu theologice pendet ab examine quod instituimus traditionis, scientifice autem patebit ex discussione sententiarum, quae inter theologos vigent, quasque iam expendere aggredimur articulo insequenti; iisque expensis, propositas difficultates dissolvemus.

ARTICULUS II.

De iure quo matrimonium fidelium ratum et non consummatum per solemnem religionis professionem quoad vinculum dissolvatur.

Cum in tres sententias theologi partiantur circa ius quo dirimitur coniugium ratum, aliis, ut innuimus, hanc dissolutionem ex iure naturali, aliis ex iure ecclesiastico, aliis denique ex iure divino repetentibus, cumque unaquaeque et suis fundamentis fulciatur et suis etiam laboret difficultatibus, operae pretium ducimus unamquamque singillatim distinctis paragraphis excutere.

§. I.

De illorum theologorum sententia qui dissolutionem coniugii rati ex iure naturali repetunt.

Plures magni nominis theologi huic sententiae, duce b. Thoma, qui istorum agmen ducit, adhaerent. Hos recen-

sent Salmanticenses (29), inter quos eminent card. Bellarminus (30); ex recentioribus praestant Ludov. Habert (31), Drouin (32), Collet (33), Lagedemon (34), aliique.

Horum theologorum sententiae fundamentum est in duplici principio, quod cum s. Thoma constituunt. Contentundum itaque coniugium ratum dissolvi ex eo, quod ratio ipsa doceat semper licitum esse de statu minus perfecto ad perfectiorem transire, si id fieri possit absque alterius detrimento. Iam vero statu coniugii perfectior est religionis status; poterit ergo ab uno ad alium transitus fieri, quando id fiat sine ullius detrimento; porro nullum detrimentum pati qui derelictus est, matrimonio nondum consummato, patet ex eo quod nullum afferatur soboli damnum, quae non existit; nullum uxori, quae virgo permanet, nec ullam hac de causa infamiam subit; aliunde ius par est in utroque; proinde nulli fit hoc discessu iniuria.

Secundo evincitur ex eo, quod matrimonium semper in religione contrahatur sub hac implicita saltem conditione, nisi velim ante consummationem religionem ingredi ac profiteri, prout id mihi conceditur.

Sic autem disserit s. Thomas: «Ante carnalem copulam est inter coniuges tantum vinculum spirituale; sed post etiam est inter eos vinculum carnale. Et ideo sicut post carnalem copulam matrimonium solvitur per mortem carnalem; ita per ingressum religionis, vinculum quod est ante carnalem copulam solvitur: quia religio est quaedam mors spiritualis, qua aliquis seculo moriens vivit Deo (35).» Alibi vero angelicus Doctor alterum principium attingit scri-

(29) Tract. IX. *De matrim.* cap. IV. puncto III. n. 28.

(30) Lib. II. *De monachis* cap. XXXVIII. n. 16.

(31) *De matr.* Cap. II. §. VII. resp. 5.

(32) *De matr.* quaest. IV. cap. III. §. I. prob. IV.

(33) *De matr.* cap. V. sect. V. n. 346.

(34) *De matr.* quaest. VII. art. 2. sect. I. concl. 3.

(35) *Suppl.* quaest. 61. art. 2. in corp.

bens: « Ante carnalem copulam non est omnino translatum corpus sub potestate alterius, sed sub conditione, nisi interea alter coniugum ad frugem melioris vitae convolet. Sed per carnalem copulam completur dicta translatio, quia tunc intrat uterque in corporalem possessionem sibi traditae potestatis (36). »

Huius sententiae patroni cum ex ipsa rei natura et ex analogia fidei argumenta deducant ad evincendam dissolubilitatem coniugii rati, inferunt haud opus esse ad eius probationem proferre testimonia sive biblica sive traditionalia. Ecclesia quippe uti iuris naturalis interpret, spectata utriusque status coniugalitatis et religiosi perfectione, iudicavit hanc illi esse anteposendam, atque ad eam aditum patere cum nondum matrimonium suam adeptum est perfectionem per sexuum commixtionem.

Ast non spernendis haec premitur opinio difficultatibus sub utroque aspectu quo est proposita. Siquidem nisi prius constituatur ex divina traditione, matrimonii vinculum non esse prorsus indissolubile iure divino positivo, ex sola ratione nihil evincitur. Nam si Deus constituit coniugium in genere inter christianos prorsus indissolubile, quidquid ex rationis penu statuatur, patet nullius roboris esse.

Nec satis est professionem religiosam esse statum perfectiorem, de quo nulla est quaestio, sed ostendendum praeterea esset, post sancitum solemne foedus coniugale, quo alter alteri ius fecit in corpus suum, fas esse profiteri statum religiosum sine alterius libero consensu. Alioquin posset coniux votum etiam emittere continentiae, sacros ordines suscipere, aliaque eiusmodi praestare quae perfectiora sunt statu coniugali; attamen nemo catholicorum id umquam affirmavit.

Nec obest solum statum religiosum mortem spiritualem ac civilem efficere, quae comparatur morti naturali, quae

(36) *Suppl.* quaest. 61. art. 2. ad 2.

matrimonium dirimit consummatum. Nam quaestio in eo praecise versatur, utrum quis possit sibi spirituales mortem inferre, quando id in eius potestate non amplius situm esse videtur ob anteriorem obligationem, eamque iustitiae, quam contraxit. Pessime porro ageret, qui gravatus aere alieno substantiam suam in pauperes distribueret, ac interea debita sua non persolveret. Gratis deinde assumitur id non vergere in alterius detrimentum; nam si agatur de viris, res ita esse potest; sed si de puellis agitur, non ita se habet, cum aegre interdum maritum inveniunt, quandoque non nisi post plures annos, quandoque etiam nunquam. Puellis autem, quae in se non experiuntur vocationem ad religiosam vitam vel ad caelibatum, invenire honestum consortem, hac in vita summa res est (37).

(37) Dixi *Quae in se non experiuntur vocationem ad religiosam vitam, vel ad caelibatum . . . hac in vita summa res est*; prorsus enim admitti non potest quod domina De Gasparin in suo op. *Le Mariage au point de vue chrétien*. Paris 1844. 2. édit. affirmare ausa est cap. I. matrimonium praefereendum esse caelibatui utpote finem supremum foeminae; sic enim scribit pag. 53: «Oui, la femme est faite pour l'homme et le mariage est fait pour la femme, il est *sa fin naturelle ici-bas*, il est parmi les moyens terrestres, le plus efficace, que Dieu lui ait donné pour aider à son perfectionnement et pour arriver à la satisfaction de ses instincts élevés.» Et pag. 36. «Ce n'est pas ici ou là, clair et rarement semés qu'on les rencontre, ces comparaisons qui font éclater *la supériorité du mariage, c'est par tout.*» Scilicet in universa sac. Scriptura. Quumque sibi obiecisset verba Apostoli I. Cor. VII. ubi ipse praefert caelibatum coniugio, non veretur haec foemina calviniana rigida et methodistica inficiari Apostolum hac in re fuisse inspiratum. En verba quibus se defendit in fol. periodico *Archives du christianisme* 20. Juil. 1851. pag. 130. «Ce chapitre, inquit, renferme deux paroles: l'une de Dieu, *l'autre de l'homme*. Il y a des portions de ce chapitre où Paul parle seul; il y a d'autres portions où le Saint-esprit parle par la bouche de Paul . . . Tout ce qui y concerne le célibat est de l'homme. Du premier verset au dixième, c'est Paul qui parle. Vient ensuite la parole du Seigneur. La parole humaine recommence au verset douzième; elle s'arrête avec le seizième. La parole de Paul, *l'expression de son opinion particulière* reprend au verset vingt-cinquième, et elle continue jusqu'à la fin du chapitre.» Quam quidem particularem Apostoli opinionem circa *doctrinam*, vocat *errorem funestum*. En eius verba ibid. 8. Mar. 1851. pag. 53. «*Erreur funeste, qui impose le devoir de lutter contre une autorité tendrement aimée.*» O foeminam petulantem, cui apprime conveniunt Tertulliani verba in lib. *De praescript.* cap. 41. *Ipsae mulieres haereticas quam procaces! Quae audent docere, contendere.*

Quod vero attinet ad principium alterum de consensu conditionali, reponunt adversarii, eiusmodi conditionem praesumi potius quam probari. Nam haec conditio neque implicite seu tacite a contrahentibus ponitur, qui intendunt inire coniugium ratione consueta, ut fruantur iure suo; et patet ex renitentia partis derelictae. Sed neque ex parte ecclesiae eiusmodi apponitur conditio, cum ea nusquam id declaraverit. Immo cum agatur de sacramento, eam excludit, cum non possit sacramenti effectus suspendi, et dum contractus coniugalis per consensum de praesenti conficitur, hoc ipso conficitur sacramentum, quod gratiam producit ex opere operato, quaeque nec moras patitur nec suspensionem. Alioquin in ipsa coniugii consummatione, per quam hypothetica conditio expletur, conficeretur sacramentum, communicareturque gratia, quod est absurdum. Sane qui in coniugii mutuo consensu praebendo profiterentur continentiam, isti numquam sacramentum reciperent, neque gratiam sacramentalem. Quis porro hoc dixerit? Non denique hanc conditionem exposcit natura ipsa contractus coniugalis; quia reperiretur in omnibus matrimoniis legitimis sive in vera sive in falsa initis religione. Nam quod insitum est ipsi rei naturae, toties reperiri debet, quoties res ipsa subsistit; subsistit autem verum matrimonium etiam apud infideles et haereticos, apud quos tamen locum habere non potest ea conditio (38).

Sub quocumque igitur respectu sententia haec perpendatur, constat eam nutare, nec firmiter consistere (39).

Et quidem cum apostolo Paulo, quem *funesti erroris* accusare non veretur ne se turpiter errare fateatur! Talis est haereticorum erga Biblia veneratio. Eodem ratione se gesserat saec. III. Ptolaemeus haereticus gnosticus respectu Moysis.

(38) Haec postrema ratio nullius ponderis esse videtur; tum quia nemo unquam dixit hanc conditionem provenire ex iure naturali absoluto, sed solum in hypothesi quod Deus constituerit statum perfectionis evangelicae; tum quia haec conditio in falsa religione supponi nequit.

(39) Cf. Suarez *De religione* tom. III. lib. IX. cap. 23. ubi fuse eam persequitur.

§. II.

De illorum theologorum placito qui constituunt dissolvi matrimonium ratum iure tantum ecclesiastico.

Permoti difficultatibus, quibus prima urgetur sententia, non pauci theologi in eam venerunt opinionem, ut ius hoc dissolvendi coniugium ratum deducerent ex ecclesiae auctoritate, quae accepta a Christo ligandi solvendi-que generali facultate, eiusmodi coniugia dissolvit, aut saltem uti interpret iuris divini id constituit. Eminent inter hos Suarez (40), Kugler (41), Antoine (42), Simenet (43), Theologi Wirtenburgenses (44), card. La-Luzerne (45), Pothier (46).

Suarez qui istorum fere agmen ducit ad huius sententiae veritatem adstruendam tribus innititur probationibus. Primam desumit ab exclusione; quia hoc votum solemne religionis habet hunc effectum non ex sola natura rei, neque ex divino iure immediate; ergo interveniente ecclesiastico iure. Priora duo uti probata supponit, tertium vero ostendit ex Ioannis XXII. extravagante *Antiquae de voto*, in qua summus pontifex negat votum castitatis ordinis habere hunc effectum: *Cum nec iure divino, nec per sacros reperimus canones hoc statutum* (47). Ex quibus verbis colligit ipse, aliquod ex his tribus esse necessarium ad hunc effectum, et quodlibet eorum potuisse suf-

(40) Loc. cit. n. 20 seqq.

(41) Quaest. XXII. n. 1671 seqq.

(42) *Theol. dogm.* tom. II.

(43) Dist. IV. art. 6. prop. 1. 2.

(44) N. 406. Tract. *De matr.*

(45) *Instruct. sur le Rituel.* n. 814.

(46) N. 475-483- apud Carriere tom. I. n. 669.

(47) Inter extravagantes, seu constitutiones viginti a Ioanne papa XXII. editas, tit. VI. *De voto et voti redemptione* an. 1332. Avenione. Apud Pithoeum tom. II. *Ius canon.* p. 381.

ficere; ergo merito idem dicimus de voto castitatis religiosae; cum ergo in hoc voto de effectu constet, et de iure divino non constet, imo sufficienter probetur non existere, sistendum est in iure ecclesiastico, de quo satis constat.

Alteram probationem eruit Suarez ex eo, quod hic effectus non excedat amplitudinem ecclesiasticae potestatis, ut constat ex adductis Ioannis XXII. verbis, quae illam supponunt; tum ex illimitata facultate a Christo Petro concessa ligandi ac solvendi, pascendique oves suas.

Tertiam denique probationem promit ex facto, seu, ut ipse loquitur, ex *signo*, ecclesiae nimirum agendi ratione, quatenus ecclesia diversa ratione hac potestate usa est, dum noluit hunc effectum per votum quod in sacra ordinatione emittitur, aut per simplex votum castitatis in seculo servandum; voluit autem seu constituit, ut hunc effectum produceret votum *solemne* religionis, quod prius ad id non requirebatur, ut patet per exempla ex antiquitate ecclesiastica deprompta. In his enim nullam solemnem religionis professionem invenimus, sed propositum servandae castitatis, eiusque observantiam. Quia nempe nondum ecclesia constituerat, ut per solum solemne religionis votum coniugium dirimeretur. Idque confirmat exemplo votorum simplicium, quae a scholasticis Soc. Iesu emitti solent, quae olim vim non habebant dirimendi matrimonium ratum, postea vero ex constitutione pontificia, eam vim adeptae sunt (48). Hinc concludit ex sola ecclesiae potestate derivandum hunc effectum de dissolutione coniugii rati et non consummati per professionem religiosam, quae iuris ecclesiastici est, saltem quoad solemnitatem.

Ceteri vero theologi nonnisi diversis verbis easdem hasce probationes evolvunt; nisi quod alii adiiciunt hanc

(48) Nempe Gregorii XIII. in Const. *Ascendente Domino*.

esse conditionem tacitam ab ecclesia appositam celebrationi coniugii omnium fidelium. Siquidem ecclesia eodem iure quo potest constituere impedimenta matrimonium dirimentia, potuit conditionem apponere, ut matrimonium tamdiu dissolubile sit, quamdiu non fuerit consummatum. Et sic optime omnia, ut ipsi putant, explicantur, atque evanescent difficultates, quae contra urgeri possent.

Ast eiusmodi conditio, quae recidit in superiorem, quam paulo ante expendimus, non afficit nisi modum quem ecclesia tenet, dum iuxta hanc sententiam sua utitur potestate, nec dici potest novum argumentum, seu nova probatio. Iam argumenta ipsa perpendamus.

Reponunt igitur adversarii: qui hanc tuentur sententiam assumunt ecclesiam praeditam hac potestate a Christo fuisse, nec tamen id evincunt. Quae enim ab ipsis proferuntur testimonia biblica nimis vaga sunt, ac generalem collatam ecclesiae potestatem solum respiciunt, non autem specialem de qua disserimus, quaeque si urgerentur plus evincerent quam hi theologi vellent. Nam si id concludunt ex verbis: *Quodcumque ligaveris, quodcumque solveris*, quare ea extendere non possent etiam ad matrimonium consummatum? Idem dic de aliis: *pasce agnos meos*.

Assumunt praeterea, ecclesiam, dum matrimonium ratum dissolvit ob solemnem religionis professionem, usam esse potestate sibi propria, quam a Christo accepit, et non potius se gessisse ut divini iuris interpretem. Hac enim in hypothesis omnia etiam exponuntur, quae a Suarezio dicta sunt de exemplis ex antiquitate depromptis, in quibus ut plurimum saltem, non agitur nisi de proposito continentiae servandae, aut de ipsa observantia. Siquidem ecclesia utpote divini iuris interpret iudicavit illis in casibus ius divinum dissolutioni contracti matrimonii favere. Alioquin intelligi non posset, quomodo tot seculorum in-

tercapedine, quot a Christo ad nos usque fluxerunt, ne unum quidem afferri possit exemplum potestatis, qua usa ecclesia fuerit respectu voti emissi ex occasione sacrae ordinationis aut simplicis continentiae.

Hac ratione, qui hanc sententiam impugnant se extricant ab auctoritate Ioannis XXII. qui per *sacros canones* potuit designare interpretationem per eos canones exhibitam iuris divini. Si enim hic summus Pontifex persuasum sibi habuisset posse id facere auctoritate sua, opus non habuisset tam longa discussione; satis enim ei fuisset auctoritate sua id constituere.

Verum haec sunt negativa, nec nisi indirecte hanc impetunt sententiam. Positive autem eam aggrediuntur hoc certe haud spernendo argumento. Si ab ecclesiae potestate pendet constituere, ut professio solemnisi religionis hunc effectum producat dissolvendi coniugia rata non consummata, in eiusdem pariter ecclesiae potestate esset hunc ipsum effectum professioni religiosae demere; quod si hoc fiat, actum esset de veritate canonis dogmatici tridentini, cui subesse aliquando falsitas posset. Hoc argumentum urget Benedictus XIV. quaest. DXLVI. n. 35. scribens: « Cessat indissolubilitas matrimonii rati in casu quo alter ex coniugibus professionem religiosam emittat, et haec solubilitas originem habet a iure divino . . . et clarissime ostenditur ex can. VI. sess. XXIV. *De matr.* ubi anathema profertur adversus asserentes matrimonium ratum non solvi per professionem religiosam; si enim post hunc tridentinum canonem de fide est, coniugium ratum solvi per professionem, solubilitas debuit esse imposita a solo Deo, qui eam potuit facere sempiternae veram, uti subtiliter argumentatur card. De Lauraea (49). »

(49) *Quaest. canonic. et moral.* opp. ed. Venet. 1767. tom. XIII. part. II. pag. 128. Hoc eodem argumento, ut suo loco vidimus, usus est Pius VI. pestringens episcopum motulensem, et pistorienses.

Ex his facile est colligere neque hanc sententiam suis destitutam esse difficultatibus, quas late urget Pontius, qui Vasquezii, ceterorumque qui eidem sententiae adstipulati sunt discutit ac dissolvit argumenta (50) prout et alii recentiores praestiterunt.

§. III.

De illorum theologorum sententia qui solutionem vinculi matrimonii rati ob professionem religiosam repetunt a iure divino.

Hisce discussis, superest ut tertiam exploremus sententiam, illorum scilicet, qui ius de quo agimus a solo arcessunt iure divino eoque positivo. Hanc adstruunt Sanchez (51), Pontius (52), Tournely (53), Billuart (54), Collet (55), alique fere omnes recentiores communi calculo, eique adhaesit Benedictus XIV. (56).

Eam porro evincunt tum negative, seu per exclusionem, tum positive. Negative quidem, quatenus eiusmodi ius cum non possit deduci ex lege mere naturali, neque ex lege ecclesiastica, eo ipso ex lege divina positiva provenire dicendum est. Duo priora excludenda esse satis constat ex difficultatibus quibus superiores sententiae urgentur, quasque nos exposuimus.

Positive autem idem evincunt illis omnibus argumentis quibus hoc fidei dogma adstruximus adversus protestantes, nempe ex traditione depromptis. Ex illis enim ostenditur iugiter in ecclesia, quin origo assignari possit, viguisse hoc institutum, ut etiam post contractas nuptias

(50) *De matr.* lib. IX. cap. III seqq.

(51) Lib. II. disp. XIX. n. 3.

(52) Lib. IX. cap. V.

(53) Quaest. V. art. 2.

(54) Disp. V. art. 2. §. 4.

(55) Cap. VII. art. 3. sect. 6. n. 396.

(56) Quaest. cit.

ante corporum commixtionem, sponsus aut sponsa profiteri possent continentiam, ac separari invicem, altero etiam invito. Ecclesia autem numquam ita se gerentes coëgit ad cohabitationem et torum. Nullum saltem in tota antiquitate contrarium documentum suppetit. Quamvis autem passim in allatis exemplis non legatur derelictum coniugem ad alia vota transiisse, imo de quibusdam contrarium legatur, attamen potuissent certe id facere, quemadmodum reipsa id fecisse, nemine contradicente, novimus Ecgfridum Angliae regem, qui Edildrida uxore eius monasterium ingressa, alteram duxit uxorem Ermenburgem, prout superius retulimus ex Beda et Thoma Eliensi (57).

Quam traditionem sectantes rom. pontifices eiusmodi dissolutionem decretis suis probavere, profitentes se hac in re permotos fuisse sanctorum exemplis; ac verba Christi: *Non licet viro uxorem suam nisi causa fornicationis dimittere*, de matrimonio consummato interpretati sunt, ut vidimus factum esse ab Alexandro III. cap. *Ex publico, de convers. coniugat.* et ab Innocentio III. cuius pariter verba dedimus. Cum igitur hi pontifices nihil novi intulerint, sed quod iamdiu receptum erat unice sanxerint, merito inferitur ex antiqua traditione, eaque divina, hoc privilegium in favorem professionis religiosae, seu perfectionis evangelicae ad nos usque devenisse.

Id magis ex eo confirmatur, quod agatur de re maximi momenti, quae fidem moresque attingit; de re quae ab immemorabili in ecclesia universa obtinuit, eaque probante atque sanciente, quin ullus uspiam qua late patet christianus orbis, reclamaverit. Quocirca divina auctoritate ita fuisse constitutum concedi deberet, etiamsi monumenta deessent, iuxta inconcussum illud Augustini prin-

(57) Cf. Pagi in not. ad Baronium an. 677. n. 12. Ubi notandum est ab Eddio Stephano in vita s. Wilfridi, Ecgfridum vocatum esse virum religiosum, nec ab ullo fuisse insimulatum ob secundas ab eo initas nuptias.

cipium: « Quod universa tenet ecclesia, nec conciliis institutum, sed semper retentum est, non nisi auctoritate apostolica traditum rectissime creditur (58). »

Atque huc spectat theoria quam dedimus in nostris praelectionibus de distinctione inter traditionem et instrumenta seu media, per quae agnoscimus traditionem (59). Fieri enim potest, ut vigeat traditio, nec tamen omnia suppetant instrumenta ad illam cognoscendam, sive quia non omnia litteris aut monumentis consignata sunt, sive quia nonnulla eorum temporis decursu perierunt, sive aliis quibuscumque de causis. Verum hic defectus suppletur ecclesiae praxi ac iugi sensu traditionali, qui facto ipso decurrit per saecula. Idque revera factum novimus in re de qua agimus, quamque ubique receptam ac invalescentem novimus quavis ecclesiae aetate, quin, ut saepius diximus, originem deprehendere possimus.

Ne autem quidpiam in ambiguo relinquamus, multos offendit quod a nobis dicatur divino positivo iure, eoque immediato constitutum fuisse, ut matrimonium ratum dissolvatur ob solemnem religionis professionem, cum tamen nonnisi serius et quidem ecclesiastica tantum institutione eiusmodi solemnitas inducta fuerit (60). Immo longe verisimilius est antiqua monachorum vota non fuisse nisi simplicia (61), nec vim habuisse dirimendi coniugia, prout primo constitutum est in conc. lateranensi II. an. 1139. sub Innocentio II. celebrato, his verbis: « Statuimus. . . quatenus monachi atque conversi professi, qui sanctum transgredientes propositum uxores, sibi copulare praesumpserint, separentur: huiusmodi namque copulationem, quam contra ecclesiasticam regulam constat esse contractam, matrimo-

(58) *De baptismo contra Donatist.* lib. IV. cap. 24. n. 31. Opp. cit. ed. tom. IX. col. 140.

(59) Tract. de loc. theol. part. II. sect. II. *De tradit.* n. 837.

(60) Nempe a conc. lateran. IV. an. 1215. sub Innocentio III.

(61) Cf. Pontium lib. VII. cap. 23.

nium non esse censemus (62). » Qui proinde ante id temporis post nuncupata vota nuptias inirent, id quidem illicitè attentabant, ac poenis ita contrahentes subiiciebantur; attamen nuptiae ipsae validae habebantur, prout multiplici auctoritate et exemplis adstruit Basilius Pontius (63). Quum igitur votorum solemnitas ecclesiasticae sit institutionis, votaque simplicia matrimonium invalidum non redderent, intelligi vix aut ne vix quidem potest qua ratione ex divino iure positivo possit adstrui per professionem religiosam dirimi quoad vinculum coniugium ratum. Eo vel magis quod, ut vidimus, a Gregorio XIII. constitutum fuerit vota simplicia scholasticorum societatis Iesu vim habere dissolvendi matrimonium ratum, quem effectum ante eiusmodi constitutionem minime producebant. Quae quidem omnia explanantur, si semel admittatur iure tantum ecclesiastico hunc effectum a religiosa professione proficisci.

Ast facile haec omnia diluuntur si in religiosa professione id quod ad eius substantiam spectat ab iis, quae accidentaliter sunt, secernatur. Ad status religiosi substantiam pertinet professio trium evangelicorum consiliorum, qua quis se mancipat Deo in continentia perpetua, in abdicatione domini, aut saltem usus bonorum temporalium (64), et obedientia legitimo spiritali superiori. Inter ea quae accidentaliter nuncupavimus adnumerari debent quas diximus solemnitates seu formalitates, ut usus loquendi obtinet, et legales effectus qui ex iisdem proveniunt.

Iam vero observatio evangelicae perfectionis, seu evan-

(62) Cap. VII. §. *Ut. Lex*, et refertur causa 27. cap. 40. in *Decreto* et apud Harduin. tom. VI. par. II. col. 1109.

(63) Lib. VII. capp. 14-15-16.

(64) Dixi, in abdicatione saltem usus; siquidem non desunt qui contendunt primis seculis religiosos voventes paupertatem retinuisse bonorum suorum dominium. Cf. Pontium lib. VII. cap. 13. Nunc autem exploratum est id probatum esse in non paucis religiosis ordinibus et congregationibus ab apostolica Sede, ita ut qui votum emisissent paupertatis, possint bonorum suorum retinere dominium seu proprietatem vel ad tempus, vel etiam in perpetuum.

gelicorum consiliorum semper in ecclesia viguit, cum numquam defuerint viri sancti qui perpetuam servaverint, ac professi sint castimoniam, qui se bonis abdicarint, atque sub praelati seu superioris, saltem episcopi, dependentia ac nutu vitam duxerint. Hi portionem electam constituerunt quavis aetate dominici gregis, etiam priusquam instituta monastica ortum in ecclesia haberent. Plerique eorum quorum exempla attulimus ad hunc censum pertinent, ac tria recensita consilia evangelica sectati sunt. Ecclesia probavit horum institutum, seu vivendi rationem, atque utpote iugis ac viva interpretis voluntatis Christi, declaravit eos ab ipso Christo auctos esse hoc privilegio, ut in gratiam perfectioris huius status, si quod inierint coniugium ante eius consummationem dissolveretur, ac pars derelicta ad novas iungendas nuptias libera permaneret.

Ne autem abusus irreperent, ecclesia temporis decursu constituit, ut quaedam solemnitas hoc vitae genus munit. Consistit autem eiusmodi solemnitas in duobus potissime, tum in perpetuitate extrinseca ex parte acceptantis, qua sublata est facultas praelato liberum dimittendi eum qui voverit (65), et in *illegitimatione*, quae ex lege ecclesiastica accessit iisdem votis, qua redditur vovens inhabilis et ad matrimonia ineunda, et ad rerum dominia acquirenda, aut saltem ad eorumdem liberum usum habendum (66). His deinde accesserunt formalitates temporis, loci, ritus etc. quae illam solemnitatem comitarentur, ut actio tota iuridice legitima ac valida censeretur.

Qua solemnitate semel inducta, ecclesia constituit, ut coniugia rata deinceps non dissolverentur nisi per solemnem in religione approbata professionem. In qua nihil novi ecclesia induxit, sed conditionem tantum adiecit, qua cer-

(65) Quod intelligendum est *per se*, ut aiunt; nam fieri potest, ut id praestare valeant praelati obtenta ad hunc finem a Rom. Pontifice auctoritate.

(66) Cf. Pontium loc. cit. cap. 9.

tior fieret de profitentium voluntate ac dispositione, ut possit iis privilegium a Christo concessum favere. Eo vel magis quod ecclesia a Christo potestatem acceperit, ut suo loco ostendimus, moderandi contractum coniugalem naturalem uti materiam proximam sacramenti matrimonii, ac personas ipsas inhabiles reddendi ad contrahendum.

Hisce enucleatis, pronum iam est explanare propositam difficultatem. Nam etiamsi solemnitas cum adnexis formalitatibus serius a iure ecclesiastico inducta fuerit, tamen cum haec intrinseca sit et non afficiat substantiam professionis religiosae, potuit ipsa subsistere cum privilegio a Christo facto, antequam illa solemnitas ab ecclesia institueretur. Apprime praeterea intelligitur quomodo olim per vota simplicia irrita non fierent coniugia, quae post inductam solemnitatem iam irrita evadunt. Intelligitur insuper quomodo interdum sola professio perpetuae continentiae absque voto expresso diremerit vinculum nuptiale, uti contigit ex. gr. in s. Thecla, s. Caecilia, s. Alexio aliisque eiusmodi a quibus difficile omnino est ostendere emissum explicite fuisse votum sive castitatis, sive obedientiae, sive paupertatis, cum nihilominus perfectionem evangelicam inirent quoad suam substantiam, neque ecclesia quidpiam constituisset quo impedirentur privilegio Christi uti, hinc dissolutum ipsorum coniugium est. Intelligitur demum quomodo Gregorius XIII. dum vim hanc tribuit votis simplicibus scholasticorum soc. Iesu dissolvendi coniugia rata, qua antea carebant, iure suo usus fuerit restituendi postremis hisce temporibus pro singulari hoc casu quod obtinuit in ecclesia longo seculorum tractu, praesertim cum agatur non iam de votis simpliciter privatis, sed aliquo modo publicis.

Quae cum ita sint huic sententiae utpote solidiori, ac magis dignitati sacramenti prospicienti adhaeremus, quae nunc inter recentiores communis effecta est.

His expletis, accedere iam tuto possumus ad solutionem difficultatum, quibus veritas catholica impetitur tum a protestantibus, tum ab iis etiam qui doctrinam orthodoxam profitentur, sed hac in re minus recte locuti sunt.

ARTICULUS III.

De difficultatibus quibus asserta a tridentina synodo catholica veritas impugnatur.

Praemittimus catholicam veritatem a privatis theologorum placitis esse prorsus independentem, et quamvis nobis verisimilior visa fuerit sententia illorum, qui effectum hunc repetunt ex iure divino positivo atque immediato, quum tamen reiici absolute non debeant, utpote sua probabilitate haud destitutae illorum sententiae, qui aut a iure naturali aut a iure ecclesiastico adstruunt, catholicae veritatis vindices ad tuendam a novatorum impetu doctrinam catholicam promiscue uti possunt quavis hypothesi, cum nullam ecclesia reprobaverit.

Qui itaque aggressi sunt veritatem canonis VI. tridentini pugnarunt ex Scriptura et traditione, quas contendunt nullum fundamentum dogmaticae huic definitioni praebere. Nam in Scripturis, inquit, non modo nullum verbum aut apex occurrit, quo adstrui possit solvi coniugium ratum fidelium per solemnem religionis professionem, sed contrarium potius adstruitur, dum ait Christus: *Quod Deus coniunxit, homo non separet*; et insuper aperte declaravit: *Omnis qui dimiserit uxorem suam, excepta fornicationis causa, facit eam moechari* (67). Quibus verbis allusit Christus aperte ad id quod Adam de matrimonio adhuc rato ac nondum consummato in paradiso protulerat: «Quamobrem relinquet homo patrem suum et matrem, et adhaerebit uxori suae (68).» His cohaerens Apostolus scripsit: «Alligatus

(67) Matth. V. 32.

(68) Genes. II. 24.

es uxori? noli quaerere solutionem (69); » et iterum : « Mulier sui corporis potestatem non habet, sed vir; similiter autem et vir sui corporis potestatem non habet, sed mulier (70). » Cum autem haec omnia de quovis coniugio sive consummato, sive non consummato verissime dicta sint, profecto nonnisi contra apertam Scripturarum auctoritatem adstrui potest coniugii rati per solemnem religionis professionem solutio.

Haec quidem ex Scripturis opponuntur; non est tamen quod his permoveamur; nam si spiritu privato Scripturae intelligi deberent, posset difficultas oriri; verum cum earum interpres ecclesia sit, quae eas alio omnino sensu intellexit, atque interpretata est, omnis profecto difficultas evanescit. Simul ac enim Christus hoc privilegium proficenti perfectionem evangelicam sub ecclesiae directione concessit, fieri non potest, ut obiecta loca contradicant Christi ipsius dispositioni. Ad eiusmodi autem contradictionem tollendam satis est ut allatos textus exponamus de matrimonio consummato.

Nihil vero est quod huic expositioni repugnet; et sane effatum Christi Domini: *Quod Deus coniunxit, homo non separet*, de matrimonio consummato accipiendum esse patet ex occasione, qua illud Christus protulit, videlicet ad abolendum libellum repudii; nec non ex verbis immediate praecedentibus: « Iam non sunt duo, sed una caro (71). » Quod si quis instaret, etiam coniugium ratum fuisse a Deo coniunctum, adeoque ab homine seiungi non posse, reponimus iuxta sententiam tertio loco expositam, non ab homine, sed a Deo, nempe Christo, separari.

Idem dic de altero textu: *Omnis qui dimiserit uxorem suam* etc. Nam ex substrata materia et ex scopo Christi

(69) I. Cor. VII. 27.

(70) Ibid. v. 4.

(71) Matth. XIX. 6.

Domini evidens est in eo sermonem esse de matrimonio consummato, nec trahi ad rem nostram ullatenus posse.

Sic verba ab Ada prolata de lege universali matrimonii, quo fit ut coniuges sibi mutuo adhaereant, vitamque individuum vivant, accipienda esse, nemo est qui inficiari possit; nos autem agimus de casu exceptionalis ac singulari qui ex positiva Christi lege dependet, adeoque ea verba generalia perperam obiiciuntur. Eo vel magis quod neque Adae aetate, imo neque in veteri foedere exceptio de qua loquimur locum obtinuerit.

Apostolum disserere in utroque obiecto testimonio de coniugio consummato ac de communi lege apertum est adeo, ut supervacaneum sit id velle adstruere. Hinc urgeri contra hanc doctrinam ea non possunt. Verissimum quidem est per contractum conjugalem sive virum sive mulierem ius acquirere in alterius corpus, nisi alteruter a pacto resiliat, antequam alteri sui corporis copiam fecerit; at ius istud amittitur cum quis privilegio sibi a Christo concesso ad perfectiorem vitam profitendam uti velit, antequam ad coniugii consummationem perventum fuerit.

Ita ea omnia concidunt quae a novatoribus ex Scripturis urgentur ut evincant canonem tridentinum illis adversari, quae illum ne attingunt quidem.

Videamus iam num validiora sint, quae ex traditione promunt tela. Aiunt itaque tam infirmam ac labilem nimis eam esse ut ei inniti fidei dogma possit. Siquidem pleraque sanctorum exempla, quae ex antiquitate proferuntur, si ad critices lancem exigantur multiplici ex capite deficere deprehenduntur. Etenim deficient ex parte fundamenti historici, cum illorum acta aut spuria sint, aut non satis gravi auctoritate fulciantur; eiusmodi ex. gr. acta sunt s. Theclae, Caeciliae, Alexii etc. Sed praeterea deficient ex parte rei, cum nusquam referatur aliquem istorum a nuptiis, seu potius sponsalibus resiliisse ad institutum re-

ligiosum profitendum , aut voto se obstrinxisse ; quae tamen necessaria essent , ut ad catholicorum causam accommodari allata exempla possent. Deficiunt denique ex parte solemnitatis religiosae professionis , quae iuris ecclesiastici , adeoque humani est , et quidem nonnisi sequioribus seculis instituta ; quo fit ut sancti illi antiqui hac de causa nequiverint sua coniugia dissolvere. Quapropter numquam reperimus in seculo relictos , vivente priori coniuge , novas nuptias celebrasse , quod tamen ostendere necesse foret , ut vis aliqua probationis exinde erueretur. Omnibus igitur perpensis , aequo rerum aestimatori patebit nullum aliud fundamentum suppetere catholicis ad thesim suam fulciendam praeter rom. pontificum decreta , quae nonnisi seculo XII. tandem edita sunt. Ecquis vero his fidat recentibus documentis ad traditionem divinam adstruendam , cum praesertim compertum sit ex decretorum istorum tenore pontifices illos permotos fuisse ad ea conficienda exemplis veterum sanctorum , quae , uti ostensum est , huc referri nequeunt , et de quibus dubitare adhuc licet an recte se gesserint , cum non omnia sanctorum gesta , ut notum est , rectam agendorum regulam praebeant ?

Verum pleraque istorum argumentorum a nobis praecipua sunt , et ad ea disiicienda satis est constitutis principiis insistere.

Contra omnem veritatem assumitur traditionem nostram infirmam ac labilem esse , quum eam auspicati fuerimus a prioribus ecclesiae seculis , et protraxerimus ad seculum usque XII. et deinceps a sec. XII. usque ad tridentinam synodum , a qua hoc fidei dogma demum solemniter decreto assertum est.

Deficere porro multiplice ex capite sanctorum exempla adversarii quidem affirmant , ast non evincunt , prout ex ipsorum inspectione facile ostenditur.

Ac primo non deficiunt ex parte fundamenti historici.

Dum autem id dicimus, haud intendimus omnia probare, quae identidem a theologis, praesertim vetustioribus, congesta sunt; critices enim arte nondum ad perfectionem adducta, non minus catholici quam protestantes, prout ipsorum lucubrationes anteactae illius aetatis palam faciunt, interdum offenderunt. Itaque his minus certis omissis, nos insistimus allatis exemplis quorum fundamentum historicum iure in dubium revocare nequit (72).

Secundo non deficiunt ex parte rei; quia etiamsi non legamus quemquam illorum, qui in seculo relictus est, novas iniisse nuptias, non inde sequitur, id eos non fecisse. Scriptores enim ecclesiastici solliciti unice fuerunt de referendis actibus virtutis eorum, qui Christi amore nuncium remiserunt seculo ad continentiae propositum servandum, quin persequerentur ea, quae parti alteri contigerunt. Ceterum vidimus Ecgfridum anglorum regem novum reipsa iniisse coniugium sec. ecclesiae VI. exeunte, aut ineunte VII. nemine nedum reclamante, sed ne admirante quidem; immo vero eundem virtutis ac pietatis laude novimus commendatum. Argumento igitur est agi in hoc transitu ad secundas nuptias de re consueta, et communiter recepta.

Concedi utique potest in nonnullis sanctorum veterum exemplis incertum esse, num de sponsalibus tantum, an vero de nuptiis proprie agatur; in aliis tamen de nuptiis presse sumptis procul dubio sermo est. Notum autem est penes veteres receptum passim fuisse, ut coniuges nomine sponsi aut sponsae nuncuparentur.

(72) De Actis s. Theclae cf. quae scripsit Honoratus a s. Maria in op. *Reflexions sur les règles et l'usage de la critique*. Paris. 1713. tom. I. p. 178-295. et tom. II. p. 18 seqq. Acta vero s. Caeciliae non ita pridem vulgavit ac vindicavit D. Gueranger in op. *Histoire de sainte Cécile*. Deux. ed. Paris 1853. Cf. praesertim ch. XXXV seq. *Examen et réfutation des arguments de l'école janséniste contre les Actes de sainte Cécile*, pag. 308 seqq. De Actis s. Alexii cf. Bollandianos loc. cit.

Tertio non deficient ex parte solemnitatis professionis religiosae, etsi solemnitas formali sensu accepta sequioribus tantum seculis ad abusum tollendos, aut praecavendos inducta sit; professio religiosa quoad suam substantiam numquam non obtinuit in Christi ecclesia, ex quo nempe evangelica consilia ab hominibus perfectionis studiosis fuerunt in praxim deducta (73). Cum vero non modus profitendae evangelicae perfectionis, sed res ipsa sit, quae, ita Christo volente, coniugium ratum dirimat sub ecclesiae directione, parum refert, quod modus iste antiquitus non obtinuerit. Hic defectus non impediēbat quominus professio religiosa ex se hunc produceret effectum. Dixi *sub ecclesiae directione*, nam ipsius erat expendere, utrum omnes conditiones concurrerent, quae requiruntur ad valide ac licite coniugium dissolvendum. Longe verisimilius est sanctos aut sanctas ab episcopi aut sacerdotis ad id constituti nutu in perfectionis proposito servando, et partem etiam relictam in novis celebrandis nuptiis directos fuisse. Nec enim ista privatorum arbitrio dimittenda sunt.

Romani porro pontifices, uti iam monuimus, nihil novi intulerunt decretis suis, sed ea sanxerunt quae antiquitus iamdiu in usu erant, ac dubia quae a nonnullis excitata sunt traditioni divinae innixi dissolverunt, ut ex eorundem decretorum verbis manifestum est. Si qua Scripturarum effata opponi videbantur, ea interpretati sunt, et quo sensu

(73) Cf. Suarez *De religione*, tom. III. lib. III. cap. 2. ubi apposite animadvertit « aliud esse loqui de statu religioso puro ac nudo, quoad ea quae substantialia sunt; aliud vero esse loqui de illo ut determinato ad certam regulam, seu certum vivendi modum, vel quod perinde est, ut talibus circumstantiis vestitum. » Qua distinctione constituta, affirmat statum religionis secundum se, et quoad substantiam ab ipso Christo Domino immediate traditum et institutum fuisse, atque ita dici posse de iure esse divino non praecipiente, sed consulente. Quae quidem deinde et confirmat auctoritate gravissimorum virorum catholicorum, et ecclesiae patrum, atque pluribus rationibus evolvit et enarrat in totius capituli decursu.

intelligi deberent exposuerunt. Si maturius eiusmodi dubia ipsis proposita fuissent, citius etiam ipsorum haberemus responsa, prout s. Gregorius M. respondit ad interpellationem quamdam, iuxta decreta legalia, id est iuxta leges non debere laedi in bonis suis desponsatam, quae ad Dominum converti voluerit, seu ad profitendam religionem in monasterium se conferre (74).

Iure autem summos pontifices in suis decretis innixos fuisse sanctorum veterum exemplis ostendimus, nec pluribus opus est. Ex ecclesiae porro approbatione patet sanctos, qui ita se gesserunt, sancte omnino et ad evangelicae legis normam ea in re se gessisse, utpote qui coelesti instinctu ad id fuerint permoti, ut antiqui patres loquuntur, ceteris huiusmodi exemplum imitandum proponentes.

Cetera quae ex traditione obiici solent, causam non attingere, ex eo liquet, quod non ratum tantum, sed potius matrimonium consummatum respiciunt, cuiusmodi est epistola s. Gregorii M. ad Theoctistam Patriciam, in qua legitur: «Si dicunt causa religionis coniugia debere dissolvi, sciendum est, quia etsi hoc lex humana concessit, divina lex tamen prohibuit (75).» At ex orationis serie aperte constat s. Pontificem loqui de matrimonio consummato, quod utique ob religionis professionem dissolvi quoad vinculum nequit; pergit enim paulo post adducta verba: «Scimus quia scriptum est: *Erunt duo in carne una*. Si ergo vir et uxor una caro sunt, et religionis causa vir dimittit uxorem, vel mulier virum in hoc mundo remanentem, vel etiam fortasse ad illicita migrantem; quae est ista conversio, in qua una eademque caro et ex parte transit ad

(74) Lib. VII. epist. 23. ed. Maur. tom. II. col. 867. ubi agit de laudata Catelli sorore, quae cuidam Stephano cum esset desponsata Neapoli in monasterium se contulit ad vitam religiosam profitendam *divinae propitiationis instinctu*, ut ipse loquitur. Ubi obiter notandum adversarios aequè impugnare dissolutionem coniugii rati, ac sponsalium ob ingressum in religionem.

(75) Lib. XI. epist. 45. ed. cit. col. 1130.

continentiam, et ex parte remanet in pollutione? (76) » Quin potius ratione contrariorum videretur inferri posse ex s. Gregorii principio, quod cum nondum una caro effecti fuerint, liceret causa religionis coniugia dissolvere. Alludit autem per illa verba: *etsi lex humana concessit* ad Novellas Iustiniani imperatoris quibus eiusmodi separatio religionis obtentu permittebatur (77), quas quidem leges merito s. Gregorius reprobat uti divinae legi adversantes.

Idem ferendum iudicium de eo, quod statuit Ecgbertus eboracensis in capitulis a se vulgatis: «Legitimum coniugium non licet separari sine consensu amborum, potest tamen alter alteri cum consilio episcopi licentiam dare ad servitum Dei accedere. Quidam etiam dicunt, si vir, sive mulier ex consensu religionem ceperit, licet alterum accipere novum coniugium, sed puellam vel puerum, si continens esse non poterit. Quod non laudo. Sed si quis vult coniugatus converti ad monasterium, non est recipiendus, nisi prius a coniuge, castimoniam profitente, fuerit absolutus. Nam si, illo vivente, per incontinentiam alteri nupserit, procul dubio adultera erit, et qui eam dimisit, participes erit peccati illius (78):» Nam hoc in capitulo de matrimonio consummato hunc episcopum agere inde col-

(76) Ibid.

(77) Novell. 22. *De nuptiis* ubi de causa repudiorum, item lib. V. cod. tit. 17. et in digestis tit. *De divoritiis*; nec non Novell. 123. *De sanctissimis episcopis*, praesertim cap. 40. *Solvatur matrimonium*. Ex quibus legibus factum est, ut graeci quandoque sua coniugia dissolvant etiam consummata ad profitendam vitam monasticam. Hi innituntur praeterea auctoritati, ut ipsi contendunt, s. Basilii, qui in *Regulis fusius tractatis. Interrog. XII.* constituit, ut qui matrimonio functus est, atque monachus fieri vult, possit se in monasterium recipere, etiamsi assensum suum uxor dare detrectet. Item exemplo Theonae abbatis, de quo refert Cassianus collat. XXI. cap. 9. quod cum in coniugio per quinquennium constitisset, demum uxore repugnante, ea relicta ad monasterium convolverit, in quo adeo sancte vixit, ut miraculis claresceret. Ast perperam. Cf. Bellarm. lib. II *De monach.* cap. 38.

(78) Cap. CXVIII. apud Labb. tom. VI. Conc. col. 1596. nec non apud Wilkins *Concilia Magnae Britanniae et Hiberniae.* Londin. 1737. tom. I. in Excerptis D. Ecgberti arch. eboracens. cap. CXX. pag. 108.

ligitur, quod loquatur de eo quod contingere consuevit, non autem de casu exceptionalis, cuiusmodi est coniugium ratum et non consummatum; siquidem necesse non est, ut cum coniugium ratum dissolvitur religionis causa, qui manet in seculo continentiam profiteatur, ut vult Ecgbertus, sed potest alium sibi coniugem libere comparare. Ut omittam notum profecto fuisse episcopo eboracensi, quod factum fuerat seculo vix anteacto ab Angliae rege Ecgfrido (79).

Quod si episcopus veronensis de quo sermo est in cap. 7. *Ex publico, de convers. coniugat.* excommunicatione multavit coniugem, quae nondum consummato matrimonio religionem ingredi constituerat, per ignorantiam id fecisse dicendus est, eiusque sententiam Alexander III. irritavit contrarium sanciens (80). Exinde patet nihil sive ex Scriptura sive ex traditione opponi posse, quod catholicam doctrinam infirmet.

Reliquum igitur est ut ea dissolvamus, quae pseudo-Maldonatus cum aliis catholicis opposuit deprompta ex natura ipsius matrimonii ac sacramenti, quibus adnectimus quae ex iisdem fontibus a novatoribus arcessuntur.

Itaque verissimum esse fatemur matrimonium ratum a consummato *natura* non differre; at ex divina dispositione differunt quoad *effectus*. Siquidem coniugium fidelium consummatum ita indissolubile est, ut nullo umquam in casu eius vinculum abrumpi possit, quamdiu alter coniugum in vivis est. Contra vero matrimonium ratum locum praebet dissolutioni, ita Deo volente, ad perfectius institutum consecrandum in solemnibus religiosae vitae professione. Quod quidem, ut superius exposuimus, ab extrinseco provenit, seu a voluntate divina.

(79) Et hoc in hypothesis de genuina collectione canonum, quae sub Ecgberti eboracensis nomine circumfertur: nam et hoc nunc a criticis negatur.

(80) Lib. III. *Decretal.* tit. 32.

Fatemur pariter, si lubet, Christum de matrimonio etiam rato dixisse: *Quod Deus coniunxit, homo non separet*; verum contendimus hoc in casu non hominem, sed Deum ipsum separare, quod ipsemet coniunxerat. Hoc enim sibi reservavit ad promovendam evangelicam perfectionem quam ipse proposuit.

Rursum et illud ultro concedimus in matrimonio rato alterum coniugem alteri tradere sui corporis potestatem; hanc enim complectitur consensus mutuus, quo perficitur coniugale foedus. Ast contrahentes hanc praebent potestatem adnexam privilegio sibi divinitus facto resiliendi a contractu, eamque revocandi religiosae perfectionis intuitu, neque ad hoc indigent alterius consensu, cum independenter ab eo uti valeant iure suo, seu sibi a Christo concessa. Dum enim ipsi contrahunt, eadem ratione qua se obligant mutuo ad onera, quae huiusmodi status sunt propria, sic iuribus omnibus donantur, quae ex Dei voluntate eidem adnexa sunt, inter quae et illud recensetur quo de agimus.

Quartum argumentum redit in illud quod modo expendimus, adeoque eadem aptari debet responsio. Pactum enim solemne ac solemne votum induunt naturam rei de qua pactum initur, atque obiectum est voti. Si igitur matrimonium ratum hoc privilegio, de quo disserimus, divinitus auctum est, patet pactum solemne minime officere solutioni a Deo decretae.

Demum non abnuimus matrimonium ratum vere et proprie sacramentum esse, et s. Augustinum hac de causa coniugium christianorum prae ceteris esse indissolubile quoad vinculum docuisse. Haec tamen catholicae non officiant doctrinae. Nec enim hoc sacramentum aliquem imprimat characterem, neque tale est ut suspendi aut tolli etiam interdum non possit eius effectus. Ex eo quod matrimonium sive ratum sive consummatum sit sacramentum,

fit ut gratiam sacramentalem producat ad munera status coniugalis rite obeunda, et quantum ex se est, reddat nuptiale foedus permanens ac insolubile, et hoc est quod s. Augustinus docuit, quia est signum efficax gratiae ad vivum repraesentans unionem Christi cum ecclesia. Verum hoc non impedit quominus *ab extrinseco*, uti expositum est, nempe Dei voluntate positiva, hoc sacramentum quamdiu matrimonium consummatum non est, effectum producat indissolubilitatis perpetuae, sed dissolvatur per solemnem religionis professionem.

Ex his patet necesse nobis non esse ad solvendam difficultatem statuere cum nonnullis theologis sive quod matrimonii rati significatio diversa sit ab ea quam praesertit consummatum; quod scilicet per illud significetur coniunctio Christi cum anima fidelium per gratiam, quae dissolubilis est, per istud vero Verbi cum humanitate per unionem hypostaticam, aut per charitatem cum ecclesia, quae prorsus indissolubiles sunt; sive quod matrimonium ratum non sit adeo perfectum, quale est consummatum (81); sive denique quod ratum coniugium ineatur sub conditione, qua deficiente, transeat in absolutum. Haec quidem sunt praeclare dicta, at non plene satisfacere videntur, sive quia haec non destruunt rationem sacramenti, sive

(81) Bellarminus lib. II. *De monachis* c. 38. n. 24 seqq. scribit: «Sacramentum matrimonii triplicem habet significationem. *Primo* significat gratiam invisibilem, sive coniunctionem Christi cum anima: *secundo* coniunctionem Christi cum ecclesia per charitatem: *tertio* coniunctionem Christi cum ecclesia per naturae conformitatem. Ex quibus matrimonium ratum habet solum primam, ut docet s. Thomas in 4. d. 27. q. 1. art. 3. q. 2. ad 1. et Innocentius III. cap. *Debitum de digamis*. Quae significatio sufficit ad constituendum verum sacramentum; sed ea non facit matrimonium insolubile. Nam illa coniunctio Christi cum anima non est insolubilis ut patet; matrimonium autem consummatum habet alias duas;» prout ibidem ostendit; deinde concludit: n. 26. «Matrimonium ratum esse verum sacramentum, sed non perfectum *quoad omnem significationem*.» Ast haec non omnibus probantur. Nam matrimonium ratum significat etiam unionem Christi cum ecclesia per charitatem; eiusmodi autem coniunctio indissolubilis est; nec enim umquam potest Christus ab ecclesia sua separari. Verum hoc alii viderint.

quia s. Augustinus ad eiusmodi distinctiones non recurrit, sive quia non admodum solide videntur constituta.

Quidquid porro de hoc sit, ex eo quod dixerimus per hoc sacramentum non imprimi characterem, intelligimus quomodo, dissoluto primo coniugio tantum rato, possit coniux qui relictus est novum cum alio celebrare connubium, vivente adhuc coniuge quem antea duxerat.

Post haec nullius est negotii ceteras difficultates persequi ac solvere, quae a novatoribus urgentur; uti cum dicunt: Si matrimonium ratum solvi posset, quia Deus ad statum perfectiorem vocat, solvi idem poterit per votum etiam simplex continentiae, cum et hoc sit de meliori bono; nec alio se obstrinxerunt voto sancti veteres quorum exempla allata sunt. Insuper ratio afferri nequit quare professionis religiosae intuitu solvi possit matrimonium ratum, non autem consummatum; cum idem motivum in utroque vigeat. Sane utrumque matrimonium essentialiter in eo convenit, quod sint ambo maritalis coniunctio individuum vitae societatem retinens, quae quidem societas individua non nisi morte absolvitur. Ex qua definitione utrique coniugio communi patet utrumque esse penitus indissolubile tum iure naturali tum iure divino. Quod autem tale est, profecto nulla humana auctoritate aut humana institutione, cuiusmodi est solemnis religionis professio, dissociari potest. Demum non intelligitur, quomodo solvi possit per solemnem religionis professionem matrimonium ratum, solvi autem nequeat per ordinum sacrorum, praesertim vero presbyteratus et episcopatus susceptionem, qui hominem constituunt in statu longe perfectiore.

Prima difficultas disiicitur concedendo adversariis nihil repugnare per se, quod etiam simplex votum continentiae posset dissolvere coniugium ratum; quandoquidem Christus generatim hoc indulsit profitenti perfectius vitae institutum; cum tamen ecclesiae suae potestatem tribuerit regendi fide-

les in actis suis et in praxim deducendi hoc privilegium in casibus particularibus, ut omnia ordinate fierent, ecclesia pro diversis rerum ac temporum adiunctis ita rem temperavit, ut ex una parte hoc privilegium obtineret effectum, ex altera vero praecaveret abusus, qui ex parte privatorum gliscere ac obrepere poterant. Iuxta hoc principium ecclesia constituit, ut diversis temporibus diversa obtineret disciplina.

Nam primum probavit dissolutionem coniugii rati per solum discessum alterutrius contrahentis, qui sese vellet perpetua continentia, atque abdicatione omnimoda bonorum temporalium, ac dependentia a legitimis pastoribus perfectius Dei famulatu mancipare. Difficile sane est ostendere, quod veteres sancti solemnibus aliquo voto se obstrinxerint; coniicitur quidem ac praesumitur id eos fecisse, ast non probatur, cum deficient hac de re documenta. Postea vero, cum introduci coeperint monastica instituta, ecclesia exegit ab iis qui matrimonio tantum rato coniuncti erant, ut si vellent hoc solvere, monasticum institutum professione religiosa amplecterentur, quae tamen monastica professio, uti iam diximus, nonnisi vota simplicia complectebatur. Progressu autem temporis eadem ecclesia demum constituit ad praecavendos abusus, ut Christi favore in dissolutione eiusmodi coniugiorum nonnisi illi fruerentur, qui in aliqua religione approbata vota solemniter nuncuparent. Hanc vero determinationem concilium tridentinum sancivit canone suo; et Gregorius XIII. declaravit hunc ipsum effectum parere vota simplicia a scholasticis in societate Iesu emissa: atque hoc pacto etiam per votum simplex reipsa potest coniugium ratum dissolvi.

Hac ratione omnia componuntur quae de antiquioribus sanctis, de voto simplici, de solemnibus professione religiosa dicuntur. Nunc iterum in mentem revoco in professione religiosa discernendam esse rei *substantiam* ac *modum*: quoad

substantiam ea a Christo provenit, quoad modum ab ecclesia. Haec duo permisceri inter se nequeunt, uti adversarii facere consueverunt, dum aiunt quod est divinae institutionis non posse irritum fieri ab humana potestate. In quo ipsi triplici ratione peccant, dum assumunt perfectius vitae genus quod a viro religioso suscipitur, esse institutionis humanae, cum sit institutionis divinae; dum pariter assumunt ab ecclesiae auctoritate provenire quod professio religiosa solvat coniugium ratum, cum id statutum sit a Christo (82); dum denique permiscent rei substantiam in professione religiosa cum eo quod in eadem adscititium est, nempe cum solemnitate, quae certe ab ecclesia suam originem repetit.

Altera difficultas ex eo petitur, quod ratum solummodo, non vero etiam consummatum matrimonium religiosa professione solvatur: sed haec quoque evanescit, si ratio habeatur divinae voluntatis, quae aliter constituit, prout ecclesia illius interpretis iugiter professa est; et si aliquando id attentatum fuerit, constanter reprobavit, praesertim cum apud graecos hic abusus pariter ob leges imperiales inolevit solvendi ob monasticam professionem coniugium consummatum (83). Sane id patet tum ex antiquo auctore epistolae ad Celantiam inter Hieronymianas recensitae, qui acriter matronam hanc arguit, quod absque mariti consensu continentiam vovisset (84); tum ex s. Augustini epistola ad

(82) Reipsa Chemnitius in *Exam. conc. trid.* ad can. V. (siquidem ipse canonem VI. sub num. V. posuit), utrumque uti certum assumit.

(83) Id enim invenimus constitutum, uti iam diximus, in Novella 22. Iustiani *De nuptiis* ubi de iure repudiorum. Item lib. 5. cod. tit. 17. et in Digestis tit. *De divortiis*. Insuper in Novella 123. *De sanctissimis episcopis*, cap. 40. *Solvatur matrimonium*. Idque postquam Photius suo *Nomocanoni* leges imperiales tamquam partem iuris canonici inseruit; prout factum est circa dissolutionem conjugii ob adulterium. Exinde enim omnis mali labes penes graecos repeti debet.

(84) Haec epistola ab Erasmo, et ab editoribus maurinis adscripta est s. Paulino; contra vero Vallarsius eam tribuit Sulpicio Severo, qui fuit ss. Hieronymo et Paulino coaevus. Cf. huius editoris adnotationem. Eam exhibet immediate post epistolas s. Hieronymi geminas sub num. CXLVIII.

Armentarium et Paulinam, ubi Armentarium ad servandum continentiae votum quo se obstrinxerat hortatur, vetat autem illud servare, si eius uxor suum non praebeat assensum, adiiciens: « Nam et vota talia non sunt a coniugatis, nisi ex consensu et voluntate communi. Et si praepropere factum fuerit, magis est corrigenda temeritas, quam persolvenda promissio (85). » Eadem repetit s. Pater in epist. ad Ecdiciam (86); tum ex s. Gregorio M. in cit. epistola ad Theoctistam, atque ex s. Basilio qui disserens de admittendis ad profitendam vitam monasticam ita scribit: « Atque ii etiam qui matrimonio coniuncti, ad huiusmodi vitae genus accedunt, interrogandi sunt, *an mutuo consensu id efficiant* ex Apostoli praecepto. Nam, inquit, *sui corporis potestatem non habet*, sicque qui accedit, coram pluribus testibus recipiendus est.... Quod si dissentiat altera pars, repugnetque, quod minus sollicita sit, quomodo placeat Deo, in mentem veniat illud Apostoli qui dicit: *In pace autem vocavit nos Deus* (87); » nec non ex conciliis ac summis pontificibus, quorum decreta relata sunt a Gratiano causa XXVII. q. 2. et in Decretalibus lib. III. tit. XXXII. (88).

Licet autem, prout dicitur in tertia difficultate, utrumque coniugium tum ratum, tum consummatum quoad essentiam conveniant, ac utrique aptari debeat matrimonii definitio, quod in perpetua vitae consuetudine retinenda consistat, pro diverso tamen stadio maiorem vel minorem obtinent firmitatem ex Dei dispositione. Ad eum enim modum, quo Deus in veteri lege, non obstante data definitione, constituit ut matrimonium consummatum, ad deterius malum vitandum, dissolvi posset per libellum re-

(85) Epist. ed. Maur. CXXVII. n. 9.

(86) Epist. CCLXII. n. 9. et 10.

(87) *Regulae fusius tractatae. Inter.* XII. Opp. ed. Maur. tom. II. pag. 354.

(88) In Decreto Gratiani l. c. a cap. 21 ad 26. In Decretalibus vero cap. 2.3.4.

pudivi, in nova constituit, ut possit dissolvi matrimonium ratum perfectioris vitae sectandae causa. Et quemadmodum per mortem corporalem abrumpitur vinculum carnalis coniugii, ita per mortem spiritualem spiritalis coniunctio dirimitur.

In quarta difficultate petita ex indissolubilitate matrimonii iure divino ac naturali latet aequivocatio. Siquidem coniugalis foederis indissolubilitas est quidem utrique iuri conformis, ac etiam, si lubet, in utroque iure fundata; ast non est adeo utroque iure ita imperata, ut dissolutio intrinsece mala dici debeat utpote contraria primariis utriusque principiis. Alioquin Deus numquam potuisset dare dispensationem, aut permittere ut licite aliquando dissolveretur. Iam vero constat Deum et in antiquo foedere matrimonio etiam consummato solutionem indulsisse, et in novo pariter permittere solutionem coniugii in infidelitate contracti. Quod si ita est, patet omnimodam indissolubilitatem neutro iure firmari, adeoque rite nonnullis in casibus ita Deo volente posse coniugium dissolvi; porro unus ex his casibus est matrimonium ratum ex quo aliquis transitum facit ad solemnem religionis professionem.

Ut postremae difficultati satisfiat, sufficit animadvertere continentiam extrinsecam esse sacris ordinibus, qui constare possunt cum et sine illa, nec nisi ecclesiae lege eos ordines suscipientibus illam impositam esse iustissimis de causis ut suo loco ostendimus (89). Per se autem non repugnat status coniugalis cum his ordinibus, neque cum statu sacerdotali nominatim, ut patet, ceteris omissis, ex ecclesiae graecae disciplina. Contra vero religiosae professionis essentia etiam in continentiae professione consistit. Hac ratione optime intelligitur quomodo dissolvatur matrimonium ratum per professionem religiosam, non autem per sacrorum ordinum susceptionem, quae cum illo natura sua non repugnat.

(89) In Tract. *De ordine*, cap. V. prop. II.

Ad episcopalem statum speciatim quod attinet, comparatum cum statu religioso, eam quaestionem pluribus expendit eximius Suarez, qui utrumque statum distingui affirmat ex eo quod status religiosus sit status perfectionis acquirendae, status vero episcopalis sit perfectionis communicandae. Ex quo infert statum religiosum non modo instructum esse oportere mediis idoneis ad perfectionem comparandam, verum etiam ad obstacula removenda, quae illi acquisitioni obsistere, seu illam impedire possent. Contra vero nihil horum postulat status episcoporum, qui supponitur perfectus, et cum quo cohaerent magnus honor, superior potestas et minor subiectio, ac rerum temporalium possessio tamquam media apta ad proprium munus exercendum, supponuntque excellentiorem perfectionem in eo, qui ad talem statum ascendit. Cum igitur inter media idonea ad perfectionem acquirendam consiliorum evangelicorum observatio sit, nimirum castitatis, subiectio- nis et abnegationis honorum temporalium, fit ut status religiosus natura sua componi nequeat cum statu coniugali, ast idem dici nequit *ex se*, ut animadvertimus, de statu episcopali, cui ecclesia sola continentiam alligavit. Exinde dignoscitur quod quamvis status episcopalis, atque etiam, si ita placet, status sacerdotalis perfectiores *per se* sint statu religioso, tamen per hunc dirimatur coniugium ratum, non item vero per illos (90).

(90) Cf. Suarez *De religione*, part. II. lib. I. a cap. XIV. ad XX. ubi univ-
sum hoc argumentum expendit fuseque persequitur de statu religioso ad statum
episcopalem comparato. Notandum tamen, fuisse singularem opinionem card.
Ostiensis in *Summa*, eadem pollere vi sacrum ordinem ac professionem religio-
sam ad solvendum matrimonium ratum. Ast haec doctrina directe opponitur Con-
stitutioni Ioannis XXII. *Antiquae de voto*, quam superius allegavimus, adeoque
nullum habuit adstipulatorem. Cf. etiam Bellarm. lib. II. *De monachis* c. 38.
n. 13 seqq.

ARTICULUS IV.

De romani pontificis auctoritate circa solutionem coniugii rati alias ob causas praeter solemnem religionis professionem.

Difficilem prima fronte salebrosamque attingimus quaestionem, circa quam theologi in diversas dilabuntur sententias non modo antiqui, verum etiam recentiores; alii autem ob difficultatem quam ea praesefert insolutam relinquunt. Agitur enim de auctoritate rom. pontificis ad concedendam dispensationem in coniugali vinculo matrimonii rati et non consummati alias ob causas praeter solemnem religionis professionem de qua hactenus sumus loquuti. Quam quidem auctoritatem alii rom. pontifici denegant, alii eandem ipsi vindicant. Nec desunt gravia pro utroque placito rationum momenta, quae expendere opus est, ut collatis inter se, et eorum iudicio facto, quid tenendum sit statuere valeamus.

§. I.

Argumenta quibus utriusque sententiae negantis et affirmantis patroni utuntur.

Omissis antiquioribus theologis quorum elenchum adstruxit Sanchez (91), quique *probabilissimam* illorum sententiam vocat, qui dispensandi facultatem denegarunt rom. pontifici, ex recentioribus eandem doctrinam profitentur Pontius (92), Silvius (93), Tournely (94), Drouin (95), Collet (96) et alii.

Argumenta quibus innituntur haec sunt. 1. Si rom. pontifices hac praediti fuissent a Christo potestate, ea

(91) Lib. II. disp. XIV. n. 1.

(92) Lib. IX. c. 3.

(93) *Comment.* in 3. part. 5. Thomae quaest. LXI. art. qu. 2.

(94) Quaest. V. art. 2. concl. 5.

(95) Lib. IX. c. 3. §. 3. q. 6.

(96) Cap. V. sect. VII. n. 433 seqq.

ab initio ac deinceps usi essent; atqui numquam usque ad Martinum V. (97) ea facultate adeo necessaria, ecclesiaeque utili sunt usi; nempe usque ad seculi XV. initium; argumento igitur est ineluctabili, ea praeditos non fuisse.

2. Ut adstrueretur rom. pontifici eiusmodi potestas, verbo Dei scripto, aut tradito id deberet confici; porro neque ex Scriptura, neque ex traditione aliquod suppetit testimonium. Non ex Scriptura, quae de hoc omnino silet; siquidem Christi verba ad Petrum directa: *Quodcumque solveris, quodcumque ligaveris* urgeri nequeunt; nimis enim probarent, posse videlicet rom. pontificem etiam solvere fidelium coniugium consummatum, quod nemo dixerit. Non ex traditione; nullum enim uspiam apparet huius potestatis vestigium aut in patribus aut in conciliis, aut in aliis traditionis fontibus e quibus hauriri id possit.

3. Verum, dato etiam, quod rom. pontifex eam a Christo potestatem acceperit, hac in hypothesi eiusmodi potestas esset humana sive ecclesiastica, cuiusmodi est illa qua ipse solvit quempiam a voto, iureiurando, aliisque id genus plurimis; iam vero per ecclesiasticam potestatem dispensari nequit in eo, quod est divinae institutionis, qualis est indissolubilitas matrimonii rati.

4. Sane matrimonium ratum quoad essentiam idem est ac matrimonium consummatum iuxta tritam matrimonii definitionem: *viri ac mulieris legitima coniunctio individuam vitae societatem retinens*: adeoque firmitatem habet indissolubilem tum iure divino tum iure naturali. Ex iure quidem divino, quia ut loquitur tridentinum sess. XXIV. «Perpetuum, indissolubilemque nexum matrimonii primus humani generis parens divini Spiritus instinctu pronuntiavit, cum dixit: *Hoc nunc os ex ossibus meis etc.*» Et

(97) Quae enim ante Martinum V. a nonnullis proferuntur huius dispensationis exempla, uti s. Gregorii VII. quoad comitem Mathildem, et Alexandri III. extra rem sunt.

Catechismus rom. subdit : « Siquidem Salvator ait : quod Deus coniunxit, homo non separet. Quamvis enim matrimonio, quatenus naturae est officium, conveniat, ut dissolvi non possit etc. (98). » Ex iure igitur naturali prout coniugium officium naturae, est, ac prout eiusdem postulat definitio, et quia prolis educandae studio, et aliis eiusdem bonis repugnat, ut eius vinculum dissolubile sit, uti prosequitur Catechismus romanus (99).

5. His accedit quod matrimonium fidelium ratum sit sacramentum; haec porro sacramenti ratio maiorem addit firmitatem coniugali vinculo. Hinc postquam Catechismus rom. adstruxit coniugii indissolubilitatem proveniente ex iure divino ac naturali, subdit : « Id maxime fit, quatenus est sacramentum, qua ex re etiam in omnibus, quae naturae lege eius propria sunt, summam perfectionem acquirit (100). » Quî autem fieri potest, ut romanus pontifex dispenset in eo quod indissolubile prorsus est tum naturali, tum divino iure, tum ratione sacramenti?

6. Id quod potest frequenter solvi, non est insolubile; iam vero si matrimonium ratum potest per dispensationem pontificiam solvi, potest frequenter solvi, adeoque non est insolubile; sane quod possit eiusmodi coniugium a pontifice frequenter solvi ex eo patet, quod frequenter possint causae proponi, quae animum dispensare valentis moveant. Hinc quidam scribunt Gregorium XIII. uno die cum undecim dispensasse. Est autem apud omnes in confesso matrimonium esse insolubile sive sit consummatum sive ratum tantummodo; ergo solvi nequit per dispensationem.

7. Hoc quod posterius dictum est ex eo confirmatur, quod vinculum voti aut iuramenti eius etiam quod per

(98) *De matrim. ut sacram. cap. VIII. sect. I. n. 11.*

(99) *Ibid.*

(100) *Ibid.*

solum pontificem potest solvi, non est insolubile, et hoc ideo quia potest per dispensationem pontificiam solvi; ergo nec vinculum coniugii rati erit insolubile, si posset similiter solvi.

8. Non potest summus pontifex statuere ut matrimonium ratum solvatur per unum aliud quod fuerit consummatum. Ergo nec potest per dispensationem illud solvere: eiusdem siquidem est potestatis solvere, et casum quo solvatur statuere.

9. Quod si nonnulli pontifices matrimonium quandoque ratum solverunt, dicendum est eos hac agendi ratione secutos fuisse sententiam probabilem, et apud iuris canonici peritos communem: quod in re obscura ipsis licuit; et illi quibuscum sic fuit dispensatum ex iusta causa tuti fuerunt (101). Non defuerunt tamen alii pontifices qui existimarent se tali potestate non pollere, ut Innocentius III. cap. *Ex parte tit. De convers. coniugat.*, ubi respondet matrimonium inter legitimas personas contractum, illis viventibus nullo casu posse dissolvi, nisi vel ex revelatione divina, vel si per carnalem copulam consummatum non fuerit, per alterius professionem in religione. Censebat igitur in matrimonio etiam non consummato dispensationem pontificiam nihil posse quoad eius diremptionem. Idem sensisse Alexandrum III. ex conc. lateranensis parte VI. c. 8. colligi potest, prout Pontius egregie illud expendit. Idem constat de Adriano VI. de quo refert Dom. Soto, quod

(101) Huc referuntur quae animadvertit Bossuetus *Hist. des variat.* liv. VII. n. 50. et 62. ex occasione dispensationis a Iulio II. concessae Henrico VIII. ad ducendam uxorem defuncti fratris sui Arcturi: « Ces matières de dispense se règlent souvent par *de simples probabilités*; et on n'est pas obligé d'y rechercher la certitude de la foi, dont même elles ne sont pas toujours capables... Qu'il y ait pu avoir sur cette matière quelque diversité de sentiments, c'est assez qu'il ne fût pas évident que la dispense fût contraire aux lois divines, auxquelles les chrétiens sont obligés. Cette matière était donc de la nature de celles où tout dépend de la prudence des supérieurs, et dans lesquelles la bonne foi doit faire le repos des consciences.» Ed. de Versailles tom. XIX. pag. 447. et 454 seq.

cum ab eo huiusmodi dispensatio postulata esset, oblatque fuerat sententia Caietani, demiratus est, virum theologum hoc sibi in animum inducere potuisse: et ideo improbis, inquit, precibus succumbens, respondit se dare quod posset, sed tamen credere nihil posse (102).

Quae cum ita sint, concludit Auctor *De re sacramentaria*: «Neminem qui vere theologus fuerit a doctrina ecclesiae exempla talia (rom. pontificum) dimovebunt; tum quia incerta penitus sint; tum quod disciplina divinitus constituta factis contrariis convelli non possit (103).»

Affirmantem autem sententiam propugnant haud minoris auctoritatis theologi, Sanchez (104), Suarez (105), Bellarminus (106), Salmanticenses (107), Kugler (108), aliique passim, praecipue vero Benedictus XIV. (109), una cum canonistis pene omnibus (110).

Hi porro inversa, ut ita dicam, ratione ac via procedunt ad hanc adstruendam sententiam. Hoc enim argumentum instituunt. Certum est ab aliquot saltem seculis romanos pontifices, numquam ecclesia reclamante, dispensasse a vinculo matrimonii rati. Ergo hac debuerunt esse a Christo Domino praediti potestate in ecclesiae bonum, ac utilitatem.

De prima affirmatione, seu de antecedente nullum nunc dubium superesse potest. De Martino V. et Eugenio IV. fatentur adversae sententiae theologi ipsos dispensasse in matrimonio rato fulti gravi testimonio s. Antonini (111),

(102) Dist. 27. q. I. art. 4.

(103) Drouin loc. cit.

(104) Loc. cit.

(105) Loc. cit.

(106) Lib. II. *De monachis*, c. 38. n. 22.

(107) Cap. IV. n. 61.

(108) Quaest. XXIII. n. 1692.

(109) *Quaest. canonic.* Quaest. XXIV. CVIII. CCXLXXIX. et alibi.

(110) Horum prolixum catalogum exhibet Sanchez lib. II. disp. XIV. n. 2.

(111) In *Summa theol.* Part. 3. tit. I. cap. 21. §. 3. ed Veron. 1740. p. 102 seq.

nec non de Paulo III. et Pio IV. auctoritate innixi Navarri (112), ac de Clemente VIII. Urbano VIII. Gregorio XIII. idoneis pariter testimoniis permoti, ut de insequentibus pontificibus sileamus.

Satis nobis sit verba exscribere Benedicti XIV. quibus uti certam hanc potestatem et praxim assumit dicens: « Cessat quoque indissolubitas matrimonii rati in aliis omnibus casibus extra professionem religiosam, in quibus summus pontifex, iustis et gravissimis de causis, censet eius dissolutioni esse locum, ita suadente tridentino, ita exposcente observantia, ita demum convincente continuata plurium seculorum praxi sedis apostolicae, ex quibus interpretatio iuris divini optime colligi potest (113); » et alibi iterum scribit: « Nullam de potestate summi pontificis moveri amplius posse quaestionem in eo quod attinet ad dispensandum super matrimonio rato, et non consummato, cum hodie opinio affirmativa sit communis inter theologos et canonistas, et in praxi recepta, uti notorium est (114). » Ego quoque certo novi plures eiusmodi dispensationes factas fuisse ab insequentibus pontificibus Pio VII. Gregorio XVI. Pio IX., ut omittam non paucas resolutiones congregationum concilii et ss. inquisitionis de petenda a pontifice dispensatione illis in causis in quibus casus iste agitatus est (115).

(112) In *Enchiridio*, cap. 22. n. 20.

(113) *Quaest. canon.* q. CXLVI. n. 36.

(114) *Ibid.* Quaest. CCCCLXXIX.

(115) Quoad vetustiores dispensationes cf. Christophor. Cosci *De separatione tori coniugalis*, tom. I. lib. I. cap. 16. n. 3. 4, et 69. Romae 1773. pag. 251 seqq. Quoad recentiores cf. Zamboni *Collect. declarat. s. Congreg. conc. trident.* III part. verbo *Dispensatio* §. 16. tom. VI. pag. 295 seqq. Eiusmodi porro dispensationes datae potissimum sunt in dubio de impotentia alterutrius coniugis, omissis experimentis, quae ex iure fieri debuissent. Harum dispensationum placet hic elenchum chronologicum praebere, quibus novissimas adiicio.

Itaque data est dispensatio in causa urbanens. 12. Ian. 1726.

In causa mediolanens. 24. Mai 1732.

In causa hispalens. 9. Sept. 1741.

Itaque cum *factum* extra omnem dubitationis aleam constitutum sit, facile his theologis est transitum facere ad *ius*, non solum ob illud generale principium, quod ad instar axiomatis receptum est: «De pontificis potestate, postquam dispensavit, dubitare, instar sacrilegii est. Esset enim Christo quasi exprobrare, quod non satis ecclesiae suae providisset (116);» verum etiam ob argumenta, quae hanc inesse pontifici potestatem suadent.

Ac primum est argumentum negativum. Quod non adversatur Scripturae ac traditioni, quodque cedit in bonum ecclesiae, et a rom. pontificibus fieri consuevit, in horum potestate constitutum esse censendum est; talis porro est dispensatio matrimonii rati.

Sane quod non adversetur Scripturae exinde patet, quod illae constanter loquantur de matrimonio consummato, prout illius oracula hac de re exponunt ipsi romani pontifices inter quos Alexander III. in cap. *Ex publico* (117). Quod vero non adversetur traditioni ex eo ostenditur, quod nullum testimonium ex antiquitate proferri possit ex quo contrarium constet, contra vero invenimus pontifices, qui data occasione dispensarunt solvendo coniugium iam contractum at nondum consummatum.

Secundum argumentum est positivum. Christus constituens Petrum in ecclesia sua primatem, suumque vicarium, eumque illa potestatis plenitudine praeditum esse voluit, qua eiusdem ecclesiae ac fidelium omnium utilitati ac necessitati providere posset. Quam quidem potestatis

In causa icruensi 16. Augusti 1783.

In causa neapolitana 28. April. 1827.

In causa gandavens. 17. Dec. 1845.

In causa taurinens. 11. April. 1848.

In causa tiburtina 12. Sept. 1853.

In causa cadicens. 24. Ian. 1857.

In causa Neapolit. 27. Mart. 1858.

(116) Ita Veracrux in *Speculo* part. II. col. 27.

(117) Tit. *De convers. coniugat.* cap. VII.

plenitudinem amplissimae illae ac illimitatae formulae exprimunt quibus ipse usus est ad hanc potestatem ei communicandam: *Quodcumque ligaveris, quodcumque solveris*; item: *Pasce agnos meos, pasce oves meas*. Nisi igitur ostendatur exceptio respectu matrimonii rati, quemadmodum constat in matrimonio fidelium consummato omnem exceptionem excludi, etiam ad illius solutionem potestatem Petro collatam protendi dicendum est, prout reipsa protenditur ad solutionem voti solemnem aut iuramenti. Ergo Rom. pontifex, qui divino iure in hac potestatis plenitudine Petro succedit, id ipsum praestare posse dicendus est.

Romanus praeterea pontifex utpote supremus in ecclesia doctor et sacrarum Scripturarum perinde ac divinae traditionis interpres, divina oracula quae sunt de firmitate coniugii, intellexit cum exceptione in peculiaribus casibus quoad matrimonia rata. Quoties proinde ii incidunt casus in quibus iidem pontifices deprehenderunt, quod nisi eiusmodi coniugia solverent, plurimum detrimenti obveniret in animarum perniciem, scandala insuper gravissima, aliaque non minora incommoda orirentur, toties hac extraordinaria potestate usi sunt (118).

Alii eandem adstruere nituntur doctrinam ex significatione matrimonii rati, quam diversam esse dicunt ab ea quam habet matrimonium consummatum, prout paulo ante exposuimus. Nos ultro eiusmodi significationes matrimonii admittimus cum communi doctorum suffragio. Verumtamen hoc argumentum ex diversa significatione petitum non adeo firmum videtur, ut ei inniti possimus.

(118) Eiusmodi necessitas manifestius apparebat antequam concilium tridentinum decreto suo irrita fecisset clandestina matrimonia. Per haec enim saepe fiebat, ut ecclesia, quae non iudicat de internis, deberet sancire publice matrimonia, quae nulla erant et adulterina ob impedimentum ligaminis ex clandestine antea inito coniugio si ratum solum permanebat, poterat rom. pontifex illud dissolvere, et hac ratione obviare nullitati posterioris matrimonii in facie ecclesiae celebrati aut celebrandi. Quod profecto leve non erat emolumentum.

Siquidem, ut animadvertit Pontius, ea significatio non afficit indissolubilitatem matrimonii aut dissolubilitatem, sed signum est a posteriori, ex quo colligimus eam solubilitatem cessasse, aut permanere; ast quod matrimonium sit nec ne solubile id pendere ab institutione Christi (119). Huic igitur insistendum est, eo vel magis quod non defuerint, qui existimarent matrimonium etiam ratum significare unionem Christi non solum cum anima, verum etiam cum ecclesia, cum Paulus Ephes. V. unionem illam indicans dicat universe: *Hoc sacramentum magnum est. Ego autem dico in Christo et in ecclesia*; praesertim cum non modo fidelium, sed etiam matrimonia infidelium, multo vero magis matrimonia hebraeorum aliquo modo unionem Christi cum ecclesia, aut etiam unionem hypostaticam significarent. Quocirca non videtur solide dici posse ideo solvi matrimonium ratum, quia solum significat unionem Christi cum anima uniuscuiusque fidelis.

His propterea, aliisque eiusmodi minus certis argumentis dimissis, ne infirmetur potius quam adstruatur thesis, hic sistunt graves theologi in sua protuenda sententia, qua affirmant posse romanos pontifices extraordinaria potestate sibi a Christo concessa, cum opus fuerit, solvere coniugium ratum fidelium.

§. II.

Utriusque sententiae argumentorum discussio et conclusio.

Hactenus praecipuos auctores qui pro alterutra opinione decertant una cum praecipuis argumentis quibus pro sua quique thesi utuntur in medium attulimus; nunc iam necesse est ea inter se conferre, ut eorum vim ad probandum detegamus. Sic enim fiet, ut facilius veritatem

assequamur, et quatenus ex illis sit nobis amplectenda videamus. Scopum porro obtinebimus accurata eorundem analysi instituta, prout deposito studio partium, et maiori qua fieri poterit claritate efficere aggredimur.

Dissimulare haud possumus nonnulla argumenta quibus permoti sunt theologi ad denegandam rom. pontificibus potestatem dispensandi in matrimoniis ratis fidelium primo obtutu videri admodum valida, et ita comparata ut persuasionem quamdam gignere facile possint. Attamen si propius spectentur illico patebit magis apparentia ea esse quam solida.

Revera duo priora argumenta negativa desumpta ex non usu istius potestatis per quatuordecim pene priora ecclesiae secula, atque ex silentio Scripturarum et traditionis multiplicem exceptionem admittunt. 1. Quia adhuc incertum est num ante Martinum V. alii pontifices non dispensaverint; neque ex defectu documentorum inferri legitime potest aliquid factum non esse, aut Martinum in hac danda dispensatione antecessorum suorum exemplum ac vestigia non fuisse secutum. Id enim probari nequit. Imo s. Antoninus contrarium supponit; asserit enim iam sua aetate quod «Canonistae *communiter* tenerent contrarium, scilicet quod Papa potest dissolvere illud;» et aliorum refert rationes atque auctoritates, demum provocat, seu remittit lectores ad «aliquas bullas et Martini V. et Eugenii IV. continentis talem dispensationem sive dissolutionem matrimonii non consummati, contrahentibus postmodum illis cum aliis (120).» 2. Hi ipsi theologi propugnant adversus novatores per religionis professionem solvi matrimonium ratum; iam vero primum documentum authenticum huius declarationis suppetit ex Alexandro III. et Innocentio III. qui floruerunt sec. ecclesiae XII. et XIII.

(120) Loc. cit. ed. Veron. 1740. part. III. *Summae theol.* tit. I. c. 21. pag. 102 seqq.

Idem dic de potestate rom. pontificis in dispensando ab impedimentis dirimentibus *præviis*, cuius facultatis ante Innocentium III. vix suppetit solemne aliquod factum. 3. Qui haec obiiciunt non advertunt eandem difficultatem moveri posse adversus quemcumque pontificem, qui primo aliqua facultate sibi propria usus fuerit, cum semper excipi posset, ante talem nominatim pontificem, neminem usum ea potestate fuisse. Quod profecto absonum est.

Quod vero attinet ad alterum argumentum negativum de silentio traditionis, magis adhuc nutat. Siquidem vidimus ex Benedicto XIV. hanc potestatem constare *ex traditione*. Haec autem potest inesse ac vigere in ecclesia, quin de ipsa constet per instrumenta, quibus nobis pateferi solet, ut alias adnotavimus; cum duo haec, traditionis scilicet existentia in ecclesia, et eiusdem traditionis documenta per quae dignoscitur, valde inter se discrepent; prout contingit in pluribus aliis doctrinae catholicae capitibus.

Tertium argumentum, quod est Sylvii, iuxta quem potestas, quae profluit aut exercetur immediate a Rom. Pontifice, etiamsi is a Christo eam acceperit, non potest dici divina, sed solum humana aut ecclesiastica, adeo ut eadem non possit dispensari in eo quod divinae est institutionis, falsum est et absonum. Falsum quidem, quia exinde sequeretur non posse ecclesiam accepta a Christo potestate plura constituere, quae versentur circa ea quae divinitus sunt instituta; ex. gr. ut in re de qua agimus sistamus, sequeretur ecclesiam constituere non posse, ut plura vel pauciora impedimenta dirimant matrimonia praeter ea quae in Levitico habentur; item legem caelibatus pro clericis, aliaque eiusmodi; quod tamen catholicorum nemo dicere ausus est. Falsum praeterea et absonum est hoc principium, quasi nempe dum divinus legislator Christus Dominus amplissimam contulit potestatem ad ea de-

cernenda, quae ad ecclesiae suae bonum ac utilitatem faciunt, non posse huius potestatis subiectum ea uti ad ea moderanda, quae divinitus constituta sunt. Receptum est principium, quod qui per alium facit per se ipsum facere censetur. Dum igitur ecclesia nomine Christi et potestate ab eo accepta aliquid constituit, ipse Christus id constituere censendus est. Tertio denique hic auctor pro certo assumit, quod tamen ab aliis iure meritoque negatur, nimirum divina institutione matrimonium ratum esse prorsus insolubile. Quocirca praeterquam quod eiusmodi argumentum falsum et absonum est, sophisticum etiam esse deprehenditur.

Quod quarto loco proponitur de eadem essentia utriusque coniugii tum rati tum consummati, quibus propterea eadem convenit definitio, verissimum est, dummodo tamen admittatur diversus inter utrumque gradus. Ex qua gradus diversitate iuxta quosdam theologos consequitur, ut alterum sit indissolubile, alterum vero per legitimam auctoritatem solvi possit. Haec porro diversitas in eo consistit, quod matrimonium ratum differat a matrimonio consummato, ut iidem theologo loquuntur, sicut perfectum differt ab imperfecto; in illo enim deest pars integralis, qua perficitur coniugium; haec autem integritas habetur in matrimonio consummato. Hinc ad eum modum quo eadem convenit definitio homini integro atque perfecto, ac homini cui pars integralis aliqua deest, utpote caeco, manco, claudo, surdo etc.; nec tamen non potest homo hac ratione imperfectus eadem praestare, quae posset homo integer atque perfectus, sic matrimonium consummatum id habet ut sit omnimode insolubile dum ratum matrimonium manet solubile. Hoc autem discrimen vocibus ipsis designatur, quibus denominantur *consummatum et non consummatum*. Quid enim aliud significat consummatum nisi *perfectum*, et inconsummatum sive ratum nisi *imperfectum*?

Quod numquam de alio dicitur, nemo enim distingueret inter sacerdotium ratum et consummatum ad discernendum eum, qui numquam sacrificium obtulerit, ab alio qui obtulit (121). Itaque utrumque matrimonium essentia unum sunt, una eademque definitio utrique convenit; utrumque propterea ex se est indissolubile utroque iure, si lubet, naturali ac divino. Verum inter se differunt quoad integritatem et perfectionem, quo fit, ut diximus, quod alterum habeat absolutam indissolubilitatem, alterum vero potestate a Deo communicata possit dissolvi. Alii addunt differre unum ab altero, ob diversam significationem coniunctionis Christi cum anima, aut cum ecclesia. Verum quidquid de hoc sit, quacumque ratione solutum plane est hoc argumentum.

Argumentum quintum, quod petitur ex ratione sacramenti, haud melius rem conficit, quam argumentum proxime antecedens cum quo cognationem habet. Certissime sacramentum est matrimonium tum ratum, tum consummatum. Hoc nemo negaverit. Ast sacramentum ordinatum est ad conferendam gratiam, non autem per se ad tribuendam indissolubilitatem. Hanc matrimonium habet ex divina institutione, et quodammodo ex lege naturali, quatenus sequitur naturam contractus. Quod si ratio signi, nempe significationis unionis Christi sive cum anima fideli, sive cum ecclesia aut in charitate aut in carne maiorem tribuit coniugio firmitatem, ut aliqui contendunt, intelligendum id est, ut ipsi explicant, pro diversa significatione quam nanciscitur coniugium prout diversum habet gradum perfectionis (122) iuxta paulo ante exposita. Et haec quidem ut responderemus *ad hominem* iis theologis qui hoc urgent argumentum; ceterum ut alias diximus, hoc pendet a divina dispositione.

(121) Cf. Bellarm. lib. II. *De monachis*, cap. XXXVIII. n. 20 seqq.

(122) Cf. Bellarm. loc. cit. n. 23. 24.

Cetera quae adiciuntur argumenta nullam seriam faciunt difficultatem. Etenim quod solubile dici deberet coniugium ratum, si rom. Pontificis auctoritate solvi posset, nullum est inconueniens. Et sane s. Thomas dissolubile dicit matrimonium ratum scribens: «Et ideo nec omnimodam indivisibilitatem habet (123).» Et sic alii theologi passim. Ceterum in hoc quaedam latet aequivocatio; siquidem matrimonium ratum potest, imo et dici debet indissolubile tum ratione sui, sive ab intrinseco, tum dispositione divina generali, sive ab extrinseco; attamen dici potest dissolubile dispositione divina, nempe ab extrinseco per ingressum alterius coniugis in religionem et per dispensationem pontificiam, extraordinaria ad id tributa auctoritate qua utitur Pontifex ut Christi vicarius, gravi interveniente causa; si hos casus excipias, nec coniuges privata auctoritate, nec alius quisquam ullo in casu possunt coniugium ratum dissolvere. Et en quomodo hac sublata aequivocatione, rite omnia componantur, et quo sensu in confesso sit apud omnes matrimonium esse insolubile, et quonam sensu etiam solubile dici queat.

Exinde responsio fluit ad id quod de vinculo voti aut iuramenti additur, quod cum possit a summo Pontifice solvi per dispensationem, idcirco solubile dicatur; nam eadem ratio valet tam pro solutione voti ac iuramenti, quam pro solutione matrimonii rati, cum horum obligatio sit de iure divino; scilicet natura sua sunt insolubilia; at solubilia sunt potestate a Deo communicata, ut nuper expositum declaratumque est.

Non video quare ex eo quod non possit romanus Pontifex statuere, ut matrimonium ratum dissolvatur per aliud quod fuerit consummatum, inferat Sylvius qui hoc proponit, non posse summum Pontificem per dispensationem matrimonium ratum solvere. In primis absurda videtur hypothesis

de matrimonio altero consummato, dum adhuc subsistit primum matrimonium licet solum ratum. Hac enim in hypothesis rom. Pontifex bigamiam simultaneam probaret, quod certe ab ipso praestari nequit. Potest autem summus Pontifex per dispensationem solvere, iusta de causa, coniugium ratum, quo soluto, possunt coniuges liberi effecti cum aliis celebrare matrimonium. Haec sola hypothesis possibilis est, in qua nihil est quod repugnet. Legem autem generalem qua decernatur quod in tali particulari casu matrimonium ratum dissolvatur, ideo numquam statuet rom. Pontifex, quia difficile omnino est omnia recensere adiuncta quae determinare solent ipsum ad solvendum eiusmodi coniugium, et quia praeterea non omnia quae licent semper expediant. Ceterum quod absolute posset rom. Pontifex legem constituere etiam generalem non abnuit s. Antoninus (124), et non pauci theologi post illum, qui insuper hunc casum in quo dispensare posset, assignant. Horum sententias referunt et expendunt Salmanticenses (125). Adeoque multiplici sub respectu nutat hoc Sylvii argumentum, quod suum effecit Collet (126).

Quod postremo loco affertur ad suadendum haud posse rom. Pontifices dispensare in matrimonio rato cum pluribus constet partibus, necesse est ut eas singillatim discu-

(124) Sic enim scribit loc. cit. «Potest ergo Papa etiam de potestate ordinata circa matrimonium non consummatum hanc constitutionem facere, et sic patet ratio conveniens rationi, ut notatur 27. quaest. 2. *Quapropter*. Unde circa non consummatum potest ecclesia statuere quidquid placet; dum tamen subsit causa iusta, et hoc voluit finis cap. *Ex publico*. Dicit tamen ipse Ostiensis, quod non expedit, quod circa hoc multum laxet habenas, nec etiam est tutum.»

Inter eos, qui solutionem coniugii ob solemnem religionis professionem repetunt ex iure ecclesiastico, non desunt qui ita rem explicant: ecclesia interpretes voluntatis Christi declaravit coniugium ratum posse dissolvi: generali quidem lege statuit illud dissolvi ob solemnem religionis professionem: pro ceteris vero casibus non lege universali, sed privilegio ac dispensatione utitur.

(125) Cf. Tract. IX. *De matr.* Cap. 4. Dub. 3. n. 61. 62.

(126) Loc. cit. n. 449.

tiamus, ne si simul eas complectamur, minus perspicua sit responsio.

Cum igitur hi theologi dissimulare nequeant plures Pontifices romanos hac potestate usos esse in dissolvendis coniugiis ratis, nec aperte audeant eos erroris arguere, ideo confugerunt ad probabilitatem sententiae quam illi secuti sunt. Verum, esto quod interdum possint rom. Pontifices in suis actis inniti sententiae probabili; ast quod omnes longo seculorum decursu, initium saltem sumendo a Martino V. ad aetatem usque nostram ita se gesserint, sin minus absonum, durum saltem dictu omnino videtur. Etsi enim practice prudenter se gerent, theoretice saltem tot doctissimos sanctissimosque Pontifices errasse ac errare in re tam gravi, quae ad mores pertinet, et universam afficit ecclesiam, dicendum esset; aut saltem ex adversariorum doctrina summi Pontifices periculo se exposuissent, atque exponerent dandi dispensationem iure divino invalidam. Et sane quotquot hanc rom. Pontifici denegant potestatem, eos non modo errasse, sed praeterea eosdem ab ecclesiae doctrina recessisse affirmant, et a doctrina revelata a qua eos, non recessisse modo, sed ei sese etiam opposuisse autumant. Quin etiam toties nullitati, aut saltem aperto nullitatis periculo docent exposuisse sacramentorum administrationem rom. Pontifices quoties sine potestate, aut cum potestate dubia dispensarunt in matrimoniis ratis (127). Adhuc enim vigente priori coniugio, posterius nullum evadit. In hac itaque sententia romani Pontifices indulgissent vel concubinatui vel polygamiae; quod dicere nefas est. Nefas idcirco est asserere rom. Pontifices uni probabilitati et quidem tenui innixos praebuisse ac etiamnum praebere has dispensationes, adeoque eiusmodi effugium in tuto non constituit rom. Pontificum agendi rationem (128).

(127) Hanc rationem urget Collet loc. cit. n. 445.

(128) Atque hic animadvertendum est theologos plerosque omnes, qui huic

Romanos autem Pontifices antiquiores existimasse, uti subdunt hi theologi, se tali potestate non pollere, exploratum non est, nec probari posse videtur. Hi Pontifices perhibentur Nicolaus I. Alexander III. Innocentius III. quibus addunt ex nonnullorum auctoritate Hadrianum VI. Verum perperam hos Pontifices veluti contrarium sentientes proferri ex documentorum analysi facile est ostendere.

Ac primo Nicolai omnium vetustissimi allegatur epistola ad Carolum episcopum moguntinum in qua legitur: « Hi qui matrimonium sani contraxerint, et uni ex duobus amentia, aut furor, aut aliqua infirmitas accesserit, ob hanc infirmitatem coniugia talium solvi non possunt. Similiter sentiendum de his, qui ab adversariis excaecantur, aut membris truncantur, aut a barbaris exsecti fuerint (129). » Ex quibus inferunt Pontius et Colletus, *manifestum est* supervenientem impotentiam non videri Nicolao I. sufficientem causam dissolvendi matrimonium, qui indistincte statuit matrimonium semel contractum ne quidem ob gravissimas amentiae, furoris, detruncati membri, atque etiam exsectionis causas dirimi posse.

Ast vero in toto Nicolai textu ne verbum quidem occurrit quo insinuetur ipsum locutum de matrimonio tantum rato fuisse. Quin potius omnia suadent eum de matrimonio consummato disseruisse, quum difficile sit supponere illa quae enumerantur contingere brevi intervallo, quod inter celebrationem matrimonii, eiusque consummationem effluere solet. Praeterea sanctus Pontifex in allegata epistola non agit de dispensatione quae ab illo fuerit petita ac denegata, sed de responso doctrinali quaestioni sibi propo-

adhaerent placito in doctrina morali ad probabilioristarum classem pertinere, qui diris probabilismum devovent. Hi tamen ipsi non verentur affirmare rom. Pontifices in re tanti momenti *opintoni probabili* innixos matrimonia rata dissolvisse atque porro dissolvere.

(129) Apud Gratianum in *Decreto* II. par. causa XXXII. quaest. VII. cap. 25. *Si quis matrimonium.*

sitae. Verum, quod caput est, eiusmodi epistola quae sub Nicolai nomine a Gratiano profertur, est omnino apocrypha, et ex huc illucque collectis fragmentis consuta (130). Quod quidem Pontio utpote antiquiori auctori exciderit, mirum esse non debet; ast mirari subest hoc non advertisse Colletum, qui ceteroquin accuratus esse solet. Itaque Nicolaus ab hoc censu expungendus est.

Alter Pontifex, qui contrarius perhibetur est Alexander III. cuius a Pontio quatuor hac de re allegantur decreta ex appendice concilii lateranensis III. par. V. cap. 8. *Super hoc*; cap. 17. *Porro si qui vir et mulier*; cap. 18. *Sollicitudini tuae*, et cap. 22. *Super eo*, in quibus, iuxta ipsum summus hic Pontifex patefecit se tali potestate dissolvendi coniugium legitime contractum non pollere.

(130) Cf. Car. Sebast. Berardi in op. *Gratiani canones genuini ab apocryphis discreti*. Taurini 1755. par. II, tom. II. pag. 293 seqq. *De epistolis ad Carolum archiepiscopum moguntinensem et eius suffraganeos*, ubi non solum vir doctus ostendit supposititiam esse eiusmodi epistolam, sed praeterea fontes ex quibus desumptus sit textus a Gratiano allegatus patefacit scribens: « Dicendum adhuc superest de canone 25. caus. 32. quaest. 7. Sed hunc frustra aut in conc. moguntino, aut in memorata Nicolao pontifici tributa epistola quaereres. Falsa ea primum inscriptio. Legitur apud Burchardum, qui primus in lib. 9. cap. 28. fragmentum illud laudavit ex epistola Nicolai ad Carolum moguntinum episcopum scribentis; ceterum alia est capituli inscriptio in vetustioribus collectionibus. Reginonem memoro qui tempora Nicolai pontificis attigit; nam ipse in lib. 2. de ecclesiast. disciplina postquam in cap. 129. verba descripsit quaedam romanae legis nomine (illa ipsa, quae sub nomine Fabii papae Gratianus retulit in can. 26. caus. 32. quaest. 7.), ita prosequitur in cap. 130. *Ex eadem*, nimirum ex lege romana: *Si qui matrimonium sani contraxerunt, et uni ex duobus insania aut furor, aut aliqua infirmitas accesserit, ob hanc infirmitatem coniugia talium solvi non possunt. Similiter sentiendum de his, qui ab adversariis caecantur, aut membris detruncantur*. Verba illa: *aut a barbaris exsecti fuerint*, quae legimus apud Gratianum desiderantur in codice Reginonis, quemadmodum etiam apud Ivonem in part. 8. cap. 166. Baluzius in notis ad Reginonem iam visus est indicare, unde nam Gratiani fragmentum sit repetendum; ait enim apud Paullum iureconsultum lib. 2. sentent. tit. 19. caput istud sic expressum haberi: *Neque furiosus neque furiosa matrimonium contrahere possunt, sed contractum matrimonium furore non tollitur*; cui sententiae hanc interpretationem subiunxit Anianus: *Si qui matrimonium sani contraxerint, et uni ex duobus amentia, aut furor accesserit, ob hanc infirmitatem coniugia talium solvi non possunt.* »

Iuverit proinde hos textus afferre, et perlustrare, ut quod Alexander reipsa senserit colligamus. Atque ut a primo exordiamur, nempe a cap. VIII. ita se habet Alexandri responsum: « Consuluisti nos, utrum inter virum et mulierem, praestito vel non praestito sacramento, si legitimus consensus intervenerit de praesenti, carnali copula non secuta, liceat mulieri alii nubere: vel si nupserit alii, et carnalis fuerit copula secuta, an ab ipso debeat separari. Super hoc inquisitioni tuae taliter respondemus: quod si legitimus consensus a solemnitate, qua fieri solet, praesente sacerdote, aut etiam eius notario, sicut etiam in quibusdam locis adhuc observatur, coram idoneis testibus interveniat de praesenti, ita quod unus alium in suam mutuo consensu verbis expressis recipiat, utrimque dicendo: *Ego te recipio in meam, et ego te in meum*: sive sit iuramentum, sive non, non licet mulieri alii nubere: et si nupserit, et fuerit carnalis copula subsecuta, ab eo separari debet, et ut ad primum redeat, ecclesiastica districtione compelli: quamvis alii aliter sentiant, aliter etiam a quibusdam praedecessoribus nostris sit aliquando iudicatum (131). »

Ut interim hic sistamus, fidenter assero nihil hoc in contextu reperiri quod ad rem nostram referatur. Etenim 1. nos agimus *de iure*, seu de eo quod rom. Pontifex possit aut non possit circa dispensationem in matrimonio rato; in hac autem decretali agitur *de facto*, declarante Pontifice in casus specie de quo interrogatus fuerat, quid censendum; at nulla ratione in ea agitur de petita dispensatione, eaque concedenda aut deneganda. 2. Quaestio Pontifici proposita est de matrimonio in genere, sive istud fuerit consummatum sive non. Cui rite respondit Pontifex ex norma iuridica, hoc matrimonium non posse ullo modo dissolvi, etiamsi mulier post initum verbis de praesenti

(131) *Acta concil. Hard. tom. VI. par. II. col. 1732.*

coniugium ante consummationem alteri nupserit, cum eo-
que carnalem copulam habuerit. Nos ipsi eadem ratione
propositae quaestioni responderemus, quia nulla dispen-
satione interveniente, firmum manet ratum coniugium le-
gitimo consensu celebratum. Quaestio autem nostra ver-
satur circa potestatem Pontificis dispensandi in matrimonio
rato, cum iusta intercesserit causa, de qua Alexander hoc
in decreto ne verbum quidem habet, multo vero minus
professus est se dispensare non posse, ut hi theologi autu-
mant; 3. verba illa: *Quamvis alii aliter sentiant, aliter etiam
a quibusdam praedecessoribus nostris sit aliquando iudica-
tum*, haud referuntur ad potestatem de qua haec non agit
Alexander dissolvendi coniugii rati, sed ad peculiarem il-
lam opinionem, quae aliquando viguit, quamque nonnulli
interdum Pontifices secuti sunt, quod nempe si mulier post
initum per consensum verbis de praesenti expressum cum
aliquo coniugium, alii nupserit cum quo copula secuta fue-
rit, posset secundum hunc coniugem retinere. Hanc opi-
nionem reprobatur Alexander III. (132). Igitur non *egregie*
Pontius Alexandri III. rescriptum expendit ad suam fir-
mandam sententiam, sed ex anticipato iudicio.

Multo minus, quod contendit Pontius et qui eum se-
quuntur, continetur in aliis capitibus, quae ab ipso al-
legantur ex eiusdem Pontificis decretis, quae hic non
piget describere.

(132) Ideo apud aliquos invaluerat eiusmodi opinio, quia in veteri iure
receptum erat, ut secuta copula inter sponso, non iam meram sponsalium
obligationem haberi, sed verum matrimonii contractum locum habuisse puta-
retur; dummodo vera copula, non tantum nisus in copulam intercessisset.
Idque ex praesumptione, uti exponunt canonistae, de vero consensu de prae-
senti facto ipso expresso. Atque ita reipsa decretum postea est ab Innocentio III.
et Gregorio IX. in cap. 15. 30. et 32. *De sponsalibus*. Hoc vero ius abrogatum
est a conc. tridentino in decreto de Ref. sess. XXIV. cap. I. quo irrita facta sunt
matrimonia clandestina. Ex quadam igitur analogia factum est, ut nonnulli
venerint in illam sententiam reprobatur ab Alex. III. de valore secundi ma-
trimonii copula secuta, adeo ut istud praeferrent priori matrimonio tantum
rato et non consummato.

In cap. XVII. insistit Alexander in doctrina cap. VIII. tradita ob paritatem casus sibi propositi, scribens: « Si qui vir et mulier pari consensu contraxerint matrimonium, et vir ea incognita, aliam duxerit in uxorem, et eam cognoverit: cogendus est secundam dimittere, et ad primam redire. Quia quamvis exinde sit diversa quorundam sententia, et non eadem consuetudo ecclesiae; tutius tamen videtur, ut primam hanc quam secundam, cum a prima iudicio ecclesiae separari non debeat, postquam cum ea ex pari voto et consensu matrimonium contraxit. Sane quamquam mulieri desponsatae et a viro non cognitae, liceat ad religionem transire, aliam tamen non potest ducere in uxorem. » Neque hoc in capite sermo est de potestate dandi vel non dandi dispensationem.

In capite vero XVIII. haec leguntur: « Super eo siquidem unde nos consuluit dilectio tua, quid videlicet servandum sit, et retinendum de muliere, quae cum sit uni viro desponsata, ab alio postea desponsatur et cognoscitur: sollicitudini tuae taliter respondemus, quod licet quarundam ecclesiarum consuetudo habeat, ut cum secundo viro debeat remanere; convenientius tamen videtur, ut si vir et mulier ad aetatem coniugio aptam devenerint, et infra mulier desponsata fuerit, quod vir mulierem in suam, et mulier virum in suum recipiat; licet postea ab alio desponsetur et cognoscatur, debet primo restitui (133). » Neque in hoc rescripto quidpiam habetur quod nostram attingat quaestionem.

Item in capite XXII. haec constituta ab Alex. III. occurrunt: « Super eo quod ex litteris tuis intelleximus, virum quemdam et mulierem de mandato domini utriusque assensu se invicem recepisse, nullo sacerdote praesente, nec adhibita solemnitate, quam solet anglicana ecclesia adhibere, et alium praedictam mulierem ante carnalem

(133) *Acta concil. Hard. loc. cit. col. 1735.*

commixtionem solemniter duxisse et cognovisse: tuae fraternitati duximus taliter respondendum, quod si primus vir et mulier pari consensu de praesenti sese receperint, ipsa debet primo restitui; cum nec potuerit, nec debuerit post talem consensum alii nubere. Si vero consensus talis inter eos non intercesserit sub verbis illis quae diximus, nec carnalis copula etiam assensu de futuro praeunte: secundo viro, qui eam postea traduxit atque cognovit, mulier ipsa debet relinqui, et ab impetitione prioris absolvi; iniuncta primo poenitentia de laesione fidei vel violatione iuramenti, si dedit fidem, vel praestitit iuramentum (134).» Ut legenti patet, nihil quod ad quaestionem nostram referatur in hoc pariter capite reperitur.

Cum autem haec sint omnia et sola documenta quae ex Alexandro III. a Pontio eiusque asseclis proferantur, quae nihil omnino continent de potestate quam sibi inesse denegaverit solvendi matrimonia rata, ideo iure meritoque concludimus: ergo ex censu horum rom. Pontificum adversantium huic doctrinae, etiam Alex. III. eliminandus est.

Restat ut expendamus quae afferuntur ex Innocentio III. Sunt porro duo; primum desumitur ex cap. *Ex parte*, in quo haec habet hic summus Pontifex. « Nos inquisitioni tuae taliter respondemus, quod etsi possit non inconsulte videri, quod ex quo matrimonium inter legitimas personas, per verba de praesenti contrahitur, illis viventibus *in nullo casu possit dissolvi*, ut vivente reliquo, alter ad secunda vota transmigret, etiamsi unus fidelium, inter quos est ratum coniugium, fieret haereticus, et nollet permanere cum altero sine contumelia Creatoris, nisi forte secus fieret ex revelatione divina, quae superat omnem legem, sicut a quibusdam sanctis legitur esse factum. Nos tamen nolentes a praedecessorum nostrorum vestigio declinare, qui respondere consulti, antequam ma-

(134) Ibid. col. 1736 seq.

trimonium sit per carnalem copulam consummatum, licere alteri coniugum, reliquo inconsulto, ad religionem transire: ita quod reliquus extunc legitime poterit alteri copulari: hoc ipsum tibi consulimus observandum in articulo praenotato, quamvis falsa sit causa, per quam ad susceptionem veli praedicta mulier sit inducta (nempe quod ductus coniux lepra superveniente laboraverit), cum sine qualibet tali causa idipsum religionis obtentu facere potuisset. Porro licet praedicta mulier videatur in veli susceptione religionis habitum assumpsisse; si tamen velit in domo propria remanere, quasi propositum castitatis in seculo servatura, nihilominus consummandum est matrimonium iam contractum, nisi se voto adstrinxerit ad observantiam regularem: in quo casu compelli potest, ut relicto seculo religionis propositum exequatur (135).»

In quae verba animadvertit Pontius 1. lepram supervenientem matrimonio rato iudicatam non fuisse ab Innocentio III. sufficientem causam dissolvendi coniugium secus ac senserit Sanchez. 2. Urget verba illa: *in nullo casu posse dissolvi, etiam altero in haeresim incidente, nisi tantum ex divina revelatione*; atque adeo ob solum ingressum religionis, qui casus habetur iam ex divina revelatione. Sensit ergo Innocentius nullam idoneam esse causam dissolvendi matrimonium ratum, nisi quae constiterit ex revelatione divina (136).

Ita quidem, si Innocentius hac in epistola locutus fuisset de potestate Pontificis circa dispensationem in matrimonio rato, et de causis quibus posset vel non posset moveri ad concedendam eiusmodi dispensationem, prout assumit Pontius. Iam vero hac de re ne verbum quidem in universa hac decretali. Respondit igitur Pontifex quaestioni sibi propositae ad iuris ecclesiastici regulam iuxta quam

(135) Cap. XIV. *Ex parte. tit. XXXII. de convers. coniugat.*

(136) Lib. IX. cap. 3. n. 5.

privatae personae nequeunt dissolvere proprium coniugium ratum quacumque de causa, si excipias ingressum in religionem, quod quidem ius ex Deo promanat. Ceterum neque propter infirmitatem supervenientem neque propter haeresim, aliamve causam iure pollent fideles dirimendi ratum coniugium initum per verba de praesenti ad exprimendum consensum; adeoque altero adhuc in vivis agente novas cum alio celebrare nuptias nequeunt. Hac ratione respondissent pariter vel ipsi Pontifices, qui dispensationem in matrimonio rato dare consueverunt.

Idem dic de causis quarum mentionem iniecit Innocentius in suo rescripto: siquidem in eo non agitur de causis, quibus permoveri Pontifex possit ad concedendam vel denegandam petitam dispensationem, de quibus Innocentius non agit, sed de causis quibus invicem coniuges separari se posse autumarent propria auctoritate. Accedit, clausulam illam generalem Innocentii: « Quod etsi posset non inconsulte videri, quod ex quo matrimonium inter legitimas personas per verba de praesenti contrahitur, *illis viventibus in nullo casu posse dissolvi* » complecti etiam casum de ingressu in religionem, ut patet ex adversativa formula qua usus est Pontifex: « Nos tamen nolentes a praedecessorum nostrorum vestigiis declinare etc. » Adeoque nimis probaret, si presse sumeretur, et quemadmodum casum excepit ingressus in religionem, sic si opus fuisset et de quaestione nostra fuisset locutus, potuisset excipere dispensationem quae a Pontifice obtineretur. Ergo inaniter urgetur auctoritas huius Pontificis, quasi senserit haud posse supremum ecclesiae caput dispensare.

Multo vero minus alterum Innocentii III. rescriptum, quod urgent hi theologi, rem conficit. Sic enim habet Innocentius in cap. *Super eo*, quod in medium proferunt: « Super eo quod interrogasti de sacramento coniugii, breviter respondeo: illam quam dixisti, a patre coniugi tra-

ditam, et ab eo cui tradita fuerat, patri commendatam; donec statuta die in domum suam ille traduceret: dico quod legitimo consensu interveniente, ex eo statim coniux fuerit, quod spontanea voluntate sese coniugem esse consenserit, non enim futurum promittebatur, sed praesens confirmabatur. Quapropter quidquid cum alia postmodum factum est in coitu sive in generatione prolis, tanto reprehensibilius est secundum, quanto verius primum. Constante enim primo, quanto amplius in Deum committitur, tanto magis culpa augetur. His ergo cognitis, facile erit negotium praesentium latoris tuae discretionis debito fine terminare (137). »

Quid porro decernit in hoc documento Innocentius? Non posse per matrimonium consummatum subsequens dirimi matrimonium ratum, quod nemo negaverit. Iam vero quid hoc commune habet cum quaestione nostra? Nihil prorsus.

Quapropter et Innocentius III. e censu Pontificum aliter sentientium seponendus est. Cum vero soli hi tres perhibeantur doctrinae de potestate pontificia in solvendis coniugiis ratis contrarii, consequitur argumentum hoc omni destitui fundamento.

Dixi: *hos solos perhiberi huic doctrinae contrarios*: nec enim moramur quas aliqui referunt historiolas de Hadriano VI. et Innocentio VIII. Quasi nempe prior miratus fuerit de Caietano, quod in mentem theologi haec venerit sententia, ac tandem improbitati cedens postulantis diremptionem responderit, se dare quod posset, etsi persuasum haberet se nihil posse. Haec enim fabella seipsa confutat; nam ignorare non poterat doctus et pius hic Pontifex a praedecessoribus suis Martino V. et Eugenio IV. aliisque post eos datam eiusmodi dispensationem fuisse; nulla proinde ei ratio suppetebat admirationis, quod Caietanus

eam docuerit sententiam : ut omittam in supposita responsione aut eum egisse contra propriam conscientiam, aut decepisse postulatorem.

Idem dic de Innocentio VIII. de quo refert Pontius ex Panormitani fide, quod cuipiam matrimonii rati dissolutionem petenti, ore rotundo negarit se id posse; cumque ei Glossae auctoritas oblata fuisset, responderit: *Maledictus qui te docuit* (138): siquidem et Innocentius VIII. pontificatum gessit post Martinum V. et Eugenium IV. (139), qui dispensarunt in matrimonio rato. Quis praeterea illico non videat verba, quae ei tribuuntur, indigna plane esse tanto Pontifice? Virum certe theologum dedecet his inniti fabellis ad sua placita firmanda.

Ex hac quam hactenus instituimus analysi argumentorum quibus negantem sententiam theologi propugnant, quisque facile deprehendet eadem magis apparentia esse quam solida. Ex eadem enim constat 1. eiusmodi argumenta fundamento esse destituta, ac procedere ex falsa hypothesis; 2. olere principium sin minus protestanticum, saltem minus orthodoxum et tutum de interpretatione Bibliorum et divinae traditionis privato sensu contrario illi quem rom. Pontifices secuti sunt, quasi isti ab ecclesiae doctrina et a divina revelatione, in sua agendi ratione recesserint. Quod luculenter evincunt quae ex Drouinio attulimus, de quo inquit Collet « *Solide auctor libri de re sacramentaria ait: « Neminem qui vere theologus fuerit, a doctrina ecclesiae exempla talia dimovebunt, tum quod incerta penitus sunt, tum quod disciplina divinitus constituta factis contrariis convelli non possit* (140). »

(138) Lib. IX. cap. 3. n. 15.

(139) Etenim Martinus V. ab an. 1431. clavum ecclesiae tenuit usque ad an. 1447. quo creatus est pontifex Eugenius IV. qui vixit usque ad an. 1455. Innocentius vero VIII. rexit ecclesiam ab an. 1484. ad an. 1497.

(140) Collet op. et loc. cit. n. 451. ubi illud: *incerta penitus sunt*, nempe facta rom. pontificum, qui dedisse perhibentur dispensationem matrimonii rati,

Nos autem *minus considerate* haec tanto viro excidisse dicemus. Alioquin concludere ex iis possemus tot doctos sanctosque Pontifices non fuisse *vere theologos*; item inferre deberemus fidem adiungendam non esse historicis omnibus documentis ex quibus factorum veritas certissime constat, imo et iis quae oculis nostris usurpamus; inferre deberemus eosdem longo seculorum decursu recessisse a *doctrina ecclesiae*; deberemus inferre eos ipsos a *disciplina divinitus constituta*, seu a divina revelatione hac agendi ratione descivisse. Ecquis autem catholicus theologus haec affirmare audeat, ac se iudicem, immo et censorem constituere supremi ecclesiae capituli et magistri? Itaque non *solide*, sed *minus caute* nobis haec dicta esse videntur, et a modestia, quae in dicto hoc auctore fulget, aliena.

Quod vero attinet ad argumenta quibus fulcitur altera sententia, animadverto nil solidi posse opponi, nisi aut negentur facta, quae tamen nullo pacto infirmari, multo vero minus convelli possunt, cum agatur de serie quatuor plus minus seculorum (141), aut evidenter ostendatur eiusmodi facta verbo Dei tum scripto tum tradito adversari, quod defectu documentorum tum biblicorum tum traditionalium, quae contraria sint, effici omnino nequit. Accedit quod si testimonia biblica quae opponuntur ali-

coarctat potissimum ad id quod dicitur de Gregorio XIII. qui referente Henriquez *tredecim* (alii dicunt *undecim*) eodem die dispensationes dedit. Nos non solum incertum, sed plane uti fabulosum factum istud reiicimus. Exinde tamen fas non est cetera facta, quae certissima sunt, ut incerta traducere.

Sed quid dicemus de I. Walter, qui in suo *Manuale del diritto ecclesiastico*. Trad. dal Tedesco di Fortun. Benelli. Pisa 1848. tom. II. §. 319. pag. 250. nota (m) scribit: «Altri casi, nei quali vuolsi, che il Papa abbia dispensato, ciò che nei termini *di un vero matrimonio è impossibile*, si fondano sul fatto del non avere avuto luogo tra i coniugi accoppiamento maritale per causa di avversione; che vuol dire: son tutti casi, nei quali non era intervenuto un vero consenso, ma sì un consenso forzato dalle circostanze.» Verum haec expositio est prorsus absona, atque ad proprium placitum adstruendum excogitata.

(141) Nempe ab an. 1431. ad an. usque 1858. Ut patet ex elencho chronologico quem paulo ante exhibuimus.

quam vim haberent, non modo sententiam hanc impeterent de potestate pontificis dispensandi graves ob causas a vinculo matrimonii rati, sed etiam pari modo impeterent praecedentem dogmaticam thesim de solutione matrimonii rati per solemnem religionis professionem. Atque heic obiter noto pleraque argumenta quae hanc impetunt sententiam, impetere pariter alteram de solutione per solemnem religionis professionem. Scilicet ob easdem pene rationes ob quas haeretici aiunt ecclesiam errare dum docet matrimonium ratum per solemnem religionis professionem dissolvi, isti catholici theologi affirmant Pontifices errasse, dum ob alias causas matrimonium ratum dissolverunt.

Quum vero haec a viro catholico probari non possint, et pontificia auctoritas unus ex fontibus seu locis theologicis sit ad firmandam aliquam doctrinam» posteaquam rom. Pontifices et dictis et factis patefecerunt se posse divina ad id praeditos facultate, urgentibus causis, exposcentibus item bono ac utilitate fidelium, dispensare in matrimonio rato, nemo iam sine temeritatis nota poterit hanc potestatem in dubium revocare, multo vero minus inficiari.

Nec illud silentio praeterire debemus quod summi Pontifices haud caeca ratione, sed consulto sese gesserint in eiusmodi dispensationibus concedendis. Etenim Clemens VIII. voluit ut quaestio haec in congregatione particulari octo S. R. E. cardinalium, quatuor sac. Rotae auditorum, duorumque insignium theologorum expenderetur. Ab eadem porro congregatione suffragium latum est, quo sententia de summi pontificis potestate in dirimendis matrimoniis ratis laudata, probataque est; qua insequentes summi Pontifices constantissime ad hos usque dies usi sunt (142).

(142) Cf. *Thesaurum resolution. sac. congr. Conc.* tom. LV. Romae 1786. in *Causa niciensi seu turritana* pag. 36.

Quod vero attinet ad causas ob quas rom. Pontifices permoveri possint ad eiusmodi dandam dispensationem, nostrum non est iudicium ferre, sed negotium hoc universum prudentiae dimittendum est eorumdem, qui certe ea non utuntur facultate, nisi ea concurrant rerum adiuncta quae eam postulent. Quo spectat votum card. Lancellotti in quo postquam odia coniugum et inimicitias inter consanguineos tamquam legitimam causam concedendae dispensationis recensuisset, haec habet: «Et ideo hanc reprobari posse non credo, maxime ubi iungatur cum disparitate; et ego facta diligentia non inveni aliquem, qui similem causam quoquam modo in hoc proposito reprobet, licet non desint qui aliquas causas reprobaverint (143).»

Post eiusmodi discussionem veluti corollarium sequitur nos absque ulla animi haesitatione huic secundae sententiae calculum nostrum adiicere. Eo vero lubentius in hanc concedimus sententiam quod eam optime convenire videmus cum doctrina quam in praecedenti articulo adstruximus de matrimonii rati dissolutione ob solemnem religionis professionem. Illa quidem de fide est; at certa quoque haec est quae de matrimonio rato aliis de causis auctoritate rom. Pontificis solvendo traditur. Utraque doctrina iisdem pene argumentis probatur iisdemque fere innititur principiis. Quemadmodum vero solutionem matrimonii rati per professionem religiosam derivavimus ex iure divino, ita et dissolubilitatem ob alias causas deducimus ex eodem divino iure. Divinus enim Legislator statuit, ut matrimonia tantum rata religiosa professione solverentur, et ideo suo in terris vicario potestatem largitus est, eadem matrimonia aliis quoque de causis dirimendi; utrumque autem ecclesia Christi voluntatis interpres nobis manifestat, licet diversa ratione; nempe primum per de-

(143) *In causa hispal. dissolut. matrim.* apud Ursaya *Discept. eccles.* tom. III. par. II. discept. XXI. Ibid.

finitionem, alterum per praxim suam. Quamvis vero matrimonium ratum absolute atque ab intrinseco seu natura sua indissolubile sit ac dici debeat, solvi tamen ab extrinseco, seu divina auctoritate potest, prout expositum est.

Sed quae de matrimonii christiani proprietatibus tertio hoc libro nec non quae in totius operis decursu sumpsimus disquirenda, iam satis superque disceptata ac disputata pro nostris, quales eae tandem cumque sint, viribus videntur. Scopulosum profecto pelagus, ac multa syrti periculosum navigavimus. Quare eo nobis laetandum magis, quo felicius ad portum appulsi sumus. At potuimus aliquando pro humanae imbecillitatis conditione, cuius non est omnia cavere, aut aliquo forte illidere, aut a recto navigationis cursu paullulum deerrare. Quid ni? Hominis est posse falli. Verum etsi me errori obnoxium profitear, attamen et una sum, qualis omnis catholicus theologus esse debet, obsequentissimus sanctae romanae ecclesiae discipulus, ac studiosissimus eius observantiae filius. Quare si quid mihi forte inscienti, aut imprudenti inter scribendum de quaestione tam difficili, tamque per tempora exagitata exciderit, quod vel transversum quidem unguem a veritate discedat, iam nunc heic profiteor, me illud tamquam indictum, aut retractatum omnino velle. Unum enim animi nostri desiderium, immo voluptas, semper et fuit et est, ac porro speramus a Dei O. M. bonitate ut ad mortem usque sit *veritatis catholicae triumphus*.



ERRATA CORRIGE

Pag. 261	lin. 12	<i>matrimonio.</i> —	<i>matrimonium</i>
» 362	» 20	Apostolus.—	Apostolo :
» 380	» 6	professore....—	possessore
» 391	» 19	provexit...—	provenit ,
» 448	» 25	evangelici.—	evangelica

Reliqua emendabit eruditus lector

INDEX

LIBER TERTIUS

DE

UNITATE AC DISSOLUBILITATE MATRIMONII CHRISTIANI

STATUS QUÆSTIONIS ET PARTITIO

SECTIO PRIMA

DE MATRIMONII CHRISTIANI UNITATE.....pag. 5

CAP. I.—DE POLYGAMIA SIMULTANEA.

- ART. I. Non solum christiani matrimonii unitati, sed ipsi Matrimonii notioni, spectato etiam solo iure naturae, directe opponitur polyandria et uxorum communio.....» 7
- ART. II. Polygamia simultanea iuri naturae absolute non repugnat, eidem tamen minus conformis est et quadantenus etiam adversatur.....» 23
- ART. III. Polygamia simultanea iure divino positivo ante Evangelium absolute vetita non posse dici videtur, nec proinde necessaria divina dispensatio, ut veterum polygamia a crimine contra ius naturale vel divinum defendatur.....» 34
- ART. IV. Polygamia simultanea in lege Evangelica omnino est abolita, adeo ut christiani Ma-

trimonii proprietas prima ac inviolabilis
sit unitas.....» 50

CAP. II.—DE POLYGAMIA SUCCESSIVA.

ART. I. Ecclesiae doctrina ac disciplina circa biga-
miam, seu secundas nuptias, exponitur
et vindicatur.....» 74

ART. II. Doctrina Ecclesiae ac disciplina circa triga-
miam ulterioresque nuptias successivas
exponitur ac vindicatur.....» 94

SECTIO ALTERA

**DE INDISSOLUBILITATE MATRIMONII CHRIS-
TIANI.....» 113**

**CAP. I.—DE INDISSOLUBILITATE MATRIMONII IUXTA LEGEM
NATURALEM, MOSAICAM ET EVANGELICAM.....» 115**

ART. I. De Matrimonii indissolubilitate spectato iure
naturae.....» ib.

ART. II. De Matrimonii indissolubilitate, spectato
iure divino positivo, ac nominatim in lege
mosaica.....» 132

ART. III. Quaestio expenditur an et quomodo perfe-
cta indissolubilitas, quae ex lege evan-
gelica propria est matrimonii christiani,
deducenda sit e ratione sacramenti.....» 150

**CAP. II.—DE BIBLIORUM DOCTRINA CIRCA CHRISTIANI
MATRIMONII INDISSOLUBILITATEM ETIAM IN CAUSA
ADULTERII.....» 161**

ART. I. De authentia ac genuina lectione textuum
Matth. V. et XIX.....» 162

- ART. II. De quibusdam exegeticis interpretationibus
textuum Matth. V. et XIX.....» 177
- §. I. Nonnullae exegeticae eorum textuum inter-
pretationes historice exponuntur.....» ib.
- §. II. Sententia illorum expenditur qui putant ex-
ceptionem fornicationis factam a Christo
fuisse tantum ad mentem legis mosaicae.» 180
- §. III. Excutitur eorum sententia, qui alterutrum
Matthaei textum intelligunt de matrimoniis
iudaeorum, vel primorum fidelium qui ex
iudaismo ad Christi fidem transierunt...» 183
- §. IV. Expenditur illorum placitum qui vocem *πορ-
νεία* exponunt de fornicatione vel flagitio
ante initum matrimonium patrato.....» 186
- §. V. Sententia illorum excutitur, qui fornicatio-
nis vocem non de adulterio, sed de statu
fornicario et concubinato exponunt.....» 191
- ART. III. Dogmatica Ecclesiae interpretatio doctrinae
biblicae de indissolubilitate Matrimonii
christiani argumentis hermeneuticis scien-
tificè demonstratur.....» 206
- §. I. Indissolubilitas matrimonii christiani etiam
in causa adulterii ex scientifica exegesi
textuum Matth. V. et XIX. deducitur.....» ib.
- §. II. Eadem interpretatio textuum Matthaei de
omnimoda christiani matrimonii indisso-
lubilitate ex Marci X. et Luc. XVI. stabi-
litur.....» 219
- §. III. Eadem textuum Matthaei interpretatio de
perpetua coniugii christiani indissolubili-
tate ex Apostolo Rom. VII. et I. Cor. VII.
confirmatur.....» 228

CAP. III. — DE SENSU TRADITIONALI CIRCA INDISSOLUBILITATEM MATRIMONII CHRISTIANI IN CAUSA ADULTERII IUXTA EVANGELICAM ET APOSTOLICAM DOCTRINAM.....»		240
ART. I. De sensu traditionali circa indissolubilitatem christiani matrimonii in causa adulterii prioribus quinque ecclesiae seculis.....»		
§. I.	De Herma.....»	ib.
§. II.	De s. Iustino M.....»	248
§. III.	De Athenagora.....»	252
§. IV.	De Tertulliano.....»	243
§. V.	De Clemente alexandrino.....»	263
§. VI.	De Origene.....»	266
§. VII.	De s. Cypriano.....»	274
§. VIII.	De Lactantio.....»	275
§. IX.	De concilio illiberitano.....»	279
§. X.	De concilio arelatensi.....»	285
§. XI.	De s. Basilio.....»	287
§. XII.	De s. Gregorio nazianzeno.....»	296
§. XIII.	De s. Ambrosio.....»	299
§. XIV.	De s. Epiphanio.....»	304
§. XV.	De s. Ioanne Chrysostomo.....»	310
§. XVI.	De Theodoreto.....»	316
§. XVII.	De Asterio Amaseno.....»	321
§. XVIII.	De s. Hilario pictaviensi.....»	322
§. XIX.	De Chromatio aquileiensi.....»	324
§. XX.	De s. Hieronymo.....»	326
§. XXI.	De s. Augustino.....»	330
§. XXII.	De s. Innocentio I.....»	336
§. XXIII.	De concilio milevitano II.....»	340
§. XXIV.	Documentorum e primis quinque ecclesiae seculis de indissolubilitate coniugii	

in causa adulterii, et difficultatum quae
opponuntur epicrisis.....» 344

ART. II. De sensu traditionali circa indissolubilitatem
christiani matrimonii in causa adulterii
a seculo VI. et deniceps.....» 350

§. I. De documentis certis pro indissolubilitate
vinculi coniugalis a saeculo VI. et deinceps
.....» 351

§. II. De documentis dubiis circa indissolubilitatem
vinculi coniugalis a sec. V. VI. et
deinceps.....» 357

§. III. Documentorum medii Aevi circa indissolu-
bilitatem coniugii in casu adulterii, et dif-
ficultatum quae contra eam opponuntur epi-
crisis.....» 384

CAP. IV.—DE GRECORUM PRAXI DEQUE CANONE TRIDENTINO
CIRCA INDISSOLUBILITATEM CHRISTIANI MATRIMONII
IN CAUSA ADULTERII.

ART. I. De natura et origine erroneae praexeos grae-
corum dissolvendi ob adulterium coniugii,
deque ecclesiae romanae hac in re erga
graecos oeconomia.....» 389

ART. II. De natura et vi canonis VII. sess. XXIV.
concilii tridentini..... 407

CAP. V.—DE SOLUTIONE IMPERFECTA MATRIMONII CHRISTIANI
SEU DE SEPARATIONE INTER CONIUGES
QUOAD TORUM ET COHABITATIONEM.

ART. I. Concilii tridentini doctrina de separatione
quoad torum et cohabitationem plures ob
causas, manente vinculo, exponitur et
vindicitur.....» 420

- ART. II. Doctrina concilii tridentini de separatione quoad torum et cohabitationem ob plures causas, manente vinculo, ab adversariorum difficultatibus vindicatur.....» 430
- §. I. Doctrina canonis VIII. concilii tridentini a nota *novitatis* vindicatur.....» ib.
- §. II. Eadem doctrina vindicatur ab altera nota *oppositionis* cum evangelica et apostolica doctrina.....» 436
- §. III. Doctrina de divortio quoad torum et cohabitationem, manente vinculo, a tertia nota *immoralitatis* vindicatur.....» 445
- CAP. VI. — DE DISSOLUTIONE MATRIMONII RATI,
NON CONSUMMATI.....» 460
- ART. I. De veritate doctrinae catholicae circa dissolutionem vinculi coniugalis per solemnem religionis professionem alterius coniugum.» 464
- ART. II. De iure quo matrimonium fidelium ratum et non consummatum per solemnem religionis professionem quoad vinculum dissolvatur.....» 472
- §. I. De illorum theologorum sententia qui dissolutionem coniugii rati ex iure naturali repetunt.....» ib.
- §. II. De illorum theologorum placito qui constituunt dissolvi matrimonium ratum iure tantum ecclesiastico.....» 477
- §. III. De illorum theologorum sententia qui solutionem vinculi matrimonii rati ob professionem religiosam repetunt a iure divino.....» 481
- ART. III. De difficultatibus quibus asserta a tridentina synodo catholica veritas impugnatur.» 487

INDEX.

- ART. IV. De romani pontificis auctoritate circa solutionem coniugii rati alias ob causas praeter solemnem religionis professionem...» 502
- §. I. Argumenta quibus utriusque sententiae negantis et affirmantis patroni utuntur....» ib.
- §. II. Utriusque sententiae argumentorum discussio et conclusio» 512



NIHIL OBSTAT

IOS. KLEUTGEN S. I. THEOL. DEPUT.

IMPRIMATUR

FR. DOMINICUS BUTTAONI O. P. S. P. A. MAGISTER

IMPRIMATUR

FR. A. LIGI BUSSI ARCHIEP. ICONIEN. VICESGERENS.

